

مجموعۂ زہد

11961

دار المعلمین

M.Ü.İlahiyat Fakültesi Kütüphanesi
Fen Edebiyat Koleksiyonu



* F 0 2 8 5 4 *

المحمد وعبدالرشيد في الحكماء والدينية

جزء اول

عبادات بدنيه وماليه دأر مسائل حاويدر

اثر

السيد احمد زهدى



فتواخانه نك نظر تدقيقندن كچورلد كد نصكره معارف نظارت نك
رخصتنامه رسميسيله طبع اولنش وهر حقى صاحب اثره
عائد بولنشدر

در سعادت

(مطبعة عثمانيه)

۱۳۱۱



تعظیبات و تسلیمات کافیہ انجم تابان ہدایت اولان آل واصحاب
کرامت مآب حضراتہ الیقدرکہ جہاد اکبر واصغر دہ اہتمام
نامدن صکرہ اجتہاد اصول وفروع اسلامیہ یبذل مساعیء مالا کلام
وتحریرک اقدام اقدام ایلہ اعلام شریعت غرابی اعلا واحکام
ایتملدر . رضوان اللہ تعالیٰ علیہم اجمعین .

رونق بخش اریکۃ معالی پیرایۃ سلطنت . شرف افزای مقام عظمت
اتسام خلافت . حامی اعظم دین ودولت . ظل ظلیل رب عزت .
وکیل نبی صاحب شریعت . ولی نعمت بی منتمز شہریار
مکارم خصات . شہنشاہ عادل . بی معادل و بی مدانی . غازی سلطان
﴿بالحمد﴾ خان ثانی . خلد اللہ سلطنتہ و خلافتہ الی آخر الدوران .

افندمن حضرتلرینک مغبوط اعصار وازمان اولان عصر عالیء
ملوکانہ لرندہ انوارانواع فون ومعرفت آنآ فآ نآ ابارۃ دائرۃ ترقی
ووسعت ایتمکدہ اولدینی گی ذات قدسیۃ صفات خلافتناہیلرینک
من عند اللہ متصف و مجبول بیورلدقلری کمال تقوای دیانت احتوای
ملوکانہ لری اقتضای عالیسنجہ ممالک محروسۃ شاہانہ لرینک ہر جہتندہ
علوم دینیہ نک دخی تمام انتشار و تعمی باخلاصہ مطلوب معالی مصحوب
شہنشاہیلری اولہرق بویولده صرف اولہ جق مساعیء خالصانہ نک
افکار کرامت آثار تاجدار یلرینہ ال موافق اولہ جق خصوصاتدن
اولدینی امر مسلم بولنسنہ واحکام منیفۃ فقہیہ واسطۃ بلاغ دین مبین
اولان لسان بدیع الیمان عربدہ انواع صور مکملہ دہ مضبوط
ومدوّن اولوب بلاد عثمانیہ دہ بیتشان علمای اعلامک ﴿نور اللہ
تعالیٰ مضاجعہم﴾ ہمہ برگزیدہ لریلہ بونلردن ترجمہ صورتیلہ

المجموعة الزهدية

في الاحكام الدينية

بِسْمِ اللَّهِ الرَّحْمَنِ الرَّحِيمِ

حمد و ثناء لایحصا ذات اجل واعلاسی اشباہ و نظایردن منزہ
اولان ربمیز واجب الوجود مطلق ومعبود بالحق حضرتلرینہ
مخصوصدرکہ زبدۃ الحقایق اولان نوع انسانی جوہرۃ نیرۃ عقل
ایلہ ممتاز واکتجال علم و عمل ایلہ تنویر ابصار ایدنلری بدایہ
ونہایہ دہ کثر لایفزی عنایات ونجلیات ربانیہ سندن انتشار ایدن درر
غیر سعادتہ سرافراز بیورمشدر . جلّ جلالہ وعم نوالہ .
صلوات وتحمیات زاکیہ حبیب محترم خدای متعال ومحرم حر مسرای
ازل ولا یزال اولان پیغمبر شفاعت پرورمن محمد المصطفی
حضرتلرینہ احرادرکہ جانب جلیل جناب اقدسدن عباد اللہ مبالغ
دین مبین وبرنہج مختار ردّ مختار ایلہ وقایہ و ہدایہ منزہ کافی
واضع شرع متین اولمشدر . صلی اللہ تعالیٰ علیہ وسلم .

ترجحه ده دخي پك چوق مؤلفات و آثار زينت سازي ادي اعتبار اولمش ايسه ده اشبو مؤلفات تركيه نك بر قسمي عسير الضبط اوله جق قدر مطول و قسم ديگر يده بيلنمسي لازم كلان مسائلي احاطه ايدمه جك مرتبه مختصر اولمقله برابر تركه من لسان و مكان اعتباريله تحولات گونا گونه اوغرايه رق برايكي عصر اول يازلمش اثر لر شمدى حسن تفهمه خلل ويره جك كلمات و تعبيرات متروك دن خالى گورنما سنه مبنى فقه شريفدن كمسه نك و قوفندن مستغنى اوله ميه جنى احكامى يعنى امر دينه تعلق ايدن عبادات و امر دنيايه عائد معاملاتدن بعض اقسامى حاوى و مطالعه ايدم جك اخوان دينك سهولتله استفاده لرينه خدمت ايدم جك يولده عبارته جه ممكن اولديغى قدر تكلفدن و افاده جه تطويل و تعقيد دن عارى اولمق اوزره كتب موجوده فقهيه دن اخذ و التقاط ايله بر اثر تدوينى آرزوى خالصانه سيله مستعينا بتوفيقه الكريم وضع خامه عجز جامه ميه مبادرت و حصوله كلان اشبو رساله يي **المجموعه الزهديه** . فى الاحكام الدينية **اسميلة** توسيمه مئارت ايلدم .

مطالعه سندن معلوم اوله جنى و جهله قدورى و درر مختار و درر و ملتقى و حابى و بونلرك شروح و حواشيسى و امثالى كتب معتبره اساس اتخاذا و انه رق علم فقهك مفتى به . صحيح . اصح . احوط . اظهر . شبه . اولان مسائلندن جمع و ترتيب ايديلوب متعلق اولدقلى مباحث اعتباريله متعدد كتابه و بونلرده بر خيلى ابوابه تقسيم ايله ايجابنه گوره آيات بينات و احاديث هدايت غايات . مقام استدلالده زيور سطور تسطير و بعض مسائلده ايضاحى مقتضى علل موجبته على وجه الاختصار ايراد و تزبير و مسائل مضبوطه نك كمال صحى امرنده بر گونه تردده محل قالماسق و مطالعه ايدن اخوان دين آرزو

ايتدكلى صورته امهات كتبه مراجعتله توسيع دائره علم و يقين ايتك ايجون ماخذ اصليله يگان يگان ارايه و تحرير اولمش و نه قدر ساده يازلسه اصطلاحات شرعيه ايله بعض لغات . مطلقا توضيحه محتاج اولدقلى رندن آنلر كده مشتمل اولدقلى معانى . ذيل صحايفده بيان قانمشدر .

من يرد الله به خيرا يفقهه في الدين حديث شريفنك متضمن اولديغى خير جزيله مظهر اولان ذوات فخرامك مؤلفات جليله لرندن الك الزم اولان اقسام مهمه سنى صره سيله على طريق الايجاز جمع و نشره دلالت . اجرينه نائيلتى اخص آمال اتخاذايله تشبث ايلديكم اشبو امر جسيم . استطاعت كلييه موقوف و بوابده هر جهته بضاعه سزلكم معلوم و معروف ايسه ده خلوص نيته مقرون و معطوف بولنان اعمال و مساعيده مددرس كافى و وافي اولان توفيق جناب رب كريمه استنادم سبيله بعونه تعالى پذيراي حسن ختام اوله رق موقع انتشاره وضع اولنان و عبادات بدنيه و ماليه ميه عائد احكامى مشتمل بولنان اشبو جزؤ اول مثلو بعض معاملاتدن باحث اولان جزؤ نائينك دخي حسن ايكالنه موفقيتمى حضرت موفق الامور اولان خداى متعال حضرت تالرينك الطاف و عنايات جليله آلهيه سندن استدعا و استرحام ايلرم .

محتويات مجموعه بروجه معروض كاملا كتب معتبره فقهيه دن مأخوذ و منقول اولديغندن اساس مسائلجه بر گونه ياكشلىق وقوع بولماسنه اعتنا ايدلمش ايسه ده قلت استطاعه و سرمايه دن ناشى افاده و عبارته جه بر طاقم نقايص اكسك اوليه جغندن بونلرك عفوئى اماله نظر ايدم جك ارباب عرفان و كمالدن خاصه تمنى ايدرم .

شواثر خیرده بوعبد عاجزه الك برنجی سائق ومشوق . ولی نعمت
بی منت اعظمز ولی نعمت عالم افندمن حضر تلرینک افکار مکارم
آثار شهنشاهیارینه موافق خدمت . امرجیلی اولغله بودولت
معظمه عثمانیه نک باعث سعادت حال واستقبالی وعامه رعایاوبرایانک
کافل رفاهیت بالی اولان ذات شوکت سمات خلافتناهیارینک کمال
صحت وعافیتله مادام النهار واللیل شرف پیرای اریکه مهابت
واجلال اولملری دعای واجب الاداسنی که - لسان ووجدان
صدق بیان مملوکانه مک ورد فاخر دائمسیدر - بوراده دخی کمال
تعظیم وتوقیر ایله تکرار علی التکرار زیور زبان تذکار ایلرم .

السید احمد زهدی
ابن السید الحاج محمد رفعت
غفر الله ذنوبهما



مقدمه

هر علمک طالبنه بیانمسی موجب بصیرت اولان مبادی اوندر *
بونلرده او علمک اسمی . تعریفی . موضوعی . مأخذی . غایتی .
واضعی . مسائلی . حکمی . شرف وفضیلتی . نسبتی در .
شو حالده بیانی صد دنده بولندیغمز علمک اسمی فقه اولوب
تعریف وسائر مبادیسی بوجه آتی ذکر اولنور شویله که : فقه
لغته باب رابعدن مطلقا بر شیئی بیلوب فهم ایتک دیمک اولوب
بعده باب خامسدن شریعت مطهره به علم ومعرفت حاصل ایله مک
معناسنده استعمال اولنش وعند الاصولیین ادله تفصیلیه دن
مکتسب اوله رق احکام شرعیه فرعیه به متعلق علمه اصطلاح
اولمشدر * بوکا نظراً عند الاصولیین فقیه . لفظنک مجتهد اطلاق
حقیقت ومسائلی حفظ ایدن مقلده اطلاق مجاز وعند الفقهاء
اطلاق ثانی حقیقتدر . فقه . فقها نزدنده احکام شرعیه فرعیه بی
گرك دلائلیه گرك بلا ادله حفظ ایتک معناسنه اولوب لا اقل اوج
حکم شرعی فرعی بی حفظ ایدنه فقیه اطلاق اولنور * ارباب حقیقه
گوره علم ایله عمل بیننی جمعدن عبارت اولدیغدن انلرک عندنده فقیه .
دنیا دن معرض وآخرته راغب وکندی عیوبنی بصیر وعبادته

مداوم اولاندر . فقهك موضوعی یعنی كندوده اعراض ذاتیه سندن
 بحث اولنان شی . ثبوتاً و یا سلباً عبد مكلفك فعلیدر كه بوده ایکی
 قسم اولوب بری واجب و حرام گئی كندیسیله تكلیف و الزام
 ثابت اولان فعلدر * دیگری مباح و مندوب گئی كندوسیله تكلیف
 ثابت اولیان فعلدر . بنابرین مكلفك غیرینك فعلی علم فقهك
 موضوعندن اولمدی . اما صبی و مجنون و بهائمك اتلاف ایتدكاری
 شیلرك تضمینیه اولان تكلیف آنلرك فعللرینه عائد اولیوب بلكه
 ولیلرله صاحبلرینه راجع اولدیغندن بومثلاو مسائل فقهیه دن
 بحث دخی افعال مكلفیندن بحث دیمك اولمغله علم فقهه داخل اولمش
 اولور . فقهك مأخذی كتاب و سنت و اجماع امت و قیاسدر .
 كتابدن مقصد قرآن عظیم الشان . و سندن رسول اكرم و نبی
 محترم صلی الله تعالی علیه و سلم افدمز حضرتلرینك اقوال و افعال
 شریفه و تقریرات منیفه حكمت بیانلریدر * اصحاب گزین
 ﴿ رضوان الله تعالی علیهم اجمعین ﴾ حضرتلك اقوال فصاحت
 اشماللری سنت سنیه یه تابعدر . اصحاب كرام گئی مسائل دینیه ده
 اجتهاد و اتفاقلرینه اعتماد اولنان ذوات فخامك اتحاد و اجماعلرینه
 اجماع امت و كتاب و سنت و اجماعدن اخذ و استخراج اولنان
 احكام دینیه یه غیر برشیئ قیاس ایتمكه ﴿ قیاس فقها ﴾ دینلمشدر *
 برشیئ قیاسده مقیس علیهمه موجود اولان علتك مقیسده دخی
 موجودتی معتبردر * كتابدن اولان قیاسه اهل اصولك دلالت نص
 بحثده ایراد ایتمش اولدقلری آیت کریمه مثال اوله بیلور كه استعید
 بالله ﴿ وَلَا تَقْلُ لَهَا أَفٍ ﴾ ﴿ نَظْمُ جَلِيلِ أَبُوبِیْنَه قَارِشُو ﴾ ﴿ أَفِ ﴾
 دیوار خجرت اظهارندن بزی نهی ایتمكه اولدیغی حالده ضرب و شتم

گئی ایذا آندن اولویته منع و تحریم ایلیمكه اولمغله ضرب و شتمك
 حرمتی نص آیتده اولان حرمت تضجره قیاساً ثابت اولمشدر .
 سندن اولان قیاس مثلاً نخودك بر اولچكئی ایکی اولچكه بیعك
 حرمتی ﴿ الْحِنْطَةُ بِالْحِنْطَةِ مِثْلًا بِمِثْلِ يَدَا بَيْدٍ وَالْفَضْلُ رِبًا ﴾
 حدیث شریفی ایله حرمتی ثابت اولان برصاع بغدادیه ایکی صاع
 بغدادی بیعك حرمتیه قیاس گیدر * اجماعاً اولان قیاس . فقها
 حضرتلك حرمت مصاهره ده و طیء حرامی و طیء حلاله یعنی
 بر كسه زنا ایتدیكی مرأهك اناسنی نكاح ایتمك حرمتی استفراش
 ایلدیكی جاریه سنك اناسنی نكاحك حرمتیه قیاسلری گیدر . شو
 مسئلهده مقیس علیهمه کی حرمت . اجماعله ثابتدر . زیرا بوبابده
 مخصوصاً نص اولیوب انحق نص شریف . امهات نساء حقنده در .
 مقیس علیه ایله مقیسده وجودی معتبر اولان علت . امثله ثلثه
 محررهك هر برنده موجوددر .

علم فقهك علت غائییه سی سعادت دارینه نائل اولمقدر چونكه بونك
 اهلی دنیاده عزیز و محترم و دار عقباده متمم انواع نعم اولور .
 علم فقهك واضعی امام اعظم حضرتلریدر . فقهك مسائلی . موضوعی
 فعل مكلف و محمولی و جوب و ندب و اباحه و حرمت و كراهتدن
 عبارت بولنان احكام خمسة شرعیه دن ﴿ هَذَا الْفِعْلُ وَاجِبٌ ﴾
 او حرام او مندوب او مباح او مكروه ﴿ گئی جمله لك بریدر .
 فقهك حكم شرعیسی مثلاً طهارت و صلات و صوم و شروطنك
 حصولیه تحقق و جوبی حالنده زكات و حج . مثللو عباداته دائر
 اولان احكامی اجمالاً اولسون تعلم و تدریس ایله مك مسلمینه فرض

عین و نکاح و رضاع و طلاق و بیع و شرا و عتاق و امثالی معاملات
عائد مسائل ممکن مرتبه او اگر تمک فرض کفایه اولمیدر .

فقهک شرف و فضیلتی . کلام و تفسیر و حدیث و اصول فقهک دن
ماعداد کافیه علومک افضلی و احادیث نبویه نک ثمره و محصولی
بولنمیدر . زیرا احادیث شریفه نک هربری اوامر و نواهی بی
مشمولدر . بنابرین امام اعظم رضی الله عنه حضرت تلمیذی فقهی

﴿مَعْرِفَةُ النَّفْسِ مَالِهَا وَمَا عَلَيْهَا﴾ یعنی انسان کندی نفع
و ضرری بیلمک ایله تعریف بیورمشلردر که بوده فقهک عین
اوامر و نواهی دن عبارت اولدیغی بیان دیمک اولور ﴿مَنْ

يُرِدُ اللَّهَ بِهِ خَيْرًا يُفْقَهُهُ فِي الدِّينِ﴾ و ﴿مَنْ نَفَقَ فِي دِينِ اللَّهِ
كَفَاهُ اللَّهُ هَمَّهُ وَرَزَقَهُ مِنْ حَيْثُ لَا يَحْتَسِبُ﴾ و ﴿مَا عِنْدَ اللَّهِ
تَعَالَى أَفْضَلُ تَمَنٍّ فَقَّهَ فِي الدِّينِ﴾ و ﴿الْفَقِيهُ الْوَاحِدُ أَشَدُّ عَلَى

الشَّيْطَانِ مِنَ الْآلِفِ عَابِدٍ﴾ و ﴿لِكُلِّ شَيْءٍ عِمَادٌ وَعِمَادُ الدِّينِ
الْفَقَّهُ﴾ و ﴿أَفْضَلُ الْعِبَادَةِ الْفَقَّهُ﴾ و امثالی احادیث شریفه

و دهانجه آثار منیفه ایله علم فقهک قدر و مزیت علویه و فائده و اهمیت
مادیه و معنویه سی مثبت بولنمغله بومقامده ده از یاده تفصیلات
اعطاسنه حاجت گوریلهمامشدر .

فقهک صلاح ظاهره نسبتی . عقائد و تصوفک صلاح باطنه نسبتی
قیلندندر .

مذهب حنفیه متعلق احکام دینیّه عبدالله بن مسعود حضرت تلمیذینه
متصل اولان طریق ایله استنباط اولنمشدر که مذهبک امام

اعظمی اولان ابوحنیفه نعمان بن ثابت حماد دن و حماد ابراهیم
نخعی دن و بوده عاتقه دن و علقمه عبدالله بن مسعود دن و عبدالله بن
مسعود دخی ﴿رضوان الله تعالی علیهم اجمعین﴾ رسول اکرم صلی الله
تعالی علیه وسلم اقدمز حضرت تلمیذدن اخذ و تلقی ایلمشلردر . امام
ابی یوسف و امام محمد و امام زفر بن هذیل و امام حسن بن زیاد
﴿رحمهم الله﴾ جناب امامک تلامیذیدرلر . بوصورتده احکام
شرعیه بی ائمه مشار الیه درجه عالیّه اجتهاد و استنباطه ایصال
و اضعاده خارق العاده صورتده بذل و قدرت و عنایت بیورمشلر
و ائمه مذاهب ثلثه دخی کندی طریق تلمیذی اوزره باب استخراجده
یک جوق هم تلمیذ گوسترمشلردر .

ائمه حنفیه دن امام محمد حضرت تلمیذی علوم دینیّه ده بیک قدر کتاب
تألیف ایتشددر . مشار الیه . تلامیذندن بولنان امام شافعیک
﴿رحمه الله تعالی﴾ والده سنی تزوج ایلمش بولندقلرندن حین
و فاتلمرنده مؤلفات و سائر متروکاتی کندوسنه انتقال ایدرک حقایق
و دقائق احکام شرعیّه جه امام شافعی حضرت تلمیذی تزید و قوف
و معلومات ایلمشلر و حتی «قسم ایدرمکه فروع فقهیه ده بنم
وقوف و اطلاع امام محمدک کتابلرینی تدقیق و مطالعه ایلله مزداد
اولدی . بناء علیه علم فقهی کسب و تحصیل ایتک استیان ابوحنیفه نک
اصحابنه ملازمت و مصاحبت ایتسون» دیمشلردر . امام شافعی
«ناسک کایسی امام اعظمک عیالیدر» بیوردی یعنی امام اعظم
حضرت تلمیذی عباد الالهک امور دینیّه لرنده محتاج اولدقاری مسائل
و احکامک اجتهاد و استنباطنی کشی کندی عیالک نفقه سنی التزام
ایتدیکی گبی تکفل و تعهد ایلدی دیمکدر . امام اعظم حضرت تلمیذی

هر صبح نمازینی مسجدده ادا دن صکره وقت ظهره قدر طالیینه
مذاکره ونشر علمله و صلات ظهری بعد الایفا وقت عصره
و آدن صکره اخشامه و بعده یانسویه دگین تدر یسله اختیار
مشغولیت ایدوب صلات عشادن صکره سعادت خانهرینی بالتشریف
براز مکث واقامت . بعده ینته مسجدده خروج وعزیمت وطلوع
فجره دک متوغل صلات وعبادت اولدقلری و بعد اداء الفجر . ینته
درسه مباشرت بیوردقلری سالف صالحیندن مسعر بن کدام
وسائر ذوات عظامدن مرویدر . مومی الیه مسعر حضر تلی

حَسْبِي مِنَ الْخَيْرَاتِ مَا عَدَدْتَهُ

يَوْمَ الْقِيَمَةِ فِي رِضَا الرَّحْمَنِ

دِينُ النَّبِيِّ مُحَمَّدٍ خَيْرُ الْوَرَى

ثُمَّ اعْتَقَادِي مَذْهَبَ النُّعْمَانِ

نظمی انشاد ایلمشدر . بعضلری نظم مذکورک ناظمی امام ابی
یوسف حضرتاری اولدیغنی روایت ایتمشدر .

مشار الیه امام اعظم وهام افخم حضرتلرینک قرق سنه
یانسو نمازینک آبدستبله صلات فجر ی ادا والی بش دفعه زیارت
بیت معلا و صوگ حجده کعبه دن بالاستیدان لیلاییت معظمه
دخول ایله ایکی رکعت نمازده بر ختم شریف اجرا ایلدکاری
و بعد السلام بکا و ﴿ اَللّٰهُمَّ مَا عَبْدُكَ هَذَا الْعَبْدُ الضَّعِيفُ حَقَّ
عِبَادَتِكَ لَكِنْ عَرَفْتُكَ حَقَّ مَعْرِفَتِكَ فَهَبْ نَقْصَانَ خِدْمَتِهِ لَكَ اَل

مَعْرِفَتِهِ ﴿ ديه رك مناجات ودعا ايلدكده هاتفدن ﴿ يَا اَبَا
حَنِيفَةَ قَدْ عَرَفْتَنَا حَقَّ الْمَعْرِفَةِ وَخَدَمْتَنَا فَاحْسَنْتَ الْخِدْمَةَ قَدْ
غَفَرْنَاكَ وَلَمِنْ اَتَّبَعَكَ تَمَنَّ كَانْ عَلَى مَذْهَبِكَ اِلَى يَوْمِ الْقِيَمَةِ ﴿
نداسی ظهور ایتمش اولدیغنی ومدت عمر سامیارنده یتمش بیک
کره ختم قرآن کریمه موفق اولدقلری عندالرواة متواتر و محققدره
حبیب کبریا علیه اکمل التحایا افندمن حضر تلی امام مشار الیه
حقنده ﴿ آدم ویا جمیع انبیای کرام علیهم الصلاة والسلام بنمله
افتخار ایلدکاری گبی بنده امتمدن کنیه سی ابو حنیفه واسمی
نعمان بر رجل ایله افتخار ایدرمکه اول ذات : امتمک سراجی
حکمنده اولوب انلری ظلمت جهل وضالندن طریق استقامت
وهدایت اید جکدر ﴿ بیورمشلردر .

مشار الیهک بعض اصحاب عظام حضراتندن حدیث شریف
روایتنده اتفاق عالما واردر . زیرا کندولری سکسان تار یخنده
دنیا یی تشریفلرنده یگر می قدر صحابی حضراتی موجود ایدی .
سن سنیهلری یتمشه بالغ اولدیغنی حالدده بغدادده یوز الی سنه
هجریه سننده سجن دنیا یی ترکله عازم سرا ی عقبای اولدیلر .
﴿ تَرْفَعُ زِينَةُ الدُّنْيَا سَنَةَ حَمْسِينَ وَمِائَةٍ ﴾ حدیث شریفی امام
مشار الیهک عظم شأنه دلیل اولدیغنی علامه ابن حجر المکی
﴿ الْخَيْرَاتُ الْحَسَنَاتُ فِي تَرْجَمَةِ أَبِي حَنِيفَةَ النُّعْمَانِ ﴾ نام کتابنده تحریر
ایتمش و بو حدیث شریف امام مشار الیهک وفاتنه محمول اولدیغنی
شمس الائمة الکردری بیان ایلمشدر . مشار الیه امت محمدیه یی
ظلمت جهل وظنون وشکو کدن انوار علم واجتهاد ایله تخلص

و تنويره موفق بيورلمش وائمه ديني علم و كماله سابق و فائق
 و اصحاب رسول الله مدرک و لاحق اولمشدر . ذكرى آتى دعايه
 صباح و اخشام مداومت : شدايد يوم قيامتدن بلطفه الجليل
 موجب نجات و سلامت اوله جفنى امام مشار اليه حضرت تلى
 تبشير و بيان بيورمشدر - سبحان الابدى الابد . سبحان
 الواحد الاحد . سبحان الفرد الصمد . سبحان رافع السماء بغير
 عمد . سبحان من بسط الارض على ماء جمده . سبحان من خالق
 الخلق فاحصهم عدد . سبحان من قسم الرزق ولم ينس احد .
 سبحان الذى لم يتخذ صاحبة و اولاد . سبحان الذى لم يلد و لم يولد
 و لم يكن له كفوا احد - * حضرت امامك رحلتلى ايانده
 امام شافعى حضرت تلىنك قدمهادة مهدي وجود اولملى قال خير
 عد اولمشدر *

مشاراليه امام اعظم حضرت تلىله تلاميذى بيننده بعض مسائلده
 وقوعبولش اولان اختلاف - اختلاف ائمتي رحمة - حديث
 شريفى دلالتيله آثار و شعار رحمت اولدينى ظاهر و اختلاف هر قدر
 اكثر اولور ايسه رحمت دخی اولدرجه ازيد و او فر اوله جنى امر
 باهر در * امام حضرت تلى كمال احتياط و ورع نندن ناشى كافه اصحابنه
 خطاباً - سرك ايچون بر مسئلهده بنم ديديگمك خلاقه بر دليل
 ظهور ايدرسه آنكله اخذ ايدىكنز - ديو امر بيوروب
 بعده هر بر يسي كنديسنك رواياندن برينى ترجيح صورتيله
 ظاهراً مخالفتده بولنديلر ايسهده كافه سى قسم ايدرك - نه هيچ
 بر مسئلهده امام اعظم حضرت تلىندن مروى اوليان بر قولى

قائل اولملى - ديمشدر * ائمة حنفيهك اختلاف بيوردقلى
 مسائل دينيهده قنغيرينك اقوال صواب ماللريله افتا
 لازم اولديغنده بين العلما عدم اتفاق رونما اولوب فقط
 اصح اقوال اولملى اوزره سراجيه و غيريده بروجه آتى بيان
 اولمشدر شوييله كه : مفتى . مجتهد اولمزشه اولاً على الاطلاق يعنى
 امام مشاراليه كرك يالكر بولنسون كرك ديكرلريله برابر اولسون
 انك قوليله افتا ايدره ثانياً امام ثانى - كه ابو يوسفدر - ثالثاً امام
 محمد . رابعاً امام زفر و حسن ابن زياد حضرتانك اقواليله فتوى
 ويرر * و بر مسئلهده امام اعظم بر طرفده و امام ابى يوسف
 و امام محمد ديكر جانبده بولنسه لر مفتى . افتاده مخير بولوب
 طرفندن هانگيسنك قوليله افتا ايدرايسه جائز اولور دينلدى .
 و امام زفر و امام حسن درجه واحدهده اعتبار ايدلدى . بعضلى
 طرفندن مفتى . مجتهد اولورسه ائمة مشار اليهم اقوالندن احدها
 آخره نسبتله دليلى دهاقوى اولان قولك اختيار و ترجيحى لزومى
 گوسترلدى . بر مسئلهده ايكي قول مصحح بولنسه و احدهما
 لفظ تصحيح ديكرندن آكد اولمزشه قولين مذكورينك بريسيه
 قضا و افتا جائز اوله جفنى بحر رائق ايله ديكر بعض كتب فقهيهده
 تصريح و تسجيل اولمشدر . افتانك علامائى فقهانك اكثراً و به
 يفتى . و عليه الفتوى . و به نأخذ . و عليه الاعتماد . و عليه
 عمل اليوم . و عليه عمل الامة . و هو الصحيح . و هو الاصح .
 و اظهر . و اشبه . و اوجه و مختار . و به جرى العرف . و هو
 المتعارف . و به اخذ علماؤنا - و امثالى الفاظ اولدينى مضمرات

نام کتابك اوائلنده ذكر وتفصيل قلمشدر . علامت افتا الفاظك
 بعضی بعض آخرندن آكد واقوی اولدیغندن بر مسئله ده اقوی
 اولان علامتله معنون بولسان قولك اقوال سائر ده تقدیمی اولی
 اولدیغی مثلاً ﴿فتوی . صحیح . اصح . شبه . اوجه . احوط .
 اظهر . مختار ﴾ مانندی الفاظدن ﴿وبه یفتی ﴾ لفظی ﴿وعلیه
 الفتوی ﴾ دن و ﴿اصح ﴾ لفظی ﴿صحیح ﴾ و ﴿احوط ﴾ تعبیری
 ﴿احتیاط ﴾ مثللو کلماتدن واشباهی دخی صره سیله بر بردن آكد
 واقوی بولندیغی شیخ ﴿خیرالدین رملی ﴾ نك فتاوا سنده بیان اولمش
 وارباب ترجیحندن ایکی امام صاحب مقام بیننده بر مسئله ده تعارض
 واختلاف واقع اولوبده بریسی قولنی ﴿هو الصحیح ﴾ و دیگری
 ﴿هو الاصح ﴾ عنوانیه تقید وتذیل ایلسه صحیح اولمسنده
 ایکیسنگده اتفاقلری حاصل واصحیتنه انحق برینك قائل اولمش
 بولمسندن ناشی قول صحیحی اخذ ایله آنکله عمل اولی اولدیغی
 و ﴿وجیه . اوجه . احتیاط . احوط ﴾ تعبیرلری دخی بوقیلدن
 ایدوگی حاجی کیر ده محرر بولمشدر . بوضورتده ﴿اصح ﴾
 و ﴿صحیح ﴾ لفظلرینك ترجیحندن ایکی قول بولمش اولور .
 فقهایدی مراتب مشهوره اوزره اولوب کمال پاشا زاده نك وقف
 النیات نام رساله سنده مراتب مذکوره شو وجهله بیان اولمشدر .
 طبقه اولی . مجتهد فی الشرع . که ادله اربعه دن قواعد اصولیه بی
 تأسیس وترصین واحکام فروغیه بی استنباط وتعیین ایدن ائمه
 مذاهب . اربعه وامثالیدر . طبقه ثانیه . مجتهدین فی المذهب . که امام
 اعظم حضر تلرینك ﴿رضی الله عنه ﴾ قواعد مؤسسه سی اوزره
 ادله دن احکام . استخراج ایدن امام ابی یوسف وامام محمد وسائر
 اصحابیدر . ثالثاً . مجتهدین فی المسائل . که صاحب مذهب دن منصوص

اولیان مسائلده انك اصول وقواعدی مقتضای اوزره احکام
 استنباط ایدوب اصولاً وفروعاً اصلاً مخالفته قادر اولیان
 ذوات کرامدر . بونلر امام طحاوی وخصاف و کرخی وحلوانی
 وسرخسی وفخر الاسلام وقاضیخان وامثالیدر . رابعاً . طبقه
 اصحاب تخریج . که اصلاً اجتهدده مقتدر اولیوب بلکه اصولی علی
 وجه الاتقان ضبط واحاطه ایله امام اعظم واصحابی حضر تلرینك
 اقوال اجتهد اشتغاللرندن ایکی وجهله محتمل اولان قول مجملی
 وحکم مبهمی مشار الیهك اصول رصینه سنه نظر وفروعدن
 امثال ونظائرینه مقایسه ایله تفصیل وایضاحه مقتدر وموفق اولنلر
 اولوب بونلرده امام رازی واقرائی ذوات کرامدر . خامساً .
 مقلدیندن طبقه ارباب ترجیحدر . که بونلر ابی الحسن القدوری
 وصاحب هدایه گبی ذوات اولوب بعض مسائلده ﴿هذا اصح
 روايه . وهذا اولی . وهذا اوفق للناس ﴾ قوللریله بعض روایتلری
 دیگرلری اوزرینه تفضیل وترجیح ایلمشلردر . سادساً . طبقه
 مقلدین . که قوی واقوی . وضعیف وظاهر روایت . وروایت نادره .
 بینلرینی تمیزه قادر اولان وکتب مؤلفه لرنده اقوال مردوده بی
 اصلاً نقل وروایت ایلمیان متأخریندن ارباب متون معتبره
 اولوب بونلرده . کنز ومختار ووقایه ومجمع . اصحابی مثللو ذوات
 عالیهدر . سابعاً . احوال مشروحه دن برشیئه مقتدر اوله میان
 وقول ضعیفی فرق ایده میان مقلدیندر *

﴿در مختار وطحاوی ورد مختار﴾



برنجی کتاب

طهارت صغری و کبری به متعلق مسائل مخصوصه بی مشتمل اولوب
یدی باب منقسمدر

برنجی باب

وضوء دائردر

کتب فقهیه ده تفصیلاً بیان اولندیغی اوزره علم فقه . امور دینیهدن
اولان . عبادات . معاملات . عقوبات . دن باحث اولوب بونلردن .
عبادات . قسمی استعیذ بالله وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ نص جلیلی ایجابجه جن وانسك ما خلق لہی
اولدیغندن دیگر ایکی قسمدن اهم اولدیغی گبی . عبادات . قسمندن
بولنان . صلات . دخی استعیذ بالله الَّذِينَ يُؤْمِنُونَ بِالْغَيْبِ وَيُقِيمُونَ الصَّلَاةَ نظم منیفی و بَنِي الْإِسْلَامَ عَلَى خَمْسٍ .
شهادة ان لا اله الا الله وان محمداً رسول الله واقام الصلوة وايتاء الزكوة
وصوم رمضان وحج البيت من استطاع اليه سبيلاً حدیث شریفی
منطوق عالیسی اوزره بعد الايمان اول واجبات وبالاجماع افضل
عبادات بولمغله سائرلرندن مقدم اولوب فقط بونك شرائطندن بری
بولنان طهارت ایسه صلاتك شرط خاص لازمی و مفتاح الصلوة
الطهور وتحریمها التكبير وتحليلها التسليم حدیث شریفی دلالتیه

مانع صلات اولان قفل حدثك من جهة الازالة مفتاحی بولندیغندن
طهارتك طبعاً ووضوءاً صلاته تقدیمی مستحسن کورلمشدر .
طهارت . لغتده باب اول وخامسندن مصدر اوله رق دنس حسی
ویادنس مغنویدن پاك اولمق معناسندهدر . شرعاً نجاست حکمیه
اولان حدث اصغر واکبردن یاخود نجاست حقیقیه اولان خبشن
بدن وثوب ومكان و اوانی واطعمه و امثالی طاهر بولنقدردر .
طهارتك سبب وجوبی طهارتسر فعلی حلال وجائز اولمیان شیئی
فاعلك قصد و اراده ایلمسیدرکه اول شی مثلاً . صلوة . گبی
فرض اولسون و یا نوافل و من مصحف . گبی فرضك غیری
اولسون بونلر انحق طهارتله اجرا ایدیلور . سبب وجوب
طهارتده بین العلما درمیان اولنان اقوال اربعه و بونگا متفرعه
اولان اختلافات واقعیه استندیکی حالده مفصلاته مراجعتله
بالاطراف کسب اطلاع اولنه بیله چکندن بو مختصرده تفصیلدن
صرف نظر اولندی . اشباهده ذکر و بیان اولندیغی وجهله
طهارت صغرا و کبرانك شرائط وجوبی طقوز اولوب بونلرك
اجتماعنده شخص محدثه طهارتك وجوبی تحقق ایدر . انلرده
عقل . اسلام . بلوغ . حدث . وجود مطهر (۱) . استعمال
مطهره قدرت . عدم حیض . عدم نفاس . ضیق وقت . دن
عبارتدر . چونکه مجنون و غیر مسلم وصی و متطهر و فاقد ماء
و تراب (۲) و استعمال مطهردن عاجز و حائض و نفساً اولنلره
وسعه و قتله طهارت واجب دگلدر .

(۱) وجود مطهره کند وسیله طهارت جائز اولان صو و طوبراق گبی شیلرك
موجود اولسی (۲) فاقد ماء و تراب . صو و طوبراغی بوله میان کسه

شرائط صحتی درت اولوب بونار امره امثال و تفریح ذمت
جهتدن طهارت انحق کندوسيله صحيح و حاصل اولان شيلدرکه
انر غسل و یا مسجی واجب اولان محلی شیء مطهرک استیعاب (۱)
واحاطه ایله مسندن و مرأده حیض و یا نفاسک مفقود اولمسندن
وانشای طهارتده طاهر حقند مطلق و معذور حقند مابه العذرک
غیری برناقض بولنممسندن عبارتدر . خفی اولیه که مرأده حیض
ونفاسک استغابی توجه خطاب جهتیله شرائط وجوبدن وادی
واجب اعتباریه شرائط محندن عدایدلمشدر . طهارتک صفتی
فرض و یا نافله اولسون مطلقا نماز ایچون فرض قطعی و مس (۲)
مصحف ایچون فرض عملی و طواف ایچون واجب و نوم ایچون
علی قول سنت و مس کتب شرعیده و کذب و غیبت و قهقهه
و شعر قیچدن سکره و دها و توتوز قدر احوالده مندوب اولدینی .
خزائن . نام کلمده مفصلاً بیان اولمشدر .

طهارتک رکنی یعنی اجزای ماهیتی غسل و مسح و زوال نجس
اولق اوزره اوچدره زوال نجس نجاست مرئیه عین نجسک
زائل اولمسندن و غیر مرئیه حدث اکبرده غسل و حدث
اصغرده غسل و مسحدن عبارتدر . طهارتک آلتی . ماء و تراب
طاهر و امثالیدر در مختار و ابن عابدین و طحطاوی . دلیل
استعید بالله یا ایها الذین آمنوا اذا قمتم الى الصلوة الى آخره
آیت جایله سیدر . معنای شریفی ای ایمان شرعی ایله متصف اولان

(۱) استیعاب . قابلامق (۲) مس . یا شمی

ذوات کرام نه زمانکه ادای صلاته اراده قیام ایدرسکنر وضوء کنر
(۱) یوغیسه هر بریکنر یوزیکنری والاریکنری درسکاریکنر ایله
برابر غسل و باشیکنری مسح ایدیکنر و آیتلریکنری طپوقلریکنر
ایله برابر بیقایکنر دیمکدر . قیامدن مقصد . ذکر مسبب
اراده سبب طریقله اراده قیام و حال حدث ایله مقید اولدینی
کشافده و سائر تفاسیرده محرر و ﴿ارجلکم﴾ نصب (۲)
و جر (۳) ایله قرائت اولندینی متواتر و جر جواریه به
حمل ایله اسرافدن منع ایچون مسحه قریب اولسنه تنبیه اولندینی دخی
مصر حددر . بعضلر نصبی تحفی (۴) به و جری تحفه (۵) حمل ایله رجل
عاریکنری (۶) غسل (۷) و خفکنری یعنی مستلی اولان ایاغکنری
مست اوزرینه مسح ایدیکنر دیو توجیه ایتشدر در درر و غیره
آیت کریمه ده ﴿فَاغْسِلُوا وَاَمْسَحُوا﴾ امر شریفی و جوبه دال
اولدیغندن غسل و مسح رأسده مقدار معینک فرضیتی اجتهادی
ایسه ده اصل اوله رق غسل و مسحک فرضیتی قطعی الثبوتدر .
بناء علیه وضونک فرضی درت اولوب بونک اوچی اعضاء ثلثه
مذکورده بی بشقه بشقه برر کره کاملاً غسل و بریده رأسک
بعض محله بر کره مسح ایلکمدر قدوری و غیره وجه (۸)
طولاً بحسب العاده شعر رأسک (۹) بتدیکی بردن اسفل ذقنه دک (۱۰)

(۱) وضوء . آبدست (۲) نصب . فتحه (۳) جر . کسره
(۴) تحفی . یالین ایاق اولق (۵) تحفف . ایاغی مستلو بولمق (۶) رجل
عاری . چپلاق ایاق (۷) غسل . بیقامق (۸) وجه . یوز (۹) شعر
رأس . باش قیلی (۱۰) اسفل ذقن . چکه نک اذ اشاغی محلی

عرضاً ایکی قولاً غک مابینی اولمق ایله معتبر و میندر . بو کارا س
لحه (۱) اولان عذارین (۲) ایله اذنینک (۳) مابینی دخی داخل
اولدیغدن بونلریده بر کره بیقماق فرضدر * خلافاً لامام ابی یوسف
(ملتق) غسل . اساله ماء (۴) طاهر دن واساله دخی عند الامامین
ولوقطره واحده اولسون صویک داملامسندن عبارت اولدیغی
اکثر کتیده مصحح و امام ابی یوسفه گوره بر قطره بیه کافی
اولوب تقاطر ماء (۵) شرط اولدیغی هدایه شرحی ابن همامده
مصر حدر (حاجی) شمس الائمة الحلوانی ابتلال اعضا ایله یعنی
اعضائک ایصالاً بمسئله . وضوء . حاصل اولوب اساله ماء اولمسه ده
جائزدر دیمش ایسه ده صدر الشریعه قطره واحده و یازانده نک
سیلانیه (۶) . مؤولدر دیونقل ایتمشدر تلج (۷) ایله قطره واحده سز
وضوء . صحیح اولیوب فقط اساله و یا تقاطر بولمق ایچون ایکی
قطره حاصل اولمق لازمدر (حاجی) وضوئک سبب وجوبی
ادای صلوٰه گبی بلا وضوء جائز اولمیان عملی اراده و بعضی عندند نفس
حدثدر (تنویر الابصار) آیت وضوء . مدینه منوره ده نازل اولدیغی
متفق علیه اولوب صلوٰه ایسه مکّه مکرّمه ده فرض اولمغله نبی
ذیشاعز علیه الصلاوة والسلام افندمن حضر تری و حی غیر متلو (۸)

(۱) رَأْسِ لِحْيَةٍ . صَقَالُ بَاشِي (۲) عِذَارَيْنَ . صَقَالُ بَاشِلَرَيْنِک قَوْلَاقِ
جَانِبِنْدَه کی تویسز برلری (۳) اُذْنَيْنِ . ایکی قولاقلر (۴) اساله ماء .
صَوْبِي آفَتَمَق (۵) تَقَاطُرُ ماء . صَو دَامَلَامَق (۶) سَيْلَان . آفَقِ
(۷) تَلَج . قَار (۸) وَحْيٍ غَيْرِ مَتْلُو * لسان شرعده تلاوت صورتیه اولمیان
و یالکز قلبه الهام طریقیه اولان وَحْيِ الهی معناسنده استعمال اولمشدر که
مقابلی (وَحْيٍ مَتْلُو) در قرآن گبی

و یا شرایع سابقه دن اخذ ایله امر وضوئی اولجه اجرا بیوردقلری
ثابت و (هذا وضوئی و وضوء الانبیاء من قبلی) حدیث شریفی
دخی بونی مثبت اولدیغدن فائده نزول آیت تقریر امر وضوء
و تأکید فرضیت اولمق احتمال ظاهر در (درر) دوام وضوء
وسیلّه شهادت اولدیغی (من داوم الوضوء مات شهیداً)
حدیث شریفنده بیان و تبشیر بیورلمشدر .

آیت جمیله ده کی باء تبعیه دلالته بعض رأس . مبهم اولدیغدن
مسح رأسه فرض اولان رُبْع رَأْسِدِن (۱) عبارت بولنان
ناصیه (۲) مقداری اولدیغی مُغِيرَة بن شُعْبَة (رضی الله عنه) دن
مروی حدیث شریف ایله ثابتدر که رسول اکرم صلی الله علیه
وسلم افندمن حضر تری بر قومک سباطه سنی (۳) بالتشريف
نقض وضوء ایله توضی بیوردقلرنده مبارک ناصیه لرینه و خفینه
(۴) مسح بیوردیلر (قدوری و غیره) مسح . شرعده ید
مُبْتَلَّه ی یعنی ماء طاهر ایله ایصالاً تمش الی یا خفه و یا رأسه و یا جیره
(۵) یا خود صارغی اوزرینه اصابندن عبارت اولدیغدن بونک ماء
جدید و یا غسندن باقی قالان صو ایله اجرایی لازم کلوب یوقسه
مسحندن بقیه قالان آب (۶) ایله جائز اولمز (درر و غیره)
امام اعظم حضر تلرندن اشهر روایتده جلد ملایق اولان شعر
(۱) رُبْع رَأْسٍ . بَاشِكِ دَرْتَدَه بری (۲) نَاصِيَه . آئِن (۳) سُبَاطَه .
خَرَابَه (۴) خُفَيْنَ . مُسْتَلَر (۵) جَبِرَه . بَدْنَدَه قَرِيقِ وَجِيقِ اَعْضَائِي
صار دقلری تخته لر (۶) آب . صَو

لحیه بی (۱) غسل . فرضدر . بوروایت . معراج درایه ده
 « اصح » و ظهیریه ده « و به یفتی » ایله مصر حدر . تحتی مرئی اولان
 لحیه خفیفه بی غسل قول مختارده فرضدر . تحتی شعر ایله مستور
 و غیر مرئی اولان لحیه کثیفه (۲) بشره سنک (۳) ییقامسی
 ایجاب ایتمز طحطاوی و قاضیخان رأس و لحیه بی تراش
 ایستدکن و قرحه یا بسه نک (۴) جلدی (۵) ازاله ایلدکن
 و قطع ظفر (۶) دن صکره اعاده غسل و مسح لازم دگلدر
 تنویر (۷) اما او ستوره و مقراص و چاقی و امثالک اصابتدن
 و قورومش یاره نک در یسی قالقمقدن ناشی ایرین و قن چیقارده
 نقض وضوئی انتاج ایده جک مرتبه ده سیلان و قوعه کلور ایسه
 تجدید وضوء ایجاب ایدر . اثنای توضع ده پرمقده اولان خاتم
 ضیق (۷) نزع (۸) و یا تحریک (۹) ایلمک اقتضا ایلر
 درر (۱۰) یالکز بر و یا ایکی پرمق مد (۱۰) اولنه رق باشک درتده
 برینک مسح ایدلمسی تجویز اولنماشدر ملتقی (۱۱) لکن النک آیه سیله
 برابر مسح ایدیلور ایسه جائزدر در مختار (۱۲) مرفقین (۱۱)
 و کعبین (۱۲) غسل ایتمک ائمه ثلثه عندنده فرضدر . (چونکه

(۱) لحیه کثیفه . صیق صقال (۲) بشره . انسان در یسنک اوستی
 (۳) جلد . دری (۴) شعر لحیه . صقال قبلی (۵) قرحه یا بسه .
 قورومش یاره و چیان (۶) ظفر . طرناق (۷) خاتم ضیق . طار
 یوزک (۸) نزع . چیقارمق (۹) تحریک . قبرداتمق (۱۰) مد .
 اوزاتمق (۱۱) مرفقین . ایکی دیرسکر (۱۲) کعبین . ایکی طپوقلر

غایت مغیاده داخل اولدیغندن دیرسکاری و طپوقلری صوکه
 نقطه لرینه قدر مطلقا ییقاملیدر (برکسه نک یدی یا خود رجلی
 قطع اولنه رق مرفقندن و یا کعبندن برشی قالمش ایسه غسل .
 ساقط و قالمش ایسه بقیه نک غسل واجب اولور طحطاوی
 آبدستک سنت مؤکده سی او یقودن قالقیلوب قصد وضوء ایدلدکنه
 اللری اناءمانه یعنی صوقابنه ادخالدن اول بیلکله قدر غسل ایتمکدرکه
 فرض . مقامنه قائمدر قدوری (بومعامله صویک ابریق
 و مطاره و دستی یا خود موصالقی سمار و کوب و امثالی قابلر ایچنده
 محفوظ اولمیویده گردل و تکنه و قوفه مثلاًوشیلر دروننده آچیق
 اوله رق بولندیغی و قنده اجرا اولمق یعنی ابریق کبی قاب
 دروننده کی صویک لاجل الوضوء حین استعمالنده ال ایله ابریق
 تحریک اولنمسیله طبیعی ماء . جریان ایدرک اللرک ییقامسی ممکن
 اولوب لکن صوگردل و اشباهی (۱) ایچنده بولندیغی حالده
 آبدست آتمق استلده کده اول امرده اوافق چناق و یا طاس و برداق
 گبی شیلر وار ایسه بونلر ایله و یوق ایسه گردله و سائر یه اللری
 صوقیه رق یالکز آوو جک چقورینه قایدن بر مقدار صونقل ایله
 ایکی اللری بیلکله دگین بعد الغسل توضع به مباشرت قاتمق اقتضا
 ایدر (ابتدای وضوء بسم الله الرحمن الرحیم یا خود بسم الله
 العظیم والحمد لله علی دین الاسلام دیمک قول اصح اوزره
 سندر درر چونکه لا وضوء لمن لم یذكر اسم الله علیه

(۱) اشباه . امثال گیدر

حدیث شریفی کائنہ مصروف ایدوگی حاجی دہ مسطور در . (حدیث شریفہ کی . نفی . ذات وضوئے عائذ اولیوب فضیلت وضوئے متعلق اولیق محتملدر زیرا او آبدست ایله نماز قیلمق جائز در)

مسواک استعمالی مضمضہ ایدر کن سنت اولدینی مبسووطہ بیان ایدلمشدر . اغزہ صو آلوب تحریک ایتک . بورنہ صو چکمک . قولاقلری مسح رأسدن باقی قالان صو اگر عمامہ یه ویافس وامثالہ مسئلہ استعمال اولندیسہ انگله و مس استعمال اولندیسہ ماء جدید ایله مسح ایلمک . قولاقلرک داخلنی شہادت وظاہرینی باش پرمغنی و بونی پرمقارک ارقہمی ایله مسح ایتک . باطن جانبندن لہیہ بی وایاقلرک پرمقارینی تخلیلہ (۱) صول الک کوجک پرمغیہ صاغ ایانک کوجک پرمغنی التندن باشایوب صول ایانک کوجک پرمغندہ بتورمک . ہر اعضائی بشقہ بشقہ اوچر کرہ یبقامق سنت سنیہ در درر و حاجی در مختارده ذکر اولدینی اوزرہ قلب ایله وضوئے نیت . صائم دگسہ مضمضہ واستنشاقده مبالغہ . تجدیدماء . غسل اعضادہ ترتیبہ رعایت . ولاء (۲) وذلک (۳) اعضا ایتک . صاغ الی قوللانمق . دخی سنت شریفہ در . مسواک کل طولی برقارش و عرضی کوجک پرمق قدر اولمق واعلی واسفلدن اوچ کرہ تحریک اولنمق مستحبد . استعمال اولنور ایکن خنصر (۴) وایہام (۵) پرمقاری مسواکک تحتندہ وباقی اوچ پرمق فوقندہ طوتلمق مسنون اولدینی ابن مسعود (۱) تخلیل . خلالاتمق (۲) ولاء . بربری آردنجہ یایمق (۳) ذلک . اوغمق (۴) خنصر . سرچہ پرمق (۵) ایہام . باش پرمق

(رضی اللہ عنہ) حضرت تارندن مرویدر ﴿ ابن عابدین ﴾ حین استعمالدہ مسواک صورت مسنونہ خلافہ اولہرق قبض (۱) ایدلمسی باعث باسور و اغزہ مص (۲) اولنمسی مورث عمی در در مختار ﴿ بلامص . ابتدای استیا کدہ (۳) تو کریگی یوتنق جذام و برص علتندن ماعدا دیگر بعض درده دوا اولدینی حکیم ترمذیدن نقلاً حلیہدہ محرردر ﴿ ابن عابدین ﴾ مسواک یوغیسہ اصبع ایله استیاک کافیدر ﴿ منیہ ﴾ وضوئے نیت ایتک ولسانیہ عربجہ ﴿ نَوَيْتُ الْوُضُوءَ ﴾ یاخود ترکیہ « آبدست آلمغہ نیت ایلدم » دیمک وجمیع رأسی مسح و آیت وضوءدہ ذکر اولنان ترتیبہ رعایت ایلمک و غسل اعضادہ صاغدن باشلامق مستحبد ﴿ قدوری ﴾ نیتک وقتی آبدست آلور ایکن وجہک یبقانمسینہ باشلانیہ جغی زماندر ﴿ حاجی ﴾ رأسدہ استیعاب مسح . اولایکی اللرک اصابعی و کفینی ایصلا تدقندن صکرہ خنصر و بنصر (۴) ووسطی (۵) پرمقارینی بربرینہ ضم وایہام و شہادت پرمقارینی رفع ایدرک و کفینی باشہ دو قدر میہرق ایکی اللرک اوچ پرمغنی باشک اوک طرفنہ وضع وقفایہ دوغری مد ایله بعدہ ایکی الک آہ لرینی رأسک جانبیننہ قویہرق مسح و باطن (۶) ایہام ایله

- (۱) قبض . طوتنق (۲) مص . اممک (۳) استیاک . مسواک طوتنق (۴) بنصر . سرچہ پرمقک یاندہ کی پرمق (۵) وسطی . اورنہ پرمق (۶) باطن . ایچ طرفی

قولاغك ظاهرینی و باطن مسبحه (۱) ایله قولاغك باطننی كذلك مسح ایتك طریقیه اولدینی منیه ده مسطور و دررده زیلعیدن نقلاً اصابع (۲) و کفینی (۳) مقدم رأسه (۴) وضع وقفایه مد ایلیمک صورتیه مذکوردر . نبی محترم صلی الله علیه وسلم افندمن حضرتلرینک رأس سعادتلرینی قاپلایو مسحه مواظبت کثیره لری و بعض اوقاتده ترک بیورملری وقوعولسنی حاجی استدلال ایدرك استیعاب مسحك سنت اولسنی بیان ایلیمش و اکثر کتبه دخی بو وجهله گوسرلمشدر . برگونه معذرت اولدینی حالد و ضوئی وقت صلاته تقدیم ایتك . آبدست آلور ایکن یوکسکجه موقعده بولنق . قبله یه دونمک . پرمغنده خاتم واسع (۵) اولدینی حالد تحریک ایله مک . حین مسجده سرچه پرمغنی قولاغنه ادخال ایتك . غیریدن استعانه ایله مامک . دنیا کلامی سویله مامک .

اللهم اجعالي من التوابين واجعالي من المتطهرين واجعالي من عبادك الصالحين - دعا سیله ادعیه مأثورده سائرینی اوقومق . صلات و سلام ایتك . فضله و ضوئی ایچمک . بعدالفرغ - سبحانک اللهم و بحمدک اشهد ان لا اله الا انت وحدک لا شریک لک استغفرک و اتوب الیک اشهد ان لا اله الا الله و اشهد ان محمداً عبده و رسوله -

دیمک . انا انزلناه - سورده سنی قرائت ایله مک . جمله آداب

(۱) مسبحه . شهادت پرمغنی (۲) اصابع . پرمقار (۳) کفینی . ایکی الک آیه لری (۴) مقدم رأس . باشک اوک طرفی (۵) خاتم واسع . گنش یوزک

و مستحبات وضوء دن اولدینی ابن حیان روایت ایلیمشدر .

(بوسوره نك تلاوتنده (۱) اولان اجر مثوبات (۲) من قراها فی اثر الوضوء غفر الله له ذنوب خمسین سنة - حدیث شریفنده تبشیر بیورلمشدر که (معنای منیفی سورده مذکورده نی عقیب وضوءده قرائت ایلان مؤمنک الی سنه لك ذنوبی عفو اولنور دیمکدر) مسح رقبه ده (۳) اختیار طحاوی سنت و اختیار صدر شهید مستحب اولدینی گبی اکثر متونده دخی مستحب اوله رق بیان و مسح حلقوم (۴) بدعت ایدوگی جوهرده ده اتیان اولنمشدره وضوءده بسمله . نیت . ترتیب . استیعاب رأس بالمسح . سنت . و بعضار عندنده مستحبدر (ملتی) صوبی بوزده شدتله اورمق تزییها و توضی ایدیلان ماء . دره صوبی و یا کندی ملکی اولدینی حالد اسراف ایتك یا خود تقیر یعنی اوچدن نقصان ایله مک تحریماً مکروهدره اگر قوللا نیلان آب . جوامع و مدارس صوبی گبی وقف ایسه اسراف ایتك حرامدره ماء جدید ایله رأسه اوج کره مسح ایله مکده دخی کراحت وارددر (در مختار) سیلیدن (۵) خروج ایدن بول و غائط و دم و یا انکز مقعددن چیقان ریج ایله دوده و حصاة یعنی کوچک قورد و صوغلجان و اوفق طاش و قوم . ناقض وضوءدر . ینه بونلر گبی قان و ایرین و صاری صو تطهیری فرض اولان محله بنفسه تجاوز ایتك . واغز طولوسی قی ایلیمک . ویانی اوزرینه گرك استناد (۶) ایله گرك استناد سز او یومق . و آلدقدده دوشمک شرطیه

(۱) تلاوت . قرآن اوقومق (۲) مثوبات . ثوابلر (۳) رقبه . بیون (۴) حلقوم . بوغاز (۵) سیلین . اوک و آرد محللری (۶) استناد . دایمق

الرفیله بر شیه دایانرق ناتم (۱) اولق - وحت ویا یهوش (۲)
وایکی طرفه تمایل مرتبه سکران حاله نده بولتیق - وعقل وبلغ
اولارق ذات رکوع وسجود اولان حاله نده یقظانده بولندیقی
وغسل آبدستی اولیرق مستقل توشی ایلمش اولدیقی حاله
برکسه غیرسی استماع ایده جک قدر قهقهه ایله گولک - ووجع
ایله قولاق وگوزدن ایرین جیقمق - دخی آبدستی یوزان تیلر دندر
﴿قدوری ودرر﴾ بلغ اولدیقه و حال یقظانده بولندیقه وغسل
آبدستلو اولدیقه قهقهه ایله وضوء یوزلار - ووجع عین وضف
بصر سبیلله حقیق گوز یالتلریده وضو قی قنض الیدر ایسه نده
یو حال مستمر وبردوام اولور ایسه صاحبی العقل عتدر صایلمور -
ایره (۳) ایله راس جرحه (۴) دن دم (۵) خارج اولویده
برجانیه سیلان ایلمیه رک دورسه یاخورد ایصیرالان شیده ایر دم -
ظهور ایسه ویایوروندن مرجح قدر دم جامد (۶) جیقاراله
ناقض وضوء اولار ﴿درر و غیره﴾ یلیم - مطلقا ناقض وضوءدن
عد اولقلمش ایسه دم المام الی یوسف یلیم اگر جوقدن حالت
اولور ایسه آبدستی قنض الیدر درمندر ﴿ملتق﴾ قلن توکر وکه
غالب ویاسلوی اولارق احمر (۷) ایسه ناقض اگر قلن
مطلوب اولوب الصقر (۸) ایسه ناقض دگندر ﴿منج﴾ حره (۹)

(۱) ناتم - اویولک (۲) یهوش - لیلان (۳) ایره - ایکنه (۴) راس
جرحه - یلامک بالی (۵) دم - قلک (۶) دم جامد - درمندی قلن
(۷) احمر - قورمزی (۸) اصقر - صاری (۹) حره - قورمزی

اقرب ایسه آبدستی یوزوب بیاضه اقرب (۱) ایسه نقض
ایته جکی و مساوی اولدیقی حاله شدیداً اصفر ایسه احتیاطاً
توشی لازم کله جکی منیده محرردر - قنم وقاعد وراصع
وساجدک نومی آبدستی یوزماز - لکن سجوده سنت وجهه
بطنی اصعاد (۲) وعضدنی (۳) اصعاد (۴) ایلمک شرط
اولدیقی حاجی و غیره ده بیان ایلمشدر - برکسه قاعداً اویقوه
واروب تمایل ایله جکی حاله دوشه اگر حین سقوطنده (۵)
اویانور یاخود جنی (۶) برره اصابت ایتمکسزین و یا جنی
بره اصابت ایلوب فقط محل قومندن افکاک (۷) ایلمکسزین
سقوط وقوعبولور ایسه آبدستی یوزلار ﴿در مختار و غیره﴾

ایکنجی باب

غسل یانتمندر

الستینیلله وان کتم جنبا فاطهروا لایه معای شریفی
(۱) معای مؤمنین اگر سر جنب اولور ایسه اگر طاهر
ایله وجود گزی کمالاً غسل ایلمیه رک زیلده تطهر الیدر ﴿درمندر﴾
غسل قرضی مضطه - المستلق الیک - جمیع بدن یومق - دن

(۱) اقرب - زیلده یقین (۲) اصعاد - یوقاری طویق (۳) عضد - یاز
(۴) اصعاد - اوزاق الیک (۵) سقوط - درمندی (۶) جنب - یان
(۷) افکاک - آیرلی

عبارت اوله رق اوچدر ﴿قدوری﴾ قول احمده بلا مشقة
فتحی ممکن اولدینی صورتده ختان ایدمک سنت اولان جلد
مخصوصک داخلانی و مطلقاً سره بی (۱) غسل ایدمک فرض
داخلنده در ﴿درر﴾ منابت شعره (۲) صوبی ایصال ایتمک
صاج و یا قیل کثیف (۳) اولسه بیله بالاجماع فرضدر . کذلک لویه
ورأس و بدنده بولنان صاج و قیلرک اره لرینه دخی ایصال ماء
فرضدر . بناء علیه صاج صیق اولوبده دیبلرینه صوا و لاشدیرلمسه
اعتنا ایدلمز ایسه غسل صحیح اولمز ﴿منیه و غیره﴾ حاجب
(۴) و شارب (۵) و لویه و شعر (۶) رأس هر تقدیر کثیف
و متلبه (۷) اولورسه اولسون بشرة و شعراً غسلی اجماع ایله
فرضدر ﴿در مختار﴾ کوبه و خاتم . طار اولوبده التدرینه مانک
عدم وصولنده ظن غالب اولورسه کوبه و یوزگک تحریکی فرض
اولور ﴿حلی﴾ بدنده مرهم و طرناق ایچنده خیر و امثالی
اوساخ (۸) خارجیه بولنوبده نفوذ مائی مانع اولدینی اگلاشدینی
تقدیرده بولری ازاله ایلیمکمزین غسل جائز اولمز . فقط بدن
انساندن متولد درن دینیلان و نجسک غیری اولان کرلر تراکم ایتمش
اولسه بیله ازاله اولنماسی مانع غسل اولمز ﴿محیط و قاضیخان﴾
گرک قلیل گرک کثیر اولسون دیشلرک اره سنده باقی قلان طعام
(۱) سره . گوبک (۲) منابت شعر . قیل بتن برلر (۳) کثیف . بوراده
صیق و (۴) حاجب بوراده . قاش معنارینه در (۵) شارب . بیق (۶)
شعر . قیل (۷) متلبه . بکه لنش (۸) اوساخ . کرلر

قرنیمسی قتی خیرگی اولوبده نفوذ مائی مانع ایسه غسلی دخی مانعدر
﴿حلی﴾ شقاق (۱) رجله (۲) مرهم اولوبده وصول ماء . مضر
اولدینی حالده یالکز امرار (۳) کافی و مضر اولدینی صورتده
شقاقه صوبی ایصال ایتمک غسل و وضوءده لازمدر ﴿منیه﴾ انانی
غسلده مضمضه و استنشاق و یا بدندن بر جزؤ او نودیله رق فرض
و یا واجب اولان نماز ادا اولندقدن صکره و وقوع نسیان (۴) تذکر
و تحطّر (۵) اولسه در حال مضمضه و استنشاق ایدیلرک اعاده
صلات ایجاب ایدر . اگر قیلنان نماز نافله ایسه شروعی صحیح اولماغله
اعاده سی لازمه کلمز ﴿حلی﴾ ابتداء ایکی الاری و عورت محلی
غسل و بدنک سائر برلرنده نجاست وار ایسه آنلری ازاله و صکره
وضوء صلات گبی توضع (۶) اولنوب ظاهر روایتده باشه مسح
ایدمک و صورتراکم ایلیمش محله بولندینی حالده ایقلرک غسلی
تاخیرایله همان رأسه و بالجمله بدنه صاغدن بدأ ایله اوچر کره صو
دو کونتمک واک صکره صورتراکم ایلیمیان یره گیدیلرک ایقلری
اوراده گوزجله ییقامق . غسلک سنترلرندندر ﴿قدوری و غیره﴾
اعضایی صره سیله دلک ایله مک سنت اولدینی دررده مذکور
وامام مالک عندنده فرض عد اولندینی مجمع البحرینده و بصورت
امام ابی یوسفدن دخی مروی بولندینی فتح القدیرده مسطوردر .
استقبال قبله دن ماعدا آبدستک مستحبانی غسلده دخی معتبردر
(۱) شقاق . یاریق (۲) رجل . ایاق (۳) امرار . گچورمک
(۴) نسیان . اونوتمق (۵) تحطّر . خاطره گتورمک (۶) توضع .
آبدست المق

﴿در مختار﴾ مرأة نك اورلمش صاچارینی حین غسلیده تماماً
چوزمسی لازم اولیوب یالکز صاچنك دیبلرینه صویك ایصالی کافیدر
﴿قدوری﴾ صاچلری چوزلمش ایسه اثنای شعره (۱) صویك
اولاشدیرلمسی فرض اولدیغی محیط و بدایعده مصحح واورلمش
ارکك صاچلرینك اره لرینه ایصال ماء . روایت صحیحه ده فرض
ایدوکی خلاصه ده مصر حدر ﴿حلی﴾ غسلك اسباب وجوبی
یعنی فرضیتی درت اولوب بری دَفَق (۲) و شهوت ایله رجل
ومرأة دن نوم (۳) و یا یقظه (۴) حالنده منی انزال اولمق .
ایکنجیسی رجل و مرأة نك ختان موضعلری بغیر انزال بربرینه
تلاقی ایله مك . اوچنجیسی قادینلر حیض حالنده بولنمق . دردنجیسی
كذلك قادینلر نفاس گورمكدن ﴿قدوری﴾ دَفَق هر نقدر دفعة
خروج معناسنه ایسه ده بو حال مرأة ده حس ظاهری ایله غیر محسوس
بولندیغنه بناءً معتبر اولدیغی گبی رجلیده دخی امام اعظم
وامام محمد حضر تلری عندنده شرط دگلدر ﴿درر و غیره﴾
ضرب و یا حمل ثقیل و بر مرتفع محلدن سقوط سیبلر یله
بلا شهوة منی نك خروجی بالاتفاق موجب غسل اولمز * امام
ابی یوسفه گوره محلندن شهوتله آیریلوب فقط امساك آلت سببیه
شهوتك سکونندن صگره منی نك خروجی دخی غسلی ایجاب
ایتمز خلافاً للامام الاعظم . اشبو خلاف قبل البول والنوم

(۱) اثنای شعر * صاچلرک اره لری (۲) دَفَق * دفعة چیمق (۳)

نوم * اویقو (۴) یقظه * اویانقلق

غسل ایدیلوب بعده بقیة منی سیلان ایتدکده دخی جاریدر .
اگر بول ونومدن صگره غسل ایدیلوب بعده بقیة منی ظهور ایلسه
بالاجماع اعاده غسل لازمگلمز * تذکر شهوت و یا ملاعبه (۱)
سببیه مذی حاصل وبعد البول و دی خارج اولمق و پرمغی یاخود
حجر و شجر دن برشیئ مقعده ادخال ایلمك واحتقان ایتمك غسلی
ایجاب ایلمز ﴿حلی و درر﴾ اویقودن اویانیله رق بریرنده یاشلق
بولنسه بونده اون درت وجه واردر . چونکه بولنان یاشلق منی
ویامذی یاخود و دی اولدیغی تیقن (۲) ایتمك ویامنی و مذی یاخود
منی و وودی ویامذی و وودی ویامنی و مذی و وودی اولدیغنده شك
ایله مك ضروریدر . شو حالده ذکر اولنان صور سبعة نك هر برنده
یا احتلام . تذکر اولنور یاخود تذکر اولنمز . اشبو ایکی صورت
آنفاً بیان اولنان صور سبعة نه ضرب اولندقدن اون درت وجه
حاصل اولور . بونلرک یدیسنده بالاتفاق غسلك وجوبی تحقق
ایدر . انلرده تذکر احتلام ایله منی ویامذی اولدیغی تیقن ایتمك
ویامنی و مذی ویامنی و وودی ویامذی و وودی ویامنی و وودی
اولدیغنده شك ایله مك صورتلری . یاخود عدم تذکر احتلام
ایله منی اولدیغی تیقن صورتیدر . درت صورتده اتفاقاً غسل
واجب اولمز . انلر احتلامك عدم تذکر یله و دی ویامذی اولدیغی
تیقن و مذی و وودی اولدیغنده شك ومع تذکر و دی اولدیغی
تیقن ایتمك صورتلریدر . اوچ صورتده عند الامامین غسل
واجب وامام ابی یوسفه گوره غیر واجب اولوب بونلرده عدم

(۱) ملاعبه * اویناشلق (۲) تیقن * یقین حاصل ایله مك

تذکر احتلام ایله منی و مذی و یامنی و وودی و یامنی و مذی و وودی
اولدیغنده شك ایتمکدن عبارتدر ﴿ابن عابدین و غیره﴾ مذی
ملاعبه وقتنده ذکر دن خروج ایدن ماء رقیق (۱) ابیض و وودی
عقیب بولده ظهور ایلیان ماء غلیظ (۲) اولوب ایکسیده غسلی
موجب دگلسه ده وضوئی ناقضدر ﴿قدوری﴾ بر مسلم بعد التیقظ
(۳) آلتنده یا شلق بولدیغی صورتده قبل النوم متحرک اوله رق قائماً
و یا قاعداً نائم اولمش ایسه اگنا غسل لازم اولیوب اگر مضطجعا (۴)
تنوم (۵) ایدر و یامنی اولدیغی تیقن ایلر ایسه غسل اقتضا ایدر
﴿حاجی﴾ رسول اکرم صلی الله تعالی علیه وسلم افندمن حضر تبری
جمعه و عید فطر و اضحی و عرفه ده وقفه و احرام ایچون غسلی امتته
سنت بیور مشلدر ﴿قدوری﴾ اغتسال اون بروجیه اوزره
اولوب بشی فریضه در . بونلر حیض و نفاس حالارندن .
و ختائیک التماسندن (۶) . و دفع و شهوت و جهله یقظه حالده
منی نك نزول و خروجندن . ونوم ایچنده احتلام اولوب منی
و یامنی نك ظهورندن . عبارتدر * دردی سنت اولوب انلرده
غسل یوم جمعه . و غسل عیدین . و غسل عرفه . و غسل
احرامدر . بریسی واجب علی الکفایه در که غسل میتدر . بری
دخی مستحبدر که غیر مسلم اهتدا ایله کده غسل ایتمکدر ﴿درر
و منیه﴾ قول اصح بودر که غسل جمعه . مندوب اولوب بوده
امام ابی یوسفه گوره صلات جمعه یه مخصوص بولندیغندن صلات
(۱) رقیق . انجه (۲) غلیظ . قویو (۳) تیقظ . او یانق اولوق (۴)
اضطجاع . یانی اوزره یا تمق (۵) تنوم . او یومق (۶) التقاء . قاوشمق

جمعه یه اهل اولیان مسالمة مندوب اوله من . حسن بن رید
عندنده غسل . یوم جمعه ایچون اولغله جمعه یه مندوبدر . غسل
عرفه . و غسل احرام . و غسل دخول مکه و مدینه . و غسل
وقوف مزدلفه قول احمد مستحبدر ﴿حاجی﴾ جنب و حائض
و نفساء و محدث بالغ اولانلره مس مسح شریف جائز اولیوب
فقط انفصال شرطیه غلافیه مس اولغله جواز واردر . لکن
شیرازه لی ایسه تجویز اولمادیغی هدایه ده گوسلرملش و دررده
محیط و کافیدن نقلاً جوازی ایراد ایدلش ایسه ده حاجی هدایه
قولنی ترجیح ایلمشدر . تفسیر و حدیث و فقهه متعلق کتابلره
حرمة جنب و حدث حالده چپلاق ال ایله یا شمسق مکروه
اولوب اگر مندیله و امثالی ایله اخذ ایدیلور ایسه باس یوقدر .
خلاصه نك بیاننه گوره محدثك کتب محرره یی مس ایلمسندده عدم
کراهت . قول احمد ﴿حاجی﴾ جنب اولانه الینی و اغرنی غسل ایتدن
اول اکل و شرب ایلمک مکروهدر ﴿منیه﴾ فص (۱) خاتمه قرآن
عظیم الشاندن و یا اسماء حساندن برشی محکوک ایسه انکله خلایه
دخول ایتک مکروه ایسه ده او مقوله خاتمی باطن کفه تحویل
ایدرك دخوله علی قول کراهت یوقدر ﴿حاجی﴾ بومثل و محکوک
ختم و سائره جیبده محفوظ و یا برشیئه مانعوف بولنسه ضرری
یوق ایسه ده تحذر (۲) اولی در . جنب و حائض و نفاسیه او طور مق
و یا مرور ایتک ایچون بلا ضروره دخول مسجد حقنده

(۱) فص . یوزك طائی (۲) تحذر . صافمق

جواز گسترلما شد در ﴿منیة﴾ محدثك دخی ضرورتسز مسجده
دخولی مکروه اولدیغنی درر. تاتار خانیدن نقلاً بیان ایلما شد. جنب
وحائض و نفساء ایچون قرآن قصیدله مادون آیت و دعا و شاقصیدله آیت
نامه و بلکه سورة فاتحه بی اوقومق و نصف آیتده قطع ایدرك تلاوت
قرآن ایله مك بلا کراهة تجویز اولمش و صاحب هدایه مادون آیت
قرآن قصیدله قرائت جائز اولدیغنی تصریح ایلما شد ﴿حاجی﴾ كذلك
جنب ایچون الجای ضرورتله تهجی قرآن و کلمه کلمه تعلیم صبیان خصوصه
بلا کراهة جواز واردر ﴿منیة﴾ مصحفك محل کتابتی مس
ایتمک مکروه ایسه ده بیاض یرینه یا شمعده کراهت اولدیغنی
بغضاردن نقلاً حاجی بیان ایلماش و دردرده بونك خلافی
گسترلما شد. صحیفه ولو حی ارضه و یا وساده یه (۱) وضع ایدوب جنب
و محدثك کتابت ایلما سینه امام ابی یوسف عندنده جواز وار
ایسه ده امام محمد گوره. کتابت. قرائت منزله سندده اولمغله جائز
اولمیوب فقط اولی اولان صحیفه اوزرینه بر حائل (۲) وضع ایله ایله
صحیفه بی مس ایتمیه رك تحریر ایتمکدر. بوده امام ابی یوسف
قولی اخذ ایله تجویز و امام محمد قولیه کراهتی ترجیح دیمک
اولور ﴿حاجی﴾ احکام مذکورده حائض و نفساء دخی داخلدر

اوچنچی باب

ماء مطلق ایله اولان طهارت بیاننده در
بغمور و دره و بیگار و قیو و دگنر صورلیله حدث اصغر و اکبردن
طهارت قصیدله توضی و اغتسال ایله مك جائزدر. زیراماء مطلقا
(۱) وساده. دایانه حق شی (۲) حائل. مانع

طهور یعنی مطهر اولدیغنی حالد خلق اولدیغنی حدیث شریف
ایله ثابتدر ﴿قدوری و غیره﴾ تلج و زمزم شریف صورلیله
و گونشده ایصنمش صو ایله بلا کراهة طهارت جائزدر
﴿در مختار﴾ شمسده ایصنمش ماء ایله طهارتك کراهتسز
جوازینه مخالف اوله رق ابن عابدین قول معتمده بنا ایدرك تنزیها
مکروه اولدیغنی در میان ایلور که بوده مختار شافعیدر. آصه دن
و یمشدن تقاطر (۱) ایدن ماء ایله اظهر اولان تطهیر نجس ایچون
جواز وار ایسه ده ازاله حدث غیر جائزدر. اغاجدن و ریباس
(۲) و تفاح (۳) و غب (۴) و امثالی سبزه و میوه دن صیقیلهرق
حاصل اولان صور و یشورلمش شور به لرگی ماء مقید ایله حدثن
طهارت جائز دگلددر ﴿قدوری﴾ جمیع اجزاسی منعصر (۵)
اولان مایع طاهر و ماء مقید ایله ثوب و یدنده اولان نجاست
حقیقیه بی ازاله و تطهیر ایله مك جائزدر ﴿منیة﴾ سر که ایله نجس
تمیزله مك صودن اشد و اظهر و دهن (۶) و لبن (۷) و دبس
(۸) و غسل (۹) گبی جمیع اجزاسی منعصر اولمیان شی ایله تطهیر
غیر معتبردر ﴿منیة﴾ شیء طاهر ایله مخلوط (۱۰) و اوصاف
ثلثه نك یعنی لون (۱۱) و طعم (۱۲) و ریحك (۱۳) بریسی متغیر

(۱) تقاطر. داملامق (۲) ریباس. ایشقین اونی که کند و سندن بر نوع شربت یا پیلور
(۳) تفاح. الماء (۴) غب. اوزم (۵) منعصر. صقلغه قابل اولان (۶)
دهن. یاغ (۷) لبن. سود (۸) دبس. یکمز (۹) غسل. بال
(۱۰) مخلوط. قارشمش (۱۱) لون. رنگ (۱۲) طعم. طات (۱۳)
ریح. قوقو

اولان سيل صويله و اشنان (۱) (وچويد و صوده) و صابون
 وزعفران مثلاً و شيلرله مخلوط اولوب مائتي (۲) غالب بولان
 صولر ايله ماء مطلق گي طهارت اولنور (قدوري وغيره) شي
 طاهر ايله اوصاف ثلثه سي متغير اولان مانك رقتي (۳) باقي ايسه
 مطلقاً طهارت جائز اولوب اگر نجس ايله احد اوصافي متغير اولور
 ايسه اتفاقاً طاهر دگلدردر (درر) مكث . سبيله رايحه كريهه سي
 اولان صو ايله ضرورته طهارت تجويز اولمشدر (ملتي)
 كثر اوراق و يا غلبه طاهر مخلوط ايله مقتضاي طبيعت مائه
 اولان سيلاني و انبات (۴) و ارواسي (۵) زائل اولمش صو ايله
 مطلقاً طهارت ايديله مز (درر) صيفه (۶) جامد (۷) و شتاده
 (۸) ذائب (۹) اولان ماء ملح (۱۰) ايله قبل الانعقاد طهارت
 اولنور ايسه ده بعد الانعقاد اولمز (منح) هر ماء را كدكه (۱۱)
 آنده قليل و يا كثير نجس واقع اوله . انگله توضي اولنه مز . زيرا
 نبی محترم صلى الله عليه وسلم افدمن حضرتلري مائي نجاستدن
 حفظ مقصد عاليسيله سزدن بريگنر ماء را كده تبول ايتسون
 ديو نهی بيور مشاردرد . كذلك سزدن بريگنر خوابدن بيدار
 اولسه التي غسل ايتدكجه اناي (۱۲) مائه ادخال ايتسون . چونكه
 النك قنعي محله ياتديغني بيلمز . ديوا مر و تنبيه ايلمشاردرد (قدوري

- (۱) اشنان . چوغان اوتي (۲) مائيت . صو كيفيتي (۳) رقت . اينجه لك
 (۴) انبات . بتور مك (۵) اروا . صوبه قاندر مق (۶) صيف . ياز
 (۷) جامد . طونان (۸) شتاه قيش (۹) ذائب . ارييان (۱۰) ملح .
 طوز (۱۱) راكد . دورغون (۱۲) اناء . قاب

وغيره) صينك الى طاهر اولديغني معلوم ايسه ادخال ايتديكي
 قابدن آبدست آلق جائز والنده نجاست اولديغني بيانديكي صورتده
 اندن توضي غير جائز و اگر مشكوك ايسه احتياطاً آبدست
 آلمز ايسه ده آلسه لا بأسدر (حاي) حمامده قورنه صوينك
 لوله و يا موصلقدن جرياني حالنده ماء جاري منزله سنده اولمسيه
 لدی الايجاب اللرك متنجس اولسه بيله قورنه يه ادخالني امام
 ابی يوسف تجويز ايلمشدر (حاي) (اگر صوا و مقوله شيلردن
 جاري دگل ايسه الى قورنه يه صوقا مليدر) جنب
 اولان اخراج اناء ايجون حوض حمامه يديغني ادخال ايلسه
 النده نجاست يوغيسه امامين عندنده ماء حوض مستعمل اولمديغني
 جهته طاهر و مطهردر (۱) منية . ماء جاریده نجاست قليله
 واقع اولوبده بونك لون و طعم و ريخندن بر اثر ظاهر اولمز ايسه
 توضي اولنور . زيرا نجاست . جريان ماء ايله زائل اولوب مستقر
 اولمز (قدوري) ماء جارينك وصفي قول اشهرده صمان چوپني
 اجرا ايتك و قول اظهارده عرف ناسده جاري عد ايدلمكدردر
 در مختار . ماء جاري اوست جانبدن سد اولنديغني حالده
 اشاعي طرفدن جرياني باقي قالسه كما كان ماء جاري صاييله جفندن
 انگله توضي جائز اولور . جرياني ضعيف اولان صودن آبدست
 آلان مسلمك ماء مستعمل مرور ايدنجيه دگين تائي (۲) ايلمسي
 مستحبدر (منية) ميزاب (۳) سطحدن ماء مطر (۴) جريان
 (۱) مطهر . تطهير ايديجي (۲) تائي . اگر طور اتمق (۳) ميزاب .
 اولوق (۴) ماء مطر . يغمور صوبي

ایدو بدنه سطحده اولان نجاسته صویک اکثری جاری اولمزه
 اثر نجاست ظاهر اولدجه ظاهر در . اگر نجاست . میزاید اولسه
 یا خود مانک نصفی و یا اکثری نجسه ملاق اولورسه صوده تغیر
 اولسه بیله نجس صایلور . یغموور یا غار ایکن سطح (۱) متنجسک
 سقفندن (۲) و یا تقبندن (۳) نازل اولان صو طاهر اولوب
 لکن یغموور منقطع اولدقدن صکره نزول ایدن ماء اگر سطحک
 نصف و یا اکثرنده نجاست بولور ایسه متنجسدر (۴) منیه غدیر
 (۴) عظیم که . بر طرفی تحریک ایله طرف آخری متحرک
 اولمیان گولدن عبارتدر . احد جانینده نجاست و ارا یکن جانب
 آخردن توضی جائزدر . زیرا ظاهر اولان بودر که نجاست .
 طرف دیگره واصل اولمز (۵) قدوری عشر آفی عشر اولان
 حوض که . مربع ایسه اطراف قرق و مدور ایسه او توز الی
 ذراع اولق و عمقی (۵) ال ایله صو آلدقده تحت ماء ده اولان
 ارض . منکشف اولماق لازمدر . بوه قوله حوض . نجاست
 غیر مرئی و قوعیله اثر نجاست ظاهر اولدجه متنجس اولمز
 (۶) منیه حوض کبیر کنارنده ناس صف باغایوب توضی ایتسه لر
 مشایخ بخاری قولی اوزره جائز و عمل دخی انک اوزرینه واقعدر
 (حاجی) حوض کبیرده اگر جیفه مرئی (۶) ایسه حوض
 صغیر قدر محل بعیددن و مرئی دگلسه عموم بلوی حسیله علمای
 (۱) سطح . خانه اوستی که بوراده دام مقصوددر (۲) سقف . طوان
 (۳) تقب . دیک (۴) غدیر . گول (۵) عمق . دربناک (۶) مرئی .
 گورینان

بخارا عندنده هر طرفدن آبدست آنور (حاجی) سیوری سنک
 و قره سنک و آری و عقرب گبی دماء سائله سی اولمیان بری
 و صودن تعیش ایدن بالق و قور بغه و ینگج مثللو بحری حیوانلر
 صوده هلاک اولسه لر بولر مائی تجیس و افساد ایلمز لر (قدوری)
 مائی المعاش (۱) و بری المولد (۲) اولان قاز و اوردک مانندی
 (۳) حیوانک صوده هلاکی ماء قلیلی مفسددر (درر) ماء مستعمل
 یعنی حدث اصغر و اکبرده استعمال اولنان وضوء و غسل صوبی
 بردفعه ده قولا نلماق جائز اولمز . شرعه ماء مستعمل اول
 صودر که وضوء و غسل طریقله انکله حدث ازاله یا خود نیت تقریب
 الی الله ایله بدنه اساله اولنه . بلانیة توضی و اغتسال و نیت ایله
 تجدید وضوء ایچون استعمال ایتک گبی (قدوری) رفع حدث
 و نیت تقریب ضمننده اولیوبده مجرد دفع حرارت و یا تعلیم ابدست
 قصدیله صورت وضوء ده قوللانیلان صو شرعاً ماء مستعمل عد اولمز
 (حاجی) امام اعظم و امام ابی یوسف حضر تیرینک عندلرنده
 ماء مستعمل بدنده ایکن طاهر اولوب انفصالنده مطهر دگلدر
 هو المختار . امام محمد نزدنده انحق رفع حدث ایچون قوللانیلان
 صو ماء مستعمل اولوب نیت قربت ایله استعمال اولنان آب .
 مستعمل صایلمز . قوللانیلان صو بدنندن انفصال ایلدکه
 مستعمل اولوب وجودده ملاصق و مستقر اولدجه غیر مستعملدر
 (ملتی و مجمع الانهر) . جنب بلانیة بئر منغمس (۴) اولسه
 (۱) مائی المعاش . صوده یشایان (۲) بری المولد . قره ده دوغان
 (۳) مانند . گبی (۴) منغمس . صوبه دالان

امام اعظم حضرت تارندن قول اصحده رجل طاهر وآب چاه (۱)
 مستعمل عدایدلمش و امام ابی یوسف عندندہ کا کان بقای حالین یعنی
 رجل جنب و ماء . طاهر و امام محمد جہ رجل طاهر و ماء طهور اعتبار
 اولمشد **در ملتقی** ہر دباغت اولنان دری نجاستدن بری اولوب
 انجق جلد آدمی کرامت و شرافتدن و جلد خنزیر عین نجاستدن
 ناشی قابل طہارت دگدر . ہر میتہ نک قیلی و کیگی و بوینوزی
 طاهر در **قدوری** انسانک دیشی و کیگی و منتوف (۲) اولیان
 قیلی قول صحیحہ گورہ طاهر در . اگر قیل منتوف اولور ایسہ
 دسومتی (۳) سبیلہ نجسدن معدوددر **حلی و در مختار** قیل
 دیشی دخی طاهر و بیع و شراسی (۴) و استعمالی جائز در خلافاً
 لامام محمد **حلی** دار حر بدن اخراج اولنان سنجاب و امثالی .
 شیء طاهر ایلہ دباغت اولنوب اولمندیغی مشکوک ایسہ اولی اولان اوچ
 کرہ ببقامقدر (مع مافیہ اشیادہ اصل اولان طہارت اولدیغہ بناءً
 غسل اولنمہرق استعمالی دخی تجویز اولمشددر کا تجری العادۃ)
 امام اعظم حضرت تارینک عندندہ کلب . عین نجس عد اولمندیغدن
 بیع و شرا و جلدی مصلاً ایدلمک جائز اولور . وعایہ الفتوی
در مختار

در دنجی باب

تطهیر بئر متنجسہ دائر در

گرک قلیل گرک کثیر اولسون نجاست . قیویہ دوشدیگی حالہ

(۱) آب چاہ . قویونک صوبی (۲) منتوف کوکندن یولونمش (۳)
 دسومت . یاغلوق (۴) بیع و شرا . صائمق و آلتی (۵)

جميع مانك نرح (۱) و اخراجیلہ (۲) بئرک تطهیری (۳) لازم
 گور . اگر فارہ و سرچہ و حیہ و کرتنکله مقداری حیوان قیویہ
 دوشسہ و اولسہ و جوباً یگرمی قوغہ و استجاباً اوتوز قوغہ
 قدر صو قیودن نرح اولنور و دلو یعنی قوغہ صغیر و کبیردن
 وسط اعتباریلہ حساب قنور . گوگرچین و طاوق و کدی مثللو
 حیوان واقع اولسہ قرق قوغہدن التمش قوغہدک قیودن صو
 بوشالتیلور . اگر کلب و غنم (۴) و دابہ و آدم و امثالی . بئرہ (۵)
 ساقط اولوبدہ فوت اولسہ قیونک صویو تماماً چیقاریلور **قدوری**
 حیواندن غیری نجاست خفیفہ و یا قطرہ بول و قطرہ دم یا خود
 محل قطعی غیر مشمع (۶) اولان فارہ قویروغی قیویہ دوشسہ کذلک
 صویک جمعی نرح ایدیلور **در مختار** بر فارہدن درت فارہ
 قدر فارہ واحدہ و بش فارہدن طقوز فارہدک برحامہ و اون
 فارہ بر آدمی حکملرنده اولدیغدن ہر بری ایچون ذکر اولنان
 احکامک مقتضیاتی اجرا اولنور **در** ایکی فارہ بردجاجہ (۷)
 قدر اولور ایسہ قرق قوغہ نرح ایدیلوب ایکی کدی دہ صویک
 جملہ سی اخراج اولنور **ظہیریہ** فارہ ایلہ حمامہ بینندہ اولنلر
 فارہ . و دجاجہ ایلہ شاة بینندہ اولنلر دخی دجاجہ گی اعتبار
 اولنہرق انلر حقندہ اولان حکملر بونلر ایچونندہ عیناً اجرا قنور
زیلعی خرم حمامہ (۸) و عصفور (۹) و ایگنہ اوجی قدر

(۱) نرح . صو چکمک (۲) اخراج . چیقارمق (۳) تطهیر .
 تمیزلہ مک (۴) غنم . قیون (۵) بئرہ . قویو (۶) غیر مشمع . بالمومیسز
 (۷) دجاجہ . طاوق (۸) خرم حمامہ . گوگرچین ترسی (۹) عصفور .

سرچہ قوشی


اولان غبار نجس ایله قطرات بول وایکی دانه بَعْرَة ایل (۱) و غنم معفو ایسه ده زیاده سی دگلدن (درر) قیویه دوشن حیوان صغیر اولسون ویا کبیر اولسون شیشسه یا خود داغلسه بئردن جمیع ماء نزع و اخراج اولنور (۲) دَلْوُكْ عددی هر بلده نك قیوسنده استعمال اولنان دلو وسط ایله اعتبار اولنوب هر قیونك مناسب اولان قوغه سیله حساب ایدیلور . اگر صو قیودن دَلْوُ عظیم ایله بوشالتیلور ایسه دلو وسطه نسبت ایله حساب ایدیلوب ایکی قوغه مقداری ایسه اون عددی یگر می دلو اعتبار اولنور (۳) قدوری وغیره (۴) منبعندن صوبی دائماً نبعان ایلمسندن ناشی مائی منقطع اولیان بَرْك بِالْمَلْه صوبی نزع ایتك اقتضا ایتسه قبل النزع موجود اولان آب بمقدار تخمین اولنور ایسه اولقدری چیقاریلور . امام محمد عندند و جواباً ایکی یوز واستحساناً یوز که جمعاً اوچ یوز دلوه دگین قیودن صو بوشالتیلور (۵) قدوری (۶) اصح اولان اهل خبره و معلوماتدن ایکی کسه معرفتیه موجود مانك مقداری تقدیر ایتدیر یله رَك اَكْثَا گوره معامله اولتمقدن (۷) هدایه و کافی و درر (۸) امام ابی یوسفدن برروایتده آب موجودك عمقی و دوری مقداری چقور حفر (۹) اولنوب و کرچ ایله صیوانوب دولنجیه دهك قیودن صونزع و چقوره صب (۱۰) اولنور (درر) بئرده فاره ویاغیری بر حیوان میتة اولدینی حالدده بولنوبده زمان وقوع ویا قوطی معلوم اوله مامقله برابر شیشماش ویا داغلاماش ایکن اگر قیونك صوبی استعمال اولنمش ایسه امام اعظم حضر تدرنجبه (۱) بَعْرَة ایل * دوه ترسی (۲) دَلْوُ * قوغه (۳) حَفْر * قازمق (۱) صَب * دوکک

بر گون بر گيجه لك صلات اعاده ایدیلور و صوبی اصابت ایدن ثوب و بدن غسل اولنور . اگر دوشن حیوان شیشوب داغلدیسه كذلك امام مشار ایله عندند اوچ گون اوچ گيجه لك نمازك اعاده سی لازمگلدور . اما امامینه گوره زمان وقوعی معلوم اولمديغنه بناء لاشه نك بولنديغی زمانه اعتبار اولنمق ایجاب ایله جگندن بو حالدده اعاده صلات و غسل مغسولات اقتضا ایلمز (وبه یفتی) (در مختار و قدوری) لکن قول امام . عبادات جهتنجه دهها احوطدر (ابن عابدین) بئر ساقط اولان حیوان حیاً اخراج اولندقدن خنزیر و کلب و بدننده نجس اولان سائر حیوان دگل ایسه اغزی صویه باتمدقچه صوبی تجیس ایتمز . اغزی مائه باتدینی حالدده لعابنه (۱) اعتبار اولنور . اگر لعابی طاهر اولان حیوانلردن ایسه ماء دخی طاهر در . نجس اولنلردن ایسه نجس و مشکوک اولنلردن ایسه مشکوک اولوب قیو صوبنك جمله سی چیقاریلور . اگر مکروه اولنلردن ایسه کراهت اولدیفندن نزعی مستحب اولور (درر) انسانك و لحمی اکل اولنان حیوانلرک بقیه شربی طاهر در . کلب و خنزیرك و سائر یرتیجی حیوانك سؤرلری نجسدر . وهره (۲) و طشره ده گرن دجاجة و سیب طیر (۳) ایله سواکن بیوتدن اولان حیة و فاره گبی حیوانلرک بقیه شربی مکروه اولوب بغل (۴) و حمارك آر نقری مشکوکدر . اگر (۱) لُاب * صالیه (۲) هِرّه * کدی (۳) سیب طیر * یرتیجی قوشلر (۴) بغل * قاطر دینیلان حیوان

مشكوك اولان سؤر (۱) بغل و حماردن بشقه بر طاهر صوبولمخ
ایسه بونلر ایله توضی اولمغله برابر تیمم دخی ایدیلور (قدوری)
سؤر آدمی مطلقاً طاهر اولوب مؤمن و غیر مسلم و جنب و حائض
و نفسایه شاملدر . لکن طاهر الفم (۲) اولمق شرط اعظمدر
(درر) سؤر مشکوکده اولان شک . تعارض ادله (۳) حسبیله
توقفدن عبارت اولمقدور . زیرا مفتی به اولان شک . سؤر مشکوک
طهوریتده اولوب طهارتده دگلدر (درر) سؤر فرس (۴)
امام اعظم حضر تارندن روایت صحیحده ده طاهر و بر روایتده
مشكوك و دیگر بر روایتده مکروهدر . لکن مختار متأخرین
اولمق اوزره امامین عندنده بلاشک طاهر در (حلی) هر نه
اکل (۵) فاره عقبنده سؤری نجسدر . خر (۶) و امثالی
استعمال ایدنک دخی عقیب شربده سؤری غیر طاهر و متعاقباً
اغزینی تطهیر ایلدیکی حالده سؤرنده طهارت حاصل و فقط تنزیها
کراحت ظاهر در (درر و غیره) عرق (۷) حکمده سؤر
گیدر . لکن حمارک تری استحساناً طاهر در . مع هذا سؤرینک
دخی طهری مختار اولدیغی ماسبقدن اگلاشینلور (درر) بئر
متنجسک آبی منقطع اولوب بعده ظاهر اولسه صویک کسامتی
نرح . منزله سنده اولدیغندن ماء ظاهر . طاهر در (درر) بئر بالوعه
(۸) ایله بئر ماء (۹) بینده نجاستک اثری ظاهر اولیه جق قدر

(۱) سؤر * ارتق (۲) طاهر الفم * اغزی پاک اولان (۳) ادله *
دلیلر (۴) فرس * آت و بارگیر (۵) اکل * یمک (۶) خر *
شراب (۷) عرق * تر (۸) بئر بالوعه * گریز قویوسی (۹) بئر ماء *
صوقویوسی

محل اولمق بئر مانک طهارتده کافی ایسه ده بوده ارضک صلابت
(۱) ور خاوتی (۲) ایله مختلف اوله جغدن هر حالده مابینی بش
ویا یدی ذراع (۳) بولمق شرط دگلدر (درر)



بشنجی باب

تیمم بیاننده در

استَعِذْ بِاللَّهِ فَلَمْ تَجِدُوا مَاءً فَتَيَمَّمُوا صَعِيداً طَيِّباً الآية
معنای شریفی ای مؤمنلر سزماء طاهر بوله مدیغکز حالده تمیز و پاک . تراب
(۴) ایله تیمم ایدیکز دیمکدر . مسافر (۵) و خارج مصرده اولان مسلم
صو بوله میوبده کندوسیله صویک بولندیغی محل بینده درت بیک
خطوه (۶) مقداری و یادهاز یاده بعد و مسافه اولسه و یا مریض (۷)
اولمق حسبیله استعمال ماء . اشتداد (۸) مرضنه باعث اوله جنی
اگلاشله یا خود جنب اولان کیمسه ماء ایله اغتسالده (۹) شدت
برد (۱۰) سببیه هلاکدن و یا بر مرضه ابتلادن خوف (۱۱)
ایسه خاک پاک (۱۲) ایله تیمم جائز اولور (قدوری) تیمم ایتمک
فرائض و نوافلدن قصد اولنان صلاتی ادا ایچون قبل حلول الوقت

(۱) صلابت * قاتلیق (۲) رخاوت * کوشک (۳) ذراع * ارشون
(۴) تراب * طبراق (۵) مسافر * بولجی (۶) خطوه * آدم (۷)
مریض * خسته (۸) اشتداد * شدتلتک (۹) اغتسال * یقائقی (۱۰)
برده صفوق (۱۱) خوف * قورقق (۱۲) خاک پاک * تمیز طبراق

استعمال ماء دن عاجز اولان مُحَدَّث و جنب و حائض و نفسایه
جائز در ﴿ملتقى﴾ عدودن و یرتیجی حیواندن قورقق و کندویه
و دابه سنه کفایت مقداری صو و ارایکن عطش (۱) و قوعی احتمال
غالب اولمق و یادلو و حبل (۲) کبی آلت بولنماق مثللو اسبابک
وجودنده تیمم ایتک تجویز اولمشدر ﴿درر﴾ تیمم. شرعه ازاله
حدث نیتله ایکی کره اللری وجه ارضه ضرب ایدوب ضربه اولی
ایله یوزه مسح و ضربه ثانیه ده ایکی اللری قوللریله برابر دیرسکله
قدر کذلک مسح ایتکدر. مُحَدَّث و جنب و حائض بو وجهله تیمم
ایدر ﴿قدوری﴾ احوط اولان اولاً صول الک درت بر مغلک
باطنی ایله صاغ الک بر مقلربنک او جندن بدأ ایله دیرسکه دگن صاغ
الک ظاهرینی و باطن کف ایله مفصله (۳) قدر باطنی مسح و باطن ابهامی
صاغ الک ظاهر ابهامی اوزرینه امرار و بعده یدیساره (۴) دخی
بومنوال اوزره عمل ایله مکدر. کف و اصابعک هیئت مجموعیه سیله
و اصابع ثلثه نک استعمالیه مسح دخی جائز و کافیدر. لکن یالکیز
اصبع واحده و یا اصبعین (۵) ایله جائز اولمز ﴿حاجی﴾ استیعاب
عضوین ظاهر روایتده شرط اولوب محل قلیل باقی قالسه ضربه
ثالثه لازمدر. امام اعظم و امام محمد حضرتلری عندنده جنس
ارضدن اولان تراب و قوم و طاش و کرچ و طلا اولسان اوت

(۱) عطش. صول لق (۲) حبل. ایپ (۳) مفصل. قولک اوبناق
بری (۴) یدیسار. صول ال (۵) اصبعین. ایکی بر مق

و سرمه و زرنیخ و امثالی شیلر ایله تیمم جائزدر. امام ابی
یوسف تیممی احق طاهر اولان طبراق و قومه حصر ایلمشدر
﴿قدوری و غیره﴾ ذهب (۱) و فضه (۲) و شعیر و خطه
مثللو تیمم جائز اولیان شیلرک اوزرنده غبار (۳) اولور ایسه تیممه جواز
اولدینی کبی یالکیز غبار ایله ده بلا ضروره تیمم اولنور. امام ابی یوسف
عندنده تراب. موجود ایکن غبار ایله تیمم اولنمز ﴿درر و حلی﴾
امام اعظم حضرتلرنجه کر مید و طوغله نک غبار ایله تیمم اولنمق تجویز
اولمش و امام محمد کر مید و طوغله مدقوق (۴) اولدجه تیممه جواز
گوسترمامشدر ﴿منیه﴾ طین ایله تیمم شمس الائمة الحلوانی عندنده
جائز و اگر ذهب (۵) و قندن خوف ایدیلوبده اندن غیریبی بولنمز
ایسه لازمدر. خلافاً لامام ابی یوسف ﴿حاجی﴾ تصدقایی معناسنه
اولان نیت. تیممه فرض و وضوءده مستحیدر ﴿قدروی﴾ تیممک
رکنی مرور ایلدیگی اوزره ایکیدر. بری ضربتان و دیگری استیعاب
محلدر. شرطی الی اولوب بونلرده نیت. مسح اصابع ثلثه و یا ده از یاده.
وجه ارض. طهارت محل. فقدان ماء. دن عبارتدر. سانی دخی
باطن کفین ایله وجه ارضه ضرب و اقبال و ادبار کفین و نفضر (۶)
کفین و تفریح اصابع (۷) و بسمله و ترتیب و ولا اولمق اوزره
سکزدر ﴿در مختار و غیره﴾ جواز صلات حقنده شرط اولان نیت.
طهارتسز صحیح اولیان عبادت مقصودهیه تعلق ایدن نیتدر. ایمدی
دخول مسجد و مس مصحف و یا اذان و اقامت ایچون نیت اولنهرق

(۱) ذهب. التون (۲) فضه. گوش (۳) غبار. طوز (۴) مدقوق.
دوگمش (۵) ذهب. کیتک (۶) نفضر. سیلکمک (۷) تفریح اصابع.
بر مقلری آحق

تیمم ایدلسه انکله نماز قیامناز ﴿درر﴾ تیممده مطابقا طهارتہ نیت اولنسه بونکله هر صلاتی ادا جائز در ﴿حاجی﴾ وضوئی ناقض اولان تیممی ده نقص ایدر . تحصیلنه واستعمالنه قادر اولمق شرطیله رؤیت ماء (۱) دخی تیممی ناقضدر ﴿قدوری﴾ استعمالنه قادر اولدینی ماء طهارتہ کافی ودفع عطش گبی حاجتدن زیاده ووافی اولمق لازمدر . بویله دگلسه توحی اولمیوب تیمم ایدیلور ﴿درر﴾ استعمالنه قدرت وار ایکن گرک تیقظ (۲) گرک نعاس (۳) حالرنده موضع ماء (۴) مرور (۵) ایله مک دخی تیممی نقص ایدر ﴿درر﴾ تیمم الحق وجه ارضدن عبارت اولان صعید طیب ایله اجرا اولنور وجنس ارضدن اولیان شی ایله جائز اولمز . بناء علی ذلک فضه وزهب گبی لیتی (۶) قابل وشجر (۷) گبی احتراق (۸) ایله رماده (۹) متحول اولان شیر ایله بلا غبار . تیمم ایلمگه جواز یوقدر . خلافاً للامام محمد ﴿زیلعی﴾ اول وقت صلاتده صو بولمیوبده آخر وقتده مانک وجودی امید اولندیغی تقدیرده آخر وقتہ قدر صلاتی تأخیر ایله مک مستحبدر . شاید آخر وقتہ دگین صو بولنور ایسه توحی اولنوب بولنه منر ایسه تیمم ایدیلورک نماز ادا اولنور . بوتیمم ایله فرائض ونوافلدن قصد اولنان صلاتی قیلمق جائز اولور ﴿قدوری﴾ وجود مائه ظن غالب اولسه ویا معموره ده بولنسه یاخود بر مکلف عدل بوحوالیده صو واردر

- (۱) رؤیت ماء . صوبی گورمک (۲) تیقظ . اوبانق اولمق (۳) نعاس . ایلمز غائمق (۴) موضع ماء . صویک اولدینی بر (۵) مرور . گچمک (۶) لیت . بومشاقق (۷) شجر . اغاج (۸) احتراق . یانمق (۹) رماد . کول

دیوخبر ویرسه جوانب اربعه دن اوچ یوز خطوه مقداری محله دگین مائی تحرری واجبدر ﴿حاجی﴾ جنازه حاضر اولوبده وضوئه اشتغال حبسیله نمازک فوتندن خوف ایدلسه ولی جنازه اولیانلر ایچون تیمم جائز اولور . اشتغال طهارتدن ناشی بیرام نمازینک فوتندن قورقلسه کذلک تیمم ایدیلور . بحسب الاقتضا طهارتہ مشغولیت سببیه صلات جمعه نک فوتندن خوف ایدلسه بیله تیمم جائز اولمدیغندن همان توحی اولنوب اگر یتشه بیلور ایسه جمعه نمازی ادا ویتشه مدیگی حالده صلات ظهر ایفاقلنور . بیرام نمازی قیلنور ایکن حدث واقع اولسه در حال تیمم ایدیلوب بنا اولنور . صلات جمعه ووقتیه فوت اولماق ایچون تیمم ایله ادا جائز اولماز . زیرا بونلرک خافلری واردر که جمعه نک خلفی ظهر آخردن ووقتیه نک قضادن عبارتدر ﴿درر﴾ فوت وقتدن قورقلور سه نماز . تیممله قیلوب بعده اعاده ایدمک احوطدر ﴿حاجی﴾ مسافر راحله سنده اولان مائی اونوده رق تیمم ایدوب ایفای صلاتدن صگره صوبی تذکر ایسه امام اعظم وامام محمد حضر تدرینه گوره صلاتی اعاده لازم گلمز . خلافاً لامام ابی یوسف ﴿قدوری﴾ غیریبی رینک راحله سنه صو قویسه ده بوندن صاحب راحله نک معلوماتی اولمدیغی حالده تیمم ایدرک نمازی قیلسه اتفاقاً اعاده صلوۃ اقتضایتمز ﴿درر﴾ محل قریبده وجود مائه ظن غالب اولسه طلب و تحری ایتمکسزین تیممه جواز یوقدر وعکسی تقدیرده متیممه (۱) تحرری (۲) ماء لازم دگلدر . رفیق عننده صواولدینی بیانور ایسه قبل التیمم طلب اولمق مناسب اولوب منع اولندیغی حالده

- (۱) متیمم . تیمم ایدن (۲) تحرری . ارشدر مق

تیمم ایدیلرک نماز قیلنور ﴿قدوری﴾ رفیق نزدنده وجود مائی بیلوبده آندن طلب ایندیگی حالدده رفیق صوبی منع ایلسه و یا نمن مثلندن زیاده ویرمک ایسترسه یا خود نمن مثیله ویرمک جک اولوبده طالبک قدرتی اولسنه تیمم جائز اولور . حین طلبده ارقداشی صوبی دریغ ایلمسه و یا نمن مثیله ویرمک استیوبده طالبک آتی آلمغه قدرتی بوانسه تیمم اولنماز . قبل الطلب تیمم ایدلسه مختار هدایده جائز و مختار مبسوطده غیر جائز در . اکثر اعضای مفروضه سی مجروح اولان مسلم . تیمم ایدوب اقل اعضای یاره لو بولنان کیمسه غسل صحیح (۱) و مسح جریح (۲) ایدر . زیرا غسل ایله تیممک جمعی تجویز اولنماشدر ﴿درر﴾

—۵۵—

باب التتجی باب

خفین (۳) اوزرینه اولنه جق مسحه متعلقدر

موجب وضوء اولان هر حدثن خفین اوزرینه بر کره مسح ایتمک سنت مشهوره ایله ثابتدره . لکن خفینی طهارت کامله اوزرینه لبس ایتمک و تمام طهارت وقت حدثه اولمق شرطدر ﴿قدوری﴾ چونکه محدث اولان آبدست آلمزدن اول ایاقلرینی یبقایوب خفینی گیدکدن صکره حدث واقع اولسی اوزرینه اعضای باقیه وضوئی غسل ایلسه مستلرینه مسح ایده مز . نقط وقوع حدثن (۱) صحیح . صاغلم (۲) جریح . یاره لی (۳) خفین . خفک تنیه سی که مستلر دیمکدر

اول وضوئی اتمام ایله طهارت کامله حاصل اولمش ایسه مسح ایلر ﴿حای﴾ معذور اولان حین انقطاع (۱) سیلانده مستی گیر ایسه صحیح گیدر والا وقت ایچنده مسح ایدوب بعد خروج الوقت غسل ایدر ﴿ملتق﴾ مسحده شرط . خف . طبوغی ستر ایتمک . قدمدن منفصل محل اولماق . خف ایله یروجه معتاد بر فرسخ و یا دها زیاده بر یوریمک ممکن اولمق . اوزره اوچدره ﴿در مختار﴾ مقیم . بعد الحدث بر گون و بر گیجه یعنی یگر می درت ساعت و مسافر اوچ گون اوچ گیجه یعنی یتیمش ایکی ساعت مسح ایتمک جائز و مسحک ابتدایی حدثک عقیندن معتبردر . مسح . ده سنت وجهله خفینک اوزرینه بر مقلربنی آچوب خطوط اولدینی حالدده اصابع قدمک (۲) باشلرندن ابتدا ایله ساقه دوغری بر کره مد ایتمک لازم و اصابع یددن اوچ بر مق مقداری وضع ایله مک فرضدر ﴿قدوری﴾ یالکز کفی یا خود مع الاصابع کفی وضع ومد ایتمک حسن و جمیع ید ایله مسح ایلمک احسن اولدینی خلاصه ده بیان اولنماشدر ﴿حای﴾ یالکز رؤس اصابع (۳) ایله مسح ایتمک تقاطر ماء شرطیله جائزدر ﴿منیه﴾ هربری ماء جدید ایله اولمق اوزره بر اصبع ایله اوچ کره مسح ایدلمگه جواز و ارایسه ده سننه مخالفدر ﴿منح﴾ آیاق بر مغدن طولاً و عرضاً اوچ صغیر بر مق ظاهر اوله جق مقداری خرق (۴) کیری اولان خف اوزرینه مسح جائز اولمز ﴿قدوری﴾ نفس اصبع . ظاهر ایسه مقدار صغیر . معتبر اولیوب بلکه نفس ظاهره اعتبار اولنور (۱) انقطاع . کسملک (۲) قدم . آیاق (۳) رؤس اصابع . بر مقلرک باشلری (۴) خرق . بیرتیق

﴿حلی﴾ اعتبار . خف واحد اولوب ایکی خفده اولان خرقت مجموعی اوج پرمق قدر اولسه بيله مسح جائزدر ﴿ملتق﴾ اگر حال مشیده خرقدن اوج پرمق ویا اوج پرمق مقداری ظاهر اولوب حال وضعده گورنمز ایسه مسحه مانع اولور ﴿درر﴾ اوزرینه غسل فرض اولان جنب ایچون مسح ایلمگه جواز یوقدر . یعنی قبل الجنابة ایاقلرینی غسل ایدوب طهارت کامله اوزرینه لبس خفین ایلمش اولسه بيله مطلقا معتبر اولیوب حین غسلده مستلرینی چیقاروب ایاقلرینی دخی ییقامق لازمدر . ناقض وضوء اولان شیلر مسح خفینی دخی نقض ایدر . كذلك مستلرینی چیقارمق ومدت مسح . تمام اولمق دخی ناقضدر ﴿قدوری﴾ قدمک اکثری ساقه دک خروج ایتک قول صحیحده مسیحی بوزار . امام ابی یوسف عندنده اکثر عقبک (۱) خروجی دخی ناقض مسحدر ﴿درر﴾ موضع مسحده ظهر قدمدن اوج پرمق مقداری قالوب باقیسی منفصل اولسه مسح . باطل اولیه جفی امام محمددن مروی واکثر مشایخ انک رأی اوزرینه متفقدر ﴿حلی وکافی﴾ کافیده بیان اولندیغی اوزره قدم . موضعده دوردیغی حالده اوکجه دخول وخروج ایتسه مسح بوزلمز ﴿درر﴾ ایکی مستلرک اوزرینه مسح اولندقدن صکره مستلرک ایچروسنه صو داخل اولهرق طپوغه ویا اکثر قدمه بالغ اولور ایسه مسح . باطل اوله جفی ظهیریده مسطور و ذخیرهده هو الاصح دینلدیگی وابتلال (۲) قدم علی کل حال . مسیحی ابطال ایتیه جگی دررده مذکوردر . تنورده

(۱) عقب . ایغک اوکجه سی (۲) ابتلال . ایصلا تملق

دخی قول اخیره هو الاظهر دینلمشدر . لکن آیغک جمله سی ویا اکثر موضعی ایصلنمش اولور ایسه مسح بوزیله جفی وغسل ومسحک بینی جمع اولنسون ایچون خفینی نزع ایدرک ایکی آیغی دخی ییقامق لازمگه جگی حلی ده محرردر . مسح . مدتی تمام اولدقدن نزع خفین حالده شدت برد (۳) سبيله تلف قدمدن خوف ایدیلورسه تیم اولنور ﴿حلی﴾ مدت مسحک ختامنده آبدستلو بولنیلور ایسه خفینی نزع ورجائی غسل ایله آبدست تمام اولور . مسح . مدتک انقضاسندن اول آبدستلوا یکن خفین . قدمیندن اخراج ایدلسه ینه وجه مذکور اوزره معامله اولنور * حدث . واقع اولدقجه بقیه وضوئی یعنی اعضای باقیه یی غسل لازم اولمز . لکن اعاده وضوء ایله مک حسندر . مقیم ایکن مسحه بدأ ایدیلوبده برگون و برگیجه دن مقدم مسافرت اولنور ایسه اوج گون و اوج گیجه تمام اولنجیه قدر مسح ایدیلور . مسافر ایکن مسحه ابتدا ایدیلوب بعده اقامت اولندقدن برگون و برگیجه ویا دها زیاده جه مسح اولندیه خفینی اخراج ایله ایاقلری ییقامق لازمدر . برگون و برگیجه دن اکسک اولهرق مسح اولسه استیلورسه برگون و برگیجه اتمام ایدیلور . ﴿قدوری﴾ مسئله صور خمسة آتییه شاملدر * شویله که: سفر مقیم . قبل المدة الحضرية . وسفر مقیم . بعد المدة الحضرية . و اقامت مسافر . قبل المدة الحضرية . و اقامت مسافر . بعد المدة الحضرية . و اقامت مسافر . بعد المدة الحضرية . دن عبارتدر * آبدست ایله لبس (۱) اولنمش

(۱) برد . صفوق (۲) لبس . گیمک

خفك اوزرينه چز مه ويا قالچين گيلسه اگر حدندن مقدم ايسه
چز مه ويا قالچين اوزرينه مسح جائز و حدندن صكره ايسه انلري
نزع ايله مستلره مسح لازمدر ﴿منية و غيرها﴾ قبل الحدث
چز مه لر لبس ايديلوب اوزرلرينه مسح اولسدقندن صكره
چز مه نك بري چيقارلسه ايكيستك دخي مسحي باطل اوله جغندن
شو حالده قول اصحه كوره احد خفنه و چيقارليمان جرموق
(۱) آخره مسحي اعاده ايجاب ايدر . ديگر قولده چيقارليمان
چز مه دخي نزع ايديله رك خفنه مسح ايتك لازمدر ﴿درر﴾
چز مه ويا قالچيني مسح حالده اوزرنده اثر نجس بولماق الزمدر
والا مسح صحيح اولماز . خفين صاغم اولسه بيله خرق فاحشي
اولان چز مه اوزرينه مسح اولمز ﴿منية﴾ امام اعظم حضر تلرينك
عندنده چوراب اوزرينه مسح جائز اوليوب مگر كهي (۲)
ستر ايله جك موضعه دك قالين وصيق چورابه جلد قابلو اوله
ياخود طباني جلد ايله محفوظ يعني مستكي اتى وبلكه اوستي ده
دری ايله قابلاشمش بولنه . صاريق و قاقووق و باش و يا يوز
اورتوسي والديوان و امثالي اوزرلرينه مسح . تجويز اولنما مشدر
﴿قدوري و غيره﴾ كچه دن اتخاذا اولنان قالچين اوزرينه ستر
كعب . شرطيله مسح . جائزدر ﴿منية﴾ عظم منكسر (۳) اوزرينه
وضع اولنان جبیره (۴) بلا وضوء باغلاشمش اولسه دخي
مسح ايديلور . اگر برؤنام (۵) حاصل اولمزدن اول جبیره ساقط

- (۱) جرموق . چز مه (۲) كعب . طيق (۳) عظم منكسر .
قيلش كيك (۴) جبیره . بدنده قيريق و چيقق اعضاي صاردقلى تحتل
(۵) برؤنام . بتون بتون ابو اولق

اولور ايسه مسح . باطل اوليوب فقط برؤنامدن صكره صارغى تحتلري
دوئديكي تقديرده مسح بوزيلور ﴿قدوري﴾ موضع جبیره يه
مسحندن عجز بولمديني و ضررندن خوف اولمديني حالده ممكن ايسه
صارغى چوزيله رك انك محله مسح لازم و بوضو رتده صارغى تحتلرينه
مسح . غير جائزدره . مسح جبیره ده تثليث و نيت شرط دگلدر ﴿درر﴾
چبان و ياره اوزرينه وضع اولنان خرقه يه (۱) و بونك اوزرنده
اولان عصابه يه (۲) مسح . تجويز اولندي و اكثر عصابه يه مسح
كافي اولديغندن استيعاب . شرط قلمدي . صارغى اره سنده ظاهر
اولان بدني مسح كفايت ايدوب غسل ايجاب ايتمز ﴿درر﴾ شق
قدمده مرهم اولوبده تحتله صونفوذ ايلمز ايسه ظاهرينه اجراي
ماء ايله اکتفا اولنور ﴿ملتقى﴾ جبیره اوزرينه من غير ضرر
مسحي ترك ايله مك امام اعظم حضر تلى عندنده جائزدر
خلافاً للامامين ﴿منية﴾

يدنجي باب

حيض و نفاسه دائر مسائل مخصوصه بياندهدر

استعِذْ بِاللَّهِ وَيَسْأَلُونَكَ عَنِ الْمَحِضِ قُلْ هُوَ أَذًى ﴿الآية﴾
اشبو آيت جليله ايله نسايه حيض حالده مقارنت و مجامعت نهی
بيورلمشدر . ﴿أَقَلَّ الْحَيْضُ ثَلَاثَةَ أَيَّامٍ وَأَكْثَرُهُ عَشْرَةُ أَيَّامٍ﴾
حديث شريفی دلالتيله مدت حيضك اقلی اوج گون و اوج كيجه
(۱) خرقه . بزبارچه سي (۲) عصابه . صارغى

یعنی یتش ایکی ساعت و اکثر مدتی اون گون و اون گیجه دن عبارت اولان مدت . در . مدتین مذکور تیندن ناقص و یا زائد اولور ایسه حیض اولیوب استحاضه صاییلور ﴿قدوری و غیره﴾ مدت حیضده مرأه نك بیاضدن ماعدا قرمزی و صاری و طپراق و قاره و یشیل رنگلره مائل و یا بولانق اوله رق گوردیگی الوان سته نك (۱) جمله سی حیضدر . حیض . صلاتی حائضدن اسقاط و صومی اوزرینه حرام ایدر . بو تقدیرده صلاتی قضا ایجاب ایتمز ایسه ده صومی بای حال قضا ایله مك واجبدر ﴿قدوری و غیره﴾ حیض . نفس و جوب صلاتی و یا کز صحت ادای صومی منع ایدوب و جوب صومی منع ایلمز . بناء علیه بیان اولندیغی وجهله حائضه قضای صلات ایجاب ایلمیوب انجق قضای صوم لازم اولور ﴿درر﴾ حائض . مسجده دخول و بیت اللهی طواف و تلاوت قرآن ایله مز . زوج . حائض اولان زوجه سته قربان (۲) ایده مز ﴿قدوری﴾ حائضی نقیل جائز ایسه ده مباشره فاحشه و نفخیده جواز یوقدر . امام محمد غسندده یالکز موضع دمدن اتقا الزمدر ﴿درر﴾ محدث و حائضك مصحف شریفك بیاض محانی مس ایلملری جائز دگلسته ده منفصل اولان غلافی ایله اخذ ایتملرینه جواز وارد در کما مر ﴿قدوری﴾ لایق اولان بلا ضروره یا بشماقدر . غلاف . متصله و منفصله شامل اولوب انجق هدایده یالکز منفصل ایله مس . تجویز اولمشدر . جنب و خائضه دعا قصدیله قرائت و تسبیح و زیارت قبور جائزدر . لکن (۱) الوان سته . التي رنگلر (۲) قربان . یقین اولن که مجامعتدن عبارتدر

مضمضه و غسل یددن مقدم اکل و شرب مکروهدر ﴿حالی﴾ حائضك دمی اون گوندن اول منقطع اولور سه غسل ایلمدکجه یا خود بر وقت صلات کامله مرور ایتمدکجه وطی اولنمی جائز دگلدر . اگر اکثر مدت حیض اولان اون گونك ختامیله دم منقطع . اولمش ایسه قبل الغسل مجامعت تجویز اولمشدر ﴿قدوری﴾ وقت صلاتدن مقصوده غسل ایله جك و لبس ثیاب ایله نماز قیله جق قدر مدت اولدیغی وقایه و درر و درر مختارده مصر حدر . عادتندن دون اوله رق حیض . اون گوندن اول منقطع اولدقده حائض . غسل ایلمش اولسه بیله وطی حلال اوله مز ﴿ملتقی﴾ بوصورته آخر وقته دگین غسلی تأخیر واجب و اگر حیض . عادتق مقداری و یا اکثر اولور یا خود حائض . مبتدئه (۱) بولنور ایسه تأخیری مستحب اولور . اوچ گوندن اقلده حیض . منقطع اولسه صلات . آخر وقته دگین تأخیر اولنور . شاید فوت صلاتدن خوف ایدیلور ایسه یالکز توضع اولنه رق نماز قیلنور . اون گون ایچنده دم . عودت ایلدیگی تقدیرده طهارتك حکمی باطل اولور ﴿درر﴾ مدت حیض اولان ایام عشره ایچنده ایکی دم بیننده اولان طهر فاسد . دم جاری حکمنده در ﴿قدوری﴾ امام اعظم حضر تلرندن مرویدر که مدت حیضده استیعاب دم . بالاجماع شرط اولیوب نصاب زکات گبی انجق اولی و آخری معتبردر ﴿درر﴾ اقل طهر . اون بش گون اولوب اکثرینه اختلاف عادت حبیلله نهایت یوقدر ﴿قدوری﴾ استمرار (۲) دم حالنده (۱) مبتدئه . حیض گورمگه یکی باشلایان قادی (۲) استمرار . دوام ایتمك

تعیین نصاب عادت قصد اولنور ایسه اصح اولان بر ساعت نقصان اوله رق آلتی آی طهر. اعتبار اولنور زیرا عادت. حاملک طهرندن غیر حاملک طهرینک نقصانیدر و مدت حملک اقلی ده آلتی ماهدر. بناء علیه مدت حملدن نقصان اولان شی اول بر ساعت اولوب بو حالده مسئله شویله تصویر اولنور. مرأه حیضه ابتدا ایدرک اون گون دم والتی آی طهر گوروب بعده دم. استمرار ایسه آنک عدتی اون طقوز آیدن اوچ ساعت اکسک اوله رق منقضیه اولور چونکه عدت مذکوره اوچ حیضه و هر حیض اون گونه و كذلك اوچ طهره و هر طهر ده آلتی ماهدن بر ساعت نقصان مدته محتاجدر درر و غیره زمان طهری الی آی و یا دهها زیاده امتداد آیدن مرأه معتاده حقننده دخی تعیین عدت بو وجهلهدر (رساله برگوی) دم استحاضه مرأه آنک اوچ گوندن ناقص و یا اون گوندن زائد گوردیگی دمدر که حکمی دائم جاری اولان برون قانی گی اولدیغندن کتدوسی صاحبه العذر عد اولنه جنی جهتله صلاتی و صومی ادا ایلمسی لازم و وطنی حلال اولور. جریان دم اون گونی تجاوز ایلسه مرأه آنک عادت معروفه حیضی وار ایسه ایام عادته رد اولنوب زیاده سی استحاضه دره و مرأه مبتدئه مستحاضه اولدیغنی حالده بالغه اولسه حیضی هر شهر دن اون گون اعتبار اولنوب باقیسی طهر و استحاضه صاییلور قدوری محیره یعنی عادتی ناسیه اولان مثلاً هر آیده حیض گوردیگی بیلوب فقط ایامی تعیین ایده میان مرأه اول استمرار مددن اعتباراً اوچ گون نمازی ترک ایدر بعده یدی گون هر بروقت ایچون برر غسل ایله نمازی قیلر و باقی یگرمی گونده هر بروقت برر آبدست آوب اداء صلوٰه

ایلر. اشبو یگرمی گون ایچنده زوجیه. قارنت جائز اولور. اوچ گون صلاتی ترک ایلمسی اوگونلرده حیض حالده اولدیغنده تیقن ویدی گون هر بروقت ایچون برر غسل ایتمسی ایام مذکوره ده حیضله طهر ییتنده و حیضدن خروجه ترده بولمنسنه و یگرمی گونده هر بروقت برر آبدست آلمسی طهره یقین حاصل اولمنسه بناء در در مختار و حاجی بو مقوله عادتی ناسیه اولان قادین رمضان اورجنی طوتار. اگر حیضک ابتدای گیجه دن اولدیغنی معلومی ایسه بعد الرضای یگرمی و اگر معلومی دگلسه یگرمی ایکی گون قضا ایلر. حیضک بدایتی گیجه دن اولدیغنی محیره نك معلومی اوله مامسی ابتدای حیضک گوندزدن معتبر بولمنسی و بوده انتهای حیضک دخی ینه گوندز اولمنسی استلزام ایله جگندن یگرمی ایکی گون قضای صوم رمضان لازم اولور. ایکی قات قضا دن بری فساده کیدن ایام حیضه عائد اولوب دیگر یده قضا اولان گونلرک دخی ایام حیضدن اولمنسی احتمالندن ناشی احتیاطاً زیاده ایدیلان ایامدن عبارت قالور در مختار و طحاوی و حاجی مستحاضه و سلس بوله (۱) مبتلا و دائماً بورنی قلیان و یاره سی اولوب قانی ساکن اولیان عذر و ابتلا اصحابی هر وقت صلات ایچون توضع ایدوب اول وضوء ایله استدکاری فرائض و نوافلی وقتی ایچنده ادا ایدرلر. وقت خروج ایتدکده وضو لری باطل اولوب صلات آخری ایچون بشقه آبدست آلق اوزر لرینه لازم اولور قدوری ابتدای عذر. اوقات خمسهدن بروقت معینه آبدست آوب صلات فرضی

(۱) سلس بول. بر علتدر که ادراری طومق ممکن اوله ماز

اذا ایده جك قدر حدثن خالی زمان اولیوب بلکه مبتلا اولدیغی
عذر مخصوص موجود اولغله حاصل اولور . بقای عذر . وقت
صلاّتک بعض اجزا سنده عذر مخصوصک وجودیله وقوعبولور .
زوال عذر . وقت صلاّتک جمیع اجزا سنده عذر موجودک
انقطاعیله ثابت اولور . بو تقدیرجه ابتداده دوام وجود عذر
وزوالده دوام عدم عذر . شرط اولوب بقاده برکوره وجود عذر .
کفایت ایدر ﴿حاجی﴾ صاحب عذرک وضوسی امام اعظم و امام محمد
حضر تدریجاً خروج وقت ایله باطل اولوب امام ابی یوسفه گوره
خروجی و دخولی ایله و امام زفر نزدنده یالکوز وقتک دخولیله
باطل اولور . بوضورتده بعد الطلوع اولان وقت مهمل . امام
زفره گوره وضوء صحیح مبطل اولیوب فقط ائمه ثلثه عندلرنده
وضوء ابطال ایده جگی جهته بشقه جه آبدست الموق لازمگور .
امام اعظم و امام محمد حضر تدریجاً خروج وقت اولدیغندن وقت مهمله
الناس وضوء ایله صلاّت ظهیری و جمعیه ادا صحیح اولوب
لکن امام ابی یوسف و زفر عندلرنده دخول وقت سببیه صحیح
اولمز ﴿حاجی﴾ مجروح اولانه تقلیل دم ایچون یاره بی بر شیلته
باغلامق واجبدر . بو طریق ایله خروج دمی منع ایلسه صاحب
عذر اولمقدن خلاص اولور . بنابرین قان آدی ران عذر صاحبی
عد ایدلمز ﴿حاجی﴾ وجودنده یاقی آچان کسه جرحنی باغلا یوب
صارغیدن خروج دمی منع ایلسه معذور صایلمیه جغنی شرنبالالی
بیان ایتشددر . صاحب عذرک درهمدن زیاده ثوبنه دم اصابت
ایلسه بعد الغسل ادای صلاّت ایدنجه یه قدر تکرار اصابت ایتیه جگی
ظن غالبی ایسه غسلی واجب اولور ﴿منیه﴾ نفاس . ولادت .
عقبینده خروج ایدن دم مخصوصدر . حاملک حین خلمده
وولدک خروجندن اولجه حال ولادنده گوردیگی قان . دم

استحاضه در . نفاسک اقلنه حد یوق ایسه ده اکثری فرق گون
اولمق اوزره معتبر اولوب بوندن زیاده سی دم استحاضه صاییلور .
مراة نک دم نفاسی اگر قرق گونی تجاوز ایدر ایسه مقدّمکی ولادتنده
اولان عادت نفاسی معروفه اولدیغی حالدده معلوم اولان ایام عادتنه رد
قلنور و زیاده سی استحاضه عد اولنور (مثلاً بر قادی نک عادت سابقه سی
اوتوز بش گون ایکن عادت لاحقه سی قرق بش گونه بالغ
اولسه اوتوز بش گون نفاس عدا و لنوب باقی قلان اون گون ایچون
نمازی قضا ایتک لازمدر) اگر مراة نک عادت سابقه سی
یوغیسه یعنی ایلک حملی ایسه ابتدای نفاسی قرق گون اولوب
باقیسی گدک استحاضه اعتبار ایدیلور . بطن واحدن ایکی ولد
تولد ایلد کده امام اعظم و امام ابی یوسف حضر تدریجاً گوره نفاس .
ولد اولک عقیب ولادتنده ظهور ایدن دمدن و امام محمد و زفر
عندلرنده ولد ثانی بی متعاقب خروج ایلیان خوندن (۱) معتبردر
﴿قدوری﴾ انقضای عدت نفاس بالاجماع ولد اخیردن اعتبار
اولمشدر ﴿ملتق و غیره﴾ عادت حیض و نفاس امام ابی یوسف
نزدنده مرّة واحده ایله ثابت و منتقل اولور . امامینه گوره گرک
ثبوت گرک انتقالده تکرار لازم و عادت . اعاده بی مستلزم در .
بونلرک ادله تفصیایه لری کتب معتبره فقهیه ده بیان اولمشدر
﴿ملتق﴾ باش وال و آیق و یرمق و طرنق و قول گگی بعض
اجزای عضویه سی ظاهر اولان سقط (۲) . ولد صاییلهر قانی نساء
و جاریه ام ولد (۳) عدا و لنور و ولادته معلق اولان طلاق اول سقط

(۱) خون . قان (۲) سقط . دوشوک (۳) ام ولد . حملی و یاد و غریبی
ولدینی افندیسنک سندندر دیواقرار ایتدیگی جاریه دینورکه حکم شرعیه
مدبره گگی اولوب فقط ام ولد جمیع مالدن و مدبره ثلک مالدن ازاد اولور

سبيله واقع و بویوزدن عدت منقضیه اولور ﴿ملتقى وغيره﴾
 سن ایاس (۱) بر مدت ایله محدود اولیوب سن مثلیله معتبردر
 اول سنده حیض گور میان مرأهك انقطاع حیضیه حکم اولور
 اگر بعد الانقطاع دم ظاهر اولور ایسه حیض اعتبار قانور
 سن ایاس بر قولده محدود اولغله الی ویا الی بش وقول آخرده
 التمش سنه ایله تحدید ایدیلور ایاسك مدتندن صکره مرأهك رؤیت
 ایتدیگی قان قول مختارده اسود (۲) واحمر (۳) اولدینی حالد
 حیض اعتبار اولوب دگل ایسه استحاضه عد اولمشدر ﴿درر﴾

سکزنجی باب

انجاسه متدائر مسائلی حاویدر

مصلی به بدن و ثوبی (۴) واوزرینه نماز قیلدینی مکانی ادای
 صلاته مانع نجاستدن تطهیر وپاك ایتك فرض وجواز صلاتك
 شرطیدر ماء مطلق وکندوسیه ازاله نجاست ممکن اولان
 سرکه وگل صوبی گبی هر مایع طاهر ایله تطهیر نجاست جائزدر
 ﴿قدوری﴾ یاغ گبی سود دخی مظهر دگلدر چونکه کندوسنده
 دسومت اولدیغندن سرکه مثللو صیقيله میوب ثوبده و غیریده
 اثری باقی قالور ظن غالب اوزره طهارتک غلبه سنه قدر غسل
 ایدلمکله شی متنجس طاهر اولور زیرا غلبه ظن ادله شرعیه دندر

(۱) سن ایاس قادیلرک چوجق دوغر مقدن قالدینی زماندرکه اومقوله
 قادینه ایسه دینیلور (۲) اسود قاره (۳) احمر قرمزى (۴) ثوب
 اوروبه

﴿درر﴾ شی طاهر مخلوط (۱) جامد اولورسه اوصاف ثلثه که
 لون وطم ورائحه دن عبارتدر بونلر متغیر اولسه بیه بقای رقت
 شرطیه انکله طهارت یعنی وضوء و غسل وازاله نجاست تجویز
 اولمشدر زیرا صورت مذکورده غلبه صوده در مخلوط
 طاهر مایع اولوب (مقطر و مستعمل ماء) گبی هیچ بر صفتده
 صویه مخالف اولسه بونلر ده من حیث الاجزا غلبه معتبر
 اولدیغندن اگر جمیع صفتده مائه مخالف اولوبده اکثر اوصافی تغیر
 ایلش ایسه وضوء غیر جائزدر چونکه بونده من حیث الوصف
 غلبه مخلوطده در اگر لبن و ماء بطیخ (۲) مثللو بعض صفتده
 صویه مغایر اولور ایسه مخالف اولدینی صفتده غلبه به اعتبار
 اولور مثلا لبن ایله مخلوط ماءده لون وطم جهتندن غلبه سودده
 ایسه آبدسته جواز یوقدر عکسی تقدیرده وضوء جائز اولور
 و ماء بطیخ ایله مخلوط اولان صوده طعم جهتندن قغیسی غالب
 ایسه آکا اعتبار ایدیلور ﴿درر﴾ جرملی اولان نجاست خفه
 اصابت ایدوب قور یسه وجه ارضه مبالغه ایله سوریلدرک ازاله
 ایدلکده طهارت مطلوبه حصولولور ﴿قدوری﴾ طر نقله
 حك ایتك وتحته ایله قازیمق و اووشدیرمق صورتلریله ده پاك اولور
 ﴿حاجی﴾ امام محمد عندنده قوری ویا یاش اولسون دلک ایله پاك
 اولمز و امام ابی یوسفه گوره قور و ماسه دخی رایحه سی قالماق
 شرطیه او غماقله ازاله و تطهیر اولور و به یفتی ﴿ملتقى﴾
 متنجس اولان یرمق صو بولم دینی حالد اوج کره لمس (۳)

(۱) مخلوط قارشمش (۲) بطیخ قارپوز (۳) لمس یلامق

ایله طاهر اولور ﴿در مختار﴾ خُفَّه بَوْلٌ مثلاًو جر مسز نجاست مایعه اصابت ایسه دفعات ثلثه ایله گوزلجه غسل ایدیلهرک هر دفعه سنده صیقیلور . عصر ممکن اولماز ایسه هر غسل ایدلجه بر کرده قور و تمق لازمگور ﴿منیة﴾ منی نجس غلیظ اولدیغندن رطبی (۱) غَسْلُ اِیْلَهْمَكْ واجبدر . منی ثوب اوزرنده بولنوبده یبوسته (۲) تحول ایلمش ایسه ال ایله اوغوله رق ازاله ایتک کفایت ایدر ﴿قدوری﴾ (ماء طاهر . موجود اولدیغی حالد یبقامق احسندر) آینه و قلیج و سائر مُصِیْقَل (۳) اولان شیرله نجاست . اصابت ایسه گرک رطب گرک یابس اولسون مسح ایله اکتفا اولور . وجه ارضه نجاست . اصابت ایدوبده بعده شمس ایله قورویه رق اثری زائل اولسه اول ارض اوزرنده نماز قیلحق جائز اولور ﴿قدوری﴾ لکن تیمم . صعید طیب اقتضا ایلدیگی جهته تجویز اولنماشدر ﴿درر و قدوری﴾ فرش (۴) اولمش طوغله و نصب ایدلمش قامش و قطع اولنماش شجر و قوری و یاش اوت دخی روی زمین منزله سنده اولدیغندن بولرنده بولنان نجاست قورویه رق اثری کلیاً زائل اولدقده طاهر اوله جفنه بناءً اوزرلرنده اداء صلوٰه جائز اولور . اگر طوغله و قامش منفصل (۵) و شجر و اوت مقطوع (۶) بولور ایسه غسل اولندججه بولنرک اوستنده نماز قیلناز ﴿ملتقى و غیره﴾ دم و غائط و بول و خرگی نجاست غلیظه دن بری بدن و یا ثوب اوزرینه درهم

(۱) رَطْبٌ * یاش (۲) یُبُوسَتٌ * قور یلق (۳) مُصِیْقَلٌ * جلالنش (۴) فَرَشٌ * دوشه مک (۵) مُنْفَصِلٌ * آیرلش (۶) مُقَطَّوعٌ * کسلش

مقداری و یا در همدن اکسک اصابت ایسه آنکله مع الکراهة صلات جائز ایسه ده در همدن زیاده سی ایچون جواز یوقدر ﴿قدوری﴾ نجاست غلیظه دن نجس کشیفده بر مثقالدن عبارت اولان درهم کیر و نجس رقیقه ده ال آیه سی قدری معفور در ﴿درر﴾ لحمی اکل اولنان حیوانک بولی مثلاًو نجاست خفیفه لبسه اصابت ایسه مقداری ربع ثوبه بالغ اولدججه آنکله نماز جائزدر ﴿قدوری﴾ قول مختارده ربع ثوبدن مقصود مطلق ثوب مصابک ربعیدر . بر قوله ماتجوز به الصلوة اولان ثوبک ربعی و دیگر قوله دخی اصابت ایتدیگی ذیل (۱) و کُم (۲) کبی موضع معینک درنده بری و امام ابی یوسفه گوره طولاً و عرضاً بر قارش و یا بر ذراع قدر اولمقدر ﴿حلی﴾ صغیر اولسون کیر اولسون اتی اکل اولنمیان حیوانلرک بوللری و خرء دجاجة (۳) و امثالی و روث فرس (۴) و خنی بقر (۵) نجاست غلیظه در . یا کزیره سه قوشنک بولی و ترسی پاک اولوب فاره نک بولی ایله طحن اولنان حنطیه مخلوط بولنان ترسی اثری ظاهر اولدججه معفو عنه در . كذلك مفروشات و ملبوساته دائر شیرده کی بول هره دخی تحذر ممکن اولدیغندن معفو ایسه ده اوانی حقه ده بویه دگلدر . و علیه الفتوی ﴿درر و در مختار و اشباه﴾ فرس و اتی اکل اولنان حیوان بوللری و اتی اکل اولنمیان قوشلرک ترسی نجاست خفیفه در ﴿درر﴾ غسلی

(۱) ذیل * اناک (۲) کُم * بن (۳) خرء دجاجة * طاوق ترسی (۴) روث فرس * آت و بارگیر ترسی (۵) خنی بقر * صغر ترسی

واجب اولان نجاستی تطهیر ایکی صورته در * بری مرثیه اولان نجاستی تطهیر در که . عیننی و اثرینی و رایحه سنی ازاله ایتمکدر . شاید اثری باقی قالوبده ازاله سنده مشقت اولور ایسه معفودر . دیگری نجاست غیر مرثیه بی تطهیر در که . غسل ایدن کسه نک ظن غالبی ایله پاک و طاهر اولمقددر . ظن غالب . قابل عصر اولان شیده اوچ کره غسل و مرثیه ثالثه ده مبالغه ایله عصر ایتمکدن و صیقل مق ممکن اولمیان محله اوچ دفعه ماء طاهره براغیلوب هر برنده صوبی چکنجیه دک دور در مق و بعده تحفیف (۱) ایلمکدن عبارتدر * درر * حنطه متنجسه اوچ دفعه بشقه بشقه تمیز صو ایچنده ییقلماق و هر برنده قور و تمق ایله تطهیر ایدیلور * لحم متنجس . آیری آیری اوله رق اوچ دفعه سیجاق آب پاکده غلیان (۲) ایتدیر یلوب هر دفعه سنده تبرید (۳) ایدلمکله و دهن متنجس کذلک ایصنمش ماء طاهرده بشقه بشقه اوچ کره غلیان ایتدیر یلهرک وجه ماء مرتفع اولان یاغ . رفع اولمقله طاهر اولور * درر * برعضوی کدی یلاسه قبل الغسل نماز قیلماق جائز ایسه ده اولی اولان ییقامقددر * منیه * برعضوی و یا ثوبی کلب آغزینه آله بزاق (۴) و یا لعابنک اثری اوله رق بر گونه یاشاق بولمز ایسه طاهر و بو خصوصده قول مختاره گوره کلبک غضب و سکونت حالی مساوی اولدینی ظاهر در * حاجی * سجاده رطب متنجس اوزرینه سر لسه و یا ثوب یابس . رطب نجس ایله صار لسه تأثیر رطوبت ایله سجاده و ثوب صیقلدده قطره نزول ایدر ایسه (۱) تحفیف * قور و تمق (۲) غلیان * قاینماق (۳) تبرید * صفو تمق (۴) بزاق * نوکروک

نجس و نزول ایتمز ایسه طاهر در * منیه و غیرها * ثوبک متنجس اولدینی طرف اونودلمش اولسه و لوبلا تحری اولسون بر طرفنی غسل ایله پاک اولور * لکن بعد الغسل نجس اولان جانبی تحظر ایدیلور ایسه ثوب مذکور ایله قیلنان نمازی اعاده ایتمک لازمدر * حاجی * جمیع دماء (۱) نجس اولوب انجق دم شهید ایله لحم مهزول (۲) و عروق (۳) و کبد (۴) و طحاله (۵) باقی قان و بق (۶) و برغوث (۷) و قمله (۸) و سمک ده (۹) اولان قانلرله خون قلب شاة (۱۰) و دم جرح غیر سائل که . دماء عشره در بونلر طاهر در * اشباه * بناء علیه قان ایله ملطخ (۱۱) بولنان شهیدی حامل اولانک نمازی صحیحدر . فقط دم شهیدک طهارتی کندی اوزرنده بولمقله مقید اولدیغندن شخص آخرک ثوبنه بولاشسه نمازی صحیح اولمز * حوی و حلیه

طقوزنجی باب

استنجاہ دائر مسائلی مشتملدر

ریحدن ماعدا احد سیلیندن خروج ایدن نجسی ازاله دن عبارت اولان استنجا . سنت در * مخرجی تجاوز ایتمز ایسه حجر و بونک مقامنه قائم اولان خشب کفایت ایدر . مخرجی تطهیر ایدنجیه دک

- (۱) دماء * قانلر (۲) مهزول * ضعیف (۳) عروق * طمارلر (۴) کبد * قره جگر (۵) طحال * دالاق (۶) بق * سیوری سینک (۷) برغوث * پیره (۸) قمله * بت (۹) سمک * بالی (۱۰) شاة * قیون (۱۱) ملطخ * بولانمش

مسح و یا غسل ایله مک لازم اولوب عدد مسنون ثابت دگلدر
 ﴿قدوری﴾ فقدان ماء حالنده رجال . صیفده حجر اولی آردینه
 و حجر ثانی بی اوکنه و ثالثی ینه آردینه و شتاده حجر اولی اوکنه
 و ثانی بی آردینه و ثالثی اوکنه مد و نسا صیف و شتاده اولاً ادبار
 ثانیاً اقبال و ثالثاً ینه ادبار ایدر ﴿درر﴾ ماء طاهر وار ایسه
 انکله استنجا هر حالده افضل و نجاست . در همدن زیاده مخرجی
 تجاوز ایلدیگی حالده صو ایله تطهیر واجبدر ﴿قدوری﴾
 (بعد الاستنجا . بز و منديل مثلوا برشی ایله مخرجی و اطرافنی
 قوریله مق تمیزك حایدر) عائم اولمیان رجل . مخرج نجاستی ارخا (۱)
 ایدوب صول الك بر و یا ایکی بر مغنك بطیله گوزلجه بیقرار
 شویله که : اولاً اصبع و سطانی فی الجملة یوقارویه چکه رك و غسلدن
 صکره بنصرینی و بعده خنصرینی و متعاقباً سبابه سنی اصعاد ایدرك
 اطمئنان قلب حاصل اولنجیه دك غسل ایلر . مرأه ابتدا بنصر
 و وسطی بر مقلرینی جمیعاً اصعاد ایدر . گرك رجل گرك مرأه
 بعد الاستنجا ایکی اللرینی گوزلجه بیقرار ﴿درر﴾ استنجا دن
 صکره رطوبت مخرج ایله خروج ریح . قول اصحده اعاده غسلی
 موجب دگلدر ﴿نیة﴾ ستره بولنمیان موضعده ولو نهر جاری
 کناری اولسون استنجایی ترك مناسب اولور . زیرا ستر عورت
 امر طهارتدن دهها زیاده مهمدر ﴿منح و حلی﴾ ماء استنجا
 خفه اصابت ایدوبده باطن خفه تجاوز ایتدیسه محل استنجایه
 تبعاً طاهر اولدیغی منقول و رجائیه (۲) اصابت ایتسه دخی
 (۱) ارخا . کوشتمك (۲) رجلین . ایاقلر

مغفوة اولسی مأمولدر ﴿حلی﴾ مشی و یا نخج (۱) و یا جانب
 ایسره اضطجاع (۲) ایله استبرا (۳) واجبدر ﴿درر﴾ (لزوم
 و احتیاج گورندیگی و یا نك و شبهه ایلدیگی تقدیرده ذکر ینبه (۴)
 ایله احتشا (۵) احتیاطه رعایت قیلندندر) کمیک و حیوان ترسی
 و انسان و حیوان بیه جگی شی و عذر یوغیکن صاغ ال ایله استنجا
 مکروهدر ﴿قدوری﴾ قضای حاجت وقتنده قبله یه استقبال
 و استدبار ایله مکده کراهت واردر * صوده و گولگده و طریق
 اوزرنده و شجرة ثمره تحتده و نهر و بئر و حوض و مسجد
 بیننده و روزگار قارشوسنده و فاره و نملة (۶) و سائر حیوانات
 یوواسنده و قائم و مضطجع (۷) و متجرد (۸) بولندیغی حالده
 و محل توطی و اغتسالده (۹) تبوّل و تغوط (۱۰) کذلک
 مکروهدر ﴿تنویر﴾ بری آخرک ثوبنده طهارت مانع نجس گورسه
 خطارینی قبول ایده جگنه ظنی غالب اولور ایسه اخطار ایله مک
 واجب و الا دگلدر ﴿در مختار﴾



- (۱) تنخج * اوکسوررگی یا یمق (۲) اضطجاع * یانی اوزره یا یمق (۳)
 استبرا * اثر بولی کیدرمك (۴) بنبه * یموق (۵) احتشا * دولدرمق
 (۶) نملة * قارنجه (۷) مضطجع * یانی اوستنه یا تان (۸) متجرد *
 چپلاق (۹) اغتسال * بیقائمق (۱۰) تغوط * قضای حاجت انك

ایکسجی کتاب

احکام صلاته متعلق اولوب یگر می بابی مشتملدر

برنجی باب

صلوات خمسہ دائردر

اَسْتَعِذُّ بِاللّٰهِ وَاقِمْ الصَّلَاةَ الْاَيَّةُ حَافِظُوا عَلَي الصَّلَاةِ
وَالصَّلَاةِ الْوُسْطٰى الْاَيَّةُ وَفَسِّحْ لِحَالِ اللَّهِ حِينَ تُمْسُونَ وَحِينَ
تُصْبِحُونَ الْاَيَّةُ وَسَائِرَ آيَاتِ جَلِيلِهِ حَكَمَ مَنِفِي وَفَرَضَ عَلَى كُلِّ
مُسْلِمٍ وَمُسْلِمَةٍ فِي كُلِّ يَوْمٍ وَلَيْلَةٍ خَمْسُ صَلَوَاتٍ حَدِيث شریفی
مقتضاسنجه اوقات خمسہ معلومہ ده صلوات مفروضہ مشروعہ بی ادا
مکلف اولان کافہ مؤمنین و مؤمنات اوزرینہ فرض عیندر بناء علیہ
بونلری وقت وزمانیلہ و حقیلہ ادا ایدن مثاب و ترک ایلان گرفتار
عقاب اولور تارکی فاسق و نعوذ باللہ منکری کافر عدا و لنور
صلوة لغتده دعادن واصطلاح شرعده اولی تحریم و آخری
تسلیم اولان افعال معلومه و ارکان مخصوصه دن عبارتدر هجرت
نبویه علیہ افضل التحیه دن برحق سنہ مقدم رمضان شریفک اون
یدنجی جمعه ایرتسی گیجه سی لیلہ اسراده فرض اولمشدر
قبل الاسرا انحق ایکی رکعت صلات صبح و ایکی رکعت صلات
مغرب و سَبِّحْ بِالْعَشِيِّ وَالْاَبْكَارِ نص کریمیلہ فرض
بیورلمشیدی منح الغفار و مجمع الانهر فرضیتنک شرطی

اسلام . عقل . بلوغ . وسبب وجوبی صحیحہ اول وقت و معذوره
جميع وقتدر درر صلات فجرک اول وقتی صبح صادق اولان
فجر ثانیکن زمان طلوعیدرکه . افق سماده عرضاً بیاضلغک
انتشار ایلمسندن عبارتدر . آخر وقتی شمسک طلوعندن اولجه
اولان زماندر قدوری صلات ظهرک اول وقتی شمس .
خط نصف نهاردن زائل اولدینی زمان اولوب آخر وقتی امام
اعظم حضر تدرندن ظاهر روایتده فی زوالدن غیرى هر شیک
ظلی (۱) ایکی مثلنه و امامین عندنده بر مثلنه بالغ اولدینی وقتدر
قدوری قول ثانی امام اعظم حضر تدرندن دخی مروی و مختار
طحاوی « و به یفتی » قولی حاویدر . امام مشار الیهدن حسن
بن زیاد روایتده آخر ظهر . مثل واحد و اول عصر . مثاین
ایله مقدر اولوب بینهماده ناسک مابین الصلاتین تسمیه ایتدیگی
وقت مهمل ثابت اولور شرح مجمع لابن ملک فی زوالی
تعیینده اصح اقوال اولدرکه . مکان مستویده (۲) برخشبه (۳)
نصب و مبلغ ظله علامت وضع اولنوب ظل . ناقص اولدقجه ماقبل
زوال . و واقف اولدقده فی زوال . و زائد اولدیغنده نفس زوال .
تحقق ایدر شرح مجمع نقلاً عن المبسوط صلات عصرک اول
وقتی وقت ظهرک خروجی زمانی اولوب آخر وقتی غروب شمسہ
قدردر .

صلوات مغربک اول وقتی شمسک زمان غروبى اولوب آخری شفق

(۱) ظل . گولگه (۲) مستوی . دوز (۳) خشبه . تحته

غائب اولنجه يه دگيندر . شفق امام اعظم حضر تارينه گوره افق سماءه
 حمر تدنکره (۱) ظاهر اولان بياضدر . امامين عندنده حمر تدنر
 (قدوری) قول امامين شرفوارد اولان ﴿ الشفق الحمرة ﴾
 حديث شريفنه مطابق اولوب مؤخر امام اعظم حضر تارينك قول
 اولدن رجوعی دخی منقول ومصحح وبونك مفتی به اولديغی وقایه
 ودرر وسائر کتب فقهیه ده مصر حدر . صلات عشانك اول وقتی
 شفقك غیوبی زمانی اولوب آخری فجر صادق طلوع ایدنجه يه قدر
 اولان مدتدر . صلات وترك اول وقتی امام اعظم حضر تارنجه
 عشانك اول وقتی اولوب لكن ترتیب واجب اولديغی جهتله
 صلات عشا اوزرينه تقدیمی صحیح اولماز . آخر وقتی كذلك فجر
 صادقك طلوعنه دگين اولان زماندر (قدوری وغيره) امامين
 عندنده صلات وترك اول وقتی ادای عشانك صکره در . سبب
 خلاف . وترك امام اعظم حضر تارنجه فرض وامامينه گوره سنت
 مؤکده اولمسيدر . فائده خلاف ايکي موقعده ظاهر اولور .
 بری صلات وترنسيانا قبل العشاء ادا ايدلسه ويا على الترتيب قيلنان
 وترك حتى وعشانك فسادى ظاهر اولسه امام اعظم حضر تارينك
 عندنده وتر صحیح اولوب عشائي اعاده لازمگور . چونكه بويله
 بر معذرتك وقوعی ترتیبی اسقاط ايدر . امامين نزدنده وتر . عشايه
 تابع اولديغندن وترى دخی اعاده ايجاب ايلر . ديگرى وتر ايله
 سائر فرائض بيننده ترتیب شرط اولديغندن وترى قيلمدخه صاحب
 ترتيبك صلات فجرى ادا ايلمسى تجوز اولنماش وامامينجه
 فرائض وسنن بيننده ترتيبه اعتبار اولديغنه بناء بوگا جواز

(۱) حمرت . قرمز يلق

گوسترلمشدر (درر) صلات فجرى بر قوله رامى (۱)
 موضع سهمنى (۲) گوره جك وديگر قوله ايکي کره قرق
 آيت . تلاوت ايله جك قدر تأخير ايتك وظهورى ياز گوننده
 محل وموقعنه گوره بر درجه سرينك ظهور ايله جك
 وقته دك تأخير وقیش گوننده اول وقته تقديم ايله مك مستحيدر .
 شمسده تغير (۳) حاصل اولمزدن اول اولان وقته دگين صلات
 عصرى وابتهادى ثلث ليله قدر صلات عشائي تأخير و صلات مغربى
 تعجيل ايتك ويوم غيمده (۴) عصر وعشائي تعجيل وماعداني
 تأخير ايله مك كذلك مستحيدر (حاجي وغيره) صلات مغربى
 ﴿ بادروا بالمغرب قبل اشتباك النجوم ﴾ حديث شريفندن
 استدلال اولنديغی اوزره زياده تأخير تحریماً مکر وهدر . تعجيل
 صلاتدن مقصود وقتك نصف اولنده ادا ايلمكدر (مجمع الانهر) صلات
 عشائي نصف ليله دگين تأخير . مباح ايسه ده بغير عذر اندن صکره
 اداده كراهت واردر (حاجي) صلات ليله مألوفى اولان مؤمنه
 وترى آخر ليله قدر تأخير . مستحب واووقته اويانمغه اعتماد
 ايتمز ايسه قبل النوم ادا ايتك لازمدر (قدوری) بو خصوصده نبی
 محترم صلى الله تعالى عليه وسلم افدمز حضر تارى حضرت ابى
 بكره (رضى الله عنه) قبل النوم ادای وتر ايلديگندن طولايى
 ﴿ اخذت بالثقة ﴾ وحضر ت عمر (رضى الله عنه) وترى تأخير
 ايلديگى ايجون ﴿ اخذت بالفضل ﴾ بيور مشلدر (مجمع الانهر)

— ❦ —

(۱) رامى . آتيجى (۲) سهم . اوق (۱) تغير . دگشمك (۲) يوم
 غيم . بلوطلو گون

ایکینجی باب

اذان بیانہ در

اذان لغتہ بر شیئی اعلامدن و شرعہ اوقات مخصوصہ دہ کلمات معلومہ ایلہ اعلام و اعلان مخصوصدن عبارتدر . مدینہ منورہ دہ شرفصادر اولان امر و فرمان پیغمبری موجب عالیشانجہ بلال حبشی (رضی اللہ عنہ) طرفدن اذانہ ابتدا اولمشدر ﴿جمع و غیرہ﴾ رجال ایچون صلوات خمس مفروضہ و صلوات جمعہ ایچون اذان او قومق سنت مؤکدہ در * سائر صلوات ایچون سنت دگلدرہ اذان او قور ایکن شہادتیندہ تغیر کلماتی مؤدی اولہ جق مرتبہ دہ صوتی خفّض (۱) و بعدہ رفع (۲) ایتک معانسنہ اولان ترجیع و تغنی و تلحین مکروہدر ﴿قدوری و ملتق﴾ بعضلر حیعلتین دہ ترجیع و تلحین لا بأسدر دیمشدر ﴿جمع الانہر﴾ اذان فجر دہ ﴿حی علی الفلاح﴾ دن صکرہ ایکی کرہ ﴿الصلوة خیر من النوم﴾ قولی زیادہ اولنور . اقامت . کلمات اذان گبی اولوب فقط حیعلہ دن صکرہ ایکی کرہ ﴿قد قامت الصلوة﴾ قولی علاوہ قانور * اذانہ ترسل یعنی بلا سرعتہ مهل اوزرہ قرائت اولنور و اقامتہ سرعت التزام ایدیلور . حیعلتینہ کلند کدہ . وجہ . صاغہ و صولہ تحریک اولنور ﴿قدوری و ملتق﴾ تحویل و جہلہ اسماع . حاصل اولماز ایسہ منارہ دہ اولدنی گبی استدارہ (۳) ایدیلور ﴿در﴾ اذان و اقامتہ قبلہ یہ توجہ اولنور وارہ لرندہ تکلم ایدلمز مؤذن اذان او قور (۱) خفّض . ایچقلائی (۲) رفع . نوکسلماتک (۳) استدارہ . دونمک

ایکن پرمقارینی مندوباً قولاقلرینک دلیکنہ وضع ایلر ایسہ دہ اقامتہ قومز ﴿در﴾ اذان و اقامت بیندہ ﴿وقت صلات﴾ دینلمک گبی بر صورتلہ بتکرار اعلامی متأخرین مستحسن گورمشلردر . اذان ایلہ اقامت بینی فصل ایدلمکسزین ہان وصل اولنق مکروہدر * مغربک غیری نمازلردہ ہر رکعتہ لاقل اون ایکی آیت جلیلہ تلاوت اولنق اعتباریلہ ایکی ویادرت رکعت نماز قبلہ جق درجہ دہ فصل و توقف اولنور * صلوات مغربہ عندالامام اوچ قیصہ آیت او قونہ جق و یا اوچ خطوہ یورینہ جک قدر فصل ایدیلور * امامینہ گورہ جاسہ (۱) خفیفہ کافیدر ﴿حلی﴾ فوت اولان نمازک قضا سندنہ اذان او قور و اقامت اولنور . صلوات فائتہ بی قضا قصد ایدن مسلم فائتہ اولی ایچون اذان او قیوب اقامت ایدر و ثانیہ و ثالثہ یہ دیلرسہ آیری آیری اذان و اقامت ایلر و دیلرسہ ہر برینہ یالکیز اقامت ایدوب اذان او قومز . اذان و اقامت طہارت کاملہ ایلہ ایفا اولنور . آبدستسز اذان او قومق جائز اولہ بیلور ایسہ دہ اقامت ایتک وجب ایکن اذان و یرمک دہ کراہت واردر ﴿قدوری﴾ مرأئک وصبی و مجنون و سکران و فاسق و قاعدک اذانی ﴿لیؤذن لکم خیبارکم﴾ حدیث شریفک دلاتیلہ مکروہدر . مراهق و عبد و ولد زنا و اعمی و اعرابی نک اذانی مقصود اولان اعلام وقت صلاتی حصولہ گتورہ جگی جہتلہ مکروہ عد ایدلمدی ﴿ملتق و غیرہ﴾ اذانی مکروہ اولنلردن فاسق و قاعددن ماعداسنک اذانی اعادہ اولنور . اذانی مکروہ (۱) جلسہ * اوطورمق .

اوانسرك و محدثك اقامتليده مكر وه ايسه ده اعاده لازمگلمز
 قصبه ده واقع خانه سنده نماز قيلان كيمسه به اذانك تركي بلا كراهه
 جائزدر ﴿درر﴾ مؤذن . اقامت ائناسنده مشي ايله من . شايد
 امامت ايدجك اولور ايسه اقامته ﴿قد قامت الصلوة﴾
 دبراين مقام صلات امامه دوغري يورر * بعضار امام اولسون
 ويا اولسون مؤذنه مشي ايله مكده برأس اولديغني بيان ايلمشاردر
 ﴿حاجي﴾ اذان . استماع اولندقد تكييرات وشهادتين ذكر اولنوب
 حيعاتين ده ﴿لا حول ولا قوة الا بالله العلي العظيم﴾ و صباح
 اذاننده ﴿الصلوة خير من النوم﴾ ده كذلك مستمع طرفدن
 ﴿صدقت وبررت﴾ ديمك لازمدر ﴿در مختار﴾ عقيب
 ازانده حديث شريفده وارد اولان ﴿اللهم رب هذه الدعوة التامة
 والصلوة القائمة ات محمداً الوسيلة والفضيلة والدرجة الرفيعة وابعثه
 مقاماً محموداً الذي وعدته انك لا تخلف الميعاد﴾ دعاسني قرائت ايتك
 لايق اولور ﴿حاجي﴾ اقامت اوانوراين ﴿حي على الصلوة﴾ ده
 امام و جماعت قيام ايدوب ﴿قد قامت الصلوة﴾ ده
 شروع اولور . اماملق ايدجك اولان شخص . مؤذن اولديغي
 يا خود امام هنوز گلمديكي حالده امام حاضر اولدجقه
 جماعت قيام ايتمز ﴿ملتقى﴾ ابوبكر الصديق (رضي الله عنه)
 حضر تلي مؤذن ائناي ازانده شهادت رسالتى اوقور ايك
 ايكي باش برمقلرينك طرفلريني تقيل ومبارك كوزلرينه مسح

ايتديكي رسول اكرم صلى الله عليه وسلم افدمز حضر تلي ينك
 منظور جليل نبويلري اولمسي اوزرينه ﴿بي﴾ حقنده شرفصادر
 اولان سؤال عاليه ﴿تشرُّفاً باسمك الشريف وتينشأ به
 يا رسول الله﴾ جوابي ويرمليله ﴿هذا احسن . من عمل به
 امن من الرمم﴾ بيورديلر . معنای شريفي بوتقيل ومسح
 زياده كوزل برشي اولديغدن ايشلين كيمسه كوز آغريسندن امين
 اولور ديمكدره حين مسجده ﴿اللهم احفظ عيني ونورهما﴾
 دنيلمك ماثور در ﴿اخى زاده نقلاً عن شرح الوقاية لابن
 الشيخ﴾ وقت صلاتدن مقدم اذان جائز اولمز زيرا اذان
 صلاته دعوتدر ﴿قدوري﴾ (دعوت ايسه موقدر)
 قبل الوقت اذان اوقونسه اعاده سي لازمگلور ﴿صدر﴾ الحق
 صباح اذاني وقتدن اولجه اوقومق امام ابى يوسف عندنده
 جائزدر ﴿حاجي وغيره﴾

اوچنجي باب

شروط صلات بياننده در

صلاقي تقدم ايدن شروطه متعلق مسائل مخصوصه دره قبل الصلوة
 احداثدن وضوء وغسل ايله وانجاس حقيقيه دن بدن وثوب ومكانى
 مباحث مخصوصه سنده بيان اولنديني وجهله تطهير ايله مك مصلى
 اوزرينه فرض عيندر . شروط صلوة آتيدر . برنجيسي حدندن .
 ايكنجيسي نجاستدن . طهارت . اوچنجيسي وقت . در دنجيسي ستر

عورتدر رجلك عورتی گوبگی آلتدن رُكَبَه (۱) دخی داخل اوله رق
 دیزی الته قدر اولان محلدرد . چونكه ~~الرُكَبَه مِنَ الْعَوْرَةِ~~
 حدیث شریفی دلالتیله رُكَبَه دخی عورتدن بعضدر ~~قدوری~~
 وغیره ~~نفس سرّه~~ یعنی گوبك عورت خار جنده در ~~در مختار~~
 حرّه نك جمله بدنی عورت اولوب یوزی وآو چاری وبر روایتده
 ظهركفی و قدمنك ظهرك و بطنی عورت اولدیغی در مختار و حاجی ده
 محرردر . رجله عورت اولان محل جاریه دهده عورت اولدیغی گبی
 جاریه نك بطن و ظهركی دخی عورتدر ~~قدوری~~ ~~مُكاتبه~~ (۲)
 و مدبره (۳) و ام (۴) ولد . جاریه حکمنده در ~~درر~~ ~~فتنه~~ باعث
 اولدیغی ایچون مرأه شابه یوزینی بین الرجال شهوتسز بیله اولسه کشف
 ایله مکدن ممنوعه در ~~تنویر~~ و در مختار ~~بدندن~~ و یاستر عورت ایدن
 ثوبدن یا خود نماز قیلنه حق مکادن ازاله نجس ایده جك شی

(۱) رُكَبَه دیز (۲) مُكاتبه . حالاً تصرفی و مستقیلاً رقبه سی جهتندن
 کندوسنه حریت و برلش اولان جاریه دینورکه عقد کتابته تعیین اولنان
 بدلی نه زمان تماماً تأدیه ایدرسه اولوقت بستیون آزاد اولور . کوله
 مُكاتب دینلور (۳) مدبره . لغتده عاقبت امره نظر معنائنه اولان تدبیردن
 مأخوذ اوله رق (بن وفات ایلدیکم وقت یا خود بنم ارقه مدن آزاد اول) . گبی
 سوزلرله عتیق افندیسنك موتنه تعلیق اولنان جاریه دینورکه بووجه اوزره
 تدبیر مطلق ایله تدبیر اولنان جاریه حقنده بیع و هبه و رهن و ارث مثللو
 معاملات تملکجه جریان ایده ماز . اما تدبیر مقیدله یعنی (بو یولیلقدده و یا بوخته لقدن
 وفات ایدر ایسه م آزاد اول) گبی سوزلر ایله وقوع عیولان . تدبیر . معاملات
 مذکوریه مانع اوله ماز . کوله مدبر دینلور . (۴) ام ولد . حملی و یا
 دوغردیغی ولدی افندیسنك بندندردیو اقرار ایتدیگی جاریه دینورکه حکم
 شرعه مدبره گبیدر فقط ام ولد جمیع مالدن و مدبره ثلث مالدن آزاد اولور .

بولنمز ایسه ضروره بو حال ایله ادای صلوة جائز اولور و اعاده سی
 لازمگلمز . البسه بولمیان مسلم . عریان و قاعد اولدیغی حالده رکوع
 و سجودی ایما ایدرك ایفای صلوة ایدر . اگر قائماً نماز قیلار سهده
 کافی اولوب لکن قعود فی الجملة ستر عورتی موجب اولدیغندن دهافضلدر
~~قدوری~~ ~~قعود~~ ستر عورت ایچون دهافضل اولمغله
 بونك کیفیتی ایاقلری قبله یه اوزاده رق او طور مقدن . عبارتدر
~~درر~~ ربی طاهر اوروبه وار ایکن چبلاق نماز قیامق جائز اولمز .
 اما کلیسی متنجس و یاربغندن اقلی طاهر اولان ثوب ایله ایفای
 صلات عند الامامین عریان اوله رق ادادن افضل و امام محمد گوره
 واجبدر ~~درر~~ و ملتقی ~~بطن~~ و فخذ و ساق (۱) و ندی (۲)
 مُتَدَلّی و اذن و رأس و سبیلین و اثنین که طقوز عضودن عبارتدر
 بونلرك هر بری بشقه بشقه عضو واحد اولدیغندن ربی منکشف
 اولدقده مانع صلوة اولور . شعر نازلک (۳) ده حکمی بویه در .
 امام ابی یوسف غندنده بونلردن برینك اکثری و بر روایتده
 نصفی منکشف اولور سه نمازه مانع ایسه ده نصفندن اقلی دگدر
~~ملتقی~~ وغیره ~~رُكَبَه~~ بر قولده مستقیلاً و ابن همامک تصحیحی
 وجهله فخذ ایله معاً عضو واحددر قادینك کعبی ساقه تابع
 اولدیغی جهته یا گز کعبنك انکشافیه نمازی فاسد اولماز *
~~حاجی~~ مصلی نك عورت محللرینك انکشافی و جواز صلاتی مانع
 اولان نجس اوزرینه قیامی و محاذاتك شرائط معتبره سیله صف
 نساده ارکان صلاتدن برر کنك اداسی ممکن اوله حق قدر قیامك
 (۱) ساق . اینك کیگی (۲) ندی مُتَدَلّی . صارقش ممه (۳) شعر
 نازل . اوزون صاج

امتدادی امام ابی یوسف کردند نمازی افساد ایلر **در** امام محمد بالفعل ادایه اعتبار ایدر ایسه ده مختار اولان امام ابی یوسف قولیدر **در مختار** بر کیمسه نك ثوبی طاهر اولیوبده رفیق بعد اتمام الصلوة لباس طاهر و یرمگی وعد ایلر ایسه بر روایتده فوت و قندن خوف ایسه بیله لباس موعوده منتظر اولمق و روایت أخراده فوت و قندن خوف حالده لباسه انتظار ایله مامک لازمگور . وجود ثوبی قطعاً امید ایتک فوت و قندن خوف ایتیه جك مرتبه ده بکلمگی **الحجاب ایدر** **حاجی** (شروط صلاتك بشنجیسی نیتدر) داخل اولنان صلاته نیت ایدیلوب تکبیر افتتاحله نیتك بیننی عمل آخر ایله فصل ایتماگه دقت اولماید **قدوری** اصل نیتده قصد قلب . شرط لازم و تلفظ . مستحبد . نیت . تکبیر افتتاحدن صکره صحیح اوله میه جفندن تقدیم ایدمک الزم و شروع مقارن اولمق احوطدر **حاجی** فرضده تعیین نیت . شرطدر . مثلاً ظهر یوم و یا فرض و قته نیت اولمق لازم و جمعه و عیدین و وترده دخی تعیین مقتضیدر . نافله ده مطلقاً نیت کفایت ایلر . قول اتحه گوره تراویحده و سائر سنن مؤکده ده تعیین **الحجاب ایدر** **حاجی** جماعتله ادای صلاتده مقتدی امامه متابعت ایلمگه و جنازه نمازنده رضاء لله نماز قیلمغه و میت ایچون دعا ایتمگه نیت ایدر **ملتی و غیره** **حاجی** حین نیتده **اللهم انی ارید فرض صلوة الفجر فیسرهالی و تقبلها منی** **دیمک** لایق و مستحبد **اشباد** صلات فرضده فرضه و تطوعه معاً نیت ایدلسه امام ابی یوسفه گوره فرض جائز اولور و امام محمد غندنده شروع صحیح اولمز **منیه** ایکی فائته

ایچون بردن نیت اولنسه فائته اولی نك نیتی صحیح و فائته ووقتییه نیت ایدلسه و قتییه نك آخر و قتی اولمدیغی و مصلی اهل ترتیب بولندیغی حالده نیت فائتهیه و اگر و قتییه نك آخر و قتی اولور ایسه نیت و قتییه خاص اولور و و قتنده وسعت اولوبده مصلی دخی صاحب ترتیب دگلسه نیتك ایکیسیده صحیح اولمز **حاجی** امام . نسایه یا خود تعمیماً کندوسنه تابع اولان هر کسه اماملغه نیت ایلمش ایسه نسانك اقتداسی صحیح اولوب بو وجهله نیت ایلمدیگی صورتده صحیح اولمز **منیه** مقتدییه نیت اقتدا شرط اولدیغی گبی تعیین صلات دخی شرطدر * مثلاً تعیین صلات اولمیه رقی امامه یالکیز اقتدا ایچون نیت ایدلسه قول مختارده جائز اولمدیغی گبی امامك صلاتی نیت ایدیلوبده اقتدایه نیت اولنسه ینه جائز اولمز . اما امامك صلاتنه شروعی نیت ایله مک قول اصحده تحت اقتدایه کافی ایسه ده احوط اولان نیت اقتدای تصریح ایتمکدر **حاجی** نقلاً عن قاضیخان امامی زید ظن ایله مطلق امامه اقتدایه نیت ایدلسه امام عمرو اولسه دخی نیت صحیحدر . لکن زیدی تخصیص ایله نیت اولنوبده عمرو ظهور ایدر ایسه نیت صحیح اولمز **منیه** وقت ظهرك بقاسنده شك اولنسه و و قتنده خروج ایتمش اولسه ظهر یوم نیت ایدیلور ایسه قضا بنیه الادا طریقله صحیح اولوب ظهر وقت . نیت اولندیغی تقدیرده صحیح اولمز **حاجی** نقلاً عن قاضیخان چهارشنبه گونی صالی ظن اولنوبده ظهر یوم ثلاثیه نیت ایدلسه تعیین فرض حاصل اولمغه صحیح اولور **منیه** طلوع فجر دن مقدم درت رکعت صلات تهجد نیت ایدیلوبده

ایکی رکعتدن صگره فجر صادق طلوع ایلسه صگره قیلنان ایکی رکعت امامین عندنده و امام اعظم حضر تندن بر روایتده سنت فجره نائب اولور ﴿منیة﴾ فجر طلوع ایتمدی ظن اولنوبده ایکی رکعت نماز قیلنسه فجر دوغدیسسه متأخرین عندنده سنت فجر یرینه قائم اولور . اگر طلوعده شک اولنور ایسه اتفاقاً قائم اولمز ﴿منیة نقلاً عن الذخيرة﴾ (شروط صلاتک التجیسی استقبال قبله در) مصلی یه قبله یه توجه ایتمک فرضدر . مگر توجهدن بر صورتله خوف ایدر سه قادر اولدیغی جهتیه توجه ایدوب نماز قیلماق لازمدر ﴿قدوری﴾ مریض اولوبده توجه قدرتی اولدیغی و توجه ایدر کیمسه بولندیغی یا خود صحیح اولوبده قبله یه توجهی حالنده دشمن و یا یرتیجی حیواندن خوف ایلدیگی تقدیرده قادر اولدیغی جهتیه متوجهاً نمازی ادا ایدر کذلک دابه اوزرنده عذر ایله فرض و بغیر عذر نافله ادا اولندیغی حالده دخی توجه اولنان محله نماز قیلماق جائز اولور ﴿حلی﴾ اهل مکّه یه عین کعبه یه و غیر یلره جهت کعبه یه استقبال شرطدر . حتی مکی خانه سنده نماز قیلدیغی حالده بیتک جدّ رانی (۱) ازاله اولنه حق اولسه عین کعبه یه استقبال بولنماق واجبدر ﴿درر﴾ لکن بحرده ذکر اولندیغی اوزره بوقول ضعیفدر اصح اولان کندوسيله کعبه یننده حائل بولنان مکی . غائب گیدر ﴿در مختار﴾ جهت کعبه یه استقبال . کعبه مکرّمه مصلی نك دماغنده ملاقی و مجتمع و مثلث ساقینی گبی گوزلرینه تمتد اولان ایکی خط موهومک یننده واقع اولماق حاصل اولور . وجه انسان مقوس (۲) و مدور بولمغله صاغه وصوله

(۱) جدّ ران . دیوارلر (۲) مقوس . یای گبی

انحراف جزئی وقوع بولسه بأس یوقدر ﴿ملخص عن الدرر﴾ مصلی قبله ده شبهه ایلدیگی و یننده سؤال ایده جک کیمسه بولندیغی تقدیرده تحرّی و اجتهاد ایلدکدن صگر ظن غالبی اولدیغی جهتیه نمازی قیلر و نمازدن صگره خطاسنی بیلسه دخی اعاده صلات ایلمز . نماز ایچنده خطاسنی بیلدیکی صورتده جهت قبله یه دونه رک صلاتی اتمام ایلر ﴿قدوری﴾ یننده سؤال ایده جک کیمسه بولنور کن صور میوبده تحرّی ایله نمازی قیلسه قبله یه اصابت ایدر سه صلاتی جائز اولوب اصابت ایتمز ایسه جائز دکدر ﴿حلی﴾ قبله یی ارامقسنزین مصلی صلاته شروع ایتمکده قبله یه اصابت ایلسه بیله نمازی صحیح اولماز خلافاً لامام ابی یوسف ﴿ملتق﴾ اما بعد ادای صلوة قبله یه اصابتی مصلینک معلومی اولور ایسه مقصودک حصولی ایچون اتفاقاً نمازی صحیح اولور ﴿جمع الانهر﴾ لکن اراشد یردیغی جهتی ترک ایدوب دیگر جهتیه توجه ایلیرک نمازی قیلسه قبله یه اصابت ایتمه دخی امام اعظم و امام محمد حضر تلرنجه صلاتک اعاده سی لازمدر ﴿حلی﴾ بر جماعت ظلمت لیل گبی بر مانعدن ناشی قبله ده اشتباه ایدوب هر بری بعدالتحرّی بر جهتیه استقبال ایتمه لر و اماملرینک حالنی بیلمسه لر امامی تقدّم ایتمین و یا امامک حالنی بیلوب مخالفت ایلمنلرک نمازلری صحیح اولوب تقدّم و مخالفت ایدنلرک صحیح اولمز ﴿ملتق و غیره﴾ مصلی جهت قبله یی سؤال ایتمدیگی شخص اولجه دوغریسنی خبر و یر میوبده تحرّی ایتمدیگی جهتیه نمازی قیلدقدن صگره مصلی نك اختیار ایلدیکی جهتک خلافتی اخبار ایتمه نمازک اعاده سی ایجاب ایلمز . ﴿حلی﴾ محراب . علامت اولوب جهت قبله اولدیغدن ناشی مصلی ایچون محرابی قبله نیت ایدوب نمازه شروع ایلمک جائز اولمز ﴿منیة نقلاً عن الخانية﴾ مصلی صدرینی بغیر عذر قبله دن

تحويل ایدر سه نمازی فاسد اولور و اگر وجهی تحويل ایدر ایه
فی الحال ینه استقبال واجبد و بو تحويل سبیلہ نمازی فاسد اولماز
ایسه ده فقط اشداً مکروهدر ﴿منیة﴾ انهای صلاتده حدث واقع
اولدی ظنیله لاجل الوضوء قبله دن تحويل ایدوبده مسجددن
خروجدن اول حدثک عدم وقوعی بیاسه نمازی بوزلماز .
اما مصلی امام اولوبده یرینه برینی قویدقدن صکره حدثک عدم
وقوعی بیاسه مسجددن خروج ایتمش اولماسه بیلہ نمازی بوزیلور .
کذلک متوضی . بلا وضوء . افتتاح ایلمک و تمیم . سرابی صو . ظن
ایتمک و مسح مدت مسح مرور ایتدی ظننده بولمق گبی احوال
اوزرینه قبله دن انصراف ایتسهر بعده عکس حال معلوماری اولسه
اشبو انصرافلری ترک صلات قصدیلہ اولوب بناء ایچون اولمدیغندن
مسجددن چیقمسهر بیلہ نمازلری فاسد اولور ﴿حاجی ماعضاً﴾

در دینی باب

صفت صلات بیاننده در

صلاتک بدایت تحریمدن نهایت تسایمه قدر کیفیت اداسنه متعلق
مسائل مخصوصه در . صلاتک فرائضی تحریمه (۱) قیام . قرائت .
رکوع . سجود . آخر صلاتده تشهد مقداری قعوددن عبارت
اولمق اوزره التیدر ﴿قدوری﴾ ارکان سته مذکوره اتفاقدر .
امام اعظم حضر تدرینه گوره خروج بصره و امام ابی یوسف
عندنده تعدیل ارکان دخی فرضدر . تحریمه شدت اتصاله بناء
جمیع کتیده ارکان عدادنده ذکر اولمش ایه ده رکن اولینوب

(۱) تحریمه . تکبیر افتتاح دیمکدرکه خارج صلاتده مباح اولان اشیانک
حرمتنه سبب شرعی اولدینی ایچون تحریمه دینلدی

بلکه ائمه حنفیه نزدنده اتفاقاً شرط خارجدر . بناء علیه ابتدای
تکبیرده نجاست مانعه و انکشاف عورت و انحراف عن القبلة بولنوبده
بونلدر عقب مندفع اولور ایه شروع صحیحدر ﴿حاجی ماعضاً﴾
صلاته دخول قصد ایدن رجل تکبیر ایدوب تکبیر ایلہ معاً ایکی
الارینی رفع ایلہ ایکی باش پر مغنی قولافلرینک یو مشاغنه محاذی ایلر .
صلات و ترک قوتونده و عیدین و جنازه نمازلرنده دخی تکبیرلر وجه
مذکور اوزره اجرا ایدیلور ﴿قدوری و درر﴾ زمرة نساخذاء
منکینه (۱) دکه الارینی قالدیرلر . رفع ید . ماسوادن وصف کبریایی
نفيه اشارت اولوب نفی . اثباتدن مقدم اولمقله قول الصلوة تقدیم
رفع . اهم و امام ابی یوسف عندنده تکبیر ایلہ معیت ملتزمدر
﴿درر و غیره﴾ الارینی یکلرنندن چیقارمق آداب صلاتنددر .
رفع یدده پر مقلرینی ضم و تفریح بیننده یعنی بر برینه بتشدیرلمش
ویا زیاده آچلمش اولمیه رق منشور حالنده بولندیرمق و اوچلرینی
قبله یه قارشو طوتمق سنت شریفه در ﴿حاجی﴾ . مقتدینک تکبیری
امام اعظم حضر تدرینه گوره تکبیر امامه مقارن بولمق و امامین
عندنده تکبیر امامدن صکره اولمق افضلدر ﴿درر﴾ مصلی
﴿الله اکبر﴾ . یرینه ﴿الله اجل﴾ . یا خود ﴿الله اعظم﴾ .
و یا ﴿الرحمن اکبر﴾ . دیسه امام اعظم و امام محمد حضر تدرینک
عندلرنده کافی عد اولنوب امام ابی یوسف گوره اکبر و یا کبیر لفظک
تلفظی لازمدر ﴿قدوری﴾ تعظیمه دال اولان انفاظ ایلہ تحریمه
جائزدر ﴿سبحان الله و لا اله الا الله﴾ . و یا فارسی عبارت ایلہ
﴿خدا بزرگست﴾ . دیمک گبی . لکن ﴿رب اغفر لی﴾

(۱) منکینه . ایکی اموزلر

مثلاً دعایه دال اولان الفاظ ایله تحریمه جائز دکلدر ﴿درر﴾
 تعوذ و بسمله و حوله ایله افتتاحه جواز یوقدر ﴿اللهم﴾
 ویا ﴿الله﴾ لفظیله جائز در ﴿در مختار﴾ لفظه جلاله ایله
 شروع مختلف فیہ اولوب خلاصه ده جائز اولدینی و کافیده تجویز
 اولدینی گوسرلمشدر ﴿حاجی﴾ ﴿الله اکبر﴾ دینلدیکی
 وقته اسم جلالک همزه سی و یا اکبرک بای مد ایدلسه شروع
 صحیح اولمز. كذلك صلات ایچنده همزه یا خود با تمديد اولنسه
 نماز فاسد اولور ﴿حاجی﴾ لفظه جلالک همزه سی امام ایله بدأ
 ایدیلوبده امامدن اول راء اکبردن فارغ اولنسه قول اصحده شروع
 باطلدر. صاغ الی صول ال اوزرینه باغلایه رق ایکی الاری تحت
 السرة (۱) وضع ایلمک و بعده ﴿سبحانک اللهم﴾ الی آخره
 و متعاقباً اعوذ و بسمله قرائت ایتک و بونلری سرّاً او قومق سنت
 مؤکده در قدوری و غیره ﴿کوچک و باش پر مقلر حلقه ایدیلوب بیلگی
 اخذ و اوج پر منی بسط ایتک سنندر﴾ کافی ﴿سبحانک﴾ بی
 اوقورکن ﴿وجل ثنائک﴾ بی صلات جنازه نک غیریده
 ترک ایتک اولیدر ﴿حاجی﴾ استعاذه ده صاحب هدایه
 عندده اولی اولان ﴿استعید بالله من الشیطان الرجیم﴾
 و صاحب کافی و غیرسی نزدنده ﴿اعوذ بالله من الشیطان
 الرجیم﴾ دیمکدر. تعوذ. امام اعظم و امام محمد حضر تدرنجه
 قرائته تابع اولدیغنه بناءً مقتدی تعوذ ایتمز و امام ابی
 یوسفه گوره تعوذ. ثنایه تابع اولدیغندن مقتدی استعاذه ایدر
 ﴿منیه﴾ مسبوق امامه حال مخافته ده (۲) ادراک ایدلکده
 (۱) تحت السرة. گو بگک آتی (۲) صلات مخافته. ظهر و عصر صلاتی گبی
 قرائت جهر ایدلیان نماز

﴿سبحانک﴾ بی اوقویه جفی گبی قضاء ماسبق ایچون قیام
 ایتدکده ینه قرائت ایلر. مقتدی امام جهر ایدر ایکن شروع
 ایتسه بر قولده سبحانک بی ترک ایدوب قول آخرده سکتات (۱)
 امام بیننده بقدر الامکان کله کله یا ایکیشر ایکیشر قرائت ایدر
 ﴿حاجی﴾ مصلی. امام رکوعده ایکن شروع ایلسه رکوعک بر
 جزوئنده امامه ادراکی ظن غالبی اولدینی حلدۀ قائماً ثنایی قرائت
 ایلر والا ترک ایدر. برنجی سجده ده امامه یتشه ینه بویله
 یا یلمق ایجاب ایدوب ایکنجی سجده ده ادراک ایلدیگی تقدیرده
 ثنایی ترک ایله سجده ایدر. اما قعده ده ایکن ادراک ایلسه من غیر
 ثناء یعنی سبحانک بی اوقومقسزین قعود ایلمک اولی اولوب لکن
 قرائت ثنادن صکره دخی او طور مق جائز اولور ﴿خلاصه عن حاجی﴾
 مصلی بعد التکبیر قرائته شروع ایدوب ثنا و تعوذ و بسمله بی
 اونوتسه اعاده ایتمز و ترک سنت اولدینی جهمله سجده سهویه
 دخی ایلمز ﴿حاجی﴾ فاتحه ایله سوره بیننده گرک صلات
 جهریه گرک سریه ده بسمله سنت دکلدر اما قرائتده دخی اتفاقاً
 کراحت یوقدر ﴿در مختار﴾ بسمله شریفه دن صکره مصلی
 سوره فاتحه و بعده بر سوره آخرای یا خود دیله دیگی سوره دن
 اوج آیت کریمه بی قرائت ایدر ﴿قدوری﴾ فرضلرک ایکی و سائر
 نمازلرک جمیع رکعتلرنده قرائت قرآن مطلقاً فرض و بر سوره و یا
 بر آیت طویله و یا ﴿انا اعطیناک﴾ سوره سی قدر اوج آیت
 قصیره بی فاتحه شریفه به ضم ایتک واجبدر. بر و یا ایکی آیت قصیره
 قرائت ایدیلور سه تحریماً مکر و هدر. لکن واجب ایله اکتفا
 (۱) سکتات امام. صلات جهریه ده امامک ثنای قرائته اولان توقفلری

اولندینی تقدیرده تنزیها کراحت واردر ﴿ثُمَّ نَظَرَ﴾ و
 ﴿ثُمَّ عَبَسَ وَبَسَرَ﴾ و ﴿ثُمَّ أَدْبَرَ وَاسْتَكْبَرَ﴾ آیتری
 گبی ﴿حَلَبِي﴾ آیت کرسی و آیت مداینه مثلوا آیت طویلہ بی ایکی
 رکعتہ تقسیم ایتک قول اصحده جائزدر ﴿مَنِيَّة﴾ ﴿مُذَاهَا مَتَان﴾
 مثلوا کلمه واحده و (ق) و (ص) گبی علی قول حرف واحد
 اولان آیت واحده ایله قول اصحده ادای فرضیت صحیح دگدر
 امام سورۃ فاتحہ بی اتمام ایدرک ﴿وَلَا الضَّالِّينَ﴾ دیدکده
 امام و جماعتک دخی سرآ ﴿آمین﴾ دیملری سنندر ﴿حَلَبِي﴾
 ﴿آمین﴾ قبول ایله دیمکدر ﴿طِحْطَاوِي﴾ همزه نک مدی
 و میمک تشدید ی یاخود همزه نک کذلک مدی و یانک حذفی ایله
 نماز فاسد اولمز اما همزه نک قصری و میمک تشدید یله و یا قصر
 و حذف یاء ایله و یا تشدید و حذفله برابر مد اولنسه مفسد صلاتدر
 ﴿در مختار﴾ ضم سورہ دن صکره مصلی تکبیر ایدوب رکوع
 ایدر و رکوعده ایکی الارینی پر مقلرینک آردلرینی آچوب
 دیزلرینه وضع وارقه سنی بسط ایدرک طورر و باشنی دوز طوته رق
 رفع و تنزیل ایتمز و رکوعه واردقده اوچ کره ﴿سُبْحَانَ
 رَبِّيَ الْعَظِيمِ﴾ دیر بوده ﴿مَنْ قَالَ فِي رُكُوعِهِ سُبْحَانَ
 رَبِّيَ الْعَظِيمِ ثَلَاثًا فَقَدْ تَمَّ رُكُوعُهُ وَذَلِكَ أَذْنَاهُ﴾ حدیث شریفی
 اقتضا سنجه تسبیحک ادنی مرتبه سیدر ﴿قدوری و درر﴾
 مقتدی تسبیحاتی اتمامدن اول امام باشنی رفع ایتسه متابعت
 واجبدر (تنویر) بیلدیگی بر شخصک نمازه ادراک ایتسیچون
 اماک قرائت و رکوعی اطاله ایلمسی تحریم مکر و هدر اما گلان

شخصی بیلدیگی صورتده بأس یوقدر ﴿در مختار﴾ بوندن
 صکره امام و منفرد باشنی رفع ایدوب ﴿سَمِعَ اللَّهُ لِمَنْ حَمِدَهُ﴾
 و مقتدی یالکر ﴿رَبَّنَا الْحَمْدُ﴾ دیر ﴿قدوری﴾ محیطده
 ﴿اللَّهُمَّ رَبَّنَا الْحَمْدُ﴾ و بحر رائقده ﴿رَبَّنَا وَلَكَ الْحَمْدُ﴾
 دیمک افضلدر دینلمشدر امام اعظم حضر تدرندن بر روایتده
 و امامین عننده امام و قول اصحده منفرد دخی تحمیدی (۱) ضم
 ایلیمک لازمدر ﴿هدایه﴾ ﴿محیطده تحمیده قصر﴾ مصحح
 و حلیده تصحیح هدایه اولی در دینلمش و در مختارده تسمیمی
 (۲) انتقاله و تحمیدی حال استواءیه (۳) قصر ایتک لزومی
 گوسترمش و ﴿حَمْدُ﴾ لفظی سکون میم ایله او قونسه یاخود
 فقط هاسز اوله رق ﴿حَمْدُ﴾ دینلسه نماز فاسد اوله جفی
 مضمرا تده بیان ایدلمش و هندی دخی شرح کافیدن نقلاً فساد
 صلات ایله حکم ایللمش اولدینی و مع مافیہ بوندلرک جمله سی منظور فیه
 بولندینی مجموعه حفیده محرر و مصر حدر مصلی قیام ایلرجه سنه
 دوغریلوب تکبیر انتقال ایدرک سجده ایدر و سجده ده ایکی
 آووجیله ارضه اعتماد ایدوب یوزینی ایکی الینک بیتنه وضع ایدرک
 بورنی و آنی اوزرینه سجده ایلر اگر احد هابه قصر ایله یالکر
 آنی یاخود بورنی اوزرینه سجده ایتسه امام اعظم حضر تدرنجه
 جائزدر امامین یالکر بورنی اوزرینه عذر سز اقتصار سجده بی
 (۱) تحمید ﴿رَبَّنَا الْحَمْدُ﴾ دیمک (۲) تسمیع ﴿سَمِعَ اللَّهُ
 لِمَنْ حَمِدَهُ﴾ دیمک (۳) استواء دوغریلق

تجويز ايلماملردر ﴿قدوری﴾ (رکوعدن قالقدقده سبحان الله
 ديهك قدر) قومه (۱) قول مشهور ده سنت مؤكده اولديني
 هدايه ودررده وواجب اولديني قيه ده محرر در . ركوع
 وسجود ده اعضا وجوارحي اطمینان (۲) ايتدير مك كه تعديل
 اركاندن عبارتدر . روايت كرخيده واجب وروايت طحاویده
 سنت در . امام ابی یوسف عندنده فرض اولديني عنایه وحاجی ده ذكر
 اولنش وابن همام شرح هدايه ده قومه وجلسه (۳) نك امام اعظم وامام
 محمدحضر تلي عندنده واجب اولديني بيان ايلماملردر ﴿امر
 بان اسجد على سبعة أعضاء على الجبهة واليدین والرکبتين واطراف
 القدمين﴾ حديث شريفندن استدلال ايديلهرك انف (۴)
 جبهه (۵) ده داخل اولمغله عذرسز جبهه وياتف اوزرينه قصر
 سجده ايتك جائز اولور دينلمش ايسه ده بونده كراحت واردر
 چونكه آنفا ذكر اولنديني وجهله امامين عندنده جبهه ده عذر
 اولمغله يالكز انف اوزرينه سجده تجويز اولنماشدر . هله
 یناق وچكه اوزرينه سجده ايدلك مطلقا غير جائزدر ﴿خلاصه
 عن المنية والملاتي ومجمع الانهر﴾ كور عمامه (۶) ايله
 ثوبك زياده سی اوزرينه سجده جائزدر ﴿قدوری﴾ مصلی
 سجده ده ديزلريني يره والاريني قولاقارينك حذاسنده اوله رق
 كذلك ارضه وضع ايله اصابعي بربرينه ضم وقبله يه توجه ايدر
 (۱) قومه . قالقه (۲) اطمینان . سكوت اوزره اولق (۳) جلسه .
 اوطورمق (۴) آنف . بورون (۵) جبهه . آن (۶) كور عمامه .
 صاريفك دورمعی

وبازولري آچار وقاريني اولوقلردن اوزاق طوتار وقدميني
 يره قويه رق اطراف اصابعي (۱) قبله يه چويرر وانق وجهه يي
 استقرار ايديهك مرتبه يره وضع ايلر . مرأيايغلك پرمقاريني
 ديكيمه رك وبازولريني آچيه رق قولاريني زمينه بسط ايدر وبطني
 فيخذينه (۲) متصل قيلر ﴿درر مایخصاً﴾ سجده ده اوج
 كره ﴿سبحان ربی الاعلی﴾ دينلور . بوده ﴿من قال
 فی سجوده سبحان ربی الاعلی ثلاثاً فقد تم سجوده وذلك ادناه﴾
 حديث شريفی موجبجه تسبیحك اقلی اولوب تك اوله رق اندن
 زياده ايديلور ايسه فضيلت واردر ﴿درر وغيره﴾ وضع
 قدميندن مقصد . اصابعي قويمقدر بناء عليه اصبع واحده ياخود
 بلا اصابع . ظهر قدم وضع اولنديني صورتده اياقلك بري
 قونيلورسه صحيح اولوب عكسي تقديرده صحيح اولماز بوندن
 مفهوم اولان وضع اصابع ايله مقصوده اصابعي قبله يه توجهندن
 عبارتدر كه پرمقارك اوزرينه اعتماد حاصل اوله والا ظهر قدم
 وضع اولنش اولور حالبوكه فقها بونی معتبر طوتمديلر . اكثر
 ناس بوندن غافل بولنديغندن بومسئله يه تنبيه واجيدر ﴿حاجي﴾
 جامعده ازدحام (۳) جماعتدن ناشی نمازده يره سجده ايديله ميوبده
 بالضرورة اوگنده نماز قیلان كيمسه نك ظهرينه سجده اولنمی
 ساجد ايله مسجود ايکيسي بر نمازده بولمق شرطيله جائزدر
 ﴿درر ودر مختار﴾ موضع سجده . موضع قدمدن نصف ذراع
 مقداری مرتفع اولسه سجده يه جواز وار ايسه ده فقط اندن
 (۱) اطراف اصابع . پرمقارك اوجلری (۲) فخذين . ايکی اولوقلر
 (۳) ازدحام . غلبه لك

زیاده اولور ایسه ازدحام ناسدن غیریده تجویز اولنماشدر
 ﴿حاجی ودر مختار﴾ مصلی سجده دن باشی قالدیروب تکبیر
 ایدره اعضاسی ساکن اوله رق سبحان الله دیه جک قدر اوطور دقدن
 صکره تکبیر ایله سجده ثانیه بی دخی اجرا ایله . سجده ده
 مطمئن (۱) اولوب بعده تکبیر انتقال ایدرک صدور قدیمی
 اوزرینه قائم اولدینی حالدو غیریلور ﴿قدوری﴾ قیام ایله
 ایکن جلسه استراحت ایتمز و اللریله وجه ارضه عذر سر اعتماد
 ایلیموب بلکه دیزلرینه دایانور ﴿منیه﴾ (سجده تین بیننده
 اوطور یلیوبده حال سجوده قریب ایکن سجده ثانیه ایداسه
 قول اصحده صحیح اولدینی هدایده بیان اولمش و حلیده
 ظاهر اولان صحیح اولقله برابر اشد کراحتله مکروهدر
 دینلمشدر) رکعت ثانیه ده تکبیره اولی ده یعنی افتتاحه اولدینی
 گبی ایکی اللر قالدیرلیوب و ثناء و تعوذ دخی ایدلیوب بسمله
 و فاتحه و ضم سوره قرائت اولنور ﴿قدوری﴾ مصلی رکعت
 ثانیه بی رکوع و سجود ایله بعدالادا سجده ثانیه دن رفع رأس (۲)
 ابتد کده قدم یسرائی (۳) بسط ایله اوزرینه قعود و قدم یمنی بی
 (۴) قویاً نصب و اصابعی جانب قبله به توجیه و اللرینی فخذینی
 اوزرینه وضع و اصابعی بسط ایدر بعده تشهد ی یعنی (التحیات
 لله بی) الی آخره قرائت ایدر ﴿قدوری﴾ مرأه . تورک یعنی صول
 یانی اوزره اوطورر و صاغ جانبندن ایکی ایاغی جیقارر ﴿ملتقی

(۱) مطمئن * سکونت اوزره اولان (۲) رفع رأس * باشی قالدیرمق
 (۳) قدم یسری * صول ایاق (۴) قدم یمنی * صاغ ایاق

و غیره ﴿تفسیر تحیاتده احوال کثیره اولوب احسنی تحیاتدن
 عبادات قولیه و صلواتدن عبادات بدنیه و طیباتدن عبادات مالیه
 مقصود اولمقددر ﴿بحر رائق﴾ قعده اولی ده تشهد اوزرینه
 قول اصحده ﴿اللهم صل علی محمد و علی آل محمد﴾ و بر قوله
 ﴿اللهم صل علی محمد﴾ و قول آخرده بر حرف بیله زیاده
 قلنور سه سجده سهو لازمدر ﴿حاجی﴾ فرضده قعده اولی
 و بونک تشهد ی قول مشهورده واجبدر ﴿قهستانی﴾ سنت
 و نافله ده امام محمد و زفر عنندنه فرضدر دینلمشدر . صلوات بر مغنی
 شهادتیندن ﴿لا اله الا الله﴾ ده رفع و ﴿الا الله﴾ ده وضع
 ایتمک سنت اولدینی محیطده و صحیح مسلمده مصر حدر ﴿منح﴾
 فرض نماز لرک صکره کی رکعتلرنده بعدالبسملة یا کز فاتحه قرائت
 ایدیلوب ضم سوره اولنمز و تر واجبده و سنن و نوافله ضم
 سوره واجبدر ﴿قدوری ملخصاً﴾ مصلی فرضک رکعتین
 اولینندن صکره فاتحه ایله اکتفا ایدر اگر تسبیح و یا سکوت
 ایله ایسه جائز ایسه ده لکن عمداً سکوت ایدر ایسه اسانت ایتمش
 اولور . شاید سهواً سکوت ایسه امام اعظم حضر تلرندن برروایتده
 سجده سهویه واجب اولور صحیح اولان رکعتین مذکور تیندن
 صکره کی رکعتلرده قرائت فاتحه واجب دکل ایسه ده ترک ایتمامک
 احوطدر ﴿خلاصه عن الدرر﴾ آخر صلاتده قعده اولی گبی قعود
 ایدیلوب تشهد ی قرائت و ﴿اللهم صل علی محمد و علی آل محمد﴾
 کما صلیت ﴿و﴾ ﴿اللهم بارک علی محمد و علی آل محمد کما بارکت﴾
 الی آخرها صره سیله اشبو ایکی صلوات مشهوره اوقنور . آیات

قرآنیہ مشابہ و یا سائر ادعیہ ماثورہ ایلہ دعا اولنورہ و کلام ناسہ
شبیہ دعا او قونمز ﴿قدوری﴾ ادعیہ مشابہہ ﴿رَبَّنَا اِنْفِی الدُّنْیَا
حَسَنَةً﴾ و ﴿رَبَّنَا اغْفِرْ لِي وَلِوَالِدَيَّ﴾ الْآيَتِينَ و ﴿رَبَّنَا
لَا تُزِغْ قُلُوبَنَا بَعْدَ اِذْ هَدَيْتَنَا وَهَبْ لَنَا مِنْ لَدُنْكَ رَحْمَةً اِنَّكَ اَنْتَ الْوَهَّابُ﴾
گبی آیات قرآنیہ در و ﴿اللَّهُمَّ اغْفِرْ لِي مَا قَدَّمْتُ وَمَا أَخَّرْتُ وَمَا
أَسْرَرْتُ وَمَا أَعْلَنْتُ وَمَا أَسْرَفْتُ وَمَا أَنْتَ أَعْلَمُ بِهِ مِنِّي أَنْتَ الْمَقْدَمُ
وَأَنْتَ الْمَوْخِرُ لَا إِلَهَ إِلَّا أَنْتَ وَأَنْتَ عَلَى كُلِّ شَيْءٍ قَدِيرٌ﴾ و ﴿اللَّهُمَّ
إِنِّي ظَلَمْتُ نَفْسِي ظُلْمًا كَثِيرًا وَلَا يَغْفِرُ الذُّنُوبَ إِلَّا أَنْتَ فَاعْفِرْ لِي
مَغْفِرَةً مِنْ عِنْدِكَ وَارْحَمْنِي إِنَّكَ أَنْتَ الْغَفُورُ الرَّحِيمُ﴾ مثل اولر
ادعیہ ماثورہ در . اما ﴿اللَّهُمَّ اكْسِنِي وَاعْطِنِي مَالًا﴾ گبی
ناسدن طلب اولنہ بیلہ جک شیرہ دائر دعا لر وسط صلاتدہ او قور
ایسہ نماز فاسد اولور اما قعدہ اخیرہ دن صگرہ او قور ایسہ نماز
بوزلماز لکن واجب اولان سلامی ترک ایلہ نمازدن سلامسز
خروج اولمش اولہ جغندن صلات ناقص قالور ﴿حاجی﴾
قعدہ ثانیہ ده قرائتی لازم اولان تحیات وصلوات معلومه و ادعیہ
ماثورہ نك ختامی متعاقب آولا صاغ جانبدن ﴿السلام
عليكم ورحمة الله﴾ دینلوب صگرہ صول طرفدن دخی
بو وجهله سلام ویریلہ رک نمازدن چیقیلور ﴿قدوری﴾
مقتدی سلامی امامک سلامنه مقارن اولہ رق جماعت و حفظہ

کرامی نیت ایدرک صاغنه وصولنه سلام ویرر و امام قننی
جانبندہ ایسہ او جانبہ سلام ویردکده امامی نیت ایدر اگر امام
خذا سنده ایسہ هرا یکی سلامده آتی نیت ایلر و امام . سلامده
جماعت و حفظہ بی و منفرد یا لکنز حفظہ بی نیت ایدر
﴿درر ملخصاً﴾ امام . صلات مغرب و عشاءدن ایکی اولکی
رکعتلرده و صبح و جمعه و پیرام نمازلرنده قرائتی جهر (۲)
ایدر ورکعتین اولیئند نصکرہ کی رکعتلرده قرائتی اخفا ایلر .
منفرد مخیردر . دیلر سه جهر ایدوب نفسنه اسماع (۳) و دیلر سه
سراً (۴) قرائت ایلر . صلات ظهر و عصرده امام . قرائتی
اخفا ایدر ﴿قدوری خلاصه﴾ منفرد دخی بویله ایلر عندالکرخی
جهرک ادا ناسی اسماع نفسدن و اسرار و مخافته . تصحیح حر و فدن
عبارت ایسده ده فقط صحیح اولان ابو جعفر هندوانی قولیدر که
اوده اسماع نفس . حد اخفا و جهر . اسماع غیردر . بو حالده
امامک یاننده بولنانلر ایشتمیه جک اولور لر سه جهر ایتمش اولمز
و او قود یغنی کندی سیده ایشتمیان قاریء عد اولمز ﴿جوهره﴾
امام . حاجت ناسدن زیاده جهر ایلر ایسہ آثم اولور ﴿سراج﴾
منفرد و مقتدی تکبیرات انتقالیہ بی جهر ایتمز ﴿بحر رائق﴾
سنت اولان . امام . سلام ثانی بی سلام اولدن اخفایہ قریب
صور تده ایتمکدر . نماز تمام اولدقد نصکرہ امام مخیردر دیلر سه صاغندن
و دیلر سه صولندن منحرف اولور و دیلر سه قارشو سنده مصلی اولمد یغنی
حالده جماعته استقبال ایدر ﴿منیہ﴾ فرضدن صگرہ سنت وار ایسہ
(۱) جهر . آشکاره ایتک (۲) اسماع . ایشدیر مک (۳) سراً . کبزی

۱- اللهم انت السلام ومنك السلام تباركت يا ذا الجلال والاكرام ۲-
 دینلوب بلا تأخیر سنته قیام اولنور ﴿حاجی﴾ صلات وتر اوج
 رکعتدر ۳ بینلری سلام ایله فصل اولنیموب رکعت ثالثهده فاتحه
 وضم سورهدن صکره رکوعدن اول هر وترده قنوت ایدیلور
 ووترک هر رکعتنده فاتحه اوقنور وضم سورهدن اولنور ۴ واونچجی
 رکعتک فاتحه وضم سورهدن متعاقب تکبیر اولنوب ایکی اللر قالدیرلدقندن
 صکره قنوت ایدیلور ۵ صلات وتردن غیری نمازده قنوت اولنماز
 ﴿قدوری و غیره﴾ رکوعدن اول هر وترقیدی سنه نك جیعنده قیلنه جق
 صلات وترده قنوت لازم اولدیغنه تنبیه ایچون اولوب چونکه مذهب
 شافعیده رکوعدن صکره یالکیز رمضانک نصف اخیرنده و برده
 صلات فجرده قنوت ایدیلور ۶ رسول اکرم صلی الله علیه وسلم
 افندمن حضرت تلمینک صلات وترده رکعت اولیده ﴿سبح
 اسم ربك الاعلی﴾ و ثانیهده سورۀ کافرون و ثالثهده سورۀ
 اخلاص قرائت بیوردقلمی ابن عباس (رضی الله عنهما) دن
 روایت اولنشددر ﴿درر و غیره﴾ قنوتده مشهور اولان دعا
 ۱- اللهم انا نستعینک ونستغفرک ۲- و ۳- اللهم ایاک نعبد ۴-
 الی آخرها دعالمیدر ۵ استیلور ایسه مذکور دعالمه حسن بن
 علی (رضی الله عنهما) حضرت تلمینک قنوتی اولان ۱- اللهم اهْدنی
 فِیْمَنْ هَدِیتْ وَعَافِیْ فِیْمَنْ عَافِیتْ وَتَوَلَّیْ فِیْمَنْ تَوَلَّیْتَ وَبَارِکْ لِیْ فِیْمَا
 اَعْطِیْتَ وَفِی شَرِّ مَا قَضِیْتَ فَانْکَ تَقْضِیْ وَلَا یَقْضِیْ عَلَیْکَ وَانْهَ لَا یَذِلُّ
 مَنْ وَاَلِیْتَ وَلَا یُعِزُّ مَنْ عَادِیْتَ تَبَارَکْتَ رَبَّنَا وَتَعَالِیْتَ ۲- دعاسی

ضم ایدیلور و ۱- صلی الله علی سیدنا محمد وآله وصحبه وسلم ۲-
 دینلور ۳ دعای قنوتی کوزلجه بلمیان اوج کره ۴- ﴿ربنا اننا
 فی الدنیا حسنة و فی الآخرة حسنة و قنا عذاب النار﴾ یاخود
 اوج دفعه ۱- اللهم اغفر لی ۲- یاخود اوج کره (یارب) دیر
 ﴿حاجی﴾ مختار اولان دعای قنوتی اخفا (۱) ایلمکدر ۳
 مصلی قنوتی اونودوبده رکوعده تذکر (۲) ایتمسه بعدالقیام
 قنوت ایتیموب سجدهیه وارر ۴ امام اعظم حضر تلمینه گوره
 قنوت عمل وجوبی اولدیغندن تأخیری جهتیه مصلی سهو سجده
 ایدر و امامین غندنده قنوت سنت اولدیغیچون سجده سهویه
 لازمگلمز ﴿بحر رائق﴾ مصلی فاتحهیی اوقویوب ضم سورهدی
 وقنوتی فراموش (۳) ایدرک رکوعه وارسه بعدالقیام سورهدی
 قرائت وقنوت ایدوب رکوعی اعاده و سجود سهو ایدر
 ﴿جوهره﴾ هیچ بر نمازده تعیین سورهدن یوقدر ﴿قدوری﴾
 یعنی نمازک صحتی سورۀ مخصوصه نك قرائته توقف ایتمز بلکه
 قرآندن کندویه میسر اولانی قرائت ایلر ﴿جوهره﴾ نماز
 ایچون سورۀ معینه قرائتی اعتیاد ایتمک مکروهدر ﴿قدوری﴾
 کراحت ۵ سورۀ معینه نك قرائتی واجبدر غیربسی کفایت ایتمز
 دیو اعتقاد اولندیغی صورتدهدر ۶ اما رسول اکرم صلی الله علیه
 وسلم افندمن حضرت تلمینک قرائتی سبیلته تبرک قصد ایدرسه
 کراحت یوقدر ﴿جوهره ملخصاً﴾ امام اعظم حضر تلمرنجه
 (۱) اخفا ۲ گزله مک (۲) تذکره خاطره گتورمک (۳) فراموش ۴
 اونوتمق

نمازده اسم قرآنک متناول اولدینی مقداری قرائت کفایت ایدر.
 امامین عندند اوچ آیت قصیره و یا بر آیت طویلده دن اقلی جائز
 اولمز ﴿قدوری﴾ آیت واحده دن زیاده قرائته مقتدر اولمیان
 مصلی به امامین عندند اوچ کره تکرار ایتک لازم اولوب امام
 اعظم حضر تدر نجبه تکراره لزوم گوسترلماشدر اما آیت واحده نك
 قرائته مقتدر اولان کیمسه ایچون نصفی ایکی کره و یا زیاده
 اوقیوبده تمامی قرائت ایلمامک امام مشار الیه نزدند جائز
 اولدینی گبی اوچ آتی قرائته مقتدر بولسان کیمسه نك بر آتی
 تکرار ایلمسیده امامین عندند تجویز اولنماشدر ﴿حاجی﴾
 صلاتده قرائت بش وجه اوزره اولدینی محیطده بیان اولنماشدر
 شویله که اولکیسی فرضدر که اوده امام اعظم حضر تدر نيك
 عندند آیت تامه در . اگر کلتین اولورسه جائز و کله واحده
 و یا حرف واحد اولورسه اصح اولان غیر جائزدر . ایکنجیسی
 واجبدر که بوده فاتحه و ضم سوره در . اوکنجیسی سنت اولوب
 فجر و ظهرده سوره حُجراتدن سوره بروج و عصر و عشاءده
 بروجدن ﴿لم یکن الذین﴾ و صلات مغربده ﴿اذا﴾
 زلزات ﴿سوره شریفه لرینی قرائت ایلمکدر . دردنجیسی
 مستحب اولوب بوده مقیم اولان مسلم ایچون صلات فجرده رکعت
 اولی ده فاتحه دن ماعدا اوتوز و یا قرق و ثانیه ده فاتحه دن بشقه
 یگر می و یا اوتوز آیت اوقومقدر . بشنجیسی مکر و هدر که بر و یا
 ایکی آیت ایله فاتحه یا خود یا کز فاتحه و یا یا کز سوره تلاوت
 ایتک گبی ﴿جوهره ملخصا﴾ مقتدی امامک آردند قرآن
 اوقومیوب سکوت و استماع ایلر ﴿غیر﴾ امامه اقتدا قصد ایدن

مسلم ایکی نیته محتاج اولوب بری صلات مشروعه و دیگری
 امامه اویمغه نیت ایتکدر ﴿قدوری﴾ مقتدی به تعیین صلات
 شرط اولدیغدن یا کز ﴿لم نوبت ان اصلي مع الامام﴾
 دیمک کفایت ایتمز . صلات جمعه ده جماعت . شرط اولمغه
 قول مختارده اقتدایه نیت ایدلمیوبده یا کز صلات امامه نیت
 اولنور ایسه جائزدر . امامین عندند اقتدا حاصل
 اولق ایچون امام . تکبیر ایتدکن صکره اویمق افضلدر
 ﴿حاجی﴾ امام . امامت موضعنده قیام ایتدکده نیت اقتدا کافی
 اولوب شروعی وقتده حضور نیت . شرط دگلدر ﴿منیه﴾
 امامه رکوعده یتشیلوبده لفظه جلالی قیامده و اکبر لفظی رکوعه
 شروع ایدر کن دیمک جائزدر ﴿اخی حاجی﴾ جماعت ایله نماز
 قیلمق سنت مؤکده در . جماعته ادای صلاتده امامته احق و اولی
 اولان نمازه متعلق مسائلی حاضر اولنردن زیاده عالم اولاندر .
 اگر علمده مساوات بولنور ایسه قرائت قرآنده زیاده ماهر
 و قرائنده دخی مساوات بولنور ایسه ورع (۱) و تقواده کامل
 بعده سنأ اکبر (۲) بعده خلقاً بعده وجهاً احسن . بوندن صکره
 نسباً اشرف بعده ثوبی انظف (۳) بولنلردر ﴿نور﴾
 مریض و مقعد (۴) و مقطوع الرجل (۵) و الید و شیخ عاجز
 (۱) ورع . حرامدن و امثالندن صافق (۲) اکبر . زیاده بیوک
 (۳) انظف . زیاده پاک (۴) مقعد . کوتورم اولان (۵) مقطوع
 الرجل و الید . ایغی و الی کشلش

(۱) واعما وپک زیاده مطر (۲) وبرد (۳) وطين. دن و ظلمت شديده (۴) دن ناشی صحیح الاعضا اولان مسلمان مسجدده جماعته حاضر بولنه مدقلى حالده معذور عد ايديلورلر (منح) صاحب البيت اماملغه صالح ايسه ديگرلرينه مرجحدر * لکن کندودن اصاحی يا خود قاضی بلده مجلسده بولنور ايسه انک امامت ايلمسی دها مناسب اولور ﴿تنوير﴾ امام اولمغه کندولرندن احق کيمسه وارايکن عبدواعر اينک وفاسقک واعما واعشانک (۵) نمازده امام اولملری تنزيهاً مکروهدر. مگر شو ذکر اولنانلردن فاسقک غیری اعلم قوم اولور ايسه اماملغه اولی اولور * اعتقادی کفری مؤدی اوليان مبتدعک (۶) وولد زناتک دخی امام اولملری تنزيهاً مکروهدر. اگر بولنردن غیری امام اولمغه لایق کيمسه بولنماز ايسه اولخالده بولنرک بلا کراهه امام اولملری جائزدر ﴿در مختار و ملتقى و قدوری﴾ امامه لایق و مناسب اولان جماعته قدر مسنوندن زیاده صلاتده قرائتی تطویل (۷) ايله میوب بلکه حال جماعته مراعاة اقتضاسنه گوره تخفیف (۸) ايلمکدر. زیرا نبی محترم صلی الله علیه وسلم افدمز حضرتلری بکاء (۹)

(۱) شيخ عاجز. پک زیاده اختیار (۲) مَطَر. یغمور (۳) رَدَدَه صغوق (۴) ظَلَمَتٍ شديده * شدتلو قرا کلتی (۵) اعشى. گيجه وگرندي ابو گورمز درجه ده ضعف بصره مبتلا اولان (۶) مُبْتَدِع. اهل بدعتک معلومدر (۷) تَطْوِيل. اوزاتقی (۸) تَخْفِيف. حقیقلتمک (۹) بکاء. اغلامق

صبي استماع بیورملری اوزرینه صلات فجرده معوذتین ايله اکتفا بیورملردر. در مختارده قدر مسنوندن زیاده تطویل صلات مکروهدر دینامشدر ﴿قدوری و غیره﴾ مصابحه مذکوردر که معاذ (رضی الله عنه) قومنه امامت ایدوب صلات عشایی سورة بقره ايله ادایه شروع ایتدکده صحابه کرامدن برینک انحراف ایدرک منفرداً ادای صلات ايلمسی و کیفیتک حضور عالی حضرت نبوی به عرض اولنسی اوزرینه ﴿یا معاذ اقرأ والشمس وضحاها وسبح اسم ربك الاعلی ونحوها﴾ فرمان جلیلی شرفصدور بیورملشدر و ﴿من ام قوماً فليصل بهم صلوۃ اضعفهم فان فيهم المریض والكبير وذا الحاجة﴾ حدیث شریفی دخی معلومدر ﴿درر و غیره﴾ کندولردن برینی امام ایدرک یالکز اولدقلى حالده جماعته نماز قیلمق زمرة نسیاه تحریماً مکروهدر. شاید کراهته برابر بویه جماعته نماز قیله جق اولورلر ايسه کندولرندن اوله جق امام انلرک ایلروسنه گچمیوب جماعت نسانک اورته سنده قیام ایدرک نمازی قیلدرمق اقتضایدر. ارککار حسب الضرورة عریاناً جماعته نماز قیله جق اولدقلى نده ایچلرندن اوله جق امام انلرک اورته لرنده قیام ایلر ﴿قدوری و غیره﴾ یالکز صلات جنازه ده جماعت نسانه کراهت یوقدر. رجلك نسیاه امامتی ایچلرنده والده سی و همشیره سی گبی محرمی ویا زوجه یاخود جاریه سی یوق ايسه خانه ده مکروه اولوب جامعده دکلدر

﴿تنویر﴾ عجز متفانیه نك (۱) عند الامام بالکزیلاً وعند الامام بن لیلاً و نهراً جماعته حضوری جائز در ﴿در مختار و غیره﴾ جماعت بیت . جماعت مسجد گبی مشروع ایسه ده فضیلتده تفاوتی (۲) ظاهر در ﴿قبه﴾ $\text{الْأَنْشَانُ فَمَا فَوْقَهَا جَمَاعَةٌ}$ فحواسی اوزره امام . بر رجل ایله جماعت اولسه رجل . امامك صاغ طرفنده اوکجه لری محاذی اوله رق قیام ایله . امام مرأه ایله جماعت اولسه قادی . امامدن تأخر ایدر . جماعت بردن زیاده اولدینی حالد امام . کندی تقدّم ایله . صورت مذکوره نك غیر بیسی علی الاصح مکروه در ﴿در مختار و قدوری﴾ ابن مسعود حضر تری نك زائد علی الواحد اولان جماعته توسط ایلمش اولملری اباحیه دلات و تقدّم . فضیاتی تضمن ایدر ﴿هدایه﴾ مقتدی اطول (۳) اولوبده مساوات عَقَب (۴) صورتنده اکثر قدمی تقدّم ایتمدکجه سجودی امامك آمانده (۵) واقع اولسه برأس اولمز ﴿در مختار﴾ رجال ایچون مرأه وصی به اقتدا غیر جائز در . جماعته اولاً رجال . ثانیاً . صبیان . صکره . خنائی (۶) بعده نسا . صف اولور (قدوری) قاری و ارایکن امی نك امام اولسی جائز دگلدر * امی امی به اقتدا ایدوبده بعده قاری . حاضر اولسه جوازی مختلف فیه در ﴿نهایه﴾ مرأه نك مرأهیه وصینك صی به اقتداسی صحیح در ﴿منح﴾ نسا . جماعت رجال نزدنده

(۱) عَجُوزٌ مُتَفَانِيَةٌ بِكَ اخْتِيَارَ قَادِينَ (۲) تَفَاوُتٌ . فَرْقٌ (۳) اطْوَلُ . زِيَادَةُ اَوْزُونُ (۴) عَقَبٌ . اَوَكْجَةٌ (۵) اَمَامِنْدَةٌ . اَوَكْنْدَةٌ (۶) خَنَائِي . خَنَائِلُ

نمازه دورسه لر اگر امام . صلاته وقت شروعده نسیایه نیت ایلمش ایسه انلره محاذی اولان رجالك صلاتی فاسد اولور . امام مرأهیه امامتی نیت ایلمامش ایسه مرأه نك اقتداسی صحیح اولیه جغندن نمازی فاسد اولوب فقط تحریمده واداده مشترك اولدینی ایچون محاذی بولسان رجالك صلاتی فساد و ارمن ﴿در مختار و غیره﴾ شروط محاذات مفسده اوندر . برنجیسی محاذیه نك گرك محرم گرك نامحرم مرأه بالغه و یاسکر طقوز یاشنده صبیّه مشتهاه اولسی . ایکنجیسی صلاتی عاقله بولنسی . اوچنجیسی امام محمد عندنده محاذات بررکن مقداری اولمسیدر . درنجیسی صلاتك ذات رکوع و سجود اولسی . بشنجیسی صلاتك تحریمه جهتیله بینهماده مشترکه بولنمسیدر . التنجیسی من حیث الادا دخی مشترکه اوله رق مسبوقك قضای مافاتی اولمامسیدر . یدنجیسی اتحاد مکان اولوب برینك آخردن قامت انسان قدر ارتفاعی بولمامسیدر * سکرنجیسی اتحاد جهت اولوب جوف کعبه ده (۱) هر برینك برجهته توجه ایتماسیدر . طقوزنجیسی بینهماده عماد (۲) مثللو حائل (۳) اولمامسیدر (اره لرنده انسان صیغه جق قدر اره لق بولنق دخی حائل صاییلور) اونجیسی امامك نسیایه دخی امامته نیت ایلمسیدر . اگر امام . نسیایه نیت ایتمز ایسه مرأه نك اقتداسی غیر صحیح اولدیغندن محاذات . مفسد صلات اولمز ﴿حلی﴾ مصلینك مکلف اولسی و بعد الشروع گلمش اولان مرأه بالغهیه تأخر

(۱) جَوْفِ کَعْبَةٍ . بَيْتِ شَرِيفِکْ دَاخِلِ (۲) عِمَادٌ . دِیرِکْ (۳) حَائِلٌ . مَانِعٌ

ایله اشارت ایله مامسی دخی شرائط مذکوره جمله سندن در .
 چونکه شرط اول بولمزه هیچ برینک و شرط ثانی موجود
 اولمز ایسه روجلک نمازینه فساد ترتب ایتمز ﴿ابن عابدین﴾
 امرد صبیحک (۱) محاذاتی قول صحیح اوله رق مفسد صلات
 دگلر ﴿تنویر و حاجی﴾ محاذاتده بعض عضو . بعض عضو
 مقابل اولمق کافیدر . لکن معتبر اولان ساق و کعبک محاذی
 اولمسی ایدوگی زیلعیدن منقولدر ﴿درر﴾ عذرردن پاک اولان
 مسلم . سلیس بوله (۲) مبتلا اولانه و طاهره بولنان نسا .
 مستحاضهیه و قاری . امییه و عاری اولمیان عریانه اقتدا ایلمک
 جائز اولمز ﴿قدوری﴾ معذورک معذور آخره عذرلری متحد
 ایسه اقتداسی جائز ایسه ده متحد دگلسه جواز یوقدر ﴿حاجی﴾
 تیمم ایدن صو ایله آبدست آلمش اولانه و خفینه مسح ایدن
 ایاقلرینی غسل ایلیانه و قاعد قائمه . نماز قیلدیرمق جائزدر * اما
 رکوع و سجود ایلمن ایما ایدنه و فرض قیلان نافله قیلانه و بروقتک
 فرضی قیلان فرض آخر قیلانه اویمسی صحیح اولیوب فقط
 نافله قیلان فرض قیلانه اقتدا ایلمر ایسه صحیحدر ﴿قدوری﴾
 جبیره اوزرینه مسح ایدنه غاسلک اقتداسی کذلک صحیحدر
 ﴿در مختار﴾ قائمک قاعده صحت اقتداسی نبی محترم صلی الله علیه
 وسلم اقدمز حضرتلرینک آخر صلاتلری قعود ایله اولوب
 (۱) امرد صبیح . یوزنده توی اولمیان گوزل تازه (۲) سلیس بول .
 برنوع علتدرکه ادراری حبس ایله مکمل اولمز

صحابه کرامک قیاماً اقتدالریله ثابتدر * اشبو صلاتده ابوبکر
 (رضی الله عنه) حضرتلرینک رفع تکبیر بیورملرندن استدلال
 اوله رق مؤذنلرک جماعت ایشیده جک قدر تکبیرلرینه جواز
 گوسترلمش ایسه ده حاجتدن زیاده صیحه (۱) کلامه ملحق
 بولمق اعتباریله مفسد صلوٰة اولمق مستبعدگلر ﴿در مختار نقلاً﴾
 عن فتح القدير ﴿قائمک احده (۲) و غیر اعرجک
 اعرجه (۳) و نماز قیامغه یمین ایدن خالفک (۴) خالفه و ناذره
 (۵) و متنفله (۶) و ناذرک ناذره و متنفک متنفله امامتی جائزدر *
 اما ناذرک خالفه و متنفله و مفترضه (۷) و نذر آخر قیلان ناذره
 و لاحقک لاحقه و مسبوقه و مسبوقک مسبوق و لاحقه و نازلک
 راکبه و راکبک نازله و راکبک دیگر دابهیه راکب اولانه و قول
 اصح اوزره غیرالثغک (۸) الثغه و مسافرک ایکی رکعتہ قصر
 ایتدیگی صلاتده بعد الوقت مقیمه اقتدالری صحیح اولمز . لکن
 مسافر . وقت ایچنده تحریمه ایدوب بعده وقت خروج ایتسه
 مقیمه اقتداسی صحیح اولدیغندن مقیمگی اتمام ایدر ﴿در مختار﴾
 فساد اقتدای موجب اسبابدن هر قیسیله اقتدا فاسد اولورسه
 فرض و یا نفل اولسون اصلاً صلاته شروع تحقق ایتیه جگنه
 بناء بونده و قوعبولان قهقهه خارج صلاتده کی قهقهه گی وضوئی
 نقض ایتمز و کذلک صلات مذکوره ده واقع اولان محاذات .
 (۱) صیحه . زیاده باغرمق (۲) آحدب . قانبور (۳) اعرج . طوبال
 (۴) خالف . یمین ایدن (۵) ناذره نذر ایلمن (۶) متنفل . نافله قیلان
 (۷) مفترض . فرض قیلان (۸) الثغ . پلتک

مفسد صلوٰۃ اولمز . (مثلاً جماعتله صلات عصر قیلنور ایکن بر مرآه کلوب ظُهر ظنیلہ ظُهره نیت ایدرک امامه اقتدا ایله برجله محاذی اولسه اختلاف صلاتین سببیلہ مرأۃنک اقتداسی فاسد اولدیغندن شروعی اصلاً صحیح اولماغله خارج صلاتده کی محاذات مثللو رجلک نمازینی افساد ایلمز) اشبو قول . امام محمدک اولوب محیطده تصحیح اولنش اولدیغندن صاحب بحر بونک مذهب اولدیغنی بر محله ادعا ایلمشدره عند الامامین اقتدا فاسد اولدقده اصل صلات باطل اولیوب بلکه قصد ایدیلان فرضیت . وصفی باطل اوله جفته مبنی نفلاً شروع . متحقق و صحیح اولغله بوصلاتده قهقهه وضوئی نقض و محاذات دخی صلاتی افساد ایلر * بوقول . سر اجدده تصحیح اولندیغندن صاحب بحر دیگر بر محله دخی بونک مذهب اولدیغنی ادعا ایلماگله در مختار صاحبی نقل مذهب خصوصنده صاحب بحرک کلامینی بیننده اولان تناقضی زیلای نک بیانی وجهله دفع ایتمشدر . شویله که فساد اقتدا لابسک عاری به اقتداسنده اولدیغنی گبی شرائط صلاتدن یاخود قاریثک امی به اقتداسنده اولدیغنی مثلوارکاندن برینک فقدانندن طولای ایسه امام محمدک قولی مذهبدر * اگر مفترضک متفله اقتداسنده اولدیغنی گبی اختلاف صلاتیندن ناشی ایسه امامین قولی مذهبدر * ابن عابدین * اقتدا اولنان امامک آبدستیز اولدیغنی بیلندیگی صورتده نمازی اعاده لازمدر * قدوری * امام محدث اولدیغنی و یا شروط وارکاندن برینک

فقدانی (۱) خبر و یردیگی حالده شایان امنیت ایسه صلاتک اعاده سی فرض و دگل ایسه مندوبدر * در مختار * امام بعد الصلوٰۃ محدث اولدیغنی تذکر ایدنجه جماعته اخبار ایله مک لازمدر * منح *

بشنجی باب

فریضه به ادراک بیاننده در

معلوم اولدیغنی اوزره قصداً بلاعذر . عبادتی نقض (۲) ایتک اَسْتَعِذُ بِاللّٰهِ وَلَا تُبْطِلُوا اَعْمَالَكُمْ نص جلیلیله حرام اولوب انحق تجدید ایچون مسجیدی هدم (۳) گبی صورۃ نقض و معناً اکمال بولنورسه . مشروعدر . جماعته ادا اولنان صلاتک منفرداً قیلنان نماز اوزرینه یگرمی یدی درجه فضیاتی واردر . بناءً علیه بر مسلم . ادای فریضه به منفرداً باشلامش اولدیغنی حالده امام اوتمازه شروع ایلسه اگر مُصَلّی منفرد . فرض رباعیده رکعت اولی ایچون و غیر رباعیده رکعت ثانیه ایچون هنوز سجده ایلماش ایسه ولو رکوعده بولنسون نمازی سلام ایله قطع ایدوب امامه اقتدا ایدر . اگر سجده ایلدیه فرض رباعیده رکعت اولی به بر رکعت دخی ضم ایدرک بعد التشهد سلام و یروب امامه اقتدا ایلر و قیلدیغنی ایکی رکعت نافله اولور و غیر رباعیده اتمام ایدر . بعد الفجر نفلک کراعتندن ناشی صلات فجر دن و اوچ رکعت نفل . مکروه (۱) فقدان . موجود اولماق (۲) نقض . بوزمق (۳) هدم . یقیمق

اولدیغندن صلات مغر بدن صکره تنفل (۱) نیتیه دخی امامه
اقتدا ایلمز . فرض رباعیده او چنجی رکعتیه قیام ایتمش اولوبده سجده
ایتمدیه قعوده عودت ایدرک ویا حال قیامده سلام ویررک قطع
ایدوب امامه اویار . اگر او چنجی رکعتک سجده سنی ایتمش ایسه
صلاتک اکثری ادا اولمش اوله جغندن دردنجی رکعتی اتمام
ایلمک لازمدر . بو حالده فضیلت جماعتی فوت ایتمامک ایچون
تطوع نیتیه اقتدا افضلدر . انجق صلات عصردن صکره نافله
مکروه اولدیغندن بونده اقتدا ایلمز . صلات نافله شروع ایدن
مؤمن . جماعت ایچون مطلقاً قطع ایتمیوب رکعتینی اتمام ایدر .
صلات فائته ومنذوره دخی بویله در . زیرا بونلرک قطعده اکمال
بولنمیوب بلکه ابطال عمل واردر . مصلی منفرد . ظهرک
ویا جمعه نك درت رکعت سنتنده بولنوبده ظهرک فرضنه یاخود
خطبه یه شروع اولنسه علی قول . شفع اولی (۲) قیلدقدن صکره
نمازی قطع ایدر . بعضیاری سنت مذکوره صلات واحده
منزله سنده اولدیغندن قطعده اکمال بولنمیوب بلکه ابطال
بولندیغندن درت رکعتک اتمامی لزومی درمیان ایلمش وحتی
فتوا دخی ویرمشلردر . صلات ایچون اذان او قونان مسجد
ویا جامعدن نمازی قبل الادا خروج ایلمک لَا يَخْرُجُ
 $\text{مِنَ الْمَسْجِدِ بَعْدَ الدَّاءِ إِلَّا مُنَاقِقٌ أَوْ رَجُلٌ يَخْرُجُ لِحَاجَةٍ يَرْيدُ}$

(۱) تنفل . نافله نماز قیلق (۲) شفع اول . برنجی ایکی رکعت

الرُّجُوعُ حدیث شریفی ایجابجه تحریماً مکروهدر . مگرکه
دیگر مسجد ویا محله جماعتله قلنه جق نماز کندوسنک وجودینه
متوقف اولوب بولندیغنی حالده جماعتک تفرقی ویا جماعته قلت طریائی
محمل بولنه ویا آبدستیز بولنیلو بده عودت نیتیه لاجل التوضی
چیقلمش یاخود قبل الاذان دخول وقتله ویا دیگر مسجبدن
اذانک استماعله فریضه اولجه قیلنمش اوله . صلاته اقامت
اولندیغنی حالده مسجبدن براحدک خروجی قطعاً لایق اولمز .
زیرا بو حرکت . آشکاره جماعته مخالفت دیمک اولدیغندن فاعلی
اتهام اولنور . فقط جماعت آخرانک مقیمی اولان مسلمه
خروجده بأس یوقدر . كذلك فجر وعصر ومغرب نمازلی
وقتلرنده بر دفعه قیلنمش ایسه بعد الاقامة مسجبدن خروج
ایدن . جماعت آخرانک مقیمی حکمنی حازدر . چونکه فجر دنصکره
گون دوغنجیه و بعد العصر وقت غروب دگین نافله قیلق
مکروه و صلات مغر بدن صکره ده اوچ رکعت نافله غیر
مشروعدر . اقامت اولنان مسجبدن صلات ظهر وعشایی
قبل الاقامة منفرداً ادا ایدن مسلمک ظهر وعشادن صکره نافله
قیلمسی جائز اولدیغندن خروجی تجویز اولنماشدر . جماعته
صلات فجرک فوتندن خوف اولنور ایسه سنتی ترک ایله امامه
اقتدا ایدیلور . اگر صلات فجرک بر رکعتیه ایرشمک مأمول
ایسه سنت مؤکده اولدیغندن ترک اولنمیوب صف صره سنده
ویا امامک آرقه سنده اولیه رق برکنارده هان قیلنه رق اقتدا
اولنور . سنت فجر فرضیه برابر فوت ایدلدکده بعد الطلوع .

زوال شمسدن اولجه وقته قدر بالاتفاق قضا اولمق لازم اولوب
يالكز فوت ايديلورسه امام محمده گوره قبل الزوال ينه قضا
اولورسه ده عند الامامين قضا اولمز . سنت ظهرك بعده ايفاسي
ممکن اولديغندن فرضك فوتي خوفي اولسون ويا اولسون ترك
اولوب بعده وقت ظهر . باقي ايسه على قول صوك سنه تقديم
وبر قوله گوره اندن تاخير ايله قضا اولنور . قبل الجمع قیلان
درت ركعت سنت دخي سنت ظهر گيدير . فرائض خمس
ووتردن وفجر وظهر سنلرندن ماعدا سنلر . گر ك سنت ظهر
مثللو داخل وقتده گر ك سنت فجر گي بعد الوقت يالكز ويا
فرضه تبعيله قضا اولمز . بر مسلم جماعته ادا اولنان صلات
رباعيه نك بر ركعتنه ادراك ايلمش اولسه من أدرك ركعة
 $\text{من الصلوة فقد أدركها}$ حديث شريفي موجبجه بونمازك
تمامي ايجون جماعت . فضيلته نائل اولور ايسه ده آني جماعته
قيامش اولمز . وايكي ركعتنه ادراك ايلسه حال ينه بويله در .
امام . ركوعده ايكن نمازه ايريشلوب تكبير ايدلسه و امام
ركوعدن باشي رفع ايدنجيه دك قيامده توقف اولنسه ويا بلا
توقف ركوع ايدلسه ده مقتدينك ركوعندن اول امام باشي
قالديرسه اوركعتنه ادراك اولمش اولمز . امامندن مقدم مقتدي
ركوع ايدوب باشي قالديرمه دن اول امام . ركوعده مقتدي يه
ادراك ايتسه مقتدينك ركوعي صحيح اولور . زيرا شرط .
جزؤ ركن ده يعنى ركوعك طرفيندن برنده امامه مشاركت

اولوب بودخي حاصل اولديغندن ركوعي صحيح ايسه ده لكن أما
 $\text{يخشى الذي يركع قبل الإمام ويرفع أن يحول الله رأسه برأس}$
 الحمار حديث شريفيله تحريماً مكر وهدر ملتقى ودرر
وجمع الانهر $\text{صاحب بجر دن منقولدر كه قطع صلات بلاعذر}$
حرامدر . عند الاكثر بر درهم وبعضيلرينه گوره ولو بر
(دائق) يعنى بر درهمك سدسي مقداري مالك ضياعي خوفي
بولورسه مباح واكمال صلات ايجون مستحب و بر نفسك تخلص
واحياسي ايجون واجيدر ابن عابدين

التنجي باب

مقتدينك نوعاً احكامنه داژدر

مقتدي . مدرك . لاحق . مسبوق . مسبوق لاحق . دن
عبارت اولمق اوزره درت نوعدر . مدرك . جميع ركعاتي امامله
برابر ادا ايدندر . بونك حكمي قرائتدن ماعدا كافه ارکان
فعليه ده واذكارده امامنه اتباع ايلمكدر . لاحق بعد الاقتدا نوم
ويا سبق حدث يا خود غفلت ويا ازدحام مثللو اسبابدن ناشي
جميع ويا بعض ركعاتي فوت ايليندر . بونك حكمي اولاً قضاي
مافات ايدوب بعده امام . فارغ اولديسه اكثامتبع ايله مكدر .
لاحق . قضاي مافات ايدر ايكن مؤتم (۱) حكمنده اولديغندن

(۱) مؤتم . امامه اقتدا ايدن

امامك فراغیدن اول ویا صکره اصلا قرائت ایتمز و کندی سهوی ایچون سجده ایله میوب فقط امامك سهوینه بعد الفراغ سجده ایلر وانك سهواً ترك ایتمدیگی شیئی مثلاً امام قعده اولی یی ترك ایلمش ایسه لاحق دخی امامه موافقتله انی ترك ایدر و کندی مسافر اولوبده امامی دخی مسافر ایسه نیت اقامتله فرضی تغیر ایله مز . لاحقك محاذات نسا (۱) سبیلله و امامك قبله جه وقوعبولان خطا سبیلله نمازی فاسد اولور . مسبوق . قبل الاقتدا رکعاتك جمله سی ویا بعضی ایله امام . کندوسنی سبق ایدن کیمسه در . بونك حکمی اولاً امامه متابعت ایدوب بعده قضای ماسبق ایله مکدر . مسبوق . قضای ماسبقده منفردگی اولدیغندن ثنا و تعوذ و قرائت ایدر و کندی سهوی ایچون سجده ایلر و محاذات نسا ایله نمازی فاسد اولمز و مسافر ایسه نیت اقامتله فرضی متغیر اولور . انجق درت مسئله ده منفرد مثللو اولمیوب مقتدی گیدر . برنجیسی کندوسنه دیگرینك اقتداسی جائز اولمز . لکن ایکی مسبوق معاً امامه اقتدا ایله قضای ماسبقه قیام ایتمک ارنده بری قاچ رکعت قضا ایده جگنی بیله میوبده دیگرینه باقه رق قضا ایدر سه صحیح اولور . ایکنجیسی مسبوق . قضای ماسبقه قالدقده نمازینه یکیدن باشلامق نیتله تکبیر ایلسه تحریمه اولی یی قاطع و مستأنف (۲) اولور . امامنفرده قیلدینی نماز ایچون مسبوق گبی پیارسه مستأنف اولمز ایسه ده قیلدینی نمازدن

(۱) محاذات نسا . قادیئرلك حذاسنده بولنق (۲) مستأنف . یکیدن باشلیان

غیری بر صلات ایچون نیت و تکبیر ایدر ایسه اولوقت مستأنف اولور . اوچنجیسی امامك سهویله مسبوقه دخی سجده سهویه لازمگلوب حتی امامك سلامندن اول قضای ماسبقه قالدقده امام سجده سهویه ایله سه قضا ایتمدیگی رکعتی سجده ایله تقیید ایتمکجه امامه متابعت ایدرک سجود سهو ایلر . اگر تقیید ایتمدیه بعد الفراغ سجده ایدر . امامنفرده غیرك سهوی ایچون سجده ایجاب ایتمز . دردنجیسی مسبوق . قضای ماسبقدن صکره بالاتفاق تکبیر تشریق اتیان ایدر . منفردده ایسه امام اعظم حضر تارنجبه تکبیر تشریق لازم گلمز . مسبوقك ابتدا قضا ایتمدیگی قرائت . اول صلاتی و تشهد . آخر صلات ایدر . مثلاً مسبوق . مغربك صوكت رکعتده امامه ادراک ایلسه قضا ایده جگی ایکی رکعتده دخی فاتحه و سوره قرائت ایدرک بینارینی قعده ایله فصل ایدر . صلات رباعیه دن صوكت رکعته یتشسه قضایه قیام ایلدکده برنجی رکعتی فاتحه و سوره ایله قیلوب تشهد ایلر بعده ایکنجی رکعته قالدقده رینه فاتحه و سوره او قویوب بلا تشهد اوچنجی به قیام ایله یالکمز فاتحه قرائت ایدر . مسبوق لاحق . قبل الاقتدا بعض رکعاتله امام . کندوسنی سبق ایدوب بعد الاقتدا بر سبیلله بعض رکعتلری فوت ایدن کیمسه در . بونك حکمی اولاً بلا قرائته قضای مافات ایتمکدن صکره امامه یتشه بیلدیگی حالده متابعت . بعده مع القرائه قضای ماسبقه مسارعت ایتمکدره مثلاً صلات رباعیه ده بر رکعتله مسبوق اولوب بعد الاقتدا ایکی رکعت دخی نوم ایله فوت اولدینی حالده امام دردنجی رکعتده ایکن او یانسه اولاً او یودینی رکعتدن

برخی بلا قرائه قیلوب امامه متابعتله قعود ایدره چونکه قیلدینی
بر رکعت امامنک ایکنجی رکعتدر بناء علیه بعده دیگر بر رکعتی
دخی ینه قرائتسز قیلهرق قعود ایلرکه بوده کندوسنک ایکنجی
رکعتدره بونلردن صکره او یاندینی رکعتی کذلک قرائت ایللمکسزین
قیلوب امامه تبعیتله ینه قعود ایدره زیرا بورکعت امامنک
دردنجی رکعتدره بعده مسبوق اولدینی بر رکعتی فاتحه وسوره
ایله قضا ایلرکه بورکعتده منفرد واوته کی رکعتدره مقتدی
حکمنده اولدیغندن امامک صلاتنک ترتیبی اوزره ادا ایللمسی
واجبدره اگر ترتیبی عکس ایدر ایسه بین الرکعات ترتیب
امام اعظم وامام محمد وامام ابی یوسف حضراتنه گوره واجب
اولدیغندن صحیح اولورسه ده ترک واجبدن ناشی اثم ترتب
ایدره امام زفر عنندنده ترتیب فرضدره عکس ترتیب بش
صورته در برنجیسی اولاً او یودیغنی صکره ماسبقی بعده اویانوب
امامه ادراک ایتدیگنی قیلمقدره ایکنجیسی اولاً ماسبقی
بعده ادراک ایلدیگنی ده صکره او یودیغنی ادا ایتمکدره
اوچنجیسی اولاً ماسبقی متعاقباً او یودیغنی و بوندن صکره ادراک
ایتدیگنی ایفا ایله مکدره درنجیسی ابتدا ایرشدیگنی ثانیاً او یودیغنی
صکره ماسبقی و بشنجیسی اک اول یتشدیگنی صکره ماسبقی بعده
او یودیغنی قیلمقدره درختار وابن عابدین و درر و غیرهم

—————▶▶▶▶▶▶▶▶▶▶—————

یدنجی باب

مکروهات و مفسدات صلات و نفعاته دائر مسائل حاویدر
مُصَلِّیْهِ ثَوْبِی و یاجسدی ایله اوینامق و سجده موضعندن اوافق
و یا حقیل طاشلری دفع ایتک یا خود اوته بری چویرمک مکروهدره
اگر سجده ممکن اولمیه جق ایسه بر کره موضع سجده بی دوزلتمکده
کراحت یوقدره قدوری ﴿یا اباذر مَرَّةً وَآلَا فَذَرْ﴾ حدیث
شریفی دلالتله حین ضرورتده بیله اولسه بردن زیاده تسویه
مکروهدره منع ﴿پر مقلربنی چاتلامق والی بوگرینه وضع
ایتک اوضاع کر بهه دندر قدوری﴾ فرقه اصابع (۱) گرک داخل
صلاتده گرک نمازه مشی و یا اکانتظار آجلسه مثلوتوابع صلاتده تحریم
مکروه اولوب خارج صلاتده حاجت ایچون اولور ایسه کراحت
یوقدره تشبیک اصابع (۲) دخی بویه در درختار اثوابی
سدل ایتماک یعنی امور لرینه الوب اشاغی صالیورمیه رک عادت
اوزره گیمک و صاچی خیط (۳) ایله باغلا یهرق باشه و یا اگسه یه
وضع و سجده یه اینرکن ثوبی ارسالدن (۴) منع ایلمامک واقعاء
کلب (۵) گبی او طور مامق لازمدره قدوری سدل لبس
معتاده مخالف ارسال ثوب معناسنه اولدینی حاجی ده مصرح اولوب
کتفیندن ایکی طرفنی صالیورمگه و نیمتن و فراجهنک یکلربنی
(۱) فرقه اصابع پر مقلربنی چاتلامق (۲) تشبیک اصابع پر مقلربنی
بربری اره سنه صوفق (۳) خیط ایبک (۴) ارسال صالیورمک
(۵) اقعاء کلب کوپک اوتوریشی

گیمیوب ارقه‌یه المغه شامل وفتح القدرده بیان اولندیغی اوزره
بر طرفی صدره و طرف آخری خلفه (۱) ارساله متاولدر
﴿منح﴾ قوشاقسز قبا (۲) ایله یگنری لبس ایدرک نماز قیلحق
جائز ایسه ده فقط اسائندن خالی دگلدر ﴿در مختار و غیره﴾ یگنر
صیغالی واتک بلده ایکن نماز قیلحق مکروهدر ﴿حاجی﴾ بلا حاجة
بویینی تحویل ایله یمین و یساره باقق و گریتمک و اغزی آچهرق
اسنه مک و ایکی الری یرده وضع و دیزلری گوگسه ضم ایدرک
قعود ایتک وال و یا باش ایله اشارت ایلیه رک سلام آلق و گوزلری
یوتمق و یا سمایه دیکمک و نماز قیلان محله برزی روحک صورت
ورسمی بولتمق و ضرورتسز او کسورمک مکروهدر و لسانیه
ولو سهوا رد سلام ایتک و صدری سمت قبله دن چویرمک مفسد
صلاتدر ﴿درر و حاجی﴾ نمازده عذر سز تربیع (۳) ایلمکده
کراحت واردر ﴿قدوری﴾ خارج صلاتده تربیع رسول اکرم
صلی الله تعالی علیه وسلم اقدامر حضرت تلیله صحابه کرامک اکثر
حالی اولغله کراحتدن بریدر ﴿در مختار﴾ نمازده عمدأ (۴)
ویانسیانا نخود مقدارندن اقل اوله رق مابین اسنانده (۵) بولنان
طعامی یوتمق مکروهدر و نخود مقداری اولورسه و بوندن آز
ویا چوق اولسون طعام اوچ کره مضغ (۶) یا خود اغزده برشی
بولنوبده صوی بلع (۷) ایدیلورسه صلاتی افساد ایدر ﴿در مختار﴾

(۱) خَلْف * آرد (۲) قَبَا * قَفْتَان (۳) تَرْبِيع * باغداش قورمق
(۴) عَمْدَأ * قَصْدَأ (۵) اَسْنَان * دِشَلَر (۶) مَضْغ * اغزده چگنه مک
(۷) بَلْع * یوتمق

اشای صلاتده خارجدن سیمسم (۱) قدر طعامی اکل و قطره
مطری شرب ایلمک دخی مفسددر ﴿منح﴾ مصلیٰ منفردی من
غیر قصد و حدث سبق ایسه نمازدن انصراف (۲) ایدر و اگر
بو حال امامده وقوع بولور ایسه خلفنده اولان مقتدیلدن برینی
یرینه چکر و مصلیٰ و یا امام در عقب آبدستلری آلوب دنیا کلامی
سویلمدیله ایسه قالدقلری رکعتدن قیلدقلری نماز اوزرینه
هر بری منفرداً بنا ایلر لکن بویله احوالده گرک منفرده گرک
امام و مقتدییه استیناف صلات افضلدر ﴿قدوری و غیره﴾ شو
مسئله بروجه آتی تصویر اولنور شویله که منفرده حدث و عارض
اولسه فی الحال منصرف اولوب بعد التوضی دیلرسه محل صلاتده
واسترسه بشقه یرده نمازی اتمام ایدر و مقتدیده حدث ظهور
ایلدکده امام و هنوز نمازده ایسه عودت ایدرک اولکی موقعده
و بر گونه مانع و حائل اولندیغی صورته محل وضوده و یا دیگر
بر یرده تکرار اقتدا ایلر و حدث اگر امامده واقع اولور ایسه
مقتدیلدن برینی مقامنه چکوب بعد التوضی عودت و یرینه
قویدیغی امام ثانییه اقتدایه نیت ایدر ﴿جوهره﴾ امام و لدی
الایجاب کندوی حال رعا فده (۳) گوستردیگی تقدیرده بورنی
طوته رق نمازدن چیقوب باقی قلان رکعتیه پر مغیله اشارت و مسبوق
دخی اولسه جماعتدن برینی یرینه جرایدر و امام و ماتجوز به الصلاة
مقداری قرائندن حصر (۴) و قوعیله عاجز اولسه امام اعظم

(۱) سَمِسم * سِيسَام (۲) اِنْصِرَاف * چِیْمَق (۳) رُعَاف * بورن قنماق
(۴) حَصْر * نمازده او قودینی قرآنی نسیان ظهوریله امامک ایلرو
گوتورمکدن عاجز اولسی

حضرت تهرینه گوره دیگرینی برینه قویمق جائز اولوب شاید اولمقداری قرائت ایلمش ایسه بالاجماع استنباهیه (۱) جواز یوقدر درر امام ایچون مسجده خروج و صحراده صفوفی تجاوز استخلافه مانع وشو حالده جماعتک صلاتی فاسددر * بومقوله احوالده امامک نمازی حقنده ایکی روایت اولوب بری فساددی دیگرینی صحتی درر درر ملخصاً ایجابنده مسجده توضع ممکن ایسه برینه دیگرینی قویمق سزین توضع ایله امامته رجوع ایله مک جائز درر در مختار ذهاب (۲) وایاب (۳) حالده قرائت ویاطلب مائه اشارت یاخود سبق حدثن صکره ادای رکن مقداری مک (۴) ایتک استخلاف و بنایه مانعدر * حقیقه رُعاف وقوعنده انقطاعه دک توقف ایدیلوب بعده بالتوضی صلات بنا اولنور تنویر آفا بیان اولندیغی اوزره بنای صلات ایدلمکدن ایسه استیناف اولنمق دهافضل واولی در * مصلی تنوم (۵) ایدوبده بوآرده احتلام وقوعبولسه ویاچنون ظهور ایتسه یاخوداغما (۶) عارض اولسه ویاغیرک ایشیده جگی درجهده وقهقه صورتنده ضحک (۷) ایله نمازی بنا ایتک صحیح اولیوب وضوء و صلاتی اعاده لازمدر * کذلک عمداً ویا نسیاناً نمازده دنیا کلامی سویلسه نمازی باطل اولور قدوری وغیره معنایی اولان لفظ وحی (ق) گبی حرف واحد بیله نمازده تکلم اولنسه مفسد صلاتدر در مختار ناسدن طایب ممکن اولان شی ایله دعا (۱) استنباه برینی برینه قویمق (۲) ذهاب گتمک (۳) ایاب رجوع ایتک (۴) مک اگلمک (۵) تنوم * اوبومق (۶) اغما بایلیق (۷) ضحک گولمک

ویا آه وانین یاخود وجع (۱) ومصیبت ایچون صوت (۲) وحروف ایله بکا (۳) ومن غیرعذر لاقل ایکی حرف ایشیدیله جک درجهده تنجیح (۴) ایله مک نمازی بوزان حالدرندر ابن همام نفسنه مالک اولمیان مریضک آه وانینی واقصیرمه واکسورمه گبی حالاتدن حاصل اولان اصواتک (۵) مقنضای طبیعتدن زیاده اولمیه رق حروف تشکیلی مفسد صلوٰه اولمز کذلک حسن صوتله تلذذ (۶) ایچون اولمیه رق خشوعاً تأثیر قرائتله آغلا یوب بلی ویا آری یاخود اوت دینلمسی ده بویلدر در مختار و ابن عابدین دفعه طاقی اولمیان مصیبت زده نک بکاسی حروفی حاوی اولسه بیله مفسد دگلددر (ظہیریة) بلاضروره تنجیح صورتنده یا لکتر صوت ویا حرف واحد حاصل اولور سه کراحت بولنور اما ایکی ویادهای زیاده حرف ظهور ایتسه نماز فاسد اولور حاجی داخل صلاتده خبر سروره الحمد لله و خبر کدره ان الله و تعجبه سبحان الله ویا لا اله الا الله دینلسه ویا بولنره مشابه (۷) بشقه برشی سویلنسه اگر صلاتده بولندیغنی بیلدیر مک قصد ایدلمش ایسه مفسد اولیوب عکسی تقدیرده یعنی خبره جواب اعطا ایدلمک استلذیگی حالده مفسددر درر اشای صلاتده عاطس (۸) اولان کندی نفسنه یرحمک الله ویا (۱) وجع اغری (۲) صوت * سس (۳) بکا اغلامق (۴) تنجیح واکسورمه صورتنده بوغازینی آغلامق (۵) اصوات * صوتلر یعنی سسلر (۶) تلذذ حظ ولذت دویمق (۷) مشابه بکزهین (۸) عاطس آقصیران


— اَلْحَمْدُ لِلّٰهِ — دیسه مفسد اولمز فقط دیگر بر عاطسه اعلام . قصدی
اولیه رِق — اِنَّ رَحْمَتَ اللّٰهِ — دیسه مفسد صلاتدر ﴿در ر﴾ نمازده
وسوسه دنیویہ بی دفع . قصدیله — اَلْاَحْوَالُ وَالْاَقْوَاتُ بِاللّٰهِ —
دیمک مفسد اولوب اگر ملاحظه احوال اُخرویہ ایچون دینلورسه
صلاقی بوزماز ﴿منیة نقلاً عن الذخيرة﴾ مصلی . امامنک
غیریسنه فتح قرائت ایتسه نمازی فاسد اولور و امامنه فتح
قرائت ایدرسه گرک ماتجوز به الصلاة مقداری قرائتدن
ویا آیت اُخرايه انتقالدن اول اولسون گرک صکره اولسون
قول اصحده فاسد اولمز ﴿ماتقی﴾ اما مقتدی جماعتدن خارج
بر کیمسه دن ایشیدوبده امامنه فتح ایلسه جمله سنک نمازی
فاسد اولور ﴿در مختار وابن عابدین﴾ مصلی نک غیرسی
مصلی یه فتح ایتسه مصلی اخذ ایدرسه شبه (۱) تعلم اولدینی سببیه
نمازی بوزیلور ﴿حاجی﴾ نمازده ایکن مصحف شریفدن قرائت .
امام اعظم حضر تلرنجه مفسد اولوب امامین عندنده دگلدرد
﴿ماتقی﴾ عمل کثیرکه (قول اصحده ناظر اولان . مصلی عاملک
نمازده اولدیغنده شک ایتیه) صلاقی مفسددر . بوقوله بدایعده
اصح و محیطده احسن و صدر الشهیدده صواب (۲) دینامشدر
﴿بحر رائق﴾ بر قوله ایکی ال ایله عمل . عادت اولان شی
ید واحده ایله دخی ایشلنورسه عمل کثیردر . ايس قیص (۳) و شد
(۱) شبه . بکزه بجی (۲) صواب . دوغری (۳) قیص . گو ملک

سراویل (۱) گبی و برال ایله عمل . عادت اولان نسنه نی ایکی
ال ایله دخی ایشله مک عمل قیلدر * قلنسوه نک (۲) لبسی و یا
نزعی و حل (۳) سراویل گبی ﴿منح و غیره﴾ مصلی قبله دن دونیمه رک
یوریبوب هر خطوه ده (۴) بر رکن مقداری وقفه (۵) ایلسه
مکان . مختلف اولدجه صلاقی فاسد اولماز ﴿در مختار﴾ اگر
مصلی نک صحرا ده اوکنده صف بولنرسه بوبایدہ معتبر اولان
موضع سجودی تجاوز (۶) ایلدیگی تقدیرده نمازی بوزلماز .
متجاوز . امام اولدینی حالدہ کندوسیه آرقه سنده کی صفک
مابینی قدر موضع سجودی گجر ایلسه کذلک نمازی بوزلمز . لکن
امامک موضع سجوددن تجاوزی مقدار مذکوردن
اکثر اولور و منفرد . محل سجده بی متجاوز بولنور
ایسه صلاتلری فسادہ وارر . امام نسفی به گوره قادین ایچون
بیت . مسجد و غیریلر عندنده صحرا . حکمنده در ﴿حاجی و ابن
عابدین﴾ مصلی یه تشهد مقداری قعوددن صکره حدث اضطراری
واقع اولسه امام اعظم حضر تلری عندنده در حال آبدست الهرق
اوتوروب سلام ویرر . چونکه خروج بصرعه بولمدیگی و نمازی
تام اولمدیگی و واجب اولان سلامی ترک ایلدیگی ایچون توضی یه
وتکرار سلامه محتاج اولور . اگر حال قعودده بعد التشهد
(۱) شد سراویل * طونی باغلامق (۲) قلنسوه * باشه گیلان کسوه
(۳) حل * چوزمک (۴) خطوه * آدم (۵) وقفه * دورمق (۶)
تجاوز * ایلرو گچمک

وقبل السلام قصداً ایقاع حدث ایله سه ویا دنیا کلامی سویله سه یاخود صلاته منافی اکل و شرب و قهقهه و کشف عورت گبی اختیار یله بر عمل ایله سه خروج بطنه بولمغله بالاتفاق صلاتی تمام اولور . تیمله نماز قیلان مسلم . تشهد مقداری او طور مزدن اول صوبی گوروب استعمالنه قدر اولسه اتفاقاً صلاتی باطل اولور . بناءً علیه متیم (۱) تشهد مقداری قعوددن صکره صوبی گورسه یاخود مصلی خفیننه مسح ایتمشیکن بعد القعود مدت مسح تمام اولسه و یا عمل یسیر ایله خفیننی اخراج ایتسه و یا امی (۲) ایکن تشهد ایدنجه قدر او طور دندن صکره بر سورة شریفه من غیر تکلف تعلم (۳) ایله سه یاخود عاری ایکن کذلک بعد القعود ثوب بولسه و یا ایما ایله نماز قیلار ایکن بعد التشهد رکوع و سجوده قدر اولسه و یا صاحب ترتیب اولوب قضایه قلمش نمازینی او حالده تذکر ایله و یا بعد القعود حدث و قوعندن ناشی امام قاری برامی ییرینه گچورسه و یا غلات فجرده تشهددن صکره گونش دوغسه و یا غلات جمعهده بولیلور ایکن وقت عصر گیرسه و یا جیره اوزرینه مسح ایله نماز قیامده ایکن تشهد مقداری قعوددن صکره بر و نامدن جبیره ساقط اولسه یاخود معذور اولدینی حالده عذری کذلک قعودده مندفع اولسه و یا وقت چیقمش بولسه امام اعظم حضر تدرنجه خروج بطنه

(۱) متیم . تیم ایدن (۲) امی . او قومه بیلان (۳) تعلم . او گر نمک

بولمیدینی ایچون نماز باطل و امامین عندنده خروج بطنه فرض اولمیدینی اعتبار یله صلات . تام و کامل اولوب شو قدر که بلا صنع سلام واجبی ترک ایتمش اولور . صور مذکوره یه مسائل اثنا عشر دینلور . قدوری و حاجی . صلات و قیبهده فائده نک تذکری و صلات فجرده شمسک طلوعی و جمعهده وقت ظهرک خروجی فرضک نافله یه انقلابی ایجاب ایدوب ماعداده کایاً باطل اولور (جوهره) صحرا و یا مسجد کبیره موضع سجوددن و خانه و مسجد صغیره مصائبک او گندن مرور ایتمک مفسد صلات دکسهده گچن آثم اولور . صحرا ده احد حاجیتنه یعنی قاشلرندن برینه محاذی و پرمق قالینلغنده اوله رق بر ذراع مقداری ستره (۱) نصب (۲) ایتمک سنت و بر قولده مستحب اولدیندن ترکی مکروهدر . مروردن امنیت محنده ترک ستره جائز و امامک ستره سی جماعته کافیدر . طولاً عصا و یا بر خط . وضع اولمیدینی و یا محراب طاشی بولمیدینی حالده کفایت ایدر .



سکزنجی باب

صلات فائده نک قضای بیانندهدر

وقتی گچن نماز لک قضاسنه متعلق مسائل مخصوصهدر . صلواتدن برینک فوتی و بونک تذکری حالنده فائده قضا اولور و صلات

(۱) ستره . پرده ایدیلان شی که بوراده آچیق بر محله نماز قیلار ایکن مصلی نک او کته دیکدیگی دگنک و امثالی مقصوددر (۲) نصب . دیکمک

وقتی که اوزرینه تقدیم قنور . لکن قضای تقدیم سببیه صلات
وقتی که فوت شدن خوف ایدیلورسه وقتی تقدیم بعده فوتیه قضا
اولنور ﴿قدوری﴾ صلات فوتیه بیننده وفوتیه ایله وقتی
میاننده ترتیب . شرط اولدیغندن بونک ترکی جائز اولماز . زیرا
ابن عمر دن (رضی الله عنه) روایت اولنان ﴿مَنْ نَامَ عَنْ صَلَاةٍ
اَوْ نَسِيَهَا فَلَمْ يَذْكُرْهَا اِلَّا وَهُوَ يَصِلُ مَعَ الْاِمَامِ فَلْيَصِلْ اِلَيْهِ هُوَ فِيهَا
ثُمَّ لِيَقْضِ اِلَيْهِ تَذْكُرُهَا ثُمَّ لِيُعِدَّ اِلَيْهِ اِلَامًا﴾ حدیث
شریفنده مع الامام قیلان نمازک اعاده سی امر بیورلمسی ترتیبک
شرط اولدیغنی مثبتدر (ملتقی وجمع الانهر) صلات وتر امام
اعظم حضر تدرینه گوره فرض عملی اولمغله انکله فروض خمسة
فائده بیننده دخی ترتیب رعایت لازمدر خلافاً للامامین . بنا برین
صلات عشا ناسیاً بلا وضوء ادا اولنوبده بعده سنت ووتر .
آبدست ایله قیلدیغنی معلوم اولسه عشا واکا تابع اولان سنت
اعاده اولنور . اما وتر . صلات مستقلا اولدیغندن بونکله عشا
بیننده ترتیب . فرض ایسه وتری ادا ایدر ایکن عشا . وضوء
ایله قیلندی اعتقاد دناشی عشا ذمتنده اولدیغنی اونو تمق معذرتیه
ترتیب . ساقط اوله جغندن امام اعظم حضر تدرینه گوره وتری
اعاده لازمگلمز وامامین عندنده وتر . سنت اولمغله اعاده سنه لزوم
گوسترلمشدر ﴿درر﴾ صلات متعدده فوت اولسه اداده ترتیب
لازم اولدیغنی گبی قضا دخی ترتیب مقتضی اولدیغندن بربری
آردنجه قضا بعده وقتی ادا ایدیلور . فوائت . آتی وقت نمازه بالغ

اولوبده صلات سادسه نک وقتی خروج ایتدیگی صورتده ترتیب
ساقط اولور ﴿قدوری﴾ سقوط ترتیب . اسباب اربعه نک بریله
حاصل اولور . اولکیسی ضیق وقتدرکه فائده نک قضا سببیه وقتی
دخی فائده اولمق خوفیدر (مثلاً عشا ایله وتر فوت اولوب وقت
فجر دن بش رکعت قبله جق قدر وقت قالسه امام اعظم حضر تدرنجه
انجق وتر ایله فجر قبله رق عشا ترک اولمغله ترتیب بوزیلور)
ایکنجیسی نسیان فائده در . (مثلاً صلات فجر اونودیله رق ظهره
شروع ایله ادادن صکره فجر تذکر اولسه ترتیب ساقط وظهر
صحیح اولور) اوچنجیسی ظن معتبردر (فرضا فجر . فوت اولدیغنی
تذکر اولدیغنی حالد صلات ظهر قیلنسه ظهر فاسد اولمشیکن
فسادندن غفلتله فجر قضا وظهر فاسدی ذا کرایکن عصر ادا
اولسه وجوب ترتیبی جهتندن ذمتنده فائده قالمدیغنی ظننه بناءً
عصر صحیح اولور) دردنجیسی کثرت فوائتدرکه فوائت سته ایله
معتبردر ﴿درر و غیره﴾ فوائت قدیمه وحديثه مجتمع اولسه
حديثه بی تذکر ایله وقتی صحیح اولور (مثلاً بر آی نمازی فوت
اوله رق ترتیب ساقط اولدقدن صکره ایضاً وقتیاته شروع ایله
بعده بر وقتی دخی فوت اولسه بونی تذکرله برابر وقتی ادا
صحیح اولور) قول اصحده کثرت . قلته عودت ایتک سببیه
ساقط اولان ترتیب عودت ایتمز (مثلاً بر ایلق فوائت . قضایه
باشلانیلوب فائده آتی وقتک مادونسه تنزیل ایدلکده هر قدر
کثرت . قلته عودت ایدلکده لکن ترتیب . عودت ایتدیگندن

ناشی مادون سته بی تذکره و قیہ بی ادا صحیح در در و غیره ﴿﴾
 نہایہ و معراجہ ترتیب . عودت ایتدیگی مفتی بہ در دینلوب بونی
 کافی دخی تصحیح ایتشدہ صاحب ہدایہ ہر قدر عودتی اختیار
 ایدوب ﴿﴾ و هو الاظہر ﴿﴾ دیش ایسہ دہ بونک مفتی بہ اولان
 قول مذکورہ نظر اضعفی ظاہر در ﴿﴾ منح و غیرہ ﴿﴾ بر فائتہ اولدیغنی
 تذکر ایلہ برابر بش وقت نماز ادا اولنسہ امام اعظم حضر تارنجہ
 فساد موقوفہ فاسد اولوب اگر خامسہ نک وقتی خروج ایتزدن
 اول قضای فائتہ وقوع بولور ایسہ قیلان نمازلر نفله انقلاب
 ایدہ جگندن ہر برینی قضا لازمگور و فائتہ قضا ایدلمکسزین
 خامسہ نک وقتی خروج ایتسہ جملہ سی صحیح اولور ﴿﴾ مثلاً بر مسلم
 صلات فجر ی ترک ایلہ بونی ذا کر اولدیغنی حالہ قضا ایتسہ رک
 ایرتسی صباحہ قدر مع الفجر بش وقت نمازی ادا ایتسہ اوقات
 خمسہ موقوفاً فاسد ایکن طلوع شمسہ ترتیبک سقوطی حسبیہ
 جملہ سی صحتہ منقلب اولور ﴿﴾ و امامین عندندہ بلا توقف فسادہ
 وارر ﴿﴾ فرضا بر مؤمن صلات ظہری ترک ایلسہ بونی قضا
 ایلکمکسزین ایرتسی گونی اوگله نمازیلہ برابر بش وقت نمازی
 فائتہ مذکورہ بی تذکر ایتمکلہ برابر ادا ایلمش اولسہ جملہ سی
 قطعاً فاسد اولہ جغندن بعدہ قضاسی ایجاب ایدر و فوائت ستہ سببیہ
 ترتیب ساقط اولمغلہ صلات عصر دن ابتداء قبلہ جفی نمازلر صحیح
 اولور ﴿﴾ امام ابی یوسفہ گورہ وصف فرضیت باطل و نفله متبدل
 و امام محمد نزندہ اصل صلات زائل اولور ﴿﴾ در مختار و مجمع الانہر
 و درر ﴿﴾ قضای فوائتہ قنی صلات اولدیغنی معلوم ایسہ فرضا

فلان گونک ظہری و یاعصری و معلوم دگل ایسہ اوزریمہ فرض
 اولان مثلاً اول ظہر و یا آخر ظہر دینیلہ رک تعین ایدلمک لازمدر
 ﴿﴾ درر و غیرہ ﴿﴾ فوائت . مسجددہ علماً قضا اولنمبوب غیر یلرک
 اطلاع حاصل ایدہ میہ جکری مناسب بر محلہ قضا ایدلمک مستحب
 و حتی بزازیہ دہ تصریح اولدیغنی اوزرہ قضای اظہار ایللمک
 مکروہدر . تحصیل حوائج عیال حسبیہ تاخیر فوائتہ بعضیلری
 طرفدن جواز گوسترلمشدر ﴿﴾ منح ﴿﴾ فوائتہ کفارت ایلہ وصیت اولنسہ
 ہر صلات مفروضہ و واجبہ ایچون ثلث مالدن صدقہ فطرہ مقداری
 اعطا اولنور ﴿﴾ سنویر ﴿﴾ مرتدک زمان رد تئندہ و دار حربدہ اسلامہ
 گلوب فرضیتنی بیلمیان حربی نک اورادہ مدت اقامتندہ فوت
 اولان نمازلری قضا ایجاب ایلمز . لکن دار اسلامدہ مسلم
 اولان ذمی یہ ہر قدر امر شریعتی بیامسہ بیلہ ینہ قضای
 مافات ایلمسہ لازمدر ﴿﴾ ملتی و مجمع الانہر ﴿﴾ مرتد تکرار اسلامہ
 گلد کدہ قبل الردۃ ترک ایتدیگی صلوات و صیاماتی قضا ایدر
 و جندن ماعدہ ادا ایلدیگی عباداتی اعادہ ایتز ﴿﴾ در مختار و ابن
 عابدین ﴿﴾ بر مسلمک حال صحتندہ فوائت کثیرہ سی وار ایکن
 وضوء و رکوع و سجوددن عاجز بولمق درجہ دہ مریض اولسہ
 بو حالہ تیمم و ایما ایلہ فوائتی قضا ایلمسہ جائز و اگر قضا دن صکرہ
 کندوسنہ صحتک عودتیلہ قدرت گلسہ انلرک اعادہ سی غیر
 لازمدر ﴿﴾ درر ﴿﴾ فوائت مفروضہ قضاسنک و جوبی فوری و یا
 علی التراخی اولسندہ اختلاف اولمش ایسہ فوری اولمسہ اصح
 اقوالدندر ﴿﴾ در مختار ﴿﴾ قضای فوائتہ اشتغال ایتک نوافلدن اولی

اولوب فقط سنن معروفه و تسبیح و تحیت مسجد و ضحی و اواین
مثلاً نماز لر حقنده اخبار مرویه اولدیغندن بونلر مستنادر
حلی و غیره

طقوزنجی باب

ادای صلات . مکروه اولان اوقات بیاننده در

نمازک تحریماً مکروه اولدینی اوقات مخصوصه دائر مسائلدیر .
شمسک طلوعی و وقت زوالده قیامی و غروب زمانده مطلقاً نماز
قیلمق مکروه اولوب فرض و تطوعه و قضا و نذره شاملدر .
وقت غیر مکروهده تجهیز و احضار اولنان جنازه نك نمازی اوقات
مکروهده قیلمز و کذا مکروه اولیان زمانده تلاوت اولنان
سجده آتی ایچون کراحت اولان مذکور وقتلرده سجده اولنمز .
انجق سبب وجوبی شروعه مقارن اولان وقت . ناقص اولدینی
ایچون صلات عصری وقت غروبده ادا مکروه دگلدیر .
و غیره . مذکور اوچ وقتده باشلانیلان و یا اداسی نذر ایدیلان
یا خود بعد الشروع افساد اولنان تطوعی قضا جائز اوله بیلور
ایسه ده بونلردن اول و ثانیک قطعی و وقت کاملده قضاسی ده
افضلدیر . درر وزیلعی . امام ابی یوسفدن یوم جمعهده حین
زوالده تطوعک من غیر کراهه جوازی مروی اولدینی منیهده
مذکور و اشباهده بونک صحیح و معتمد اولدینی مسطور در .
اوقات مکروهده قیلان قضای و اولدن واجب اولدینی حالده

وقت مکروهده ایدیلان سجده تلاوتی و سجود سهوی عدم
صحتدن ناشی اعاده لازمدر . منیه و غیره . صلات فجر دن صکره
طلوع شمس و صلات عصر دن صکره غروب شمس دگین نافله
قیلمق تحریماً مکروهدر . قدوری . طلوع فجر دن صکره دخی
سنت فجر دن ماعدا تطوعده کراحت اولوب حتی من غیر تعیین
تطوعه نیت ایدلسه سنت فجره نائب اولور . زیلعی . اما قبل
الطلوع تطوعه شروع اولنوبده او حینده فجر طلوع ایتمش اولسه
قول اصحده اتمام ایدیلور ایسهده سنت فجر . مقامنه قائم اولمز
منح . صلات فجر و عصر دن صکره اولان ایکی وقتده قبل
الاحرار قضای فوائده و سجده تلاوت و صلات جنازهده باس
و کراحت یوقدر . فقط ذکر اولنان ایکی وقتده صلات طواف
و نذر و نافله و طلوع فجر دن صکره صباح نمازینک ایکی رکعت
سنتدن زیاده تطوع . و صلات مغربدن مقدم نافله نمازی قیلمق
مکروهدر . قدوری . جمعه و عید و حج . خطبه لرنده خطیبک
منبره صعودندن آخر صلاته دگین فائده دن ماعداسی مکروه
و فائده قول اصحده بلا کراهه جائزدر . درر نقلاً عن النهایة .
انجق بوندن مقصد صاحب ترتیب اولانک فائده سی بولنوبده
اثنای خطبهده خاطربنه گلدیگی حالده انک قضاسنه جواز اولوب
یوقسه سائر فوائت حقنده صدر الشریعه نك دیدیگی گبی کراحت .
شبهه سزدر . چونکه استماع خطبهیه بلا ضروره خلل گتورمک
جائز اوله من . شرنبلالی . سنت فجر افساد ایدلسه صحیح
بودر که فرض فجر دن صکره قضا اولنمز . محیطده بعض مشایخدن

تَقْلًا (سنته شروع ایله فوت فجر دن خوف اولنسه آولا سنت بعده فریضه ایچون تکبیر ایدمک و صلات فجر دن صکره سنتی قضا ایله مک احسندر) دینلمسی (تکبیر ثانی ایله افساد سنت اولمدیغی فرض اولنسه بیلکه فرض فجر دن صکره قضای سنت کرا هتی باقی اولدیغنه و ارتفاع شمسدن صکره اولنان قضا ایسه سنت فجری قضا اولمیوب بلکه شروع سببیه لازم اولان شیئی قضا اوله جغنه مبنی) التفاته شایان اولمدیغنی حاجی بیان ایدیور.

اوننجی باب

صلات نوافل بیاننده در

طاوع فجر دن صکره فرض فجر دن اول ایکی و صلات ظهر ده قبل الفرض درت و صکره ایکی رکعت سنت مؤکده دره صلات عصر ده قبل الفرض درت رکعت سنت غیر مؤکده دره صلات مغرب ده فرضدن صکره ایکی رکعت سنت مؤکده دره صلات عشاءه فرضدن اول درت رکعت سنت غیر مؤکده و بعد الفرض ایکی رکعت سنت مؤکده دره قدوری سنت فجر اقوای سنن مؤکده اولوب بغیر عذر قاعدا اداسی جائز اولمیه جفی امام اعظم حضر تیرندن روایت اولمشدر بوندن صکره ظهرک ایلمک سنتی آکد واقووا و باقیلری علی السوا (۱) در حاجی سنت فجر فرض ایله بر لیکده فوت اولسه وقت زواله قدر انکله برابر قضا

(۱) علی السوا مساوات اوزره در

اولنور * اگر زوالدن صکره یه قالیرسه یالکز فرض فجر قضا اولنوب سنت فجر سنن صلوات سائره گبی قضا ایدلمز بر قولده سنت فجر واجب و اهل فتوایه کوره ترکی غیر جائز در تنویر و حاجی گبیجه نافله سنده سکزده و گوندز نافله سنده ایکیده و درتده بر سلام و یرمک جائز و زیاده سی مکر و هدره امام اعظم حضر تیرینه کوره کیجه نافله سنده سکز رکعتدن زیاده ده سلام و یرمکده کرا هت وارد و امامین عندنده ایکی رکعتده بر سلام و یریلوب زیاده ایدلمز قدوری صلات لیل و نهاردده امام مشارالیه حضر تیرنجبه درتده و امامین عندنده صلات لیلده ایکیده

بر سلام و یرمک افضلدر منیه بعد المغرب آواین نمازینک آئی و یا ایکی رکعت اوله رق ایفاسی و آلتی رکعت قیلندیغنی حالدده در درده سلام واحد ایله تقییدی اوچ سلام ایله اداسی مستحب اولمق اوزره تجنیسدن نقل اولنان مسئله یه مخالفدر منج صلات جمعه دن اول درت و صکره ینه درت رکعت اوله رق ادا اولنان نماز سنت مؤکده اولدیغندن بونلرک قعده اولی لرنده تشهد ایله اکتفا اولمق و رکعت ثالثه ده سبحانک او قونماق و غیر مؤکده لرده صلوات و سبحانک قرائت قلنمق سنتدر منج جمیع فرضده اولکی ایکی رکعتلرده قرائت واجب اولوب ثالثه و رابعه ده استیلور ایسه یالکز فاتحه شریفه قرائت و یا تسبیح یا خود سکوت اولنور نافله نک جمیع رکعاتنده و صلات و ترک اوچ رکعتنده دخی قرائت فرضدر قدوری فرضک ثالثه و رابعه سنده قرائت فاتحه اتفاقاً جائز افضلیت و سکوت بعضیلر

عندنده اساتدر ﴿جوهره﴾ صلات نافله دخول اولنوب بعده
افساد ایدلسه شروع ایله واجب اولدیغندن قضای لازم اولور .
درت رکعت نافله به شروع واولکی یکی رکعتلرده تشهد مقداری
قعوددن صکره رکعتین اخیرتین افساد اولسه نفاک هرایی رکعتی
بر صلات اولمق اعتبار یله انحق یکی رکعت قضا اولنور
﴿قدوری﴾ نافله به درت رکعت نیتیه شروع اولنوب یکی رکعت
اتمام ایدلمکسزین فساد ویرلسه کذلک یکی رکعت قضا ایدیلور
خلافاً لامام ابی یوسف . شفع اولی بعدالاتمام اوچنجی رکعت
قیامدن اول افساد ایدلسه امام یوسف گوره یکی رکعت قضا لازم
گلوب امامین عندند برشی ایجاب ایتمز . اوچنجی رکعت قیامدن
صکره فساد ویرلدیگی تقدیرده اتفاقاً یکی رکعت قضا ایدیلور
﴿حاجی﴾ مسئله سابقه سنن مؤکده نك غیرینه عأدر . چونکه
درت رکعت سنت مؤکده به شروع اولنوبده گرک شفع اولده
گرک شفع ثانیده افساد ایدلسه بالاتفاق درت رکعت قضا اولمق
لازم گلور ﴿منیه﴾ درت رکعت تطوعه شروع اولنوبده قعدۀ
اولی ترک ایدلسه امام محمد گوره قعدۀ اولی فرض اولدینی جهته
نماز فاسد اوله جغندن رکعتین اولن قضا اولنور و امامین عندنده
نماز فاسد اولیه جغندن قضا لازم کلز ﴿منیه﴾ نافله بی قیامه قادر
ایکن قاعداً (۱) قیلمق جائزدر . اگر نافله به قائماً (۲) شروع
اولنوبده من غیر عذر قعود ایدلسه امام اعظم حضر تدرنجہ نماز
جائز اولور خلافاً لهما ﴿قدوری﴾ طول قیام . کثرت قرائتی


(۱) قاعداً . اوطوره رق (۲) قائماً . ایاقده دوره رق

شامل اولدیغه بناء کثرت رکعتدن افضل اولدینی ملتی وغیریده
مذکور وکثرت رکعات . افضل اولدینی تنویرده مسطوردر .
معراج الدرایه ده ثانی به امام محمد قولی واوله امام اعظم حضر تدرینک رأی
دینلمش ویدا یعدۀ اول مصحح و ثانی دخی بحر رائقده مرجع اولمق
اوزره گوسترلمشدر ﴿در مختار﴾ تطوعک درت رکعتده یاخود صوک
ایکی رکعتلرک برنده قرائت ترک اولسه عند الامامین یکی رکعت
وامام ابی یوسف گوره درت رکعت قضا ایدیلور . ایکی اولکی
یاخود ایکی صکره کی رکعتلرده ویا بونلرک برر رکعتلرنده قرائت
ترک ایدلسه اتفاقاً یکی رکعت قضا اولنور (مثلاً برمسلم درت
رکعت نافله به شروع ایدوب یکی اولکی رکعتلرده قرائت ایلسه
وایکی صوک رکعتلرده قرائت ایلسه اشبو ایکی آخرکی رکعتلری
اجماعاً قضا ایدر . وبالعکس اولکیلرده ترک قرائت ایدوب
آخردۀ کیلرده قرائت ایلسه اولکی یکی رکعتی کذلک بالاجماع
قضا ایلر) اگر یالکیز اولکی رکعتلرک برنده اوقیوب دیگرنده
اوقومسه یاخود اولکی رکعتینک یا کیز برنده و صوک رکعتلرک
کذلک برنده قرائت ایلوب دیگرلرنده ترک ایلسه تحریمه
باقی اولدیغندن عند الامامین درت رکعت قضا ایدر . وامام محمد
گوره ایکی رکعتده ترک قرائتله تحریمه مرتفع اولدیغیچون
ایکی رکعت ایله اکتفا ایلر ﴿ملتی وجمع الانهر﴾ خارج مصرده
دابۀ اوزرنده ایما ایله نافله صحیح اولدیغندن دابۀ هر هانکی جهته
توجه ایدرسه ایتسون استقبال قبله گرک ابتداء گرک بقاء . شرط
دکلدر . را کباً نافله به شروع اولدینی حالده مؤخرأ نزول اولسه

عند الامامين بناء ايتك جائز وامام ابی یوسفه گوره استیناف لازمدر * عکسی تقدیرده بالاتفاق استیناف مقتضیدر ﴿ملتقى﴾ سنت فجرى سنت وجهله بعد الفاتحه سورة کافرون واخلاص ايله خانه ده ویا مسجدده تنها بر محله ایفا ایلکم مستحسن اولوب صلوات فجر ادا اولنورکن صف آره سنده ویا بلا حائل صف آرندده قیلمق مکروهدر * فقط فرضه شروعدن اول استیناف محله ادا اولنق جائزدر * امامه تشهدده ادراک ایديله جگندن امین اولنور ایه سنت فجره شروع اولنق وامین اولنه مدینى صورتده ترك ویا لکنز سنت فجر فوت اولورسه امام محمده گوره بعد طلوع الشمس وقبل الزوال * قضا ایدلک اولی در * عند الامامين اصلاً قضا ایجاب ایتز * اگر فرض ايله برابر فوت اولور ایه قبل الزوال قضا اولنور ایه ده بعد الزوال قضا ایدلکز * ظهردن مقدم اولان درت رکعت * سنت مؤکده فوت اولسه وقت ایچنده قضا و صوڪ سنت اولان ایکی رکعت قول احده تقدیم ایدیلور ﴿حاجی﴾ فتح قدیرده تقدیم رکعتین ترجیح اولنمش اولمسنه نظراً هر ایکسنى اجراده بأس یوقدر ﴿منح﴾ وقت وار ایه ایکی رکعت تحية المسجد (۱) سنت ایه ده لکن ادای فرضله ساقط اولور * بعد الوضوء ایکی وضوی وقتنده لا اقل کذلک ایکی رکعت نماز قیلمق مندوبدر ﴿تنویر﴾ فرض وسنت بیننده نمازه منافی عمل * ثواب سنتی تنقیص (۲) ایدر * عند البعض سنتی ابطال (۳) ایده جگندن اعاده سی لازمدر ﴿تنویر ودرر﴾ طلوع شمسدن

(۱) تحية المسجد * جامعه ویا مسجدده گیرلدکده قیلان نمازدر (۲) تنقیص * اکلتک (۳) ابطال * حکمیز براقق

یارم ساعت مقداری زمان مرور ایلدکده ایکی رکعت اشراق ونصف لیلدن صکره اقلی ایکی اولمق اوزره اون ایکی رکعت قدر تهجد و بعد الوتر رکعت اولی ده زلزال و نایه ده کافرون سورهلری ضم اولنه رق قعوداً ایکی رکعت تنویر قبور ناملریله صلوات نافله اولوب اداسی آرزوه معقدر ﴿حاجی و غیره﴾



اون برنجی باب

سجده سهویه بیاننده در

سجود سهو افعال صلاتدن بر فعلک زیاده ویا واجبی ترك و نقصان ویا فرض و واجبی تأخیر ایتک سببيله بعد السلام واجب اولور ﴿لکل سهو سجدةً بعد السلام﴾ حدیث شریفی دلاتيله ذکر اولنان صورتلرله صلاتده سهو وقوعنده سلام اولدن صکره ایکی کره سجده و بعده تشهد و تصلیه اولنه رق سلام ویریلور ﴿قدوری و غیره﴾ قول ظاهرده سجود سهو انحق نسیان ايله اولوب عمداً ترك ویا زیاده ایدیلورسه نمازی اعاده واجب اولور ﴿منح﴾ سجود سهو تسایمیندن صکره اولمق صاحب هدایه و شمس الائمة نك مختاری اولدینى معراج الدراية ده ذکر اولنمش ایه ده فقط جانب یمنه سلام ویرلدکدن صکره اجرا ایدلمسنى صاحب کافی و فخر الاسلام قول اصح اوله رق اختیار ایلمشلردر ﴿کذا فی الدر المختار﴾ تاج الشریعه نك بیاننه کوره قول اول کبار صحابه نك قولی اولوب شمس الائمة اصح اولان بودردییور * لکن صاحب

مجتبی نك دیدیگی گبی قول ثانی اصح واحوط اوله رق عامه مشایخ
فقهانك قولیدر وشواختلاف اولویتده اولوب جوازده دگلدرد
دیگر بر قوله گوره ده منفردده سلام نائیدن وامامه سلام اولدن صکره
سجده سهو ایله مك مختاردر ﴿درر وشرنبلالی﴾ تحیات وصلوات
وادعیه مأثورده دن صکره قبل السلام دخی جائز اولوب اعاده سی
لازم گلمز ﴿منح﴾ گرك قعده صلات گرك قعده سجده سهویه ده
تصلیه وادعیه . طحاوینك مختاری ایسه ده بونلر یالکیز سجده
سهویه نك قعده سنه تخصیص ایدلدیگی هدایده مصححدر
﴿حای﴾ لکن درر ك ظهیریه دن نقلاً بیاننه نظراً سجده سهو ك
قعده سنده تصلیه کفایت ایدر ایسه ده گرك قعده صلات گرك
قده سجده سهویه ده تصلیه ایدلك احوطدر اصل صلاتدن
اولیوب فقط جنس صلاتدن اولان بر فعلی . صلاتده زیاده ویا
سنت ایله ثابت بر فعل واجبی یاخود فاتحه ودعای قنوتی ویا تشهدی
وتکبیرات عیدیندن بر تکبیر واجبی سهواً ترك ایلمك یاخود
امام طرفدن اخفاسی واجب اولان محمله جهر ویا جهری
واجب اولان محمله اخفا یتك سجود سهوی واجباً استلزام ایدن
افعالندر ﴿قدوری﴾ ذخیره ده سجده سهویه نك اسبابی آلتی
اولق اوزره ذکر اولمشدر . برنجیسی تقدیم ركن كه قرائتدن
اول ركوع ایلمك گبی . ایکنجیسی تأخیر ركن كه تشهد اوزرینه
زیاده ایدرك یعنی اصح اقواله گوره ﴿اللهم صل علی محمد و
آله﴾ دیهرك قیامی تأخیر ایتك وبر سجده بی ترك ایله اتی ركت أخراده

بالتذکر سجده ایله مك گبی . اوچنجیسی تکریر ركن كه ایکی
ركوع و اوچ سجده . کبی درنجیسی صفت واجبی تغییركه موضع
اخفای قرائتده جهر ومقام جهرده اخفا گبی . بشنجیسی ترك
واجب كه قعده اولی بی ترك ایتك گبی . آلتنجیسی جمیع صلواته
مضافه اولان سنتی وقعده اولی ده تشهدی ترك ایله مك گبی در .
وجوه سته مذکورده ترك واجبه مؤدی اولسنه نظراً سببی ترك
واجبدن بشقه برشی اولمدیغنی صاحب ذخیره بیان ایتمشدر
﴿حای﴾ جهر و اخفا خصائص جماعتدن اولدیغنه مبنی جهر
و اخفا مواضعنه رعایت ایتماك منفردده موجب سجود اولمز
﴿منح﴾ ایکنجی قعده ده تشهددن صکره قرآن اوقونسه
سجود سهو لازم گلمیوب لکن هر ایکی قعده ده تشهد یرینه
قرآن اوقونیلور ایسه سجده ایجاب ایلر ﴿حای﴾ مسبوقك
قضای مافات اثناسنده سهوی وقوعبولسه سجده سهویه بی
اجرا ایلمسی لازمدر * اولکی ركتلرده فاتحه ایکی کره اوقونسه
سجود سهو اقتضا ایدر . صکره کی ركتلرده ایکی دفعه اوقونسه
و ضم سوره دخی اولنسه سجده ایجاب ایتمز ﴿جوهره﴾ قعده
اولی ده سهو اولنوبده صکره تذکر ایدلسه حال قعوده اقرب
ایسه عودت وجلسه ایدیله رك یالکیز تشهد اولنوب سجده سهو
ایدلمز و حال قیامه اقرب ایسه عودت ایدلمیوب صلاتك اکیلله ایلك
سلامی متعاقب سهو ایچون سجده ایدیلور ﴿قدوری وملتق﴾
حال قیامه اقرب ایکن عودت اولنور ایسه قول صحیحه نظراً نماز فاسد
اولور ﴿جمع الانهر﴾ وجودك نصف اسفل نصب اولندیسه قیامه

و اولندیسده قعوده اقر بدر . محیطده رُکبتینی رفع اولندی ایسه
 قعوده اقر بدر دینلمش ایسهده اصح اولان قول اولدر ﴿حاجی﴾
 قیام اولندجقه قعوده عودت ایتک لزومی زیلعیده قول اصح
 اوله رق بیان اولمشدر ﴿درر﴾ شو حالد قول صحیحه گوره
 سجده سهویه لازم کلز . ﴿جمع الانهر﴾ نافلهده قعدة اولی .
 ثانیه منزله سنده اولغله قیام اولنسه بیله عودت ایدیلور ﴿درر﴾
 قعدة اخیره دن سهو ایدیلورک رکعت خامسه یه قالقلسه سجده
 ایدلمدجکه قعدة یه رجوع ایدیلورک خامسه انفا اولنور و سهو
 ایچون سجده ایدیلور . اگر رکعت خامسهده سجده اولنور
 ایسه صلاتک فرضیتی باطل اولوب نفله تبدل ایده جگندن
 رکعت سادسه علاوه ایتک لازم کلور ﴿قدوری﴾ لزوم ضم .
 رکعت وتر ایله تنفل جائز اولدینی ایچوندر . اصح اولان علاوه
 مندوب اولدیغندن ضم اولمدینی صورتده هیچ برشی ایجاب
 ایتمز زیرا نفل . غیر قصدی اوله رق وقوعبولغله اتمامی لازم
 گمیه جگی وافیده مذکور و درر و بحر ایله منجده مصرح
 و مسطوردر ﴿حاجی﴾ رکعت رابعهده تشهد مقداری قعود
 ایدیلوب بعده سهواً خامسه یه قالقلسه وقعدة اولی ظنیله سلام
 ویرلمسه خامسهده سجده ایدلمدجکه قعوده رجوع اوله رق سلام
 ویریلور و سهو ایچون سجده ایدیلور . شاید خامسهده سجده
 ایدلیسه بر رکعت دهاضم ایله سجده سهو اولنور . بوضورتده
 صلات مفروضه تمام اولوب ایکی رکعت زائده . نافله اولور
 ﴿قدوری﴾ صلات فجر و عصر دن صکره ضم اولنق مختاردر .

زیرا بوقتده منهی اولان نفل قصددر . بناء علیه بوقوالک
 اصح اولدینی شرح مجمعه ذکر اولدینی گبی مجتبی ده دخی
 ﴿وعلیه الفتوی﴾ دینلمشدر . وقت کراهتک غیر یسنده ضمی
 بعضلر واجب و بعضلر مستحب دیمشدر ﴿منح﴾ رکعتین زائدتین ده
 سهو ایدن امامه اقتدا اولنسه عندالامامین انحق ایکی رکعت قیلنق
 لازم کلور . اگر مقتدی رکعتینی افساد ایلسه کذلک ایکی رکعتی
 قضا ایلر . امام محمد گوره مقتدی به آلتی رکعت قیلنق لازمدر .
 شاید مقتدی قیلدینی نمازی افساد ایلر ایسه هیچ برشی قضا اقتضایتمز
 ﴿درر و ملتق و جمع الانهر﴾ ایکی رکعت تطوعده وقوعبولان
 سهو ایچون سجده ایدلسه انک اوزرینه برشی بنا ایدلمز . اگر
 بنا اولنورسه انای صلاتده ایدیلان سجده سهویه باطل
 و تحریمه باقی اولدینی ایچون نماز صحیح اولوب فقط سجده
 سهوی اعاده لازم کلور ﴿ملتق﴾ اوزرینه سجده سهویه
 لازم اولان مصلی سجده ایلمزدن اول تسلیمتینی اجرا ایلسه
 امام اعظم حضرتلریله امام ابی یوسفه گوره صلاتدن موقوفاً
 خروج ایتش اوله جغندن اگر سجده سهو ایدرسه نمازه
 عودت ایلمش اولور و سجده ایلمدیگی تقدیرده صلاته
 عودت ایتش اولمز خلافاً لامام محمد و زفر ﴿در مختار﴾
 اوزرینه سجده سهو لازم اولان مصلی عندالامامین سلامله
 نمازدن موقوفاً خروج ایدره اگر سجده ایدیورر ایسه کندوسنه
 اقتدا صحیح اولور و سجده ایتمز ایسه اقتدا صحیح اولماز . شو حالد
 قهقهه سبیلله آبدستی بوزلماز و مسافر ایسه اقامته نیت ایله فرضی
 درت اولماز . اما امام محمد گوره سلامله نمازدن خارج اولدیغندن
 گرک سجده ایتسون گرک ایتسون کندوسنه اقتدا صحیح اولور

و قهقهه ایله آبدستی بوزیلور و اقامته نیت ایله فرضی درت اولور
 ﴿در مختار و ابن عابدین﴾ اوزرنده سجده سهویه اولدینی حالد
 سجده ایتمک نیتیه سلام ویرلسه نیتی باطل اولوب نمازه منافی
 عمل ایتمکجه سجود سهو واجب اولور ﴿ماتقی و مجمع الانهر﴾
 مصلی نمازی اوچ رکعتی و یا درت رکعتی قیلم دیوشک ایله
 بو حال کندوسنه برنجی دفعه اوله رق عارض اولدینی صورتده
 نمازی بوزوب اولندن ادا ایدر و شک . اکثر وقتده عارض
 اولور ایسه تفکر ایدوب ظن غالبی اوزرینه بناء ایدر و ظن اغلبی
 یوغیسه یقینی اولان اقل اوزرینه بناء ایدر و احتیاطاً علاوه
 ایدر جگی هر رکعتک باشنده اوتوروب نمازک آخرنده سجده
 سهوی ایفا ایتمسی لازم گلیر ﴿قدوری﴾ رباعیه ده توهم اتمام
 ایله قعده اولی ده سلام ویرلسه اتمام ایدیه رک سجود سهو
 اولور . اما مصلی کندوبی مسافر و یا قیلدینی نمازی صلات جمعه
 ظن ایله یا خود رباعیه ﴿۱﴾ بی ثنائیه ﴿۲﴾ و یا عاشایی تراویح ظنیله سلام
 ویرسه صلاتی باطل اولور ﴿درر﴾ بر عملده شک ایدیلوب ادای
 رکن ایدر جک قدر تفکر اولندقدده ایفای رکنه و یا ادای واجبه
 مانع اولورسه سجود سهو لازم اولوب لکن انسانی اداده تفکر
 ایدیلورسه قول صحیده برشیء ایجاب ایتمز ﴿حاجی﴾ جمعه و عیدینده
 کثرت جماعت سببیه سجده سهویه معفودر ﴿درر و بحر﴾
 بعد السلام شمسک طلوعی و احمر ایدر سجده سهویه بی اسقاط
 ایدر ﴿عامه الکتاب﴾ نمازده بر قیچ کره سهو وقوعه بولسه

﴿۱﴾ رباعیه . درت رکعتلو نماز ﴿۲﴾ ثنائیه . ایکی رکعتلو نماز

سجده سهوی تکرار ایتمک لازم دگلدر * مسبوق . امامک
 سلامی بکلمیه رک قالقوب ایریشه مدیگی رکعتلری قضا ایدر کن
 امام سجده سهو ایدر جک اولورسه سجده یه وارمدقچه امامه
 متابعت ﴿۱﴾ ایدوب بعد الانفراد ﴿۲﴾ ایشلیدیکی شیلری اعاده
 ایدر * اعاده ایتمزسه نمازی فاسد اولور . اگر متابعت ایلمامش
 ایسه نمازی فاسد اولمز انجق بعد الفراغ سجود سهو ایدر .
 سجده یه وارمش ایسه امامه اویمبوب فقط کندوسی نمازدن
 فراغدن صکره سجده ایدر . بو صورتده متابعت ایدرسه
 صلاتی فاسد اولور ﴿حاجی﴾ مسبوقک امام سلام ویرمزدن اول
 قضای ماسبقه قیامی تحریماً مکروهدر . لکن سبق حدثن و فجر
 و جمعه و عیدک و معذورک و قتلینک خروجی و مدت مسحک
 تمامی و اوکنندن مارتک مروری خوفی گبی عذرندن ناشی
 قبل السلام قیام ایدرسه کراحت یوقدر . اما امام . سجده صلییه
 ﴿۳﴾ و یا سجده تلاویه ایدر جک اولورسه مسبوق قائم اولدینی
 رکعتی سجده ایله تقیید ایتمکجه امامه متابعتی فرضدر .
 متابعت ایتمز ایسه نمازی فاسد اولور . مسبوق سجده ایتدکدن صکره
 امام . سجده صلییه ایدر ایسه هر حالده یعنی امامه متابعت
 ایتمه ده ایتمه ده صلاتی فساد وارر . سجده تلاویه ایدرسه
 سجده سهویه گبی متابعت صورتنده فاسد اولوب عدم
 متابعتده فساد وارمز ﴿در مختار﴾ مسبوق سهو آ سلام ویرسه
 اگر سلامی امامک سلامنه مقارن ایسه سجود سهوه لزوم یوغیسه ده

﴿۱﴾ متابعت . اویمق ﴿۲﴾ انفراد . یا لکر اولق ﴿۳﴾ سجده صلییه .
 نمازک کندی سجده سی .

شاید امامك سلامندن براز صکره ایسه سجده ایجاب ایدر
 ﴿در مختار﴾ امامی سهو سجده ایدن مقتدینك امامنه اتباعاً
 سجده سهویه بی ادا ایلمسی واجبدر (مثلاً سهو ایدن امامه
 سجده نك برینی بعد الاجرا اقتدا ایدلسه سجده اخیره ده امامه
 متابعت اولور و سجده اولی قضا ایدلر) امام . سهو ك هر ایکی
 سجده سنی ایفا ایتدكدن صکره اقتدا اولنسه كذاك مقتدی قضا
 ایدلر . اما امام سجده دن مقدم تكلم و یا قصداً حدث ایله مك
 یا خود مسجوددن خروج ایتك گبی سبیلرله امامدن سجده سهویه نك
 سقوطی مقتدین دخی سقوطنی مستلزم اولور ﴿بحر﴾ مقتدینك
 كندی سهوی ایچون گر ك سلامدن اول گر ك صکره سجده
 ایلمسی لازم كلر . لاحقه دخی مسبوق گبی امامك سهویه سجده
 واجب اولور سه ده بونی امامیله برابر ایتوب بلکه آخر صلاتده
 ایدر . اگر سهواً امامیله معاً سجده ایدر ایسه وقتسنز ایتمش
 اوله جفندن ختام صلاتده اعاده سجده ایلر و بو سبیله نمازی
 فساده گیتمز . مسافره اقتدا ایدن مقیم . مسبوق مثلونمازینی
 اتمامه قیام ایدوب شاید سهو ایدر سه كندویه سجده لازم
 اولور چونكه امام مسافر ك صلاتی تمام اولدقدن صکره
 مقتدی مقیم . منفرد . حكمنده قالور ﴿در مختار و طحطاوی﴾

اون ایکنجی باب

صلات مریض بیاننده در

رسول اکرم صلی الله تعالی علیه وسلم افندمن حضرت تلبینك
 عمران بن حصین حقنده شرفوارد اولان ﴿صل قائماً فان لم
 تستطع فقاعداً فان لم تستطع فعلى الجنب ثوبی﴾ حدیث جابلی
 حکم عالیسی اوزره مریضه قیام متعذر اولسه استدیگی وجهله
 یعنی باغداش قوره رق یاخود دیز اوزرینه اوتوره رق و یا یدیق
 وانسانه دایانه رق فرضی قاعداً قیلوب رکوع و سجود ایدر .
 رکوع و سجوده دخی مقتدر اولمزه تعذر (۱) سبیله رکوع
 و سجوده رأسیله ایما ایدوب سجده بی رکوعدن اشاغی اوله رق
 اجرا ایلر ﴿قدوری و در مختار﴾ تعذر دن مقصد . مریضه حال
 قیامده مرضنك تزایدی وبرؤ و صحتك تأخری و دوران رأس
 (۲) و کمال ضعف و الم و وجع شدیدك وقوعی گبی بر ضرر قوی
 عارض و لاحق اولمسیدر . مریض بعض قیامه قادر اولسه
 قدرتی قدر قیام ایدر ﴿جوهره و غیره﴾ حتی تحریمیه قیاماً
 قادر بعده عاجز اولور سه تحریمه ایچون قیام ایدوب صکره
 قعود ایدر . اتکایه (۳) محتاج اولدیغی حالده گر ك قعوداً گر ك
 قیاماً حائظه (۴) و یا انسانه استناد ایلر ﴿جوهره﴾ مریض

(۱) تعذر * عذری بولمق (۲) دوران رأس * باش دونمك

(۳) اتکاء * دایمق (۴) حائظ * دیوار

یوزینه طوغری برشی قالدیروب باشی آشاغی اگه رک انک اوزرینه سجده ایدر یا خود برشی قالدیر میوبده حجمی بولمیان وجهه مستقر اولمیان بر نسته اوسته سجود ایلر ایسه اشبوا یکی صورتده ایما بولندیغی ایچون جائز و اگر اوشیئک حجمی اولوبده انما دایانور ایسه ایما بولنه میه جفنه مبنی غیر جائز در در مریض قعوده قادر اولمزه ارقه سی اوسته یاتوب و آیاقلرینی قبله یه اوزادوب یا خود یانی اوزرینه یاتوب و یوزینی قبله یه قارشو طوتوب رکوع و سجودی اشارت ایلر اجرا ایدر (قدوری) استلقا (۱) صورتنده مریضک باشی الته و ساده (۲) وضع ایدیلور زیرا استلقا ایمانی مانعدر در نقلاً عن الکافی استلقا ایدن ایچون ممکن ایسه آیاقلرینی قبله یه اوزاتمیوب دیزلرینی دیکمک مندوبدر بحر رأسیله اشارته قادر اولمزه مریضک صلاتی تأخیر اولنور گوزلریله و یا قبله یه یا خود قاشلریله ایما ایتک عند الا کثر جائز دگلدر (قدوری و درر) بصورتده تأخیر صلاته $\text{فَإِنْ لَمْ يَسْتَطِعْ قَالَهُ أَتَى بِقَبُولِ الْعُذْرِ مِنْهُ}$ حدیث شریفی دلیل کافی عد اولمشدر (ملتی و جمع الانهر) ایما متعذر اولوبده فوائت حد کثرتی بولور یعنی آتی وقت اولور ایسه هر نقدر عقلی باشنده اولسه ده بر روایتده قضا ساقط اولور و علیه الفتوی (ظهیریة) حال حیاتده صلات ایچون صوم گبی فدیة تجویز اولما مشدر (منح نقلاً عن القیة) مریض قیامه قادر اولوبده رکوع و سجوده مقتدر اولسه قیام لازم گلمیه جگندن قاعداً و قائماً ایما یه ده جواز وارددر لکن

(۱) استلقا ارقه سی اوسته یاتمی (۲) ساده یوز یصدیغی

قاعداً افضلدر (ملتی) رجل صحیح صلاتی ادا ایدر ایکن قیامه مانع بر مرض عارض اولسه قاعداً اتمام ایدوب قادر ایسه رکوع و سجود ایلر و دگل ایسه ایما ایدر قعوده مقتدر اولدیغی حالده آنفاً بیان اولندیغی وجهله استلقا ایلر مریض قاعداً رکوع و سجود ایلر نماز قیلر ایکن صحیح اولسه در عقب قائم اولوب قیلدیغی صلات اوزرینه بنا ایدر اما بعض صلاتی اشارت ایلر قیلدیغی ائنده اگر مرضی زائل ور رکوع و سجوده قادر اولور ایسه ضعیف اوزرینه قوی بنا ایتک صحیح اولمدیغندن صلاتی استیناف ایلر بر کسه مغمی علیه یعنی بیهوش اولوب بش وقت نمازی و یادها آزی فوت اولسه افاقت (۱) بولدقده قضا ایدر انما (۲) سببیه بش وقت نمازدن زیاده فوت اولدیه بیهوش اولان کسه بولندیغی حالدن بیخبر اولوب کچن نماز لری تعقل ایده میه جگی جهتله قضا ایتز ایسه ده احتیاط ایلهمک اولی در (قدوری و غیره) جنون دخی انما گبی اولوب لکن سکر (۳) کندی فعلیله اولغله نقدر ممتد اولور ایسه اولسون بهمه حال قضا لازم گلور در نافلة ده عذر سببیه اتکا اتفاقاً جائز و عذر سزا تکاده امام اعظم حضر تلرینه گوره کراحت یوغیسه ده امامین عندنده وارددر بلا عذر قعود عند الامام مکروه و امامینه گوره غیر جائز در در سیر ایدن سفینه ده بلا عذر قاعداً ادای فریضه عند الامام بلا کراهة جائز و قائماً افضل و امامین عندنده غیر جائز در فلك مربوط (۴) لجة بحر (۵) دن متحرک اولور ایسه سیر ایدن گمی حکمنده در اگر ساکن ایسه قره

(۱) افاقت آیلق (۲) انما بیهوش اولق (۳) سکر عشرت حالی

(۴) فلك مربوط باغلو گمی (۵) لجة بحر دگر دالفه سی

حکمنده اولوب دوران رأس گبی بر عذر اولمدیقه قاعداً ادای فریضه بالاتفاق تجویز اولنما مشدر . تکبیر افتتاحده قبله به توجه و گمی دائر اولدیقه استقبال قبله شرطدر ﴿درر﴾ عند المشایخ مأخوذه و اظهر اولان امامین قولیدر . امام اعظم حضر تری امر غالبی واقع منزله سنه تنزیل بیور مشدر ﴿حلیه و شر نبالی﴾ پیر و ضعیف قائماً قرائتدن عاجز اولور ایسه قاعداً مع القرائة ادا ایلر . قائماً بعض قرائته قدرتی وار ایسه قادر اولدیغی مرتبه قائماً قرائت ایدوب ضعیفی زیاده اولدیغنده قعود ایدر ﴿حاجی﴾ منفرداً ایفای صلاتده قیامه قدرت اولوب فقط جماعتله تماماً قائم اوله رق نمازی ادایه عدم اقتدار حالنده قیاماً شروع ایدیلوب بعده قعود و حین رکوعده قدرت حاصل اولور ایسه قیام ورکوع ایدیلور . اگر بوگا اقتدار یوغیسه منفرداً ادا وبر قولده امامله قعوداً ایفا اولنور ﴿حاجی﴾

اون اوچنجی باب

سجود تلاوت بیاننده در

﴿السَّجْدَةُ عَلَى مَنْ سَمِعَهَا أَوْ عَلَى مَنْ تَلَاهَا﴾ حدیث شریفندن استدلال اولندیغی وجهله سجده تلاوت قرآن کریمده تعداد اولنان اون درت سوردهده سجده آیتنی تلاوت ویا استماع ایدن مسلم اوزرینه وجوب عملی ایله واجب اولور . استماعده قصد و عدم قصد مساویدر . سجده آیتلری . اعراف . رعد . نحل . اسرا . مریم . حج . فرقان . نمل . سجده . ص .

فصلت . النجم . انشقاق . علق . سور جلیله لرنده در . سجده تلاوتک شرطی علی الاطلاق حدندن و حیض و نفاسدن طهارت و استقبال قبله و ستر عورت اولوب رکعی ده جبهه بی ارضه وضع ایلمکدر ﴿ملتقی و قدوری﴾ سجده تلاوت نمازده اولمدیغی حالده وجوبی تراخی اوزره در (۱) زیرا دلائل وجوبده تعیین وقت اولمدیغنه بناء وقتدن بر جزو غیر معینده ادا واجبدر . سجده مذکوره صلاتیه یعنی آیت سجده نماز ایچنده تلاوت اولنور ایسه وجوب . بالاتفاق فوریدر . بوتقدیرجه سجده تلاوت نمازدن جزو اولدیغندن تأخیرنده اتم ترتب ایدر . بناء علیه داخل صلاتده آیت سجده بی تلاوت ایدن مصلی نك علی الفور (۲) سجده ایلمسی لازمدر ﴿در مختار و غیره﴾ سجده تلاوت . اداء ویا قضاء وجوب صلاته اهل اولنلره واجبدر . بناء علیه صبی و حائض و نفسایه و مجنون مطبقة یعنی جنون جمیع اوقاتی استیعاب ایتش اولان کیمسه به واجب دگدر . جنب و محدث و سکران (۳) و نائم . قضاء صلاته اهل اولدقلرندن انلره قضاء و مجنونک غیر یسندن ایشیدنلره اداء واجبدر . اصم (۴) اولان مسلمک آیت سجده بی تلاوتی کندی نفسنه و نزدنده بولنه رق استماع ایدن شخصه لازم اولور . اصم . سجده آیتی تلاوت اولنان مجلسده حاضر بولندقدده دیگر حضار ایله برابر ادای سجده ایلر ﴿در مختار و غیره﴾ مجنون غیر مطبقدن یعنی آلتی وقت صلاتده یا خود

(۱) تراخی اوزره در . تأخیری جائزدر دیمک (۲) علی الفور . تأخیر اولنیه رق همان اجرا ایدمک لازمدر دیمک (۳) سکران . سکر حالنده بولنان (۴) اصم . صاغر

وہا زیادہ وعلی روایۃ برکون برکیجہ دن ولو بر ساعت .
 زائد زماندہ موقف جنون کندوسنہ مستولی اولان ویا گاہ جنت
 وگاہ افاقت حالندہ بولنان شخصدن ایت سجدہ بی ایشتمکله سجدہ
 تلاویہ واجب اولور ایسہدہ آفاذکر اولنان مجنون مطبقدن و مقتدی
 و طوطی دن و صدای منعکسدن استماعله سجدہ ایجاب ایتمز
 ﴿ فاضیخان و درر و غیرہا ﴾ تہجی اوزرہ تلاوتدن تالی بہ و سامعہ
 سجدہ غیر واجبدر ﴿ حاجی ﴾ امام . آیت سجدہ بی تلاوت ایتسہ
 سجدہ ایدوب مأموم (۱) دخی اکثا معیت ایله سجدہ ایدر .
 مأمومک استماعی غیر مشروطدر . فقط امامدن سجدہ آیتنی
 ایشیدن مسلم . امام . سجدہ ایتدکدن صکرہ اور کعتدہ امامہ اقتدا
 ایلسہ داخل و یا خارج صلاتدہ سجدہ ایتسی لازم اولمز . چونکہ
 انک رکعت مذکورہ بہ ادراکی سجدہ تلاوتیدہ مدرک اولمش
 اولور . اگر مأموم سجدہ آیتنی تلاوت ایتسہ امامہ و مأمومہ
 و صلاتدہ برابر بولنان جماعتہ اصلا سجدہ لازم کلمز
 ﴿ قوری و درر ﴾ امام محمدہ گورہ بعد الفراغ سجدہ ایدرلر .
 صلاتدہ برابر بولنمان جماعتہ استماع حالندہ بالاجماع سجدہ واجبدر
 ﴿ حاجی ﴾ صلات ایچندہ آیت سجدہ تلاوت اولنسہ نمازک رکوع
 و سجودندن غیری تلاوت ایچون مستقلا رکوع و سجود ایله
 ادا اولندیغی گی برویا ایکی آیت عقیبندہ سجدہ نیتیلہ رکوع یا خود
 بلائیۃ . نماز ایچون سجدہ ایدلسہ سجدہ تلاویہ ساقط اولور
 (در مختار) صلات جہریہدہ امام رکوعدہ سجدہ تلاویہ بہ نیت
 ایدوب مقتدی نیت ایلمسہ مقتدیدن رکوع و سجودلہ سجدہ
 تلاوت ساقط اولمہ جغندن امام سلام ویردکن صکرہ مقتدی

(۱) مأموم . امامہ اویش اولان یعنی مقتدی

آبروجہ سجدہ ایدوب قعدہ اخیرہ بی اعادہ ایدر . شاید قعدہ بی
 اعادہ ایلمز ایسہ نمازی فسادہ وارر ﴿ در مختار نقلاً عن القنیۃ ﴾
 شو حالدہ امامہ لایق اولان رکوعدہ اداسنہ نیت ایتیموب سجدہ
 صلات ایله اسقاط ایلمکدر . زیرا بوصورتدہ مقتدی بہ برشی
 لازم اولمز . امارکوع صلاتدہ اداسنہ نیت ایلسہ مقتدی بہ دخی
 نیت ایجاب ایدوب شاید بوندن غفلت ایدرسہ سجدہ صلات ایله
 ساقط اولمہ جغندن بعد السلام مستقلا سجدہ ایتسی وقعدہ
 اخیرہ بی اعادہ سی لازمدر . امامک نیت ایلمسی محتمل اولدیغندن
 مقتدی بہ دخی لایق اولان رکوعدہ سجدہ تلاویہ بہ نیت ایلمکدر *
 ﴿ ابن عابدین ﴾ امام و مقتدی لری صلاتدہ معیتی اولمان رجلدن
 آیت سجدہ بی ایشتمکله صلات ایچندہ برشی یا یموب بعد الصلوٰۃ
 سجدہ ایدرلر * شاید نمازدہ سجدہ ایدرلر ایسہ کافی اولمز
 ایسہدہ نماز لری فاسد اولمز ﴿ قدوری ﴾ بوصورتدہ صلات
 ایچندہ ایدیلاں سجدہ تلاویہ نک عدم جوازی سبیلہ خارج
 صلاتدہ اعادہ سی ایجاب ایدر ﴿ درر ﴾ بر مسلم . خارج صلاتدہ
 آیت سجدہ بی تلاوت ایلدیگی حالدہ سجدہ ایتیموبدہ نمازہ شروع
 ایلسہ و نماز ایچندہ آیت مذکورہ بی بر کرہ دہا تلاوت و سجدہ
 ایتسہ ایکی تلاوتک سجدہ سنہ کفایت ایدوب خارجدہ کی آیت
 ایچون سجدہ آخری لازم کلز . اگر سجدہ آیتنی صلاتک غیربدہ
 تلاوت ایدرک سجدہ ایلسہ و بعدہ نمازہ شروع ایدوب سجدہ
 آیتنی تکرار قرائت ایتسہ اولکی سجدہ بونک ایچون کافی
 اولمہ جغندن بر سجدہ دہا ایتک اقتضایدر . بر سجدہ آیتنی مجلس
 واحدہ بر قاج کرہ تکرار ایدلسہ سجدہ واحدہ کفایت ایدر .
 و مجلس تبدل ایدر ایسہ ہر مجلس ایچون بر سجدہ ایجاب ایدر

﴿قدوری﴾ استداء الثوب یعنی جلوه بز جوزمك ايچون اوتنه بری گز نمك و چفتجي خرمن سورمك و اغاجك بردالندن دیگر دالنه کچلمك و نهر و بحر و کبیر حوضده یوزلمك گبی اولان عمل کثیر . تالی و سامع حقنده تعدد و تبدل محل و آیتی مستلزم اوله جغندن شو حالده آیت سجده تکرر ایتدکجه تعدد آیته گوره سجده لازم اولور * قیام ایتك و بر ایکی آدیم یوریمك و بر ویا ایکی لقمه برشی یمك و برقاج یودم صو و شربت ایچمك و قعود و اتکا و رکوب (۱) و نزول (۲) ایلمك مثلاً و فعل قلیل ایله تبدل محاس حاصل اولیه جغندن موجب سجده دگلدر ﴿درر﴾ تالی (۳) آیتی مجلس واحده تکرار ایدوب سامع (۴) محاس متعددده استماع ایلسه هر مجلس ایچون سامعه بشقه بشقه سجده لازم اولور . اما تالی محاس متعددده تلاوت ایدوب سامع . مجلس واحده ایشته سامعه یالکز بر سجده ایجاب ایدر . تالی مجلس واحده ایکی سجده آیتی تلاوت ایلسه سجدتین لازم اولور ﴿درر﴾ آیت سجده تلاوت اولور کن شغلدن ناشی استماع اولنسه زجرأ و جوب سجده قول راجحدر ﴿در مختار﴾ سجده تلاویه ایدن مسلم شروط صلات ایله ایاغه قالقوب الارینی قالدر میسه رق تکبیر و بعده یالکز سجده ایدوب یعنی تشهد و تسلیم ایتوب تکرار تکبیر ایدرک قیام ایلر ﴿قدوری﴾ و غیره ﴿قول اصحه﴾ گوره سجده تلاوتده مسنون اولان تسبیح . نمازك سجده تسبیحی بولسان ﴿سُبْحَانَ رَبِّيَ الْأَعْلَى﴾ در

(۱) رُكُوب * بَنَمَك (۲) نَزُول * اَتَمَك (۳) تَالِي * اَوْقُوبَان (۴) سَامِع * اِشِيدَن

﴿در مختار﴾ تالی تقدّم ایدوب سامعین خلفنده صف اولق و تالیدن اول باشلرینی قالدر مامق و برقاج آیت مقدّم اخبار ایله مک و سامع سجوده متعی (۱) دکل ایسه اخفا ایتك مستحدر . سجده تلاوتك بلا ضروره تأخیری مکرو هدر ﴿حلی﴾ خطیب سجده آیتی منبرده تلاوت ایلسه سامعین ایله معاً سجده ایدر ﴿در مختار﴾ سجده شکر دخی سجده تلاوت گبی اولوب بالاتفاق جائز و مشروعدر ﴿اشباه﴾

اون دردنجی باب

صلات مسافره دائردر

احکام شرعیه نك تغییرینه سبب اولان سفر شرعی . انسان . قصد ایله یگی محل ایله کندی ساکن اولدینی ممالکتک بیننده ایل . سیری (۲) ویا اقدام انسان . مشی ایله اوچ گونلك مسافه دن عبارتدر ﴿قدوری﴾ مجرد اعتدال هوا اولدینی تقدیرده مدت سفر اوچ گون و اوچ گنجسه اولوب جبیلده دخی بویه در . ﴿قاضیخان﴾ سفر شرعی . اقصر ایامدن مشی معتاد ایله بروجه محرّر اوچ گونلك یول اولوب بونی عامه مشایخ اون سکزو بر قوله یگر می بر فرسخ (۳) اوله رق تقدیر و اعتبار ایتشلردر . لکن هدایهده عدم اعتبار مصححدر ﴿حلی﴾ سفر شرعیده استراحت

(۱) مُتَعَيِّ * حَاضِر لَنَان (۲) اَبِل سِیرِي * دوه یوروشی (۳) فَرَسَخ * اُون ایکی بیک آدیم محل

معتاده ایله وقت زواله دك مشى . معتبر اولوب سرعت ایله ایکی
گونده قطع ایدلسه دخی سفر صاییلور ﴿در مختار﴾ بر موضعك
قره دن ایکی ودگزدن اعتدال هوا ایله اوچ گونده مدت وصولی
اولسه بخرده سفر . محقق اولوب قره ده اولمز . عكسی دخی
بویله در ﴿جوهره﴾ ابن عباس رضی الله عنهما دن مروی اولان
﴿فَرَضَ عَلَيْكُمُ الصَّلَاةَ عَلَى لِسَانِ نَبِيِّكُمُ فِي الْحَضَرِ أَرْبَعًا وَفِي السَّفَرِ
رَكْعَتَيْنِ﴾ حدیث شریفی دلالتیله مسافرك فرضی ائمه حنفیه
عندنده هر صلات رباعیه ده ایکی ركته قصر (۱) اولندیغندن زیاده
قیلمق جائز اولمز . رخصت (۲) اسقاط اولندیغنه بناء قصر مذکوری
عمداً (۳) زیاده ایدن آثم (۴) و سهواً زیاده ایلین
ایچون سجده سهویه لازم اولور * بوصورته ركته ثانیه ده تشهد
مقداری قعود اولندیغنی حالده ایکی ركته فرضه کفایت ایده جگندن
ایکی ركته اخیره سی نافله صاییلور . اگر قعود اولنمز ایسه
فرض اولان قعده ترك ایدلمش اوله جغنه بناء نماز فساد و اریر
﴿قدوری﴾ صلات رباعیه حضرت عائشه رضی الله عنها دن روایت
اولندیغنی اوزره حق مقیمده (۵) فی الاصل ایکی ركته فرض
اولوب مسافرده (۶) تخفیفاً اباقا و مقیمده ایکی ركته دهاضم
اولندی بناء علیه رخصت و قصر . اطلاقی مجاز اولمغله عدم اجراسی

(۱) قصر . قیصالتی (۲) رخصت . بوراده رخصتدن مقصد . درت
ركعت اولمق اوزره اولان اذن شرعیدر (۳) عمداً . قصداً
(۴) آثم . کنهکار (۵) مقیم . بولجی اولیان (۶) مسافر . بولجی
یعنی مقیم اولیان

اثم عد ایدلدی ﴿بحر﴾ بر مؤمن . مسافر اولمق قصدیله
بولندیغنی محلدن حر کتله بیوت و مساکنی (۱) و اوچ یوز ذراع
مقداری مسافه سی اولوب مزرعه (۲) لر ایله انفصالی اولیان فناء
مصری یعنی دفن اموات و ركض دواب (۳) گبی مصالح ایچون اعداد
(۴) ایدیلان امکنه بی تجاوز ایتدکده صلات رباعیه بی ایکی ركته
قیلمق لازمدر . بلدة أخرایه داخل اولوب اون بش کون یاخود
دها زیاده اقامته نیت ایتدیگی حالده حکم سفر زائل اولمز *
اگر اون بش کون و یا دها زیاده اقامته نیت ایدرسه مقیم اولمغله
اتمام رباعیه ایجاب ایدر ﴿قدوری و قاضیخان﴾ مصر و قبربنده
بولسان و قریه گبی مستقل (۵) اولمیه رق احدها آخره تابع
اولان ایکی موقعك مجموعنده اون بش کون اقامته نیت ایدلسه
هر قفیسنه گیرلمش ایسه مقیم عد اولنور . مکه و منا مثللو ایکی
مستقل موضعده اون بش کون اقامته نیت ایدلسه احدهایه دخول
اولندیغنی حالده مقیم صایلماز . مگر که برینه تخصیص بیتوت (۶)
اولنه ﴿درر﴾ مسافر بر بلدة و یا قریه به داخل اولوب اون بش کون
اقامته نیت ایلیمیه رك و یارین او بر کون خروج ایدرم دیه رك بر قاج
سنه او محله قالسه مقیم صایلمیه جغندن رباعیه بی ایکی ركته ادا ایدره
كذلك عساكر اسلامیه دار الحربه داخل اوله رق اون بش کون
اقامته نیت ایتسهر صلات رباعیه بی اتمام ایتیموب قصر ایله ایکی ركته
قیلرلر ﴿قدوری﴾ جنود مسلمین دار حربده بر قلعه بی محاصره
(۱) بیوت و مساکن . خانه لر (۲) مزرعه . اکیلن بر (۳) ركض دواب
حیوان قوشدر مق (۴) اعداد . حاضر لاق (۵) مستقل . باشلو باشنه
(۶) بیتوت . کچه له مك

ایستہلر یا خود دیار اسلامده موضع اقامت اولیان صحراہ محاصرۃ بغاۃ (۱) ایدرک اون بش گون اقامتہ نیت ایستہلرینہ قصر ایدرلر . اعراب و ترکمن گبی خیمہ نشین (۲) کروہی کفایت مقداری ماء و کلالری (۳) اولدیغی حالده بر مفازده (۴) اون بش کون اقامتہ نیت ایستہلر اصل اولان اقامت اولدیغندن قول اصحده قصر صلات ایلمزلر . اگر بولندقلری موقعدن مدت سفر اولان بر موضعه قصد سفر ایستہلر قصر . واجب اولور ﴿قہستانی﴾ مسافر . صلات رباعیہده وقت . خروج ایتمدن مقیمہ اقتدا ایستہ اقتداسی صحیح اولدیغندن مقیم گبی اتمام ایدر * اگر خروج وقتدن صکرہ اقتدا ایستہ جائز اولمز . مسافر . مقیملرہ امام اولوب نماز قیلدیرسہ رباعیہده ایکی رکعت ادا ایدرک سلام ویرر . بعدہ مقیملر اتمام صلات ایلمزلر . بوصورتده مسافر اولان امام . سلام ویردکده مقیملرہ خطاباً . نماز گزی اتمام ایدیکز زیر از سفری یز . دیمک مستحیدر ﴿قدوری﴾ جماعت . امامک مقیم و یا مسافر اولدیغنی بیلمک اداده شرط اولوب ابتداده دگلدر . بعد السؤال مسافر اولدیغنی امام . اخبار ایستہ صلاتلری صحیح و اگر هیچ بیلمزلر ایستہ فاسد اولور ﴿بحر نقلاً عن المبسوط﴾ مقتدی مقیم . اتمام صلاتہ قیام ایستدکده لاحق . حکمنده اولغله مسبوق گبی قول اصحده قرائت و سجده سہویہ ایتمز ﴿نویر﴾ مسافر مملکتی اولان مصرہ داخل اولستہ اقامتہ نیت ایستہ بیله اتمام صلات ایدر . اما مملکتی ترک ایدرک دیگر بر محله

(۱) بُغَاة . باغیر (۲) خیمہ نشین * چادرده اوتورانلر (۳) کَلَا . اوت (۴) مَفَاذہ * پیابان یعنی چول

نقل ایله اوراده تمکن (۱) و توطن (۲) ایستدکن صکرہ مسافرت اختیار ایلیہرک اولکی مملکتہ داخل اولستہ اقامتہ نیت ایلمدیگی تقدیرده اتمام صلات ایله منز ﴿قدوری﴾ اصل مملکتی مجرد سفر ایله باطل اولیہ جغندن نیت اقامتہ حاجت اولیوب دخول ایله اتمام صلات لازم کلور . لکن اون بش گون اقامتہ نیت ایستدیگی محلدن مسافرت ایدوب بعدہ اولکی محله یئہ گلستہ تکرار اقامتہ نیت ایلمدکجه مجرد دخول ایله مقیم اولستہ جغندن صلاتی اتمام ایله مک ایجاب ایتمز ﴿ملتقی و غیرہ﴾ مسافرک انشای سفرده صلات رباعیہ سی فوت اولستہ حضرده ایکی و حضرده ایکن فوت اولستہ سفرده درت رکعت قضا ایتمسی لازمدر . بوبابده معتبر اولان آخر وقتدر (مثلاً بر مسلم آخر وقتده مسافر اولستہ اگأ ایکی و مقیم اولورسہ درت رکعت فرض اولور) ﴿جوهرۃ و ملتقی﴾ عصاة و قطاع طریق (۳) حضر و سفرده رخصت و اسقاط جهتندن مطیع گیدرلر ﴿قدوری﴾ سفر اوچ نوعدر . بری حج و جهاد گبی سفر طاعتدر . دیگری تجارت مثللو سفر مباحدر . او چنجیسی سفر معصیتدر که عصیان و قطع طریق و عبد افندیسندن فرار ایتمک گیدر ﴿مجمع الانهر﴾ صلوات مسنونہ حقنہ اختلاف واقع اولوب بر قولده ترخصاً (۴) ترکی و قول آخرده تقریباً فعلی افضل و دیگر قولده حال سیرده ترکی و زمان نزولده فعلی انسب و بعضلر یالکز سنت فجری و بعض آخر دخی سنت مغربی ادا

(۱) تَمَكَّن . برلشتمک (۲) تَوَطَّن . یورد ایدتمک (۳) قُطَاعِ طَرِيق .

حیدودلر (۴) تَرَخُّصاً . رخصت شرعی اولدیغیچون

احسن در دیشدر در ﴿درر نقلاً عن المحيط﴾ اعتبار نیت . اصله
ومتبوعه راجع اولدینی جهتله زوجة وعبد واجیر (۱) وعسکره
زوج وسید ومؤجر (۲) ورئیس الجیشک سفره نیقی ویا
اقامت کافیدر ﴿درر﴾ صبی (۳) مسلم پدریله سفر ایدوب انسانی
مسافر تده بالغ اولسه گیده جکی محله مدت سفر دن اقل . مسافه
قلمش ایسه عامه مشایخ عندنده فرضی اتمام ایدر . بر قوله
گوره باباسنه تبعیتله ابتداء . قصد سفر بولندیغنه مبنی قصر صلوة
ایلر ﴿درر﴾

مبنی اوز بشنچی باب

صلات جمعه بیاننده در

جمعه . اجتماعدن مأخوذ در . فرقت . افتراقدن اخذ اولندی
گبی . یوم و صلات کندویه اضافه قلندی . بعده کثرت استعماله
بناءً مضاف حذف اولندی . آیت جمعه مدینه منوره ده نازل
اولدیغندن اکثر علما جمعه نك اوراده فرض بیورلدیغنه قائلدرلر .
جمعه نك گونی گیکجه سندن افضل ایدوگی مضمرا تده بیان
اولمشدر . صلات جمعه نك بنفسه مستقلاً فرضیتی کتاب وسنت
واجماع امت ایله ثابت اولدیغنه مبنی نعوذ بالله جاحدی کافر اولور .
زیرا استعید بالله ﴿یا ایها الذین آمنوا اذا نودی للصلوة من یوم الجمعة
فاسعوا الی ذکر الله﴾ آیت جلیله فرضیتنک دلیل قطعیتی و صلات

(۱) آجیر . اجرتله قولالانلان (۲) مؤجر . اجرت ورن (۳) صبی .

چو جق

و ذکر الله بدن مقصد اجماعاً جمعه نمازی اولدینی محققدر . صلات
مذکوره حقه حقه ﴿الجمعة حق واجب علی کل مسلم فی جماعة الا
اربعة مملوک وامرأة وصی ومريض﴾ حدیث شریفی شرفصادر
اولمشدر ﴿شرح نور الايضاح ودر مختار وطحطاوی﴾ جمعه نمازی
مساجدینک الکی بیوگی صلات جمعه نی ادا ایله مکلف اولان اهالی
موجوده اسلامیه سنی استیعاب ایتیان ومصر اطلاق اولنان
بلده ده ویا بونک مصلا سنده ادا اولنور ﴿در مختار و قدوری﴾
مصر تعبیر اولنان بلده یه بر فرسخ مقداری اولان فناء مصر که
(متصل اولسون ویا اولسون موتی دفنی و آت قوشدیرلمسی وعسکر
جمعی و جازه نمازی وامثالی مصالح ایچون شهرک اطرافده بولنان
خالی محلدن) عبارت اولوب بوده مصر حکمنده در . اقامت جمعه انجق
امر سلطان ویا انک طرفدن مأمور اولان قاضی وامثالنک
اذنه متوقفدر ﴿قدوری ودر مختار﴾ مطلقاً یعنی ضرورت
اولسون ویا اولسون وایکی جانبی نهر فصل ایتسون یا خود
ایتمسون دفعاً للخرج شهر واحدده مواضع متعدده و کثیرده ادا
صلات جمعه نك صحتی امام اعظم وامام محمد حضر تیرنک اجتهاد لری
اقتضاسندن اولوب بوده قول اصح و مفتی به اولدینی فتح قدیر و شرح
جمع و درر ومنجده مصر حدر ﴿در مختار﴾ صلات جمعه نك شرائط
وجوب و ادائی استجماع صورتیله فرض عین اولدینی بروجه
محرر اص قاطع وسنت واجماع ایله ثابت بولمنسی صلات ظهر دن
آ کد اولسنه دلیل قوی و کافی ایدوگی فتح قدیر وغیریده بیان

اولنشدرد ﴿منح﴾ تارك جمعه نك وخامت حال وشائی حقنده
 ﴿من ترك ثلاث جمع متواليات فقد نبذ الاسلام وراء ظهره﴾
 حديث شريفى گي سائر احاديث نبويه دخى شرفصدور ايلمشدرد
 ﴿شرح نور الايضاح وغيره﴾ مقيم ورجل بولمق وحر
 اولمق يعنى عبد اولما مق . ووجودجه صحته بولمق وسليم
 العينين (۱) وسليم الرجلين (۲) اولمق اوزره شرائط وجوبى
 التى اولوب هر مكلف ايجون شرط اولان اسلام وعقل وبلوغ
 بونده دخى لازمدر . مرأه يه ومسافر وعبد ومريض ومقعدة
 (۳) واعمايه صلات جمعه فرض دگلدر . خوف ومطر شديد
 ووحل مزید . (۴) جمعه وجماعتده بولنه مامغه عذر اكيد وبغير شرط
 اداسى صحيح ويوم جمعه ايجون صلات ظهره كافيدر . مصر ويامصلاسى
 وساطان يا خود طرفندن مأمور قاضى وامثالى ووقت ظهر
 وخطبه وجماعت واذن عام . شروط اداسيدر ﴿ملتقى وغيره﴾ جمعه
 نمازى نك شرائط اداسندن برى اولان وقت ظهر دن مقدم
 ويامؤخر قيامسى صحيح اولمز ﴿قدورى﴾ تشهد مقدارى
 قعود دن صكره وقت ظهر . خروج ايله جمعه نمازى باطل
 اوله جفندن صلات ظهري اوزرينه بنا ايله مك صحيح اوله من
 ﴿منح﴾ شروط ادادن بولنان خطبه . سنت سنه وجهله جمعه
 نمازندن اول خطيب طرفندن ايكي عدد اوله رق او قنوب
 بينلرى قعدة خفيفه ايله فصل ايديلور وهر ايكي خطبه قياماً
 (۱) سليم العينين . گوزلرى كور اوليوب صاعلم اولان (۲) سليم الرجلين .
 اياقلى بوريگكه مانع اولور برعلته معلول اوليان (۳) مقعد . كوتورم
 (۴) وحل مزید . زياده چامور

طهارت اوزرينه قرائت اولنور . امام اعظم حضر تلى نجه ايجابنده
 ذكر الله قصر ايله خطبه قايله دخى صحيح اولور . امامين عندنده
 ايسه ذكر طويل لازمدر ﴿قدورى﴾ امام مشار اليه كوره
 خطبه نييله ﴿الحمد لله﴾ ويا ﴿سبحان الله﴾ دينلسه خطبه
 صحيح اولور ايسه ده ذكر ايجون ﴿لا اله الا الله﴾ وعطسه يه
 (۱) ﴿الحمد لله﴾ وتعجبه ﴿سبحان الله﴾ دينلسه صحيح
 اولمز . خطبه اولى وثانيه دن هر برينك حمد وتشهدى وقرآن
 كريم دن بر آيت قدر تلاوتى ونبي محترم صلى الله تعالى عليه وسلم
 افدمنر حضر تلى نيه صلواتى وحاضرونه وعظ ونصيحتى حاوى
 اولمى وخطبه ثانيه ده امام المسلمين اولان پادشاه خلافتناه حضر تلى نيه
 وكافة مؤمنين ومؤمناته ادعيه قرائت اولنمى وخطيبك واجب اولان
 طهارت وستر عورت وقيامه اعتنا ايلمسى لازم گلور ﴿حاي وغيره﴾
 تحفه شرحنده هدايه دن نقلاً بيان اولنديغى اوزره خطبه ايجون
 اون بر سنت شريفه اولوب برنجيسى قبل الخطبة اخفاء تعوذ .
 ايكنجيسى حمد ايله ابتدا . او چنجيسى جناب حقه ثنا . در دنجيسى
 شهادت . بشنجيسى تصليه . آلتنجيسى وعظ وتذكير . يدنجيسى
 تلاوت قرآن . سكرنجيسى بين الخطبتين راز جلسه در . طقوزنجيسى
 خطبه ثانيه ده حمد وثنا وتصايه يي تكرار ايله مكدر . اونجيسى
 دعادر . اون برنجيسى خطبتي لزو مندن زياده تطويل ايتما مكدر
 ﴿مجمع الانهر﴾ سلطان ويا طرفندن منصوب قاضى وامثالى
 جانبندن خطابت توجيه و تقرير اولمش اولان خطيب .
 غيريسى استنا به (۲) مأذون اولمده خطبه ايجون اصلاً يعنى
 (۱) عطسه . اقصر مق (۲) استنا به . رينه بشقه سنى قويمق

گرك ابتداء گرك اثنای خطبه ده عارض اولان عذر دندن ناشی دیگرینی مقامنه چکوره میه جگی گبی صلات ایچوندخی قبل وقوع الحدث بشقه سنی یرینه قویه من ﴿ درر ﴾ خطیبک لدی الاقتضا اقامت جمعه بی آخره احاله ایلمسی بلا اذن جائز اولدیغنی ابن کمال رساله مخصوصه سننده تحقیق و بیان ایدرک صاحب دررک عدم جواز ایله حکمنی رد ایلمش و مجمع الانهرده دخی مطلقاً زمانمزد جوازی مفتی به اولدیغنی تصریح اولمشدر ﴿ در مختار ﴾ خطبه ده جماعتک حضوری شرطدر ﴿ خطیب یالکزجه قرائت خطبه دن صکره جماعت ﴾ حاضر اولوب نمازی قیسه لر جائز اولمز ﴿ لکن جهراً او قونان خطبه بی جماعتک استماعی شرط اولیوب مثلاً جماعتک کلیسی اصم و یا خطیب دن بعید یا خود نائم اولمردن ناشی خطبه بی ایستمسه لر باس یوقدر ﴿ حلی ﴾ خلفاء راشدین و حسنین و عیین محترمین ﴿ رضوان الله تعالی علیهم اجمعین ﴾ حضرتاتی خطبه ارسنده صره سیله مندوباً ذکر اولنور ﴿ در مختار ﴾ صبی عاقلک خطبه سننده اختلاف اولنوب بعضر صلاته مشابهنی جهتیله باطل و بعض آخر ذکر الله اولمق اعتباریله جائزدر دیمشدر ﴿ جوهره ﴾ شرائط جمعه دن اولان جماعتک اقلی (۱) امامدن ماعدا اوچ کشی اولمقدر ﴿ امام ابی یوسف و امام محمد حضرتاتی ایکی کشی دخی جماعته کافی اولدیغنی بیان بیومشدر ﴿ قدوری ﴾ جماعتک اهل وجوب جمعه اولمسی شرط دگلسه ده عقلای رجالدن (۲) بولنمسی مشرطدر ﴿ بناءً علی ذلک نسوان (۳) و صبیان (۴) (۱) اقلی * اذ آزی (۲) عقلای رجال * عاقل و بالغ اولان ارککلر (۳) نسوان * قادینلر (۴) صبیان * چوجقلر

ایله جماعت جمعه حاصل اولیوب فقط عبد و مسافر و مریض ایله منعقد اولور ﴿ حلی ﴾ امام اعظم حضرت تهرینه گوره سجده اولی به قدر بقای جماعت شرطدر ﴿ اگر اندن اول جماعتک بر مقدری گیتمش ایسه باقیسی یکیدن ظهری ادا ایدر ﴿ امامین عندنده تحریمیه دگین بقای جماعت شرط اولدیغندن بعدالتحریمیه بر قسمی داغلسه باقی قالانلر جمعه بی اتمام ایلرلر ﴿ امام زفر نزدنده تشهد مقدری قعده به دک بقای جماعت شرطدر ﴿ حلی ﴾ خطیب ﴿ خطبه دن فارغ اولدقده جماعتک جمله سی بالايجاب داغیلوبده خطبه بی استماع ایتمیان دیگر جماعت گله رک اقامت جمعه ایتمسه لر کافیدر ﴿ جوهره ﴾ امام ﴿ صلات جمعه ده قرائتی جههر ایدر ﴿ تعیین سوره ایتمک حقنده بر امر وارد اولدیغنه مبنی خاطره کلان سوره و آیت جهراً او قونیلهرق ادا اولنمسی حلیده محرر ایسه ده بعضر طرفدن رکعت اولی ده سوره جمعه بی و ثانیه ده سوره منافقینی قرائت مستحب اولدیغنی بیان و غنایه ده دخی ائمه حنفیه عندنده سوره غاشیه او قونمق مستحب ایدوگی اتیان اولمشدر ﴿ جمعه نمازی اوزرلرینه فرض اولیان مسافر و مرأه و مریض و عبد جامعده حاضر اوله رق جماعت ایله برابر ادای جمعه ایلمسه لر بونلردن وجوب جمعه نک سقوطی محضاً تخفیفه مبنی اولدیغندن نمازلی صلات ظهره کافی اولور ﴿ مسافر و عبد و مریضدن هر بری شرائط لازمه بی جائز بولدیغنی حالده سائر نمازلرده جائز اولدیغنی گبی صلات جمعه ده دخی لدی الحاجه اما مق

ایده بیلور لر خلافاً لامام زفر . يوم جمعه ده امام . صلات جمعه یی
 قیلدیر مزدن اول بر مسلم . خانه سنده بلا عذر اوگله نمازینی
 قیاسه صلاتی هر نقدر صحیح ایهده لکن مکروهدر . بعدالادا
 ندامت ایدرک صلات جمعه یه توجه ایتسه امام اعظم حضر تدرنجہ
 مجرد جمعه یه سعی (۱) اولندیغی و خانه دن خروج وقوعبولدیغی
 جهتله قیلمش اولدیغی صلات ظهر . باطل وادای جمعه فرض
 اولور . شاید ایفای فریضه جمعه میسر اوله منزه ظهری اعاده
 ایلمسی لازم کلور . امامین عندنده امام ایله صلات جمعه یه داخل
 اولنجیه قدر قیلدیغی اوگله نمازی باطل اولمز ایهده اندن
 صکره بطلاننده شبهه یوقدر . بوضورتده بعدالشروع افساد
 جمعه تحقق ایتسه ظهری اعاده ایجاب ایدر . معذور ومسجونہ
 (۲) وامام . جمعه یی ادادن صکره جمعه ده حاضر بولنه میانلره
 جماعت ایله صلات ظهری ادا ده تحریماً کراحت وارددر . درر
 وقدوری وغیرهما . مصر تعبیر اولنان بلدهده جمعه نمازی فوت
 اولور ایهده اذان واقامتیز منفرداً صلات ظهر ایفا اولنور
 (منح) يوم جمعه ده امامه صکره دن ادراک (۳) ایدلسه جمعه
 نمازینک یتیشلدیکی مقداری امام ایله قیلنوب باقیسی بنا ایدیلور .
 تشهدده ویاسجده سهوده ادراک اولنسه امام اعظم وامام ابی
 یوسف حضر تدرینه کوره جمعه یه نیت ایدیلوب کذلک اوزرینه بنا
 اولنور . امام محمد عندنده رکعت ثانیه نک اکثرینه یعنی رکوعنه
 (۱) سعی . سرعتله یوریمک (۲) مسجون . محبوس (۳) ادراک .
 یتیشمک

ادراک اولندیسه جمعه انمام اولنوب اگر اقلنه یتیشلدیسه اوزرینه
 اوگله نمازی بنا ایدیلور . امام . يوم جمعه ده منبره صعود
 ایتدکده جماعت . صلاتی ومطلق کلامی ایکی خطبه تمام اولنجیه
 دگین ترک ایدرک سکوت ایلر لر (قدوری) امامک منبره
 صعودنده سنت جمعه یه شروع اوله ررق بررکعتی قیلندیسه رکعت
 ثانیه ضم ایله سلام ویریلور وثالثیه قیام ایدلدیسه انمام اولنور
 (درر) قول صحیحہ گوره قبلالصعود سنته شروع اولمش
 ایه سنت ظهرگی قطع اولنیه ررق انمام ایدیلور . خطیبک منبره
 صعودند نصکره صاحب ترتیبه قضای فائته غیر مکروهدر .
 صدر الشریعه نک کراحت ایله حکمی سقوط ترتیب ایله مقید
 اولمغه محمولدر (منح) استماع خطبه ده قریبه حرام اولان بعیده
 دخی حرام ایهده . کتب فقهیه یه نظر ومطالعه ده اختلاف
 وارددر . امام ابی یوسف حضر تدرینک وقت خطبه ده کتابنه
 نظر وتصحیح ایلدیگی مرویدر . نهی منکر ایچون ایله ویاباشیله
 اشارتده قول اتحه گوره بأس یوقدر . قول صوابه نظر آنبی
 محترم صلی الله تعالی علیه وسلم افدمن حضر تدرینک اسم جلیل
 نبویلری ذکر اولندجه سرراً تصلیه (۱) ایدیلور . انشای خطبه ده
 جماعته تشمیت عاطس (۲) ورد سلام لازم اولمدیغی مفتی بهدر
 (درمختار) امام ابی یوسفدن برروایتده سرراً تصلیه وتشمیت
 (۱) تصلیه . صلوات شریفه گنورمک (۲) تشمیت عاطس . اقصیران
 کیسه یه — { یرحمک الله } — دیمک

عاطس ورد سلام مکروه دگلدر ﴿جمع الانهر﴾ امامین عندندہ
خطبہ دن اوّل و صکرہ و اثنای جلسہ دہ کلام متعارفک ماعداسندہ
کراہت یوقدر ﴿در مختار﴾ یوم جمعہ دہ مؤذن طرفدن اذان
اولیٰ منارہ دہ او قوندقدہ قول اصح اوزرہ مسلمینک بیع و شرایی
(۱) ترک ایدرک صلات جمعہ یہ توجہ وسی ایلملری فرضدر .
خطیب . منبرہ صعود ایلہ او تور دقدہ مؤذن اذان ثانی بی او قور
و خطیب خطبہ دن فارغ اولدیغندہ جمعہ نمازی جماعتلہ قیلنمق
ایچون مؤذن . اقامت ایلر ﴿قدوری﴾ طحاوی عندندہ حرمت
بیع و شرادہ معتبر اولان اذان ثانی اولدینی ابن کمال و ایضاحدہ ذکر
اولنمش و منحدہ بوبادہ صحیح اولان اذان اولیٰ در دینلمشدر .
صلات جمعہ یہ غسل و تطیب (۲) و استعمال مسواک و لبس
احسن ثیاب (۳) ایلہ توجہ مستحبدر . امام . خطبہ یہ شروع
ایتمزدن اوّل گیرودہ خالی محل وار ایکن جماعتہ اذا ایدلمکسزین
ایلرویه گچمک بلا کراہة جائزدر ﴿حلبی﴾ صلات جمعہ دن صکرہ
درت رکعت سنت جمعہ قیلنوب بعدہ وقتنہ ادراک اولنوبدہ هنوز
ادا اولنیشان ظهر آخرہ نیت ایلہ درت رکعت نماز دها ایضا
ایدیلہ رک بعضلرینہ گورہ هر رکعتدہ فاتحہ او قنور و ضم سورہ
اولنور . و بعضلرنجہ یالکز اولکی ایکی رکعتدہ فاتحہ دن صکرہ
ضم سورہ ایدیلوب صوٰک ایکی رکعتدہ یالکز سورہ فاتحہ قرائت

(۱) بیع و شرا . صائمق المق یعنی آلم صائم (۲) تطیب . گوزل قوقولو
شیلر سورنمک (۳) احسن ثیاب . اک گوزل اوروبه لر

ایدیلور . و حضرت (علی رضی الله عنه) دن مروی و امام ابی یوسف
قولی اولدینی اوزرہ اک صکرہ دہ ایکی رکعت سنت و قتیہ قیلنور .
اگر جمعہ نمازی عندالله قرین قبول اولدی ایسہ ظهر فائت آخر
قضا اولنمش و فائتہ یوق ایسہ نافله ثوابی قزانلمش و جمعہ قبول
اولندیسہ صلات ظهر سنتیلہ معاً ادا ایدلمش اولور . قضایہ عائد
اولدینی صورتدہ درت رکعتدہ دخی ضم سورہ ضرر و یرمز
﴿حلبی﴾

اون النبیجی باب

صلات عیدینہ متداثردر

عید فطرده جامع و یا نماز گاهه چیقلمزدن مقدم طاتلی برشی اکل
و استیاء (۱) و اغتسال (۲) و بعض طیب . استعمال و لبس
احسن ثیاب اولنہ رق جامع و یا نماز گاهه ماشیاً (۳) توجہ
و استقبال ایلکم و طریق مصلادہ امام اعظم حضرتلرنجہ خفیاً
و امامین عندندہ جهراً تکبیر ایتکم مستحب و صلات عید دن
اوّل جامع و یا نماز گاهده نافله قیلنمق مکروهدر ﴿قدوری﴾
کنز و تنویر متلرنده واقع اولان نفی تکبیردن مقصد سائر
متون گبی جهری نفی اولوب ذات تکبیری اولدینی جوهرده
بیان اولنمشدر . استعین بالله ﴿ولتکبروا لله علی ما هدیکم﴾
نص جلیلی ایجابجه صلات عید . اوزرینہ جمعہ فرض اولان مسلمہ

(۱) استیاء . مسواک طومتق (۲) اغتسال . غسل ایلہ مک (۳)
ماشیاً . یورویه رک

واجب اولوب خطبه دن غیري بالجمله وجوب وادا . شرائطی معتبر
وخطبه سنت مؤکده اولدینی اظهار در ﴿جوهره نقلاً عن المبسوط﴾
شمسک افقندن بر ویا یکی رُح (۱) مقداری ارتفاعی سببیه صلوات
عید حلال اولوب وقتی داخل وزوال شمس قدر منتهی اولغله خارج
اولور . وقتی داخل اولدقده امام حاضر اولان مسامینه ایکی
رکعت نماز اقامت ایدوب رکعت اولی ده آولا تکبیر افتتاح بعده
ثنا و متعاقباً اوچ تکبیر ایدرک فاتحه و سوره قرائت ایدر و بر تکبیر
ایله دخی رکوع ایلوب بعده سجود و رکعت ثانیه یه قیام و قرائته
بدأ ایله اتمام ایلدکن صکره اوچ تکبیر آلهرق صکره بر تکبیر ایله
رکوع ایلر . تکبیرات عیدده امام و جماعت الارینی رفع ایدرلر
﴿قدوری﴾ هر بر رکعتده اجرا اولسان اوچر تکبیر زائد .
واجب و رکوع تکبیرلری سنت و بر قولده رکوع ثانی تکبیری واجب
مقارن اولدیغنه مبنی بوده واجبدر ﴿حاجی﴾ تکبیرات زوائدده رفع
(۲) وارسال (۳) یدین (۴) اولنوب بونلرک بیننده برشی ذکر
ایتمک مسنون اولدیغندن یالکز اوچ تسبیح مقداری توقف اولنور
﴿تنویر﴾ صلوات عیده رکعت اولی تکبیراتندن صکره ادراک اولنسه
قیاماً تکبیرات ایدیلور و رکوعده ادراک ایدلسه افتتاح تکبیریه شروع
اولنوب اگر رکوعه یتشمک ممکن ایه قیامده و دگلسه رکوعده
تکبیر زوائد ادا ایدیلوب فقط بالضرورة تسبیحات رکوع . ترک
اولنور ﴿جوهره﴾ امام ابی یوسفدن بر روایتده تکبیر . ترک

(۱) رُح * مزراق (۲) رفع * یوقاری قالدیرمق (۳) ارسال .

بوراه اشاغی صالیویرمک (۴) یدین . ایکی اللر

اولنوب یالکز تسبیح ایدیلور و رکوعده تکبیر اولنور ایسه
رفع یدین ایدلر و امام . رکوعدن باشنی قالدیردقده آولجه
فوت اولان تکبیرلر ساقط اولدیغندن رکوعده یتیشن مقتدی
تکبیرات فائته بی اتمام ایتمز ﴿حلی و غیره﴾ امام تکبیراتی اونیدوبده
رکوعه وارسه رکوعده تکبیر ایله اکتفا ایدوب اجرای تکبیرات
ضمننده قیامه عودت ایله مز ﴿تنویر﴾ امام . نسیانی (۱)
فاتحه دن صکره تذکر ایسه تکبیر آلهرق فاتحه بی اعاده ایدر
و سوره دن صکره تخطر ایدر سه یالکز تکبیر ایدوب اعاده قرائت ایتمز
و بر رکعت ایله مسبوق اولسه قضای ماسبقده ظاهر روایتده آولا قرائت
بعده تکبیر ایلر و بر قولده آولا تکبیر صکره قرائت ایدر ﴿حاجی﴾
امام . تکبیری زیاده ایسه اثرده وارد اولدینی وجهله مقتدی
دخی اگا تبعیتله تکبیری زیاده ایلر ﴿در مختار﴾ جنازه نمازی
صلوات عیددن صکره یه تأخیر و خطبه سنت اولدیغندن خطبه یه
تقدیم اولنور ﴿درر نقلاً عن القنیة﴾ امام . عید فطر نمازدن
صکره جمعه گبی ایکی خطبه او قویوب بوضروده جماعته صدقه
فطری و احکامی دخی بیان ایدر ﴿قدوری﴾ خطبه عید .
سنت اولدینی جهته صلوات اوزرینه تقدیمی و ترکی مکروهدر
﴿منح﴾ صلوات عیدی امام . بعض جماعته قیلوب بعض آخر
فوت اولسه منفرداً قضای جائز اولمز اگر هواده بلوط و سیس
اولوبده هلال (۲) عید وقتنده ظاهر اولمیهرق زوالدن صکره
عندالقاضی رؤیت (۳) هلاله شهادت اولنسه ایرتسی گونی
قبل الزوال صلوات عید قضا اولنور . یوم ثانیده دخی صلاتی

(۱) نسیان . اونوتمق (۲) هلال . یکنی آی (۳) رؤیت . گورمک

مانع بر عذر واقع اولورسه یوم ثالثه قضای لازم گلمز . عید
 اضحاده دخی اغتسال و تطیب و تحسین ثیاب ایله مک واکلی صلوات
 عیددن فراغه قدر تأخیر اتمک و جامع و مصلایه توجه ایدرک
 تکبیر ایلمک مستحبدر . امام . صلوات عید اضحایی صلوات فطرگی
 ایکی رکعت اوله رق ادادن صکره ایکی خطبه قرائت و جماعته
 اُضحیه نك (۱) ذبح (۲) و تقسیم (۳) لحمی و عیدک تکبیر تشریق حقنده
 معلومات اعطا ایدر ﴿قدوری﴾ صلوات اضحایی تعجیل و صلوات
 فطری تأخیر مندوب و اُضحیه سی اولان مؤمنه خلق رأس (۴)
 و تقلم اظفار (۵) و قص شاربی (۶) کراحت درجه سینه و اصل
 اولامش ایسه قربانی ذبحدن صکره یه تأخیر ایله مک مستحبدر
 ﴿حاجی﴾ صلوات اضحایی برنجی گونی ادایه مانع بر عذر شرعی
 حادث اولورسه ایکنجی و اوچنجی گونه دگین تأخیر جائز
 ایسه ده عذر مشروع . واقع اولمدجه مکر و هدر . بیرامک
 اوچنجی کونندن صکره مطلقا جائز اولیه جغه و عید اضحاده عذر . نفی
 کراحت و عید فطرده جواز ایچون اولدیغنه و ایکی سیده هر حالده
 بعد الزوال تجویز اولمدیغنه دائر درر و غیر یده صراحت واردر .
 تشریقک ابتداسی یوم عرفه نك صلوات فجری عقیندن معتبر اولوب
 انتهایسی امام اعظم حضر تدرنجه یوم نحرک صلوات عصری غایتنه قدر
 سکنز وقت اوله رق ممتد اولور و امامین عندنده آخر ایام تشریقک
 (۱) اُضحیه * قربان (۲) ذبح * بوغاز لامق (۳) تقسیم * داغ تق (۴)
 خلق رأس * باشی تراش اتمک (۵) تقلم اظفار * طرقلری کسمک (۶)
 قص شارب * بینی قریبق

صلوات عصرینه دك یگر می اوج وقت اوله رق نهایت بولور ﴿قدوری﴾
 و غیره ﴿عید اضحاده امام اعظم حضر تدرنجه جماعت مستحبه ایله ادا
 اولان هر فرضی متعاقب . مصر اطلاق اولنان بلده ده امام مقیمه
 و مطلق مقتدی یه و امامینه گوره گرک جماعتله گرک منفرداً
 اولسون و یارجل یا خود مرأه و یامسافر و یامقیم و گرک مصری
 و یاقروی بولنسون هر فرض قیلان مسلمه بر کره تکبیر تشریق
 و اجبدر ﴿درر﴾ ایام تشریق ایچنده فوت اولوب یه اوسنه نك ایام
 تشریقده قضا اولنان فرضده دخی تکبیر تشریق کذلک و اجبدر
 ﴿در مختار﴾ تشریق امام . ترک ایدر سه بیله جماعت ترک ایتمز .
 وجوبی استعید بالله ﴿و اذکروا لله فی ایام معدودات﴾
 آیت جلیله سیله استدلال اولمشدر . منجده گوسترلدیگی وجهله
 صاحب الکفر . امام کرخی یه تبعاً سنتدر دیمشدر ﴿درر﴾ تکبیر
 تشریق ﴿الله اکبر الله اکبر لا اله الا الله والله اکبر الله اکبر
 والله الحمد﴾ دن عبارتدر ﴿قدوری﴾ بردن زیاده تکبیر اتمک
 علی قول فضیلت و عقیب صلوات عیدده مندوبدر ﴿در مختار﴾
 تکبیر ایدمک اونودلسه مسجددن خروج ایدلمدجه تکبیر
 اولنور . قهقه و عمد آحدث و مطلقا تکلم اتمکدن طولای
 تکبیر حکمسنز قالور ﴿منج﴾ عید اضحانک اوج اولکی گونلری ایام
 نحر و ثانی و ثالث و رابعی ایام تشریق اولوب برنجی گونی یالکیز
 یوم نحر و یوم رابع یالکیز یوم تشریق و ثانی و ثالث یوم نحر
 و تشریق اولقده مشترکدر ﴿درر﴾

اوزیدنجی باب

صلات کسوفه دائر در

شمس . طوتلد قدده امام . نافله صورتند اذان و اقامتسز مسلمینه
ایکی رکعت نماز قیلدیروب هر رکعتده برر رکوع ایدر و قرائتی
عند الامام اخفا و امامینه گوره جهر ایدرک تطویل (۱) ایلر بعده
شمس . منجلی (۲) اولجهیه دگین دعا ایدر (قدوری) هر
رکعتده برر رکوع قیدی مذهب شافعی اوزره هر رکعتده ایکی رکوع
ایدلماستی اخطار ایچوندر . امام . قرائتی . تطویل ایدر سه دعائی
تحفیف و اگر قرائتی . تحفیف ایلر سه دعائی تطویل ایدر (منح)
علیه الصلاة والسلام اقدمز حضر تلیک قرائتی تطویل . مقصد
عالیسیله رکعت اولی ده بقره و نانیه ده آل عمران سورهلری
مقداری قرائت بیورمش اولدقلری مرویدر . صلات کسوفی
صلات جمعی اقامت ایدن امامک قیلدیرمسی مشروط و خطبه غیر
مشروعدر . اگر مسلمین اجتماع ایتمز و یا صلات جمعی قیلدیران
امام بولنمز ایسه بو حالده هر کس منفرداً ادا ایدرلر . خسوف
وقوعنده یعنی آی طوتلدینی زمانده ایسه صلاتده جماعت . مشروع
اولیوب هر کس کندی کندویه منفرداً نماز قیلارلر (قدوری)
ریح شدید (۳) وظلمت نهار (۴) و زیاده ضیای لیل و فزع

(۱) تطویل * اوزاتمق (۲) منجلی * روشنک حالی که شمسک انکشافدن
انکشافه تحولندن عبارتدر (۳) ریح شدید * شدتلی روزکار (۴) ظلمت
نهار * گوندز قراگلی

غالب (۱) وزلزله و صاعقه (۲) و تلج و مطر دائم و عموم امراض
و طاعون ایچون منفرداً نماز قیلحق مشروعدر (منح و در مختار)

اوز سکنزنجی باب

صلات استسقا بیانندهدر

امام اعظم حضر تلی بیوردیکه استسقادده (۳) جماعت ایله صلات .
مسنونه اولیوب فقط مسلمین منفرداً قیلرلر سه جائزدر . زیر
استسقا الحق طلب مطر ایچون دعا و استغفار دن عبارتدر (قدوری)
استسقادده اوچ گون علی التوالی (۴) نیاب کهنه (۵) و کمال
تضرع (۶) و خشوع (۷) ایله مسلمین ماشیاً بر موضعه چیقارق
قبل الخروج صدقه بی تقدیم و توبه بی تجدید و استغفار و ضعفا و عجائز
و صبیان و دوابی احضار و اطفالی والده لرندن ابعاد ایدرلر
(در مختار) امامین عندنده امام . حاضر و نه ایکی رکعت نماز
قیلدیروب جهر ایله قرائت ایدر . بعده منبره چیقیمیهرق سیفه (۸)
و یا عصایه اتکالیه امام محمد عندنده ایکی و امام ابی یوسفه گوره بر خطبه
او قویوب قبله یه استقبال و امام محمد نز دنده یا لکزامام رداسی (۹)

(۱) فزع غالب * برنسنه دن شر و مضرت و قوعی احتمالندن نشأت
ایدن زیاده قورقو (۲) صاعقه * یلدرم (۳) استسقا
یغمور استه مک (۴) علی التوالی * بربری ارقه سی اوزره
(۵) کهنه * اسکی (۶) تضرع * زاریلق ایلک (۷) خشوع * زیاده
تواضع ایتک (۸) سیف * قلیج (۹) ردا * قفتان

تقلیه (۱) اشتغال ایدرك احد طرفینی آخره تحویل ایله تبدیل
حاله تفأل ایلر . و جماعت . اثوابی تقلیب ایلمز لر ﴿حلی﴾

اون طقوزنجی باب ﴿﴾

صلات تراویحه متعلقدر

شهر رمضانده مسلمین . اجتماع ایدوب امام . جماعته عشایی ادادن
صکرة بش تراویحه و هر تراویحه ده ایکی سلام و ایکی تراویحه بیننده
تراویحه واحده مقداری جلسه ایله یگر می رکعت صلات تراویحی
کذلك جماعت ایله قیلدیرر ﴿قدوری﴾ رجال و نسایه تراویح
نمازی سنت مؤکده در ﴿جوهره﴾ ﴿ان الله تعالى فرض
علیکم صیامه و سن لکم قیامه﴾ حدیث شریفی تراویحک سنت
رسول بولندیغه و ﴿علیکم بسنتی و سنت الخلفاء اراشدین من
بعدی﴾ حدیث جلیلی دخی سنت مؤکده اولدیغه دلالت ایدر
﴿حای﴾ تراویحی جماعت ایله ادا سنت مؤکده اولدیغی اکثر
متونده دخی مصر حدر . لکن علی الکفاية اولمغله اهل مسجدک جمله سی
ترك ایتسه هر بری آثم اولوب بعض جماعت و بعض آخر . افراد
صور تیله ادا ایلسه لر آثم . مترتب اولیوب انحق فضیلت جماعت . زائل
اولور . امام ابی یوسفدن روایت اولندیغی وجهله خانه ده جماعته
تراویحی قیامق جماعت . فضیلتی حائزدر . فقط جماعت مسجده ده
فضیلت اُخری بولمغله افضلیتی امر مسلمدر ﴿درر نقلاً عن

(۱) تقلیب * دوندورمک

الکافی﴾ تراویحک ثلث لیله تأخیری مستحب و بلکه اکثر لیلی
کثرث قرائت ایله استیعاب احبدر ﴿منح﴾ قول مختارده صلات
تراویحک وقتی صلات عشادن صکرة اولدیغدن اندن اول قیامق
جائز دگلدر ﴿منیه﴾ اما و تر دن مقدم و یا مؤخر ادايه جواز
اولدیغی قول اصح اولمق اوزره هدايده ذکر اولمشدر . حتی
مقتدی طرفندن تراویحک بعض رکعتلری فوت ایدیلوبده
اتمام تراویحی متعاقب امام . وتره قیام ایلسه اولی اولان امام
ایلر برابر و تر قیلنوب فائتة تراویح بعده ایفا اولور ﴿درر
مختار﴾ حلی ده تراویحک وقتی مابین العشاء والوتردر دینارک
قولنه بناءً اولاً فائتة تراویح قیلنوب . وتر . تأخیر ایدمک و بعده
وتری منفرداً ادا ایله مک اولی در دینامش و بوقول . خلاصه و غایت
الیانده تصحیح و ترجیح اولمشدر ﴿منیه﴾ و ابن عابدین ﴿تراویحه
تراویح یاقیام لیل و یا سنة الوقت یا خود قیام رمضان . دینیت ایدیلوب
نافله و یا مطلق . صلات اوله رق نیت ایتمک امام اعظم حضر تلرندن
برروایتده و بعض متقدمین عندنده جائز دگلسه ده اکثر متأخرین
ائمة ثلثه دن ظاهر روایت اولمق اوزره تجویز ایلمشدر ﴿منیه﴾ هر
ایکی رکعتده قعود اولنوبده سلام و برلمیه رک قیام و بوضو رتله مجموع
تراویحی بر سلام ایلر ایفا و اتمام ایله مک مکروهدر ﴿حلی﴾ نقلاً
عن الخلاصة ﴿رمضان ابتداسندن انتهاسنه قدر تراویحی بر ختم
قرآن ایلر قیلمق سنت صحابه دن ایسه ده حال جماعته مراعات (۱)
افضل اولدیغی بدا یعده محرردر ﴿ایضاح﴾ بناءً علیه جماعته ملاک
(۲) وثقلت (۳) حاصل اولماق ایچون امامک فاتحه شریفه دن

(۱) مراعات . رعایت ایتمک (۲) ملاک . قیاس و ضعف حالی

(۳) ثقلت * آغیرلق

صکره اوج آیت قصیره و یا بر آیت طویلہ قرائتہ اکتفا ایلمسی
و منفردک دخی ادامہ خشوع (۱) ایچون قرائتی اولو جهله اختیار
ایتمسی عند المتأخرین مفتی بهدر ﴿حاجتی و در مختار و طحطاوی﴾
تراویحی لیالی رمضانک ختامنه دگین بر کره ختم ایله ادا . سنت
و ایکی ختم شریفه فضیلت و اوج ختم ایله افضلدر . رمضان شریفه
تراویحک مجموع رکعاتی آلتیوز اولوب کشاف و دیگر لرینک روایتنه
گوره آیات قرآنیہ آلتی بیٹک آلتی یوز آلتش آلتی عدد اولدیغندن
بر ختم ایچون بهر رکعتده اون بر قدر آیت جلیله تلاوت اولمق
کفایت ایدر . روایت مذکوریه نظراً آیات قرآنیہ نک بیگی
وعد و بیگی و عید و بیگی امر و بیگی نهی و بیگی قصص و بیگی
خبر و بش یوزی حلال و حرامه دائر اولوب یوزی دعا و تسبیح
و آلتش آلتسی ناسخ و منسوخ اولدیغی اگلاشیلور ﴿طحطاوی﴾
و غیره ﴿صلات تراویحده بعد التشهد تصلیه دن﴾ اللهم صل علی
محمد و علی آل محمد ﴿ایله اکتفا اولوبده بقیه تصلیه و دعوات
مأثوره ترک ایدلسه جائزدر . لکن سرعت قرائت و ثنا و تلوذ
و تسمیه و طمانیتی و تسبیح و ترویجتان بیننده استراحتی ترک
گی منکرادن اجتناب ایتمک لازمدر ﴿حاجی و در مختار﴾
حسن قرائتی اولیوبده یالکز گوزل صدا صاحبی اولانی تراویح
نمازینی قیلدیرمه ترجیح ایلمک لایق اولیوب بلکه قرآنی حقیله
تلاوته مقتدر اولان ذاتی تقدیم ایتمک احسندر . زیرا بلا ترتیل
(۲) حسن صوت . خشوعه مانعدر ﴿حاجی﴾ تراویح ایچون
قراآتجه احسن و اخف . امامی اختیارده بأس یوقدر ﴿حاجی نقلاً عن
(۱) ادامہ خشوع . تواضعده دوام ایتمک (۲) ترتیل . قرآنی تجوید
اوزره اوقومق

قاضیخان ﴿دیگر اهلی بولندیغی وارکان صلاتی بحق ادایه اقتداری
معلوم اولدیغی تقدیرده مراهق (۱) درجه سنده بولان صبینک
امام اوله رق تراویحی قیلدیرمسی مشایخ بلخ . عندنده جائزایدوگی
هدایه ده مذکور و حضرت عائشه ﴿رضی الله عنہا﴾ صبی ایکن
امام حسن رضی الله عنه حضرت تلمیذینه اقتداسی بعض فتاواده مسطوردر
﴿جوهره﴾ لکن مختار اولان عدم جوازدر چونکه بالغک نفلی
صبینک نفاذدن اقوی اولدیغندن صبینک اماملغنده بناء القوی علی
الضعیف لازم گلوب بوده جائز اولماز و امام مشارالیه حضرت تلمیذ
ذکر اولندیغی وجهله وقوع بولان امامتی غیر ایچون مثال اتخاذ
ایدلمک مناسب اوله ماز ﴿حلی نقلاً عن السرخسی و غیره﴾ بر مسلم .
فرض عشائی یالکز اوله رق قیلوب بعده تراویحی امامه اقتدا ایله جماعتله
ادا ایلسه صحیح اولور . حتی او مسلم . امام . یا نسوونک فرضی
قیلقدن صکره داخل اولسه اولاً فرضی منفرداً ایفایدوب بعده
تراویحده امامه متابعت ایلر . لکن بر طاقم خلق . عشانک فرضی
منفرداً ادا ایلسه لر انلر ایچون جماعت اوله رق تراویحی قیلحق
صحیح اولماز ﴿حلی نقلاً عن ظهیر الدین و القنیه﴾ مقتدی . قعودده
نائم اولوب امامک سلامندن صکره او یانسه و قدر فائتی بیلمسه
تشهد ایدوب سلام ویرر و باقیده امامه متابعت ایدر و فائتہ نی
بیلمدکجه بر شی قضا ایلمز ﴿حاجی﴾ تراویح نمازی سنت
مؤکده اولمسندن ناشی اقتدار . باقی و موجود ایکن قاعداً ادا
ایدلمک تزیهاً مکر و هدر . حتی بعض فقها سنت فخره قیاساً بلا عذر
قاعداً ایفا صحیح اولیه جغه قائل اولمشلرایسه ده لایق اولان سنت
(۱) مراهق . سین بلوغه و صوله قریب اولان .

خجره قیاس اولما قدر ﴿در مختار وابن عابدین﴾ شهر رمضانک
غیر یسنده و تری جماعتله قیامق مکر و هدر ﴿قدوری﴾ تسبیح
وبرات و رغائب نماز لرینی نذر ایدوب جماعت ایله قیلمقده کراحت
یوقدر . فقط صدر اولده اولمیان بر شیئی التزام و نفلی جماعتله ادا گی
امر مکر و هک اقامه سی ایچون تکلف مناسب اولماز ﴿برازیة﴾
نذر سر جماعتله نافله قیامق مکر و اولدینی گی نذرک مقتدی لر دن
وقوع بولسی و امامک ناذر بولنامسی دخی اقتضایدر . یوقسه ناذرک
ناذره اقتداسی لازمگلوب بوا یسه غیر جائزدر ﴿در مختار و طحطاوی﴾
علی سبیل الداعی اولدینی یعنی جماعت اوچدن زیاده بولمندیقی تقدیرده
نوافله اقتدانک کراحتی یوغیسه ده فضیلت جماعت هر حالده مفقوددر
﴿در مختار و غیره﴾ ابتدا جماعت اوچدن اقل اولوبده بعده تکثر
ایدرسه کراحت صکره گنلره در . اشته بو کراحت امام و جماعت
جمله سی متفل اولدینی صورتده اولوب اگر امام . مفترض و جماعت
متفل اولورسه بالاتفاق کراحت اولیوب بلکه فضیلت وارددر
﴿ابن عابدین﴾

یکر منجی باب

جنازه بیانده در

احتضار (۱) حالده اولان مسلم . قبله جهتنه توجیه ایله صاغ
جانبه یا تیریلور و یاننده ﴿اشهد ان لا اله الا الله و اشهد ان
محمد عبده و رسوله﴾ کلمتین شهادتینی تلفظ ایدیلره رک کندوسنه

(۱) احتضار . موته قریب حالده بولمق

تلقین اولنور . موت . تحقق ایتمکده چکملری بر دلبنده ایله
باغلنور و گوزلری یومدیر یلور ﴿قدوری﴾ تلقین حقننده
﴿لَقِّنُوا مَوْتَكُمْ لَا إِلَهَ إِلَّا اللَّهُ﴾ حدیث جلیلی شرفصادر
اولمش و لفظ موتادن حالی موته قریب اولان مؤمنلر اراده
بیورلمشدر . محتضرک اطرافنده بولسا نلره لایق اولان وجه
مذکور اوزره تلقینده بولنیلوب فقط کلمتین شهادتینی ضجرت
(۱) وقوعی احتماله مبنی سویله . دیهرک امر و تضییق ایلماملری
لزومی اکثر کتیده بیان ایدلمشدر ﴿جمع الانهر﴾ محتضر
بعدالوفاة ظهیری اوزرینه استلقا اولنوب آیاقلری مد و یوزی
قبله یه توجه ایچون باشی بر مقدار رفع اولنق دخی جائز و مشقتلی
اولورسه حالیه ترک ایدمک لازمدر ﴿تنویر﴾ دفندن صکره
تلقین خصوصنده اختلاف اولمش ایسه ده مشروعیتی اقوی
اولوب بلاد اسلامیه ده الآن و کماکان جاری و مرعیده موتانک
گوزلری اغماض (۲) اولنور . چونکه نبی محترم صلی الله تعالی
علیه وسلم افندمن حضر تلری ابوسلمه یه بعدالوفاة تشریف ایله
گوزلرینی اغماض ایتمشلر و (قبض روحدن صکره بصر اکا
تابع اولور) بیورمشلر و ﴿اللهم اغفر لابی سلمة وارفع
درجته فی المهديین و اخلفه فی عقبه الغابین و اغفر لنا وله یا رب العالمین
و افسح له فی قبره و نور له فیهِ﴾ دعای شریفنی لطفاً قرائت
ایلمشلر در . بناء علیه هر مسلمه بودعایی حفظ ایله ایجابنده

(۱) ضجرت . اضطراب (۲) اغماض . گوزی یومدیرمق

او قومق مستحیدر ﴿منح نقلاً﴾ عن المجتبى ﴿قبل الموت سكرات﴾ .
 حالیه میتدن کلمہ کفر ظهور ایلسہ زوال عقلہ حمل ایله ینہ
 اسلامہ مخصوص اولان معاملہ اجرا اولنور ﴿تنویر﴾ میت .
 عندندہ جنب و حائضک بولمسنده بأس اولمدیغنی محیطدن نقلاً
 حلبی بیان ایلمش ایسهده بونلرک نزد میتدن اخراجی اولوبتی
 درمختارده تصریح اولمشدر . غسل میتہ قصد اولندقدہ . میت .
 سریر اوزرینه وضع و عورت یری بر بز ایله ستر و ثیابی نزع
 اولنهرق مضمضه و استنشاق اولتمقسنزین وضوء صلات گبی آبدست
 آدیریلور . بعده اوزرینه سدر یاخود حرص دینیلان یپراق
 و اوت ایله قینادلش و بونلر بولمدیغنی حالده صافی اولنهرق
 ایصدیش صودوکیلور و اوچ کرہ و یادها زیاده تک اولنهرق
 تجیر (۱) اولنور و رأس و لویه سی خطمی و بولمز ایسه صابون
 ایله غسل آیدیلور ﴿قدوری﴾ غاسل الینه بر بز صاروب
 آبدستدن مقدم میتی استنجا ایدر خلافاً لامام ابی یوسف .
 اسنان ولسانی و شفتینی (۲) و منخرینی (۳) یرمغه دولادیغنی
 بز ایله مسح ایدر و ظاهر روایتده رأسی دخی مسح ایلر
 ﴿حاجی﴾ بوندن صگره غاسل . میتی صول طرفنه یانیروب
 تحتہ وصول مائی گورنجیه دک آب و سدر (۴) ایله صاع یانی
 و بعده صول طرفنه چو یرهرک کذلک تحتہ صویک وصولی
 گورنجیه قدر صول طرفنی غسل ایدر و بوندن صگره میتی
 اوتوردهرق و کندینه دایا دیرهرق بطنی صورت خفیفهده مسح
 (۱) تجیر . توتسوله مک (۲) شفتین . ایکی دوداقلر (۳) منخرین .
 ایکی بورن دایکاری (۴) سدر . عربستان کرازینک پیراغی که کوزل قوقولیدر

ایدوب شاید بواثانده میتدن برشی خروج ایدرسه یالکز آنی
 غسل ایلر و غسلنی اعاده ایتمز . بعده میتک صوبنی برحولی و یا
 بز ایله قوروله یوب کندیسنی کفنه قور و رأس و لویه سنه خطوط
 دینیلان برنوع عطری سورر و سجده اعضاسی یعنی جبهه سی
 وافی و یدین و رگبتین و قدمینی اوزرلرینه کافور وضع ایلر
 ﴿قدوری﴾ میتک اوزرینه جریان ایدن ماء و اصابت ایدن
 مطر ایله غسل شرعی حاصل اولمیه جغندن غریقی دخی
 بعد الاخراج یبقانیلور ﴿درر نقلاً﴾ عن قاضیخان ﴿رجلک﴾
 کفنده سنت اولان . ازار و قیص و لفافه . دن عبارت اولمق اوزره
 اوچ ثوبدر . ازار و لفافه میتک جمله بدنی احاطه و قیص دخی منکینندن
 (۱) قدمینه . دگین ستر ایدر . کفن . ازار و لفافه . دن عبارت اولان
 ایکی ثوبه اقتصار اولنسهده جائزدر . تکفین میتده ابتدا لفافه بسط
 و اوزرینه طیب نثار اولندقدن صگره ازار قونیلهرق و اوزرینه
 تکرار طیب صاچیلوب و قیص دخی بویله ایدیلوب بعده
 گوملک لباس اولنهرق اولاً ازار ثانیاً لفافه طرف ایسردن
 آیمه و آیمندن آیسره القا اولنور . انتشار کفندن خوف
 اولندیغنی حالده کفن باغلانور . مرأه نک تکفینده سنت اولان .
 ازار و قیص و لفافه و تدینی (۲) ربط ایچون خرقة عریضه
 (۳) و فوق القميص رأسه خمار . وضع ایلمکدر . اشبو اثواب
 خمسہ مقابل البسه ثلاثه یعنی ازار (۴) و لفافه و خمار (۵)
 ایلهده اکتفا جائزدر . مرأه نک صاچی ایکی قسم ایدیلهرک
 (۱) منکین . ایکی اوموزلر (۲) تدین . ایکی ممل (۳) خرقة
 عریضه . اگلوز (۴) لفافه صارغی (۵) خمار . باش اورتوسی

صدري اوزرينه قونيلور ﴿قدوري وغيره﴾ بونك ترتيبى شويله در . اولاً قيض الباس و صكره شعري ايكي به بولنوب قيضك فوقنده صدرك اوزرينه وضع بعده خمار . قيضك فوقنده باشي اوزرينه اورتيلوب و صكره ازار و لفافه صاريلوب بعده خرقة ربط اولنور ﴿حابي﴾ البسه ثلاثه دن اقل اولور ايسه مكر و هدر دينلمش ايسه ده امام ابى يوسف عندنده ستر عورت بولندينى سبيله يالگزار ازار و لفافه دخى جائز و ضرورنده بر كفن بيله كافى و كفك بياض اولمى مستحيدر ﴿ملتقى﴾ اثواب مذكوره بولندينى وقتده موجود اولان كفن ايله ضرورة رجل و مرأه تكفين اولنور ﴿تنوير﴾ ميت فقيرك تجهيز و تكفينى نفقه سى اوزرينه عائد اولان مسالمة واجب و بيكس و يا غريب ايسه بيت المساله لازمدر . زوجة غنيه نك زوجى اوزرنده وجوبى دخى مفتى بهدر ﴿غري و تنوير﴾ سقط و ولد ميت بر خرقة يه لف و غسل و تسميه اولنور سهده نمازى قيلنماز ﴿تنوير﴾ ميتك اغزينه و بورنه و قولاقرينه پنبه ادخاله جواز واردر ﴿حابي﴾ موتانك شعري و لحيه سى تسريح (۱) ايدملك و شعر و ظفري قطع اولنوق غير جائز و قبل التكفين اوچ و يابش يا خود يدي كره بخيرى مندوبدر . تكفيندن فراغتدن صكره ميت ايچون محله و يا قريه امامى يا خود جنازه نك و ليسى طرفدن جماعته نماز قىلدير مق مستحيدر . اوزرينه نماز قيلنمقسزين موتى دفن اولنسه شتاده اوچ گون و صيفده يدي گون ايچنده قبرى

(۱) تسريح * طرامق

اوستنده ادای صلات جنازه جائز اولور ﴿قدوري﴾ صلات جنازه تجهيز و غسل و دفن گي فرض كفایه اولوب شروطى ميتك اسلاميتى و طهارتى و ستر عورتى و مصلاده يعنى ارض و يا ارضه قریب موقعده پيش مصلي ده حضور يدر . غائبه و دابه و ايادى اوزرنده محموله و مصليتك خلفنده موضوعه اولان ميت ايچون نماز قيلمق جائز اولمز ﴿منح﴾ ميتك طهارتى ثوبى و بدنى و مكاني خارجدن اولان نجاستدن طاهر اولمقدر . شايد ميتك غسل و تكفيندن صكره وجودندن نجس چيقوب بدن و كفنى تجيس ايدرسه باس يوقدر ﴿ابن عابدين نقلاً عن الخزانة﴾ جنازه نمازينك ارکانى تكيرات اربعه و قيام و سئلرى حمد و ثنا و صلات على النبی و دعادر ﴿منح﴾ بعض تكيرات ايله مسبوق اولان كيمسه جنازه ايادى اوزرينه رفع ايدلدكدن صكره اوموزلره وضع اولننجهيه قدر تكيرات فائده اتیان ايدر ﴿در مختار﴾ صلات جنازه ده ابتداء بر كره اللرى رفع ايله ﴿الله اكبر﴾ دينيلوب و عقينده ﴿سبحانك اللهم﴾ آخريته قدر اوقنوب بعده بلا رفع يدين بر تكيردن و تشهدده كى گي صلوات دعا لرندن صكره كذلك اللارقالدير ليهرق بر تكير دها ايديلهرك نفسى و ميت و سائر مسلمين و مسلمات ايچون دعا اولنوب ينه اللارقالدير لمقسزين تكير رابعى متعاقب بلا دعا . ميت و امام و جماعت و حفظه . نيت اولنهرق ايكي طرفه سلام و يريلور . ميت . جماعته ايفاي صلات اولنان مسجد و جامع ايچنده بولندينى حالحه جنازه نمازى مكر و هدر

قدوری و در مختار اما موتا یالکرز اوله رق و یا بعض جماعته
 خارجه یا خود جماعت کلاً و یا بعضاً مسجد ده بولنق مختلف فيه
 اولدینی در و منجده محرر اولوب فقط بزازیه دن نقلاً
 بعض جماعت جنازه ایله خارجه و بعض آخر درون مسجد ده
 بولنسلر کراحت اولدینی عنایه ده و بونک اتفاقی اولدینی حقایقه
 بیان اولنمش و اکثر بلاد اسلامیه عادت دخی بو وجهله جریان
 ایلنمکه بولنشددر . صلات جنازه ده اوقونه جق اولان دعای
 ماثور و مشهور بودر - اللهم اغفر لحینا ومیتنا وشاهدنا وغائبنا
 وصغیرنا وکبیرنا وذاکرننا وانا انشانا اللهم من احييته منافحیه علی الاسلام
 ومن توفيته ما فتوفه علی الايمان وخص هذا المیت بالروح والراحة
 والرحمة والمغفرة والرضوان اللهم ان کان محسناً فزد فی احسانه
 وان کان مسیئاً فتجاوز عنه ولقه الا من والبشری والکرامة
 والزلفی برحمتک یا ارحم الراحمین - میت . صبی و یا جنون
 اصلیه مجنون ایسه - فتوفه علی الايمان - دن صکره
 - اللهم اجعله لنا فرطاً اللهم اجعله لنا اجراً وذخراً اللهم اجعله لنا
 شافعاً ومشفعاً - دینلمیدر بودعا بیلنمدیگی و یا حفظده اولدینی
 تقدیرده - اللهم انا نستعینک - ایله - اللهم ایاک -
 دعالرینی آخر لرینه قدر او قوملیدر - حلبی - اکثر کتب مشهوره

وقساواده یالکرز دعائین اخیرین اوزرینه اقتصار اولنمی
 محرردر - ابن عابدین - عوف بن مالک رضی الله عنه بر جنازه
 اوزرینه علیه الصلاة والسلام افندمن حضر تلریله نماز قیلوب
 آئیده کی دعالری حفظ و اول جنازه نک کندوسی اولمنی تمی
 ایلدیگی مرویدر .

- اللهم اغفر له وارحمه وعافه واعف عنه واكرم نزله ووسع
 مدخله واغسله بالماء والثلج والبرد ونقه من الخطايا كما ينقى الثوب
 الابيض من الدنس وابدله داراً خيراً من داره واهلاً خيراً من
 اهله وزوجاً خيراً من زوجة وادخله الجنة واعذه من عذاب القبر
 وعذاب النار - صلات جنازه محل قرائت اولدیغدن سورة
 فاتحه قرآن نیتته قرائت اولنه من ایسه ده دعا نیتته مقام ثناده اوقونه
 بیلور - منح - بعض متأخرین - ربنا انا - و - ربنا
 لا تزغ قلوبنا - آیتلرینی آخر لرینه قدر دعا نیتته او قومنی
 استحسان ایلنمشلدر - جوهره - امامک صدر جنازه یه محاذی
 بولنمی مستحب وراسنده و یا قدمنده و قوف دخی جائز در
 بحر - هر حالده میتک بر جزونه محاذات شلدر - ابن عابدین نقلاً
 عن القهستانی - امام . جنازه نمازنده بش تکبیر ایتسه مقتدی اولنلر
 تابع اولمیوب امام سلام ویرنجیه دگین توقف ایدرلر . شو حالده
 جماعتک امامه انتظار ایتیه رک سلام ویرملرینک جوازیده و امام اعظم
 حضر تلرندن مرویدر - منح - امام اعظم و امام محمدده حضر تلرینه

گوره بعض تکبیراته مسبوق اولان فی الحال شروع ایتیموب
امامک تکبیریلہ برابر مباشرت ایدر وبعد السلام فائتہ اولان
تکبیراتی قضا ایلر . اما جمیع تکبیرات ایلہ مسبوق اولورسه اصلاً
شروع ایدہ میوب صلات جنازه بی فوت ایتیمش اولور . امام ابی
یوسف عندندہ ایکی صورتده دخی فی الحال شروع ایدر * قولیندن
هر بریسی تصحیح اولتمش ایسه ده امام ابی یوسف قولنه
﴿ وعلیه الفتوی ﴾ دینلمشدر * اما تحریمہ امامده حاضر اولوبده
غفلتدن ناشی تکبیراتک بعضی ویا جمله سنی فوت ایدن کیمسه مدرک
حکمنده اولوب بالاتفاق تکبیر امامه بلا انتظار شروع ایلر
﴿ در مختار وابن عابدین ﴾ جناز . جمع اولسه هر برینه آیری
آیری نماز قیلمق اولی ایسه ده صلاتده جمع . قصد اولندقدہ
رؤسده محاذاته باقلمیوب هر بریک صدری امامک حذاسنده
بولتمق واولاً رجال صکره صبیان بعده نساء صکره خنثالردها
صکره صبیات . قرب امامده ترتیب ایلہ یان یانه وضع و قبلیه یه
دوغری صف اولتمق شرطیلہ جمله سنی اوزرینه صلات واحده
اداسی جائزدر ﴿ درر ﴾ میت . تابوت ایچنده اوله رق قالدیرلدقدہ
تابوتک درت قائمه سندن اخذ ایلہ وسنیلکیله رک اضطراب
ویرلمه جک صورتله واولدجه سرعتله قبریینه ایصال و سطح ارضه
وضع اولنور . تابوت یرہ قونمزدن اول او طور مق ﴿ من شیع
الجزازة فلا یجلس حتی توضع ﴾ حدیث شریفی اقتضاسنجه ممنوع
ومکروهدر ﴿ قدوری وغیره ﴾ جنازده تابوتک قائمه اولی سنی
اولایمینه بعده یساره وکذلک قائمه اخراسنی یمین ویساره آله رق
هر جانبدن اون خطوه گوتورمک قرق کیره یه کفارت اولدیفنه

دائر حدیث شریف شرفصادر اولمشدر ﴿ منیح ﴾ جنازه نک خلفنده
نسا یوق ایسه آردنده ووار ایسه اوکنده یوریمک مندوبدر .
جامعتک بعضی تباعد ایتیمه رک ماشیا اوکده گتمکدخی جائز وفضیاتی
جائزدر . لکن کلیسی ویا مع التباعد بعضیسی ماشیا یاخود را کباً
جنازه نک اوکنده گیتیمک مکروهدر ﴿ در مختار وتنویر ﴾ جنازه ایلہ
کیدنلرک التزام سکوت ایتلمری لازم اولوب ذکر الله قصد ایدنلر
اخفا ایتلملردر ﴿ بحر نقلاً عن الغایة والظہیریة ﴾ میت قبله جانبندن
اولدن موجود اولان یاخود یگیدن پاییلان لحده ادخال اولنور
ومقبره یه قونلدقدہ وضع ایدن مسلم طرفدن ﴿ بِسْمِ اللَّهِ وَبِاللَّهِ
وَعَلَىٰ مِلَّةِ رَسُولِ اللَّهِ ﴾ دینیلرک میت . قبله جهتنه اماله (۱)
وکفک عقده سی (۲) حل (۳) ایدیلور بعده براز تحته ایلہ
میتک اوستی محافظه ایدلدکن صکره قبرک اوزرینه عادت وجهله
طوپراق دوکیله رک ودرت کوشه ایدلمیه رک دوه اورگچی شکلنده
اورتیلور ﴿ قدوری وغیره ﴾ لدی الحاجة یعنی ارض رخوه ده
(۴) حجر دن ویا حدیددن تابوت اعمال ایدیلرک میتک انک
ایچنده دفن ایدلمسی ومیتک اطرافنه طوغله وخشب وضع اولتمسی
تجويز اولندیغنی حاجی بدایع ومبسوطدن نقلاً بیان ایلمشدر .
علی الاطلاق نسانک تابوت ایلہ دفن ایدلمری بالوجوه مستحسندر
﴿ شرح المنیة نقلاً عن المحيط ﴾ قبری تطیین یعنی چامورله صیوانی
واوزرینه قبه وسائرہ بنا ایتیمگی وکتابت ایلیمگی سراجیه دن نقلاً
(۱) اماله . میل ایتدیرمک (۲) عقده . دوگم (۳) حل . جوزمک
(۴) ارض رخوة . کوشک یر

در مختار و دیگر لری تجویز ایلمشدر . موانک جبهه و یا عمامه سنه یا خود گفته عهدنامه یا زلسه میتک عفوی مرجودر ﴿ بزازیة ﴾ بسمله شریفه میتک جبهه سنه و یا صدرینه کتب اولمق عذاب قبردن خلاصنه باعث اولدینی مروی بولندیغندن بونی بعض متقدمین اولادینه وصیت ایلدیگی وشو حالک وقوعندن رؤیاده خبر ویرلدیگی کفایه شعبیده ذکر اولمشدر ﴿ تانار خانیه ﴾ بر مسلم . سفینه ده فوت اولسه غسل و تکفین اوله ررق نمازی قیلنوب قره به چیقارلق ممکن اوله من ایسه بحره براغیلور ﴿ درر و غیره ﴾ حامل . فوت اولوب ولدی قارنده متحرک ایسه جانب ایسردن بطنی شق ایله ولد . اخراج اولنور ﴿ غرر ﴾ ارض . مغصوبه و یا شفعه ایله مأخوذه اولوبده صاحبی طلب ایدرسه میتی اویردن اخراج جائزدر . کذلک میت . ثوب مغصوبه تکفین اولمش و یا بر کیمسه نک بر در هم قیمتنده اولان مالی درون قبرده قالمش اولسه فتح قبر . تجویز اولمشدر . ایکی میتک بر قبرده حرب و جهادگی ضرورت اولدجه دفن اولمنسه جواز یوقدر . بلا ضرورت قبری باصوب چکنمک و اوزرنده او یومق و نماز قیلحق و مقبره ده کی باش آغاج و اولتری قوپارمق مکر و هدر ﴿ ملتی و درر ﴾ قرائت قرآن ایچون قبر اوزرنده اوطور مقده کراحت یوقدر ﴿ نور الایضاح ﴾ تسبیح و دعا و قرائت ایله اشتغال ایدرک قبری چکنمک لا بأسدر ﴿ خزانه الفتاوی ﴾ بعد الولاده مولودک حیاتی صوتی و یا حرکتی ایله ظاهر اولدقدن صکره فوت اولسه اسمی قونیلور و غسلی و صلاتی لازم اولور . اگر حرکت و صوتی اولمز ایسه برشی یا لمیوب بر بزپار چه سنه وضع ایله دفن اولنور ﴿ قدوری ﴾ سقط

واقع اولسه تام الخلقه ایسه اکر امأ لبنی آدم امام ابی یوسف عندنده غسل اولنور ﴿ منح ﴾ قبرستاندن انشای مرورده بالتوقف اون بر اخلاص شریف او قونه ررق ارواح موتاه هدیه ایدلسه روحلرینی تسریره مبنی عدد اموات قدر اجر و ثوابه نائل اولنه جنی بعض احادیث شریفه ده تبشیر بیورلمشدر ﴿ در مختار ﴾ .

یکرمی بر نبی باب

احکام شهید بیاننده در

شهید . مشرکین طرفندن قتل اولنان و یا معركة حرب و قتالده مجروح و میت اوله ررق بولنان یا خود مسلمین انی ظلماً قتل ایدوبده نفس قتلی سببیه دیت واجب اولمیان مسلمدر . بصورتله شهید اولان مؤمن غسل اولنمیب یالکتر تکفین ایله نمازی قیلنور ﴿ قدوری و غیره ﴾ معلوم اوله که لسان شرعده شهید لفظی ایکی معنایه گلور . بری شهید حکمیدر که شروط شهادتی جامع اوله ررق دشمن طرفندن مباشرة و یا تسبیاً قتل اولنوب ارتثاث و قوعبولماسنده شهدای بدر واحد حضراتنه مشابه و انلرک احکام دنیویه سنی حائر اولان مؤمنلر دیمکدر . دیگری شهید حقیقی یعنی هر نه وجهله اولور ایسه اولسون فی سبیل الله یا خود مظلوماً قتل اولنان و بوجه آتی تعداد و بیان اولنه جنی اوزره بوزمره به ملحق اولان صنوف مؤمنندن عبارتدر . بونلر حسن نیت و صلاح حال و مظلومیتلرینه مبنی فضیلت شهدای احراز ایدرلر سه ده مشابعت مذکوره بولندیغیچون احکام دنیاچه سائر مؤمنلر کیدرلر . بناء علیه شو ایکی معنا بیننده عموم

وخصوص من وجه اولدیغندن شهدای بدر واحد گبی ذوات کرام حکماً و حقیقه و دیگرلری یالکڑ حکماً و ارتثانی وقوعبولان شهیدلر ایله مثلاً حریق و یاغریق اولان مؤمنلر فقط حقیقه یعنی آخرتجه شهید عد اولمشلردر ﴿در مختار و ابن عابدین﴾ احکام دنیایه نظراً شرعاً شهید اوج نوع اعتبار اولمشدر .

بری مکلف و جنب و حیض و نفاس و بونلرک زوال و انقطاعی گبی احوالدن طاهر اولدیغی حالده بغیر حق آلت جارحه ایله گرک مسلم گرک ذمی و یا مستامن طرفندن بالمباشرة قتل اولنان و نفس قتل مال و دینی مستلزم اولیوب قصاص لازم کلان یا خود هیچ برشی ایجاب ایلمیان و مرثت اولیان مسلمدر ﴿در مختار﴾ ایمدی باغی و قاطع طریق اولیان بر مسلم و یا ذمی . عاقل و بالغ و طاهر اولان بر مسلمی بروجه مشروح بغیر حق ظاهراً آلت جارحه ایله قتل ایلسه مقتول . اشبو برنجی نوعدن اولور *

ایکنجیسی کذلک مکلف و طاهر اولوب حربی و یا باغی یا خود قاطع طریق و یا شهر ایچنده لیللاً سارق و امثالی طرفندن ولو آلت جارحه نلک غیری ایله یا خود تسبباً قتل اولنان مسلمدر .

(اعدانک سوقیله دابه لرینک بر مسلمی چکنه یوب و یا ایصروپ یا خود اور کوتملر یله محارب اولان مسلمینک حیوانلری کندیلرینی اوزلرندن آتوب هلاک و وقوعه گلمسی و یا دشمن طرفندن نار و امثالی محرق شیلر انداختیله احراق ایدیلاں سفینه لرک دروننده کی اسلامک یا تمه سی و دگزه باتمه سی گبی اعدایه مضاف اولان قتللره تسبب دینلور) ﴿در مختار و طحطاوی﴾ بناءً علیه نوع اولده اولدیغی گبی آلت قتلک آلت جارحه اولسی و قاتلک مباشر بولنسی نوع ثانیده شرط دگدر .

فقط عدم ارتثات بونوعده ده معتبردر . زیرا بوبایده اصل اولان شهدای بدر واحد ﴿رضوان الله تعالی علیهم اجمعین﴾ حضرتانی اولوب بونلرک ایسه هر بری سیف و سلاح گبی آلت جارحه ایله قتل اولنماش و بلکه ایچارنده حجر صغیر ایله باشی یاریلوب و یا عصا ایله اوریلوب شهید اولمش ذوات کرام دخی بولنمش اولسنه گوره اشبو ایکنجی نوع . شهدای بدر واحد اعتباریله شهیدک تعریفی اولقی لازم کلور ﴿درر و غیره﴾ اوچنجی نوعی کذلک مکلف و طاهر اولوب گوزلرندن و یا قولانغندن یا خود جامد اوله رق بوغازندن قان خروجی و یا اعضاسندن برینک انکساری (۱) و اخناق (۲) و قوعی مثللو علامت قتل ایله حربی و یا بغاة و قطاع طریقک محل حرب و قتاللرنده جریحاً (۳) و میتا بولنمش اولان مسلملر در که بونلر زمرة شهدایه داخلدرلر .

انفندن و یا سبیلینندن یا خود صافی اوله رق حلقندن (۴) دم چیقارایکن بولنلر شهید عد اولنزلر . چونکه بو گبی مخارجدن بعضاً من غیر ضرب . دم خروجی عادت اولدیغندن بونلر قتله دلالت ایتمز . و بنابرین وجوبی قطعی اولان غسل . شک ایله ساقط اولمز ﴿در مختار و درر و شرنبلالی﴾ شهید حکمی نلک اوزرنده بولنان اشیادن سنت اولان کفه صالح اولیان چیزمه و قوندوره و مست و پاپوش و کورک و عبا و بموقلی خرقة و قلنسوه و فس و سلاح مثللو شیلر نزع اولور . اگر اوزرنده کی ثوب . کفن مسنونندن ناقص ایسه تزئید و زائد ایسه تنقیص اوله رق حد معروفه رعایت

(۱) انکسار . قیرلیق (۲) اخناق . بوغق (۳) جریحاً . یاره لو اوله رق (۴) حلق . بوغاز

واعتنا وبلا غسل نمازی بعد الادا دمیلہ ولباسیلہ دفن ایدیلور
 ﴿قدوری ودر مختار ودرر﴾ زیرا بویابده دخی اصل اولان شهدای
 احد اولدیغنه و شهدای مشار الیهم حقلرنده نبی محترم صلی الله
 تعالی علیه وسلم افدمن حضر تلری ﴿انا شهید علیهم زملوهم
 بکلوهم ودمائهم ولا تغسلوهم فانه مامن جرح یخرج فی سبیل الله
 تعالی الا وهو یأتی يوم القيامة واولداجه تشخب دما اللون
 لون الدم والريح ريح المسك﴾ بیورمش اولدقلرینه مبنی
 بونلرک حائز اولدقلری شروط سسته که مکلفیت یعنی (عقل
 وبلوغ وحدث اکبردن طهارت وعدم ارتثا دن وظلماً قتل
 اولنمقدن و نفسنه عوضاً مال و دیت واجب اولماقدن عبارتدر)
 بونلری احراز ایلمش اولان هر مسلم باذن الله تعالی شهدای
 مشار الیهمه ملحق اولورلر ﴿درر ودر مختار و غیرها﴾ ایمدی
 صبی ویا مجنون ویا جنب ویا حائض و نساء بعد الانقطاع وروایت
 صحیحہ ده قبل الانقطاع احراز رتبه شهادت ایلمش بولنسه لر
 امام اعظم حضر تلرنجه غسل اولنورلر خلافاً للامامین ﴿عنایه وفتح
 وسراج﴾ حربی ویاغی ویا قاطع طریق طرفندن آتش آتیلوب
 روزکار آتی مسلمینه گوتوره رک محترق ویا اساله اولنان صویه
 غرق اولان یاخود حیوانلرک اورکور دلمسیله چیگنه نه رک وفات
 ایلان مسلم دخی تسبب طریقله قتل اولنش بولنغله شهید اولدینی
 متفق علیه ایدوگندن بونلر دخی بیقانلمز ﴿جوهره وشرنبلالی﴾
 اما اعدانک ویا بغاة وقطاع طریقک اسبی من غیر سوق . بنفسه

قاجوب بر مسلمی چیگنه یرک ویا بر مسلمک دابه سی دشمنک تنفیری
 اولمقسزین مجرّد حال وحرکاتندن اورکوب صاحبی ویا دیگر
 مسلمی پایمال ایلیرک یاخود حال قتالده حیواننک آیانی قاجوب یره
 دوشهرک ویا مسلمین . اعدادن فرار ایدوب انلر دخی ارقه لرندن
 تعقیب ایتمگله کندولرینی خندق ویا ماء و نار گبی شیئه القا ایدرک
 ویا حیوانلریله بری برینی چیگنه یرک فوت ویا بر مسلمک اعدایه
 آتدینی آلت حرب بر مسلم آخره دو قونه رق والحاصل اعدایه
 مضاف ومنسوب اولیان بر سبب بولنهرق مقتول اولنلر امام اعظم
 حضر تلرنجه غسل اولنورلر خلافاً للامام ابی یوسف . كذلك
 اهل حرب طرفندن اولیه رق مرتفع محلدن القا ویا نار ایلله احراق
 ویا هدم وغرق صورتلریله امانه اولنان وحد یاخود قصاص ویا
 افتراس سباع (۱) سببیلله مقتول اولان یاخود بعد الجرح مرث
 بولنان یعنی حیاتندن رمق وار ایکن حیوان چیگنه مک خوفندن
 اولیه رق معرکه ویا مجروح اولدینی محلدن جای امانه نقل اولنان
 هر بر مسلم احکام دنیا به نظر آ شهید آخرت عد اولنه جقلرندن
 بالاتفاق غسل اولملری لازم کلور ﴿درر ودر مختار﴾ بروالد
 ولدینی ظلماً آلت جارحه ایلله قتل ایلسه اشبو نفس قتلك موجبی
 ابتداء قصاص وولدی شهید اولنغله غسل اولنمز فقط ﴿لا یقل
 الوالد بولده﴾ حدیث شریفندن اقتباس اولدینی اوزره
 حرمت ابوت سببیلله والد قاتلدن امر قصاص ساقط اوله رق ماله
 منقلب اوله جفندن ولدمقتوالک ورثه سنه وورثه سی یوغیسه بیت الماله
 (۱) افتراس سباع * جانورلرک پاره لامسی

تمام دینی و یرمک والدک اوزرینه واجب اولور . كذلك قتل عمدده
 صالح عارض سبيله قصاص . مُبدل دیت اولمق دخی بوقیلنددر
 بناء علیه حکم شهادت اولان عدم غسلی اخلال ایتمز در روشربلالی
 بر آدمک خطا یا خود حجر کبیر گبی بر شیء مُثَقَّل (۱) و یا عاصا
 ایله عمداً قتل ایلدیگی مسلم . ابتداءً موجبی دیت اولدیغندن شهید
 عد اولمز . ظالماً و یا مظلوماً . خطاً و یا عمداً اولدینی معلوم
 اولماسندن ناشی قاتلی مجهول اولان مقتول دخی كذلك شهید صایلمز
 در مختار و طحطاوی و بحر شهادت حکمیه دن عداولنیه رق غسلی
 موجب اولان ارثاث شرعی (مجرورح اولوب ولو بر ازا کل و شرب
 و نوم و دوا دن بر یله متصف یا خود بروقت صلات مرورینه قدر عاقل
 و ادایه قادر اوله رق حیاتی باقی بولمق و یا اولدینی محله اوزرینه
 چادر قورلمق و یا محل جرح یا خود معرکه قتال دن عاقلاً و حیاد یگر
 یره اثنای نقلده و یا بعد انقل و فات ایلمک) دن عبارتدر در دوری
 و غیره امر دنیا ایله وصیت و بیع و شرا و کثرت کلام . ارثاثده
 داخل و شهادت حکمیه به مانعدر . امر آخرت ایله وصیت امام ابی
 یوسفه کوره ارثاث . اولوب امامین عندندده دگدر . حربده
 مقتول حقتده ارثاث . انقضای حرب دن صکره واقع اولور سه معتبر
 اولوب اثنای حربده اولدینی تقدیرده اعتبار اولنیه جغندن شهادت
 حکمیه به مانع اولمز و بناءً علیه غسل ایلمز . خیولک (۲) با صوب
 چیگنه مسندن خوف اوله رق نقل اولنسه ارثاث عدا یلدیه جگندن
 كذلك یبقانلمز در و در مختار حد و قصاص شرعی ایچون قتل

(۱) مُثَقَّل . آغز (۲) خیول . آتل

اولنان مسامک غسلیله نمازی ادا اولنور . بغاة دین و یا قُطَاع
 طریق مسلمین کروهندن اولان مقتولک مجرّد ساعی بالفساد
 اولدیغندن ناشی نمازی قیامز . بونلرک غسانده اختلاف وارددر
 در دوری و غیره نفسی قتل ایدن شخص یبقانیلوب نمازی
 قانور خلافاً الامام ابی یوسف ملتقی قصاصی موجب فعل ایله
 مقتول اولان صبی و مجنون و جنب و حائض و نفساء و دینی مستلزم
 قتل ایله ظالماً مقتول و مرتکب و عدویه قصد ایدوب قتال ایدرایکن
 آلت جارحه کندویه اصابت ایدرک و یا صوبه غرق یا خود آتشده
 محترق و یا اوزرینه دیوار و بنا هدم و یا اسهال یا خود طاعون و یا
 ذات الجنب و ذات الرئة علتلرینه مبتلا اوله رق و یا غربتده بولنه رق عازم
 دار بقا اولنلر و گرک حین وضع حملده گرک بعد الوضع نفاسی مدتی
 ایچنده فوت اولان نفساء و لوکل یوم بردرس تحصیل و یا تدریس
 و یا تألیفه مشغول بولنان طلبة علوم شرعیه و علماء ایله جمعه کیجه سی
 ارتحال عقباً ایلدانلر گبی بوامتک دها بر چوق شهادتی وار ایهده
 بونلرک شهدای بدر و احد حضراتنه مشابهلری اولدینی جهته
 یا الکر شهید آخرت عد ایدملرینه منی غسل اولملری
 لازمدر در مختار و غیره ذکر اولنان شهدای اخرویه
 الی قدر تعداد اولمش اولوب بونک تفصیلاتی ابن عابدینده محرر دره

بکر منجی باب

(کعبه مکرمه قیلنه حق نمازه دائردر)

رسول اکرم صلی الله علیه وسلم اقدمن حضرتلری یوم

فتحده جوف کعبه ده نماز قیلمشدر در ﴿جمع الانهر﴾ درون کعبه ده فرض و نافله اوله رق منفرداً و یا جماعتله ایفای صلات اولور . اما کعبه ده نماز قیلوب جماعت اقتدا ایسه حسب الموقع جدار کعبه مکرمه یه توجه ایجابجه گرک ظهري امامك ظهري نه و یا جنبه یا خود جنبی جنبه و ظهري نه و وجهه و یا وجهی امامك ظهري نه و وجهه و جنبه . صادق اولسه جائز در . لكن وجهی امامك بلا حائل وجهه تصادف ایدرسه استقبال صورت بولنمغله مکر و هدر . اگر ظهري گرک محاذات گرک انحراف ایله امامك وجهه ایسه اتحاد جهته امامی تقدم ایلمش اوله جغندن اقتداسی باطلدر ﴿قدوری و ملتی و در مختار﴾ امام و جماعت جمله سی جوانب کعبه ده حلقه اولوب نماز قیلمشدر مقتدینك ظهري وجه امامه و یا امامله برابر بولنان صفه محاذی اولمدجه کعبه یه امامدن زیاده قریب اولسه دخی اختلاف جهتن ناشی تقدم بولنمغله جائز اولوب انحق جهته اتحادله برابر کعبه یه امامدن زیاده قریب بولنانك نماز قیلمسی تجویز اولنممشدر ﴿قدوری﴾ قبله عند الحنفیه بنای محسوس اولمیوب انحق سایه قدر کندویه محاذی اولان هوا ایله معاً ارض مبارکه دن عبارت اولدیغنه مبنی جبل ابی قیس گبی محل مرتفعده نماز قیلمق جائز در * مجنبی ده ذکر ایدلدیگی وجهله حضرت ابراهیم علیه السلام وضع بیوردیغی قاعده اوزرینه اولان بنا . ابن الزبیر زمانيله حجاج وقتنده ایکی دفعه رفع اولنمشدر ﴿منح﴾ امام گرک یا لکزر گرک بعض جماعتله جوف کعبه ده اولوب جماعت . خارجده - لمقه اولسه لر باب کعبه مفتوح

یا خود امامك انتقالاتی مبلّغ واسطه سیله مسموع ایسه اقتدا صحیح اولورسه ده لكن صورت اولی ده یعنی امام یا لکزر اولوب جماعتك کافه سی خارجده بولنسه لر امامك بولندیغی مکانك بر قامت قدر ارتفاعی سیبيله نماز مکروه اولور ﴿در مختار﴾



اوچنجی کتاب

زکات بیاننده اولوب اون ایکی بابی مشتملدور

برنجی باب

(زکاته متعلق مسائل مخصوصه در)

هجرت نبویه علیه افضل التحية نك سنة ثانیه سنده صیام رمضان
مقدم فرض بیوریلوب برچوق آیات کریمه ده صلات ایله معاً
ومستقلاً ذکر اولمغله کتاب صومه (۱) بالتقدیم صلاته مقارن
اوله رق ایراد اولندی در مختار و غیره استعید بالله اقیموا
الصلاة واتوا الزکوة الآية ودها نیجه آیات جلیله واحادیث
شریفه موجب نیجه زکات حر و مسلم و بالغ و عاقل اولان کیمسه به
دین و حاجت اصلیه دن فضله اوله رق مالک تام ایله نصاب نامی به
مالک اولمق و اوزرینه حولان حول یعنی برسنه مرور ایتمش
بولمق اوزره کتاب و سنت و اجماع امت ایله فرضدر بو تقدیرجه
عبد و مدبر و ام و ولد و مکاتب و صبیئک و جنون اصلی ایله مجنون
اولانک ماللری ایچون زکات واجب دکلدر قدوری و در مختار
زکات لسان شرعه مالک ربع عشر نصابه عند الشرع معین
اولان جزوئی هاشمی و معتق (۲) هاشمی اولیان فقیر مسالمه

(۱) صوم * اوروج (۲) معتق * ازادلو

کندوسندن منفعتی بالکلیه قطع ایله رضاء لله تعالی تمليك
وایتا (۱) ایتکدر شو حالد اوغلنه و حفیدینه وان سفل
و باباسنه و جدینه و جدینک جدینه وان علا زکات ویرلمز
واحد زوجین دخی آخرینه زکاتی اعطا ایلمز چونکه بونلره
ویریلنجه قطع منفعت ایدلماش اولور ماتی زوجہ سنک
دیگر زوجندن اولان فقیر اولادینه زکات ویرلمک جائزدر
ابن نجیم و ما انفقتم من شیء فهو یخلفه آیت
جایله سی دلالتیله زکات مالک نما (۲) و ازدیادینی مستلزمدر
در مختار و غیره تعریف زکاتده تمليك قیدیه اباحه
خروج ابتدی مثلاً زکات نیتیه بریتیم اطعام (۳) ایدلسه
زکات یرینه قائم اولمز مگرکه طعوم یتیمه دفع اولنه اکسا (۴)
گی کفارتده تمليك و اباحه ایله حاصل اولان تمکین شرط
اولدینی جهتله جزؤ مال قیدیه ده کفارت خارج قالدی
در مختار رفع القلم عن ثلاث عن النائم حتی یستقیظ
وعن الصبي حتی یحتلم وعن المجنون حتی یفقی حدیث
شریفنک دلالتیله عقل و بلوغ صاحب اولیان حقنده زکات واجب
دکلدر نصاب نامی یعنی بالذات و یا بالواسطه استما (۵) به
صالح بولمدینی و كذلك عباد طرفدن طلب اولسان دیندن

(۱) ایتا * اعطا معناسنه در (۲) نما * ارتقی (۳) اطعام * یمک

یدیرمک (۴) اکسا * اوروبه کیدرمک (۵) استما * ارتیرمق

و حاجت اصلیه شرعیه دن فضله اولدینی و حولان حول وقوعبولدینی حالده دخی زکات لازم کلز ﴿ملتقى ودر مختار﴾ التون وگموشده اولدینی گبی مالده ثمنیت و حیوانانده سائمت و سائر اشیاده تجارتیه نیت ایله برابر حولان حول . زکاتک اداسی وجوبنک شرائطنددر ﴿درر و غیره﴾ مالی احاطه ایده جک قدر دین اولسه زکات واجب اولمز . مال موجود . دیندن زیاده اولدینی صورتده زیاده سی حد نصابه بالغ ایسه مال زائدک زکاتی ادا اولنور ﴿قدوری﴾ مثلاً بر کیمسه نك ایکی یوز درهم دینی وایکی یوز درهم مالی اولسه زکات واجب اولمیوب درت یوز درهم مالی اولدینی تقدیرده ایکی یوز درهمک زکاتی ویرمک لازم گلور . درت یوز درهمدن ناقص اولور ایسه ایتای زکات ایجاب ایتمز ﴿جمع الانهر﴾ سکنا ایچون اولان خانه لرده ولبس اولسان ثوبلرده واثاث (۱) ولوازم بیوتده ورکوب (۲) ایچون بسلیلان دوایده (۳) و خدمت ایدن عیید واستعمال ایدیه جک سلاحد و آلات صناییه و اهلی ایچون کتب علمده زکات واجب اولمدی ﴿قدوری و غیره﴾ تجارت . نیتنه مقارن اولیان ولو اهلنک غیری اولسون علم و معرفته مخصوص هر نوع کتابلر و حرف و صنایعه مستعمل آلترک زکاتلری اولدینی گبی مفقود و بحر و ساقط بولسان و مصادره طریقله مأخوذ اولان ماللره دخی اله کچدیکی وقت سنین ماضیه ایچون

(۱) اثاث . خانه متاعی (۲) رکوب . نمک (۳) دواب . بوراده بنک حیوانلری مقصوددر

زکات یوقدر . كذلك بلا بینة مغضوب بولسان و بریه ده دفن اولنهرق محلی نسیان اولمغله غائب حکمی آلان اموالک وانکار اولنان و بینه سی بولنمیان دینک قبل الاستحصال زکاتی اولدینی گبی بعد زمان تحصیل میسر اولسه دخی بلا حول ویرلمز ﴿درر﴾ مدیون کندی ذمتده اداسی لازم اولان دینی اقرار ایلمدیگی حالده داینک بینه سی بولنسه بیله صحیح اولان امام محمد قولنه گوره زکات ترتب ایتمز ﴿در مختار﴾ بر کیمسه معارفه سی اولیان برینک عننده اولان امانت مالی او نوتسه ده مثلاً برسنه و یادها اکثر زمان مرورنده تذکر ایلسه سنین ماضیه ایچون زکات لازم اولمز . اگر مال . معارفه سی اولان کیمسه نك نزدنده اولدینی حالده وجه مذکور اوزره نسیان . واقع اولور ایسه حین وصولده سنین ماضیه ایچون زکات واجب اولور ﴿در مختار و غیره﴾ کندی خانه سنده دفن اولنهرق محلی فراموش اولنان مال حفر (۱) ایله میدانه چیقارلق ممکن اولدیغندن بعد الحول اگا زکات لازمدر . لکن ارض مملو کده و یا باغده مدفون اولان مال حقنده اختلاف واقع اولوب بعضاری طرفندن . ارضی کاملاً قازمقله ماله وصول امکانی اولدیغندن زکاتک لزومی و بعض آخر جانبندن . بونده خرج اولمغله عدم وجوبی رأی و بیان قلمشدر ﴿ملتقى وجمع الانهر﴾ حرام مالدن زکات ویرمک ایجاب ایتمز . حلال مال ایچون واجب اولان مقداره مساوی حرام مالدن ایتای زکات . جائز اولور ﴿فتوای عبدالرحیم و ابن نجیم﴾ کسب حلال ایله کسب حرام محتاط اولسه حولان حول وقوعنده جمله سی ایچون

(۱) حفر . قازمق

زکات ایجاب ایلر . زید جانب میری به عدد اغنام رسمه مقابل
ویردیگی اچقه یی زکاتنه طوتسه کفایت ایدر . بر مسلم .
ملکی اولان خانه ویا او طه لرده زکات نیتیه فقرا اسکان
ایتسه زکات یرینه قائم اولمز . بر دائن مالک زکاتندن
نصابدن زیاده اوله رق مثلاً یدی یوز غروش دینی ویرمک
اوزره مدیوننه ویرسه زکاتنه کافی اولور . **بهبه**
سکناسی اولیان کسه سکنایچون تدارک ایلدیگی اچقه اوزرینه
حولان حول واقع اولسه اول اچقه نك زکاتی اعطا ایلر **فتوای**
عبد الرحیم مال صیدن زکات واجب اولمز . زید تکالیف
عرفیه سنی زکات نیتیه ایفا ایلسه ویا زکاتنه مقابل جاریه سنی
بر فقیره ویرسه زکات یرینه گچر **نتیجه** **مقر** اولان غنی
و فقیرک ویا افلاسیله حکم اولنان مدیون مقرک اوزر لرنده بولنان
دین مقبوضک سنین ماضیه ایچون زکاتی داین اوزرینه واجبدر .
امام محمد گوره مفلسک افلاسی حکم اولندقدن صکره دین .
هلاک درجه سنه واره جغندن بوکا زکات لازم اولمز . دیندن
قبض اولنان مقداره زکات ویریلور . معلوم اوله که امام اعظم
حضر تترینک عندنده دین . اوچ نوعدر . برنجیسی بدل مال
تجارت یعنی عندنده برسنه باقی قاله رق زکاتی لازم اولان دنانیر
(۱) و دراهم (۲) و امثالی اموال دن و ثمن (۳) سوائم و غله لری
گی شیلردن متحصل . دین . دین قوی اولوب بونلر . مقداری نصابه

(۱) دنانیر * دینار لر یعنی مسکوک التونلر (۲) دراهم * درهم لر یعنی
مسکوک گموشلر (۳) ثمن * بها و قیمت

بالغ اولدیغی و بعد الحول قبض ایددیگی حالده مقبوض . قرق
درهم اولور ایسه بر درهم زکات ویریلور و قرق درهمدن ناقص
ایسه عندالامام برشی لازم گملز . ایکنجیسی بدل مال تجارت و ثمن
سوائم گی اولیان مالک بدلی یعنی حوائج اصلیه دن اولان ماکولات
و مشروبات و ملبوسات و امثالی اثمانیه غله لری و ایجار ایدیلان
دار و عقارک اجر تلی مثللو شیلردن طولانی اولان الاجق .
دین وسط اولوب بونلردن قول اصحه گوره حول . مروریه
ایکی یوز درهم قبض ایدیلورسه بش درهم زکاتی ویریلوب
ناقص اولورسه ویرلمز * حین وراثتده حول و قوعی معتبر اولق
اوزره بر دینه وارث اولان کیمسه بوندن ایکی یوز درهم قبض
ایلدکه زکاتی اکا واجب اولورکه بوده دین وسطدندر *
اوچنجیسی میراث و وصیت گی اصلا برشیدن بدل اولیه رق
یا خود مهر و مخالعه و دم عمددن مصالحه و عاقله اوزرینه دیت
و کتابت مثللو مال اولیان شیلرک بدللری اوله رق
ثابت و حاصل اولان مطلوب . دین ضعیف اولوب بونلردن
ایکی یوز درهم قبض اولنور ایسه بعد الاخذ حولان حول شرطیه
بش درهم زکات ادا ایدیلور . امامین عندنده بدل کتابتدن
و عاقله اوزرینه بدل دیتدن ماعدا مطلقا دین مقبوضدن زکات
لازمدر **در مختار و ملتقى و مجمع الانهر** یعنی مشار الیهما به
گوره دین مطلقدن مقبوض اولان شیئک مقداری گرک قلیل
ویا کثیر اولسون سنین ماضیه ایچون زکاتی ویریلور * اما بدل
کتابت و دیت مثللو دین ناقصده نصاب مقداری قبض اولنوبده

حولان حول بولمزايسه زکات لازم گلمز ﴿ملتقى وجمع الانهر﴾ زکاتک اداسی انجق ادایه یاخود مقدار واجبی مالدن تفریق و اخراجہ مقارن اولان نیت ایله جائز اولدیغندن مثلاً ایکی یوز درهمدن بش درهم . زکات . نیتیه تفریق و اخراج ایدیلوب بعد مدّة بلانیة تصدّق اولنسه زکاتی ساقط اولور . مالک جمله سی تصدّق ایدیلوبده حولان حول موجود ایکن زکاته نیت اولنسه فرضیت زکات سقوط ایدر ﴿قدوری و منح﴾ اگر نصابک بعضی نیتسز تصدّق اولنسه مال باقی محل واجب اولدیغندن ادا اولنان بعض واجبده یعنی زکاتده متعین اولمدينی جهته امام ابی یوسف عندنده اول بعضک حصه سی ساقط اولمز . امام محمد گوره واجب . گله شایع اولدیغنه بناء بعضک حصه سی سقوط ایلر ﴿جمع الانهر﴾ بلانیة فقیره تصدّق اولنوب مال . ید فقیر دد قائم یعنی قبل الصرف فقیرک ملکنده موجود ایکن نیت ایدلسه کافی اولوب فقط مالک صرف و استهلاکندن صکره . نیت اولنسه کفایت ایلمز ﴿منح﴾ قول اصحه کوره ویریلان مالک زکات اولدیغنی فقیرک بیلمی شرط دگلدر * مثلاً هبه و یا قرض . نامیله ویریلوب زکات . نیت اولنسه اعتبار . دافعت نیتیه اولوب مدفوع الیهک علمنه اولمديغندن زکات مقامنه قائم اولور ﴿جمع الانهر﴾ نلاً عن البحر ﴿تجارت ایچون برکوله اشترا اولنوب بعده استخدام نیت ایدلسه تجارت جهتی باطل اوله جفندن اکثا زکات واجب اولمز . خدمت و استعمال ایچون نیت اولنان شی . بیع ایدلمدجه مجرد بر نیت سببیه تجارتیه تحویل ایتمز . زیرا تجارت . فعل

و عملدن عبارت اولدیغندن معامله جریان ایتدجه مجرد نیتیه اعتبار اولمز . نتم سفر . عملدن عبارت اولغله مجرد نیت ایله مقیم . مسافر اولمز . لکن اقامت . ترک عمل اولدیغندن نیتیه مسافر . مقیم اولور . کذلک میراث اولان شی دخی عمله مقارن اولمديجه مجرد نیت ایله تجارت ایچون عد ایدلمز ﴿ملتقى و غیره﴾ اگر مال مورونده وارثک تجارتیه نیتیه برابر تصرفی یعنی مال آخرله مبادله سی بولنور ايسه اولوقت بدلی مال تجارت عد ایدیلهرک بعد الحول زکات لازم اولور * کشینک ترلا سندن آلدیغنی حیوانات دخی بویه در . یعنی اون سنه انبارنده یالگزر بیع . نیتیه دورمش اولسه مجرد نیتیه مال تجارت صایلمیه جفندن زکات ویریلوب فقط تجارت نیتیه بیع ایلدکده بدلندن بعد تمام الحول زکات ایجاب ایدر * ذهب و فضه و سائمه گی بلانیة زکات واجب بولنان ماله وارث اولان کیمسه تجارتیه گرک نیت ایلسون گرک ایلمسون حولان حول شرطیه انک زکاتی ویرر ﴿در مختار و غیره﴾ هبه و یا وصیت و یا نکاح و یا مخالعه و یا صالح عن قصاص گی کندی قبولنه متوقف اسبیدن ناشی مالک اولنان مال ایچون تجارتیه نیت اولندقدده امام ابی یوسف عندنده مال تجارتدن اوله جفنه بناء زکات لازم کلور . لکن بوکثا مخالف اولان امام محمد حضر تیرینک رأی و قولی احدرکه بوده او مقوله مالک مال تجارتدن معدود اوله میه جفندن زکات ترتب ایتامسیدر ﴿در مختار و غیره﴾ والحاصل اشترا اولنان شیده حال شراده نیت تجارت بالا جماع صحیح و توارث ایدن شیده سبب ملک . اختیاری اولمديغنی و کندوده عقد . تحقق ایتدیگی جهته نیت

تجارت كذلك اجماعاً غير صحيح اولوب فقط تجارتہ نیتله برابر تصرف وقوعبولدقده نیت . عمله مقارن اوله جفندن شیء موروث ایچون بعد مرور الحول زکات ویریلور کما مر . قبول ایله تملک اولنان شیده نیت تجارت امام ابی یوسف عندنده صحیح و امام محمد گوره غیر صحیحدر . زیرا سبب ملک . امام محمد گوره شرابولمق لازم و امام ابی یوسف عندنده اختیاری اولمق کافیدر ﴿ابن عابدین﴾ استعماله مخصوص اولان ایجو ولعل ویا قوت وزمرد والماس وامثالی مجوهرات ایچون تجارتہ نیت ایدلمدکجه اتفاقاً زکات ویرلمز ﴿در مختار وغیره﴾

ایکسجی باب

سائمه بی تعریف ایدر

سائمه شول چارپا حیواندرکه ییالک اکثرنده صحرا و مرعاده لبی ویا نسلی یا خود سمنی (۱) ایچون رعی مباح ایله رعی اولنه . اگر نصف حولده ویا اکثرنده علف ویریلور ایسه سائمه اولمیوب علوفه (۲) عد اولنه جفندن بونک و اسامه (۳) اولنان حیوان . نسله مخصوص اولمیوبده یوک و بنمک گبی خدمتدرده قوللالملق ایچون ایسه انک زکاتلری واجب اولمز و اگر بیع و تجارت ایچون اسامه اولنورسه سائمه زکاتی لازم گلمیوب بلکه زکات تجارت ایجاب ایدر ﴿مجمع الانهر و قدوری﴾

(۱) سمن * سمیزلک (۲) علوفه * خانه ده بسلنان حیوان (۳) اسامه * حیوانی سائمه ایتمک

اوچنجی باب

زکات ابل بیاننده در

دوه نك نصابی بش رأس اولوب بوندن اقلده زکات واجب اولمز * گرک ارکک گرک دیشی دوه بش رأسه رسیده اولدقده جمله سی سائمه یعنی آلتی آیدن زیاده طشره ده راعیه اولمق و حولان حول بولمق شرطیله طقوز ابله بالغ اولنجیه قدر برشات متوسط ویرملک واجب اولور * اون ابل اولور ایسه اون درده دگین ایکی واون بشدن اون طقوزه دک اوچ و یگر میدن یگر می درده قدر درت شات و یگر می بشدن اوتوز بشه دگین بر بنت مخاض (۱) زکات اوله رق اعطا اولنور * اوتوز آلتی دوه اولور ایسه قرق بشه دک بر بنت لبون (۲) و قرق آلتی اولدقده آلتشه قدر بر حقه (۳) و آلتش بردن یتش بشه دک بر جذعه (۴) و یتش آلتی دن طقسانه دگین ایکی بنت لبون و طقسان بردن یوز یگر می به قدر ایکی حقه زکات ویریلور * یوز یگر مییدن صکره فریضة زکات . استیناف اولنوب یوز یگر می بشده ایکی حقه ایله بر شاة (۵) و یوز اوتوزده ایکی حقه وایکی شاة و یوز اوتوز بشده ایکی حقه و اوچ شاة

(۱) بنت مخاض * بریاشنی بتوروب ایکی یاشنه گیرمش دیشی دوه یاوروسی
(۲) بنت لبون * ایکی یاشنی تماملیوب اوچ یاشنه داخل اولمش دیشی دوه
یاوروسی (۳) حقه * درت یاشنه داخل اولان دیشی دوه (۴) جذعه * بوراده بش یاشنه گیرمش دیشی دوه مقصوددر (۵) شاة * ایکی یاشنی گچمش قیون

ارقه سیله بر شیشه دایانه رق نائم (۱) اولمق . و جنت و یابی هوش (۲)
و ایکی طرفه تمایل مرتبه سنده سکران حالارنده بولمق . و عاقل و بالغ
اوله رق ذات رکوع و سجود اولان صلاتده حال یقظانده بولندینی
و غسل آبدستی اولیه رق مستقلاً توضی ایلمش اولدینی حالد
برکسه غیر یسی استماع ایده جک قدر قهقهه ایله گولمک . و وجع
ایله قولاق و گوزدن ایرین چیقماق . دخی آبدستی بوزان شیردندر
(قدوری و درر) بالغ اولدقچه و حال یقظه ده بولندقچه و غسل
آبدستلو اولدقچه قهقهه ایله وضوء بوزلماز . وجع عین و ضعف
بصر سببیه چیقان گوز یا شیریده وضوئی نقض ایدر ایسه ده
بو حال مستمر و بردوام اولور ایسه صاحبی اهل عذر صاییلوره
ایره (۳) ایله رأس جرحه (۴) دن دم (۵) خارج اولوبده
برجانبه سیلان ایلمیه رک دورسه یا خود ایصیریلان شیده اثر دم .
ظهور ایتسه و یا بوروندن مرجک قدر دم جامد (۶) چیقارلسه
ناقض وضوء اولماز (درر و غیره) بلغم . مطلقاً ناقض وضوء دن
عد اولنماش ایسه ده امام ابی یوسف بلغم اگر جوفدن صاعد
اولور ایسه آبدستی نقض ایدر دیمشدر (ملتی) قان توکروکه
غالب و یا مساوی اوله رق اخر (۷) ایسه ناقضدر اگر قان
مغلوب اولوب اصفر (۸) ایسه ناقض دگلد (منح) حرته (۹)

(۱) نائم . او یویان (۲) بی هوش . بایلان (۳) ایره . ایگنه (۴) رأس
جرحه . یاره نک باشی (۵) دم . قان (۶) دم جامد . دونمش قان
(۷) آخر . قرمزی (۸) اصفر . صاری (۹) حرته . قرمزلیق

اقرب ایسه آبدستی بوزوب بیاضه اقرب (۱) ایسه نقض
ایتمه جکی و مساوی اولدینی حالد شدیداً اصفر ایسه احتیاطاً
توضی لازم کله جکی منیه ده محرردر . قائم و قاعد و راصع
و ساجدک نومی آبدستی بوزماز . لکن سجودده سنت وجهه
بطنی اصعاد (۲) و عضدینی (۳) ابعاد (۴) ایله مک شرط
اولدینی حلبی و غیره ده بیان ایدمشدر . برکسه قاعداً او یقویه
واروب تمایل ایلدیگی حالد دوشسه اگر حین سقوطنده (۵)
او یانور یا خود جنبی (۶) بریره اصابت ایتمکسزین و یا جنبی
یره اصابت ایدوب فقط محل قعوددن انفکاک (۷) ایلمکسزین
سقوط و قوعبولور ایسه آبدستی بوزلماز (در مختار و غیره)

ایکنجی باب

غسل بیاننده در

اَسْتَعِذُّ بِاللّٰهِ وَ اِنْ كُنْتُمْ جُنُبًا فَاطْهَرُوا ۖ الْاٰیةُ مَعْنٰی شَرِیْفِی
(ای معاشر مؤمنین اگر سز جنب اولور ایسه گز ماء طاهر
ایله وجود گزی کاملاً غسل ایلیه رک زیاده تطهر ایدیکز «دیمکدر»
غسلک فرضی مضمضه . استنشاق ایتک . جمیع بدنی یومق . دن

(۱) اقرب . زیاده یقین (۲) اصعاد . یوقاری طومتی (۳) عضد . بازو
(۴) ابعاد . اوزاق ایتک (۵) سقوط . دوشمک (۶) جنب . یان
(۷) انفکاک . آیرمق

بشنجی باب

زکات غنم بیانده در

قرق قیوندن اکسک اولور ایسه زکات یوقدر * غنم نصابی اولان قرق رأسه بالغ اولدقده سوم و حول شرطیله یوز یگریمی قیونه قدر بر قیون واجب اولور * یوز یگریمی بردن اعتباراً ایکی یوزه وارنجی ایکی شاة و ایکی یوز بردن درت یوزه دك اوج و درت یوزده درت شاة و یرلمك و درت یوزدن صکره هر یوزده بر شاة اعطا ایدلمك لازم گلور بوبابده قیون و کچی مساویدر (قدوری) (۱) دن ادناسی و جوب و اعطای زکاتده معتبرد گلدر (ملتی)

التنجی باب

زکات خیل بیانده در

گرك آيغر آت گرك قصر اق اولسون خیل سائمه ایچون زکات واجبدر * خیل سائمه نك نصابی علی قول بش واحد العیاضی به گوره اوج رأس اولدیغندن بونلردن اقلنه زکات لازم اولمدیغنی مجمع الفتاوی و خزانه ده محرر ایسه ده لکن اکثر معتبرانده بیان اولمدیغنی اوزره قول صحیحه گوره خیل ایچون نصاب یوقدر (جمع الانهر) رکوب و حمله مخصوص اولان فرسه دخی زکات واجب اولمز (ملتی) خیل * آت و قصر اق ایله مخلوط ایسه (۱) نی * بوراده بریاشنده قیون و کچی مقصوددر

صاحبی مخیردر * دیلر سه هر فرسدن بر دینار (۱) و استر سه بهاسنی تقویم ایدوب ایکی یوز درهمه بالغ اولور سه بش درهم اعطا ایدر * تناسل و نما بولمیدیغندن ناشی امام اعظم حضر تلردن ظاهر روایتده یالکز ارکک آتده و امامین عندنده ایسه مطلقاً فرسده زکات اولمدیغنی گبی تجارت ایچون محفوظ اولمیان بغل و حماره دخی اتفاقاً زکات و یرلمز (قدوری) خالص قصر اقدده عند الامام روایت مختلف اولوب مشهور و مصحح اولان عدم و جوب و ارجح بولنان و جوبدر (جمع الانهر نقلاً عن الفتح) فرس مخلوطده مفتی به اولدیغنی و جهله امامین قوی اوزرینه زکات واجب اولمیدیغندن اخذ ایچون اجبار اولنما مق اتفاقیدر (منح نقلاً عن الخانیة)

یدنجی باب

تفرعات زکاته دائر مسائل مخصوصه بی شاملدر

امام اعظم حضر تلیله امام محمد گوره ناقه و بقر و شاة یا ورولری ایچون ایچلرنده بیوکاری موجود اولدقجه زکات واجب اولمیوب فقط ایچلرنده بیوکاری بولندیغنی حالده زکات و یریلور (قدوری) حتی اوتوز طقوز قوزی و بر قیون اولسه بالاجماع بر شات متوسط و یرلمك لازم گلور اگر بعد الحول قیون هلاک اولسه عند الامامین (۱) دینار * مثقال مثللو یگریمی قیراط و درهم اون درت قیراط و قیراط بش شعیر متوسط اولوب شو حسابجه درهم شرعی یتمش و دینار یوزاربه مقداری ایسه ده بونلر هر بلده نك اوزانیله معتبردر (در مختار و طحاوی)

باقیدن زکات ساقط اولوب امام ابی یوسفه گوره قیونک قرق جزؤندن بر جزؤی ویرمک ایجاب ایدر ﴿جمع الانهر﴾ امام ابی یوسف نزدنده مذکوراتک بیوکاری برابر بولمنسه بیله ایچلرنده بر رأسی زکات ایچون ویریلور ﴿قدوری﴾ انالری آلتی آیدن صکره دوغروب هلاک اولور ایسه انالرینک حولی اولادده باقی اولدیغندن سنه تمامنده صغاردن برینی زکات اوله رق اعطا ایله مک امام ابی یوسفه گوره واجبدر ﴿منح﴾ بر کیمسه اوزرینه بر یاشنده اولان حیوانی زکات ایچون واجب اولوبده او یاشنده موجودی بولمنسه زکاتی اخذ ایدن ساعی اکابدل . اعلائی آلوب فضله قیمتی صاحبنه ردا یدر یاخود ادنائی اخذ ایدرک فضله قیمتی بشقه جه استیفا ایلر ﴿قدوری وملتق﴾ او یاشنده حیوانی موجود اولدقده اعلائی ووروب فضله سنی المق ویا ادنی مع الفضل ویرمک دخی جائزدر ﴿جمع الانهر﴾ مزکی . زکات حقنده واجب اولان حیوانی عیناً ویرمیوبده قیمتی بدلاً فقرا یه اعطا ایلسه جائزدر ﴿قدوری﴾ مزکی . دفع قیمت ویا دفع ادنی مع الفضل یاخود دفع اعلی مع استرداد الفضل بیننده مخیر اولدیغندن ساعی بویولده زکات قبولنه اجبار اولنور دینلمش ایسه ده قول صحیحجه گوره صورت ثالثه ده اجبار اولدیغندن ساعی دخی مخیردر وبعضلری طرفندن هر حالده خیار ﴿۱﴾ ساعیده در دینلمش و قدوری دخی بونک اوزرینه گیتمش ایسه ده قول اول مختاردر ﴿ملتق ودر مختار﴾ زکات وعشر وخراج وکفارت ونذر وصدقہ فطرده عین واجبی ویرمیوبده

(۱) خیار . مخیر اولق

قیمتی اعطا ایله مک جائزدر ﴿ملتق ودرر﴾ اثاره ارض ﴿۱﴾ وسقی زروع ﴿۲﴾ وحمل ائقال ضمتنده اعداد ﴿۳﴾ اولسان واکثر حوله ویا نصفنده علف ویریلهرک سائمه حالنده اولیان حیوانلر ایچون زکات ویرلمز . اخذ زکات . ایدن ساعی و محصل مالک اعلاسنی ویا ادناسنی تخصیص ایدرک برندن المیوب بلکه ﴿لَا تَأْخُذُوا مِنْ حَرَزَاتِ أَمْوَالِ النَّاسِ وَتَأْخُذُوا مِنْ حَوَائِشِ أَمْوَالِهِمْ﴾ حدیث شریفنده امر بیورلدینی وجهله بلا جبر . وسطنی اخذ واستحصا ایله مک ایجاب ایدر * حدیث شریفده کی ﴿حَرَزَاتِ﴾ حرزه نک جمعی اولوب خیار مال ﴿۴﴾ معناسنه در ﴿قدوری وملتق﴾ صاحب مال بلا وصیه وفات ایتسه ترکه سندن ساعی جبر ایدرک زکات اخذ ایده مز اگر وصیت ایلمش ایسه ثلثندن معتبردر ﴿تنویر وغرر﴾ بر مسلم انصابه مالک اولدینی حالده سنه تمام اولمزدن مقدم اصل مال جنسندن براز مالدها کسب ایتسه اصل ماله ضم ایله مجموعنک زکاتی ایفا ایدر . مثلاً اول حوله ایکی یوزدر همه مالک اولوب انای حوله یوزدر هم دها اکتساب ایلسه تمام حوله اوچ یوزدر همک زکاتی اولان یدی بچق درهمی اعطا ایلر ﴿قدوری و غیره﴾ بر حیوان تجارت ایچون اشترا اولنوب بعده اسامه ایدلسه اول حول . زمان سومدن اعتبار اولنور کذلک سائمه بی انای حوله ویا تمام حولدن برگون اول گرک جنسنه گرک خلاف جنسنه ویا نقده ویا عروضة

(۱) اثاره ارض * بری یاروب سورمک (۲) سقی زروع * اکیلان شیلری
صولامق (۳) اعداد * حاضرملق (۴) خیار مال * مالک خیرلوری

تبدیل ایله تجارت نیت ایدلسه اجناس مذکوره دن نصاب واریسه
جنسنه ضم اولنوب یوق ایسه اول حول . وقت استبدال دن معتبر
اولور ﴿تنویر و در مختار﴾ امام اعظم و امام ابی یوسف حضرت تلمیذینک
عندنده زکات . عفو ه نصابه تعلیق ایتموب نصابه تعلیق ایدر و امام محمد
گوره هم عفو ه همد نصابه تعلیق ایلمز . زکات واجب اولدق دن صکره
مال . کاملاً هلاک اولسه زکات ساقط اولور ﴿قدوری﴾ امامین
مشار الیهما چه زکات یالکیز نصابده واجب اولوب نصایین بیننده
بولنان مقداره تعلیق اولدیغندن هلاک اولان مال زائدک
حصه سی تنزیل ایدلمز . امام محمد و زفر عندلر ند قدر واجبک نصایین
بینلر ند کی عفو ه دخی تعلیق اولمغله زائد علی النصاب اولان مقدارک
حصه سی ساقط اولور . مثلاً بش ابدن طقوزه قدر اربعه زائده
هلاک اولسه قول اولده خمس گه شات کامله و قول ثانیده حساب .
معتبر اولدیغندن شاتک بش تسعی ویرلمک لازم گلور ﴿جوهره﴾
کذلک سکسان قیونک بعد الحول قرق هلاک اولسه امام اعظم
و امام ابی یوسف گوره شات کامله و امام محمد عندنده
نصف شات ویریلور ﴿ملتی﴾ نصابه مالک بولنان . زکاتی
قبل الحول یعنی سنه تمام اولمزدن اول اعطا ایتک جائز در
﴿قدوری﴾

سکزنجی باب

زکات فضه بیاننده در

ایکی یوز در همدن ناقص فضه ایچون بر شی لازم اولمیوب نصاب

اولان تام ایکی یوز درهم اوزرینه سنه کامله مرور ایدر ایسه بش
درهم زکات ویرلمک واجب اولور . امام اعظم حضرت تلمیذیه ایکی
یوز درهم اوزرینه قرق درهم قدر زائد اولان مقداره زکات
ویرلمیوب تام قرق درهم زیاده اولدقده بر درهم ویریلور . امامین
عندنده ایکی یوز در همدن هر نه مقدار زیاده اولور ایسه انک
حسابی وجهله زکاتی مطلقاً واجب اولوب مثلاً بش درهم زیاده
نمن درهم و اون درهم زیاده ربع و یگر می درهمه نصف . زکات اعطا
ایدیلور ﴿قدوری﴾ درهم شرعی وزن سبعة یعنی اون در همی
یدی مثقال ایله مقدور و ذهب و فضه ده وزن معتبر در . مثقال یگر می
قیراط و قیراط دخی آنفاذ کری سبق ایلدیگی وجهله بش شعیر مقدار ایدر
﴿ملتی و درر﴾ (عمر رضی الله عنه) حضرت تلمیذینک زمان
سعادتلر ند در اهمک نوعی مختلف اولوب بوندن بر طاقنک اون
در همی اون مثقال و دیگرینک اون در همی آتی مثقال و بر نوعنگده
اون در همی بش مثقال وزنلر ند ایکن اخذ و اعطاده صعوبت
و خصوصت ظهور ایتماک ایچون بین الاصحاب بعد المشاوره انواع ثلثه
محرره جمع ایله حاصل اولان یگر می بر مثقالک ثلثی بولنان یدی
مثقال اون درهم اولمق اوزره توحید ایدلمش و الیوم بویله معتبر
بولنشددر ﴿جمع الانهر﴾ درهم مغشوشده فضه غالب ایسه فضه
حکمنده و غشی غالب ایسه عروض حکمنده اولوب وزننه
باقامیه رقیق قیمتی اعتباریله ایکی یوز درهمه بالغ اولور سه ربع عشری
اولان بش درهم واجب اولور و زیاده ایسه قرق ده بر . حسابنه رعایت

اولنور * لکن بومثلو درهم مغشوش * اتمان رایجه دن اولمز سه زکاتی
نیت تجارت ایله مشروطدر ﴿قدوری وجوهرة﴾

طوقوزنجی باب

زکات ذهب بیاننده در

یگر می مثقالدن ناقص اولان ذهبه زکات اولمیوب نصاب اولان
تام یگر می مثقالده برسنه گذراننده نصف مثقال واجب اولور *
امام اعظم حضر تهرینه گوره یگر می مثقال اوزرینه تام درت
مثقال زائد اولدقده هر درت مثقالده اون شعیره مساوی اولان
ایکی قیراط ویریلور ودرتدن ناقص اولان مقدارده زکات ویرلمز *
امامین عندنده یگر می مثقالدن یگر می درده وارنجه آرده هرنه
مقدار زیاده ایسه بونک ایچون قرقدہ بر * حسابی اعتبار اولنور *
غیر مسکوک ذهب وفضه کلچه سنه وانلردن معمول ومصنوع
حلیات (۱) و اوانیده (۲) حکم سابق وجهله یاوزنا ویا قیمة
زکات ویریلور ﴿قدوری﴾ بونلردن خالصی غالب اولان خالص
حکمنده اولوب هر حالده وزنا زکاتی لازمدر مثلاً ایکی یوزدرهم
وزننده و اوچ یوزدرهم قیمتندہ اولان برسم ابریق ایچون ابریقک
عیارینه مساوی بش درهم گموش زکات ویریاور و اگر آلتون گبی
خلاف جنسندن ویریله جک اولور ایسه بالاتفاق قیمتی اعتبار یله یدی
(۱) حلیات * زینته متعلق شیلر (۲) اوانی * آینه وشمعدان ولکن
وابریق وامثالی طاقلر

بیچق درهم قیمتندہ التون اعطا ایدیلور * اگر بونلرک غشی
غالب ایسه عروض * حکمنده اولوب وزننه اعتبار اولنیه رق
انجق قیمتندہ نظراً زکات ایجاب ایلر * شو حالده بونلرده عروض
گبی نیت تجارت ویا اتمان رایجه دن اولمق شرطدر * بویله اولمز
ایسه زکات لازم اولماز * لکن درهم مغشوشده نصاب مقداری
خالص بولنور سه یالکز انک زکاتی ویریلور * غشی * مساوی
اولدینی تقدیرده ذهب وفضه گبی وزنا زکاتک وجوب وعدمندہ
اختلاف اولنمش ایسه ده احتیاطاً وجوبی خانیة و خلاصه ده
اختیار اولمشدر * بو تقدیرجه بعضاری عندنده تام وبرقوله
گوره نصف * زکات واجب اولور وعلی قول وزنا ایتای زکاة
واجب اولمیوب عروض مثللو نیت تجارت شرطیله قیمة ادا
لازمدر ﴿درر وملتق ودر مختار﴾

اوننجی باب

زکات عروض بیاننده در

عروض رانک فتحیله و سکونیه ده عرضک جمعی اولوب
بوراده دنایر ودرهمک غیری اموال معناسنه در * ذهب
وفضه دن غیری عروض ایله معتبر اولان اموال نه جنس ونه نوع
اولور ایسه اولسون تجارت نیتیه حفظ اولنوبده قیمتی فضه
وذهب دن نصابه بالغ اولدینی حالده فقرا و مساکینه انفع اولان
دینار ویا درهم ایله تقویم (۱) ایدیلرک زکات واجبه سی اعطا

(۱) تقویم * قیمت تقدیر ایتک

اولنور ﴿در مختار و قدوری﴾ بونلردن بریله تقویم حالده نصاب ایله خمس نصابه و دیگر یله تقویم اولندقدن آندن اقله بالغ اولورسه فقرایه انفع اولان ایله تقدیر قیمت ایدیلور مثلا دراهمه تقویم اولنسه رق قیمتی ایکی یوز قرق درهمه رسیده و دنانیر ایله تقویمده یگریمی اوچ مثقاله بالغ اولسه دراهمه نظراً آلتی درهم و دنانیره گوره قیمتی بش درهم اولان نصف مثقال واجب اولوب حالبوکه آلتی درهم نصف مثقالدن بر درهم زیاده اولدیغندن فقرا ایچون درهم ایله قیمت تقدیری انفع اولور ﴿در مختار و طحطاوی﴾ امام اعظم حضرت تارنجیه یوم حوله بولنان قیمت و امامین عندنده حین اداده اولان قیمت معتبردر ﴿جوهره﴾ سنه کامله نك اولنده و آخرنده نصاب کامل . حاصل اولسه مابین سنه ده اولان نقصان نصاب . زکات مفروضه بی اسقاط ایتمز . امام زفر عندنده جمیع سنه ده نصاب کامل اولمز ایسه زکات . لازم گلمز ﴿قدوری و جوهره﴾ اثنای حوله جمیع نصاب . زائل اولسه طرفینده نصاب کامل بولنسه بیله زکات . ساقط اولور ﴿درر﴾ اثنای حوله نصابه . دین مستغرق عارض اولوب آخر حوله نصابك غیر یسندن ایفای دینه کافی ماله مالک اولنسه زوال نصاب عد ایدلیه جگندن وجوب زکاتی اسقاط ایتمز ﴿در مختار و ابن عابدین﴾ تجارت معروض عروضك قیمتی امام اعظم حضرت تلری نزدنده ذهب و فضه یه ضم اولنسه رق نصاب کامل . حاصل اولدقدن زکات واجب اولور ﴿قدوری و غیره﴾ مثلاً یوز درهم قیمتند تجارت ایچون آلمش بغدادی

ویوز درهم قیمتند التون بولنسه بری برینه ضم اولنسه رق زکات ویریلور * اما عند الامامین تقدیر تقویم اولنمیوب انحق عرضه قیمت تقدیر اولن جفندن صورت مذکوره ده برشی ایجاب ایتمز ﴿ملتقى و در مختار﴾ امام اعظم حضرت تلرینه گوره ذهب و فضه نك هر بری نصابه بالغ اولمزسه قیمتی ایله بر برینه وجوباً ضمه نصابه ابلاغ اولنهرق زکات ویریلور . كذلك هر بری نصابه بالغ ایکن یا لکز برندن ادای زکاة اولنقی استیلهرک ضم ایدلسه عند الامامینه قیمتی ایله ضم اولنور . امامین عندنده ذهب فضه یه قیمتی حسابیله ضم اولنمیوب انحق اجزاسی ایله ضم ایدیلور . مثلاً یوز درهم و یوز درهم ایله مقوم بش دینارده امام اعظم حضرت تارنجیه زکات ویریلوره و اجزا یعنی نصف و ربع و ثلث ایله نصاب کامل . حاصل اولدیغندن ناشی امامینه گوره زکات واجب اولمز . بر مسلمك یوز درهمی و قیمتی یوز درهمدن اقل اون دیناری اولسه امام اعظم حضرت تارنجیه زکات لازم دگلسه ده امامین عندنده واجب اولور . كذلك بر مسلمك یوز درهمی و یوز قرق درهم قیمتلو اون عدد دیناری اولسه امام مشار الیهه گوره آلتی و امامین نزدنده ایکی نصف بر نصاب اولغله بش درهم زکات ویرمك لازم گلور . اجزا اعتباری شویله در فرضا برندن اوچ ربع و برندن ربع نصاب و یا برندن ثلث و برندن ثلثان و یا هر برندن نصف اولسه هر بر جزؤدن حسابیله اخراج اولنور ﴿قدوری و در مختار و غیرها﴾

اون برنجی باب

زکات زروع (۱) وثمار (۲) بیانده در

امام اعظم حضر تهرینه گوره اراضی عشریه نك اخراج ایندیگی شیئ قلیل و کثیرندن تخم و عمله و حیوان و سائر مصارف لازمه سی تنزیل اولمقسنزین و نصاب و بقای حول . شرطی اولمقسنزین مجموعندن اوندی بر حسابی اوزره عشر ویرمک واجبدر . ارضدن چیقان شی . ماء مطر و آب نهر ایله سقی اولمقنده مساویدر . قصب سکر (۳) ایله دوا ایچون مستعمل برنوع قامشدن عبارت اولان قصب ذریره ده دخی عشر واجبدر . حطب و قصب فارسی یعنی قلم قامشدن و زنبیل یایدقاری خرما دالی و پیراغی ایله زراعتیه نمای ارض مقصود اولیان قیرلردن طویلانیلان حشیشدن عشر النمازه اما ارض . اغا حلق و قامشلق و او تلاق اتخاذایدیلورسه عشر لازمدر . قدوری و مجمع الانهر . امامین عندنده تمر (۴) و غناب (۵) و رمان (۶) و غناب و تین (۷) و حنطه و شعیرگی انجق کندوسیچون بقا یعنی بلا معالجه کثیره برسنه ادخار (۸) ممکن اولوب بعد التجفیف (۹) بش و سقه بالغ اوله جق محصولاته کذلک عشر واجب اولور . هر و سق . نبی علیه الصلاة والسلام

(۱) زروع * بره اکیلان شیر (۲) ثمار * میوه لر (۳) قصب سکر . شکر قامشی (۴) تمر * خرما (۵) غناب * اوزوم (۶) رمان . نار (۷) تین * اینجیر (۸) ادخار * بریکدیرمک (۹) بعد التجفیف * قوریدلدقدنصکره

صاعیه آلتش صاعدرکه هر صاع سکر رطل و هر رطل یوز اوتوز درهم اولمغله بیك قرق درهمه بالغ اولور بوتقدیرجه بروسق التمش ایکی بیك درت یوزدرهم ایدر . دلو عظیم و بقر یاخود ابل واسب و استر واسطه لریله اداره اولنان دولابه سقی ایدیلان ثمار و زروعده مصارف لازمه سنی اخراجدن مقدم اختلاف قولین اوزره نصف عشر واجب اولوب امام اعظم حضر تهرنجیه بلا نصاب و بلا بقای حول و امامین عندنده بشرط النصاب والبقاء . اعتبار اولنور * زعفران و قطن (۱) و سکرگی کیل اولنیمان شیئ قیمتی مکیلاتک (۲) الی ادناسندن بش و سق قیمته بالغ اولورسه امام ابی یوسفه گوره عشر لازم اولور . امام محمد نزدنده اوشیئک اخذ و اعطاجه اعتبار اولنان مقیاساتک الی بیوکنک بش مثله رسیده اولورسه عشر ویریلور . بناء علیه قطنده بش حمل یعنی یوک و زعفرانده بش من (۳) اعتبار ایدیلورکه هر حمل . من عراقی ایله اوچ یوزمن و هر من . ایکی رطل عراقی و هر رطل . یوز اوتوزدرهمدر . امام اعظم حضر تهرنجیه قلیل و کثیره شامل اولمق اوزره جبل و ارض عشریه دن اخذ اولنان ترنجبین (۴) و عسلده دخی عشر واجبدر . امام ابی یوسف عندنده اون ازقاقه بالغ اولنجیه قدر بونلر ایچون برشی احباب ایتمز * برزق (۵) الی مندرکه ازقاقک مجموعی بش یوزمن ایدر . امام

(۱) قطن * پموق (۲) مکیلات * کیه ایله اولجیلان شیر (۳) من * بطنان (۴) ترنجبین * قدرت حلواسی (۵) زق * طلوم

محمد کوره بش آفراقه رسیده اولور ایسه زکاتی لازمدر . هر فرق
 (۱) اوتوز آلتی رطل عراقیدن و هر رطل . یوز اوتوز در همدن
 عبارتدر * جوز و لوز (۲) و بصل (۳) و ثومدن (۴) نازه ایکن
 قول صحیحده عشر النمز (جوهره) لکن برسنه قالور و کندوسندن
 انتفاع اولنور ایسه عشر اخذ ایدیلور (فتوای علی افندی) مرعاده
 بیتمش و بیچامش اوتدن و خرمن و یا بشقه برالت واسطه سیله حاصل
 اولمش صاندن عشر النمز (نتیجه و بهیجه) زرع اولنان کتاتک کتندن
 و تخمندن و مزروع حشیش و سیسام و مصردن و پلامود محصولدن
 و قدیمآوزومندن عشر آلتان باغه زرع ایدیلان صوغان و صر مساقدن
 عشر آلتور (بهیجه) محصولدن عشر آلتان کلان ارض . مؤخرآ
 مشجره (۵) اتخاذ اولنوبده بهر سنه حاصل اولان اشجاری بیع
 ایدلسه آدن عشر اخذ اولنور * یری بشقه و کرومی بشقه وقف
 اولان باغک برسنه محصولنه آفات اصابت ایدوبده برشی حاصل
 اولسه بوندن و منزل حولیلرندن النان محصولدن عشر استیفا
 اولنمز (نتیجه) عشر . امام اعظم حضر تکر نجه ائمارک ظهوری و امام
 ابی یوسفه گوره ادراکی و امام محمد عندیده استحکامی یعنی
 کاله واصل اولدینی زمانلرده اخذ اولنور و ثمره خلاف
 بعد الظهور قبل الادراک و یا بعد الادراک قبل الاستحکام
 اکل و یا اطعام ایله اتلاف اولنقدده ضمانتک وجوب و عدم
 وجوبنده در . صاحب ارضه عشری ادا اولنمقسزین محصولی ملک
 حلال اولمدیغندن شاید اکل ایدیلور سه اضمین اولنور (مجمع الانهر)
 (۱) فرق * برنوع اولچی (۲) لوز * بادم (۳) بصل * صوغان
 (۴) ثوم * صار مساق (۵) مشجره * اغا جلق

اون ایکنجی باب

مصرف زکات بیاننده در

عشر و زکاتک کیملره دفع و اعطاسی جائز اولدیغنه دائر مسائل
 مخصوصه در * استعیذ بالله اما الصدقات للفقراء والمساكين
 الی آخر الآیه ذکر و بیان بیوریلان اصناف ثمانیه دن مؤلفه
 قلوب . مؤخرآ استئنا واسقاط اولندقلرندن بونلردن ماعدا عشر
 و زکات . نصابدن ناقص . ادنی شیئه مالک اولان فقیره و یا برشیئه
 مالک اولمیان مسکینه . و یافک رقبه سنه (۱) اعانه ایچون افندیسی
 هاشمی اولماق شرطیله ولوغنی اولسون دیگرینک مکاتبه . و یا
 دین و قوت (۲) شهریه سندن فاضل نصابه مالک اولمیان مدیونه .
 یا خود یولدن قلمش فقرای غزاته . و یا مملکتنده مالی وار ایسه ده
 بولندیغنی محله برشیئی اولمیان ابن سیله . و یا ولوغنی اولسون
 عملی مقدارده یعنی کندویه و عونیه سنه کفایت ایده جک و تحصیل
 ایتدیگی مالک نصفی تجاوز ایتیه جک در جده عامله توزیع و اعطا
 اولنوره صنوف سبعة محرره دن هر برینه اعطا و یا صنف واحد دن
 بر شخصه اقتصار عند الحنفیه جائزدر (قدوری و غیره)
 (عامل . فی زماننا معشر و تحصیلدار دینیان کیملر اولوب جانب
 دولتن بونلر معاش ایله توظیف و استخدام اولنقدده در) ابن
 سبیلک قدر حاجتدن زیاده زکات المسی جائز دگلسده فقیره جواز
 (۱) فک رقبه * آزاد اولق (۲) قوت * آرق

وازدره امام محمد عندنده آیت مذکور دهده کی **﴿﴾** فی سبیل الله **﴿﴾** ایله مقصده منقطع الحاج اولوب حج یولنده مالی ضایع وتلف اولان فقرا دخی اولمق اعتبارینه گوره انلره دهده زکات ایله اعانه اولنوره منقطع الغزاة ایله منقطع الحاجك مملکتنده مالی یوق ایسه فقیرده واگر وار ایسه ابن سیلده داخل اوله جغندن بشقه جه ذکر ی تکرار اولمز می سؤالنه بونلر هر نقدر فقیر ایسه لرده **﴿﴾** انقطاع فی عبادة الله **﴿﴾** قیدیله فقیر مطلقه مغایر اولدقلرندن آیر یجه بیان اولنمشدر جوابی ویریلور **﴿﴾** اشبو اختلاف انحق تفسیر آیتده اولوب حکمده اولدیغندن ایکسینه دخی اتفاقاً بشرط الفقر اعطای زکاة جائزدر **﴿﴾** ثمره خلاف **﴿﴾** فی سبیل الله **﴿﴾** دیهرک واقع اولان وصیت ونذر ووقفده ظاهردرکه امام ابی یوسف عندنده منقطع الغزاة و امام محمد نزدنده منقطع الحاجه صرف ودفع اولنوره تفسیر آیتده بعضاری طلبه علمی و بعض آخر مطلقاً طاعات و خیراته ساعی اولان فقیری مراد ایتمشدر **﴿﴾** جوهره ودر مختار و غیرها **﴿﴾** مکاتب **﴿﴾** هاشمی مملوکی ایسه زکات اعطاسی تجویز اولنماشدر **﴿﴾** غیر هاشمی اولان کیمسه نك مکاتبی بدل کتابتدن عاجز اولورسه قبل العجز اخذ ایتدیگی زکات **﴿﴾** غنی اولان افندیسنه حلالدر **﴿﴾** منح **﴿﴾** غنی به و ذمی به ایفای زکاة جائز اولمز و زکاتده تمليك **﴿﴾** شرط اولدیغندن انکله مسجد بنا و میت تکفین و لاجل العتق رقبه اشترا اولمز **﴿﴾** قدوری **﴿﴾** مزکی زکاتی فقیره اعطا ایلمکله برابر ذمی به و یرمگی یاخود انکله مسجد و جسر بنا و میت تکفین ایلمگی امر ایله

جائزدره علی طریق التملیک اولیان حج و جهاد و حفر انهار **﴿﴾** (۱) و اصلاح طرق و تطهیر آبار **﴿﴾** (۲) دهده دخی حکم بویله در **﴿﴾** منح **﴿﴾** مزکی طرفندن بر فقیر مدیونك دینی آنك امری اولمقسزین قضا ایلسه زکات **﴿﴾** عد اولنه میه جغندن تبرع صاییلور **﴿﴾** فقیر مدیونك امریله قضای دین اولنورسه زکات **﴿﴾** نیبیله جائز اولور **﴿﴾** مال زکات ایله مزکی اشترا ی عبد ایدرك اعتاق ایلسه زکات یرینه قائم اولمز **﴿﴾** (درر) زکات و یرن شخص زکاتی باباسنه وجدینه و یره مز و ان علا **﴿﴾** و ولدینه و ولدینك ولدینه اعطا ایتمز و ان سفل **﴿﴾** و اناسنه وجده سنه دخی و یره مز و ان عات **﴿﴾** و زوجه سنه دخی و لومبانه **﴿﴾** (۳) اولسون بالاتفاق آیتای زکاة ایلمز **﴿﴾** كذلك زوجه نك زوج فقیرینه زکات و یرمسی اشتراك منافعدن ناشی عند الامام جائز دگلدر **﴿﴾** مزکی کندی مکاتبنه و مملو کنه و غنی نك غلام و جاریه سنه و ولد صغیرینه زکات و یره مز **﴿﴾** غنی نك ولد کیری و باباسی و امراه سی و غنیه نك ولد صغیری فقیر ایسه لر انلره زکات و یریلور **﴿﴾** قدوری و غیره **﴿﴾** زوج زوجه مطلقه سنه عدتی ایچنده اعطای زکات ایده مز **﴿﴾** زید او غلنك فقیره زوجه سنه زکات و یره مز جائزدر **﴿﴾** بهجة **﴿﴾** کندی مدبر و ام ولدینه و غنی نك مدبر و ام ولدینه دخی زکات و یرمز فقط غنی نك مکاتبنه و عند الامام مأذون و مستغرق دیون اولان کوله سنه ایتا ایدیلور **﴿﴾** جوهره **﴿﴾** (۱) انهار **﴿﴾** ایرمقلر **﴿﴾** (۲) آبار **﴿﴾** قویولر **﴿﴾** (۳) مبانه **﴿﴾** عقد جدیده احتیاج وجهله مطلقه اولان قادین

و در مختار ﴿ شريك فقير . عبد مشترکده اولان حصه سنی اعتاق
ایسه شريك غنی عبد مذکورہ و یا کنديک معق البعض اولان
کوله سنه زکاتی و یرمک امام اعظم حضرت تلرنجه جائز دگلدر زیرا
بونلرامام مشار الیه گورہ مکاتب . حکمنده درلر * اما امامین عندندہ
اول عبد . حر مدیون . عد اولمغله شريك غنی زکاتی اگا اعطایتمک
جائز اولور ﴿ درر و غیرہ ﴾ حضرت علی و عباس و جعفر و عقیل و حارث
ابن عبد المطلب (رضی الله عنهم) ک آ ل و اولادندن عبارت اولان
بنی هاشمه و بونلرک غلام و جاریہ لرینه زکات و یرلمز ﴿ قدوری ﴾
بنی هاشمک یکدیگرینه زکات اعطاسی جائز اولدینی جوهرہ دہ مصرح
ولکن نہر فائقده عدم جوازی مصحدر ﴿ در مختار ﴾ طحاوی .
شرح آثارده صدقاتک جمله سنی بنی هاشمه و یرمک جائز اولدینی امام
اعظم حضرت تلرندن روایہ ذکر ایدرک بو جوازی اخذ ایدرز
دیمشدر ﴿ مجمع الانهر ﴾ مزیکی مصرف زکات . ظن ایدوب بر رجله
زکاتی اعطادن صگرہ غنی و یا هاشمی یا خود دمی اولدینی ظاهر اولسه
یا خود وقت ظلمتده فقیر دیو و یردیگی شخص باباسی و یا اوغلی
اولدینی تبین ایلسہ امام اعظم و امام محمد حضرت تلرینه گورہ حین
اعطاده تحرری و اجتهاد ایدوب مصرف زکات اولمترینہ ظن غالبی
بولندیسہ اشتباه قبلہ دہ اولدینی مثللو خطاسی مفقود اولمغله اداسی
صحیح اولورہ بناء علیہ زکاتی اعادہ لازمکمز * امام ابی یوسف عندندہ
خطاسی یقیناً ظاهر اولدینغندہ اداسی صحیح اولمیه جغندن ماء نجس
ایله توضی اولدینی تبین ایلدکده صلاتی اعادہ لازم اولدینی گبی زکاتی
دخی اعادہ ایجاب ایدر * اگر بر شخصه زکاتی و یروبده بعدہ بونک

عبدی و یا مکاتبی اولدینی بیلسہ و یردیگی زکات کندي ملکندن
خروج ایتمدیگنه مبنی اتفاقاً جائز اولماز ﴿ قدوری و ملتق ﴾ مدبر
و ام ولد حقندہ دخی حکم بویله در ﴿ جوهرہ ﴾ فنی مالدن اولورسہ
اولسون نصابه مالک اولان شخصه زکات و یرلمز بر مسلم . نصابدن اقلہ
مالک اولسه صحیح الوجود و صاحب کسب بوانسہ بیله اگا زکات اعطا
اولور ﴿ قدوری ﴾ اخذ زکاتی مانع اولان نصاب . حواجی اصلیه دن
فاضل اولمق مقتضی ایسه دہ نمانسی اولمق لازم دگلدرہ حتی ایکی یوز
درهمه مساوی بر خانیه مالک اولوبده ایچنده ساکن اولمیان
کیمسہ نک زکات آلمسی جائز اولمز ﴿ جوهرہ ﴾ قول مختاره گورہ
یا لکنز برر نسخه اولمق اوزره مصحف شریف و تفسیر و حدیث
وفقه و اصول فقه و علم کلام و اخلاق و نحو و طب کتابلرینه مالک
وانلره اهل و ار باب اولان ذوات زکات اله بیلورلر * چونکہ
مذکور گنابلرک قیمت حقیقیہ لری هر مقدارہ بالغ اولور ایسه اولسون
صاحب لرینک حواجی اصلیه سندن معدود اولمغله غنی صایامزلر *
اما کتب مذکورہ دن غیری کتابلر و یا کتب مزبورہ نک برر
نسخه دن زیادہ سی اهلنه و کتب مذکورہ و سائرہ نا اهلنه حواجی
اصلیه دن اولمیوب نصابدن معدود اولمغله نیت تجارت اولمدجہ نما
بولندینی ایچون بونلره زکات لازم گلمز سده صاحبی نصابه مالک
وغنی عد اولندینغندن زکات آله ماز * اهل حرفتک آلات صناعیه سی
دخی کتب علم . قیلنددر ﴿ ابن عابدین نقلاً عن الفتح ﴾ زکاتی
بر بلده دن دیگر بلده یه نقل و ارسال ایله مک تنزهامکر و اولدینغه
بناء هر مالک زکاتی مزیکنک بولندینی مکانه تخصیص ایدلمیوب بلکه

مالك بولنديني بلده فقراسنه اجماعاً توزیع اولنور . مگر بلده اُخراده بولنان وزکات اعطاسی جائز اولان اقرباسنه ویا مالك بولنديني بلده اهايسندن دهازياده محتاج ویا اصلح ویا اورع یا خود مسلمينه انفع اولان قومه نقل وارسال ویا تمام حولدن اول اصال ایدیلورسه کراحت یوقدر ﴿قدوری ودر مختار﴾ اما صدقه فطرده امام محمده گوره معتبر اولان مؤدبک مکانی اولوب مؤدی عنھک محلی اولمديني وبوده . اصح و مفتی به بولنديني در مختارده محرر در زکات و فطره و نذرده افضل و اولی اولان اولاً اخوة (۱) و آخواته (۲) و انلرک اولادينه بعده اعمام (۳) و عمات (۴) و بونلرک اولادينه و صکره آخوال (۵) و خالاته (۶) و دها صکره ذوی الارحامه (۷) و جیرانه (۸) بعده اهل بلده به ترتیب و جهله ویرمکدر ﴿جوهره﴾ فقیره برگون کندوسنی سؤالدن اغنا ایده جک یعنی کندی ایله عیالک اقوات یومیه و سائر سنه کفایت ایله جک مقداری اعطای زکات . مندوب و مقدار نصابی دفعه تمليك مکر و هدر . اگر فقیر . مدیون اولوب قضای دیندن ویا صاحب عیال بولنوبده هر برینه تفریق اولندقدن صکره نصاب . حاصل اولمزسه

(۱) اخوة * ارکک قرنداشلر (۲) آخوات * قیز قرنداشلر (۳) اعمام * عموجهلر (۴) عمات * خالهلر (۵) آخوال * داییلر (۶) خالات * تیزهلر (۷) ذوی الارحام * اقربا (۸) چیران * قومشولر

کراحت بولمز ﴿تنویر﴾ طبه علومه و فقرای زهاد و صلاحیه زکات . ایتاسی اولی و عالم عامل فقیره جمله دن افضل و اعلی در ﴿در مختار﴾

اون اوچنجی باب

صدقه فطر بیاننده در

صدقه فطره قول صحیحه گوره وجوب موسع (۱) ایله حر مسلم اوزرینه واجبدر * قننی مالدن اولور ایسه مقدار نصابه مالك بولنمق و حوالج اصلیه اولان مسکن و ثیاب و متاع بیت و فرس و سلاح و خدمتده بولنان عبید مثللو شیلر فاضل اولمق شرطیه کندی نفسی و اغنیادن اولیان اولاد صغاری و مجنون ویا معتوه اولان فقیر . ولد کبیری و مستخدم اولان غلام و جاریه لری ایچون فطره اخراج و ادا ایدیلور . زوجہ سی و عاقل اولاد کباری عیالی داخلنده اولوبده نفقه و کسوه لری اعطا ایدلمکده ایسه بیله انلر ایچون کندی کیسه سندن فطره ویرلمک واجب اولمز ایسه ده فقط ولو بلا اذن اولسون تبرعاً ویریله بیلور . اگر عیالنده اولمز لرسه اذنلری اولمقسزین ویریله مز . عدم ولایتدن ناشی مکاتبک و مال واحدده اجتماع حقین لازم کلامک ایچون لاجل التجارة محفوظ اولان غلام و جاریه سنک فطره سی دخی اخراج و افا ایدلمز . شریکین بیننده مشترکاً مستخدم اولان برکوله نک صدقه فطری

(۱) موسع * وقت معین ایله موقت اولیان

شریکار دن هیچ برینه بالاجماع لازم کز **در** قدوری **مگر** مهائیه (۱) طریقله استخدام اولنه بوصور تده هانکیسنک نوبتنده ایکن . پیرام حلول ایدرسه بر قول ضعیفه گوره انک اوزرینه فطره سی واجب اولور **در** مختار **اما** عبید خدمت مشترکه نک فطره سی امام اعظم حضر تلرنجه هیچ برینه لازم کلیوب امامین عندنده هر برینه اصابت ایدن رؤس اعتباریله فطره لری واجب و فقط رأس واحدده اولان سهماری ایچون غیر لازمدر . مثلاً طقوز رأس عبده ایکی مسلم شریک اولسه لر هر برینه اصابت ایدن در در رأسک فطره سنی ادا ایدوب گورو قالان برراسک زکاتی بالمناصفه ویرمز لر **در** مختار و غیره **اما** امام اعظم و امام ابی یوسف حضر تلرینک قوللرنجه فطره ده عقل و بلوغ شرط اولمديغندن کندی ماللاری بولنان مجنون وصی ایچون ماللرندن فطره نک اداسی و لیلرینه واجب اولور . شاید و لیلری ویرمز لر ایسه افاقت و بلوغدن صکره اعطایتمک کندولرینه لازمدر **در** مختار **مدبر** و ام ولدک و بعدالعودة عبد آبقک فطره لرینی صاحبی ویرمک اقتضا ایدر **در** فطره ده نما و حولان حول شرط دگلدر . آنفا ذکر اولندیغنی وجهله فطره نک وجوبی زکات گبی موسع اولدیغندن اوقات عمر دن هر نه وقت ویریلور ایسه ادا اولمق صحیح و بر قولده مضیق یعنی وقتنده اداسی لازم اولغله یوم فطر دن صکره یه قالور ایسه قضا عد اولنور **تنویر** صدقه فطرک وجوبی حج گبی قدرت تمکنه ایله اولوب قدرت میسره شرط اولمديغندن بعدالوجوب هلاک مال ایله ساقط

(۱) مهائیه . برشی مشترکی بر وقت مخصوصده نوبته قوللانمق

اولزه اما زکات و عشرده قدرت میسره نک بقانی شرط اولدیغندن بعدالحول اصلک هلاکی تقدیرنده انلرده سقوط ایدر لر **تنویر** و در مختار معلوم اوله که عبده مأموره اولدیغنی شیئی ادایه کندی ایله تمکن حاصل اولان قدرت ایکی نوعدر . بری قدرتده اعتبار اولنان تمکنله برابر یسر . اعتبار اولنماز ایسه اکا تمکن مطلق یعنی قدرت تمکنه تسمیه اولنور که عبدک کندویه اداسی لازم اولان بدنی و یا مالی یا خود هر ایکسندن مرکب عبادته یسر . اعتبار اولنمق سزین تمکن و مقتدر اولمیدر . حجه زاد و راحله و صدقه فطرده نصاب گبی . دیگری قدرتده معتبر بولنان تمکنله برابر یسر . دخی اعتبار اولنور ایسه اکا تمکن کامل یعنی قدرت میسره تسمیه ایدیلور که مالدیه نما گبی **طحاوی** و غیره **واجب** اولان فطره بغدای و دقیق و سویقندن نصف صاع و خرما و قوری اوزوم و ارپه و دقیق و سویقندن برصاعدره خبز (۱) و ذره (۲) مثللو منصوص اولیان اشیاده قیمته اعتبار اولنور . برصاع امام اعظم حضر تلریله امام محمد عندنده رطل عراقی ایله سکر رطل و هر رطل یوز اوتوز درهم اولدیغندن مجموعی بیك قرق درهم ایدر . امام ابی یوسفه گوره برصاع یوز طقسان بش درهمدن عبارت اولان رطل مدنی ایله بش رطل و بونک ثلث اولغله بو اعتباره نظر آصاع واحدینه بیك قرق درهمه بالغ اولور . وجوب فطر . یوم فطر دن فجر ثانیسک طلوعنه تعلق

(۱) خبز . اکک (۲) ذره . داری

ایله شو تقدیرده طلوع فجر دن مقدم فوت و یا فقره اولان
مسلمک و طلوع فجر دن صکره اسلامه گلان و یا تولدایدن و یا غنایه
مالک اولان کیمسه نك فطره لری واجب اولمز ﴿قدوری و در مختار
و ابن عابدین﴾ امام اعظم حضر تله رینه گوره زیب (۳) حنطه مانندی
اولغله زبیدن نصف صاع و امامین عندنده و امام اعظم حضر تله رندن
دخی بر روایتده شعیرگی اولغله زبیدن تام . صاع واجب اولور
و علیه الفتوی (ملتی و در مختار) سعه ور خاواننده حنطه و سائر نك
قیمتی نقداً اعطا ايله مك مذهب مفتی به اوزره عینی ادادن افضل
و قحط و غلا زماننده عیناً و یرمك اولی در ﴿در مختار و غیره﴾
فطره نی یوم عیده جامع و مصلایه چیقمز دن اول اعطا ایتمک
مستحبدر . بیرام کونندن مقدم و یرمك دخی جائزدر . یوم
عید دن صکره یه تأخیر سببیه فطره ساقط اولیه جفندن هر قننی
و قتده و یریلور سه ادا و بر روایتده قضا اولور ایسه ده هر حالده
تأخیری تنزیهاً مکروه اولغله موجب اسائندر ﴿قدوری
و مجمع الانهر و ابن عابدین﴾ دخول رمضان شرطیه مشروط
اوله رق فطره نك تعجیل و تقدیمی جوهره و تنویر و ظهوریه ده
مفتی به اولقی اوزره تصریح اولنش ایسه ده انجق اکثر متون
و شروطده صحت تقدیمی شرط مذکورله مشروط اولدیغندن علی
الاطلاق اولسی ظاهر روایت و مذهبدر . زکاتی بر قاج کیمسه یه
تفریق . تجویز اولندیگی گی مذهب مختار اوزره بر مسلم کنندی
فطره سنی بر و یا بر قاج فقیره دفع و اعطا ایسه دخی جائزدر

(۳) زیب . قوری اوزوم

﴿در مختار﴾ بر جماعتك صدقه فطره لرینی بشقه بشقه تعیین
ایلد کدن صکره جمله سنی جمع ایدوب طوبدن بر فقیره و یرملرینه
جواز وارددر ﴿منح و تاتار خانیة﴾ لکن مثلاً درت فطره ایچون ایکی
صاع بغدادی اولچیلوب اعطاسی و یا قیمتی بولنان بتون بر مجیدیه نك
و یرلسی حقنده نقل صریح اولدیغندن احوط اولان اول
هر برینی آیر وجه افراز بعده بریره جمع ايله ایفا ايله مکدر ﴿ابن عابدین﴾



در دنجی کتاب

صوم بیانده در

برنجی باب

صومه متدائر مسائل مخصوصه در

استعید بالله و کتب علیکم الصیام و فمن شهد منکم الشهر فلیصمه الی آخرها آیتین جلیلتین حکمنجه و بی الاسلام علی خمس شهاده ان لا اله الا الله وان محمدا رسول الله واقام الصلوة و ایتاء الزکوة وصوم رمضان وحج البیت حدیث شریفی اقتضاسنجه صوم رمضان عاقل و بالغ اوله رق دار اسلامده بولنان و یا دار حربده بولوب ایکی کیمسه نک و یا واحد عدلک اخباریله صوم رمضانک و جوینی بیلان هر مسلم اوزرینه فرضدره فرضیتی کتاب و سنت و اجماع امت ایله نابتدره بناء علیه من صام رمضان ايمانا واحتسابا غفر له ما تقدم من ذنبه حدیث شریفی و امثالی دلاتیلله رمضان شریفده بلاقصور صائم اولان مسلم نائل مکافات عظیمه اوله جفی و ترک ایدن دنیا و عقباده هر صورتله مجازات شدید گوره جگی امر باهر اولدینی گئی حفظ الله تعالی

جاحدی (۱) دخی کافر اولور . آنفایان اولدینی وجهله صوم رمضانک اداسی و فعدة من ايام آخر نص جلیلی موجبنجه قضای فرض و استعید بالله ولیوفوا نذورهم و اوفوا بعهد الله اذا عاهدتم آیت شریفه سیله ثابت و اجماع امت دخی منعقد اولدینی اوزره صوم نذور و کفارات . واجب و بونلرک غیرینی نافله در ملتقى وغيره بوضورده صوم فرض و واجب و نفل اولمق اوزره اوچ نوعدره فرض و واجبدرن هربری ایکی قسم اولوب بری رمضان و نذر معین مثللو زمان معینه مخصوص اولان صومدرکه بونلره گيجهدن نیت اولنه جفی گئی شاید نیتسز صباحه داخل اولنورسه طلوع فجردن صکره صومه منافی برشی بولندینی حالده نحوه کبرایه (۲) قدر نیت ایدلمک دخی جائدره دیگرى قضای صوم رمضان و نذر مطلق و کفارات مانندی ذمتده ثابت بولنان صوم اولوب صوم رمضان و نذر معین گئی مقرر و مخصوص و قتلری اولمدیغندن استییلان گونلرده طوتیلور و بونلره گيجهدن نیت اولنوب طلوع فجردن صکره یه تأخیر ایدلمامک لازم گلور . صوم نافله نک جمله سی قبل الزوال اولان نیت ایله صحیح اولور قدوری و ملتقى صوم . شرعه استعید بالله کلوا و اشربوا حتى یبین لکم الخیط الابيض من الخیط الاسود من الفجر آیت منیفه سی موجبنجه فجر (۱) جاحد . انکار ایدن (۲) نحوه کبری قبا قوشلق

صادقین ابتدای واستعید بالله ﴿ثُمَّ أَتَمُّوا الصِّيَامَ إِلَى اللَّيْلِ﴾
 آیت شریفه سی منظوم فیه وقت غروب حتی به دگین انتهای
 معتبر اولمق اوزره نیت ایله مَفْطَرَات ثلثه دن امساک یعنی اکل
 و شرب و جماعی ترک ایتمکدر . صومک اوج نوع . شرطی اولوب
 بری و جوبنک شرطیکه اسلام و عقل و بلوغدن و دیگری و جوب
 ادانک شرطیکه صحت و اقامت ایله حیض و نفاس حاللرندن طهارتدن
 و بری دخی صحت ادانک شرطیکه اسلام و نیت ایله کذلک حیض
 و نفاسدن طهارتدن عبارتدر . سبب و جوبی صوم مندورده نذر
 و صوم کفاراتده اسبابی اولان حنث (۱) و قتل و افطار و صوم رمضانده
 علی قول گرک لیلاً گرک نهاراً شهر رمضانک بر جزونه شهود
 و حضوردر و دیگر قوله گوره هرگونک جزو اولیدر بناء علیه
 مجنون اولان مسلم لیالی رمضانک برنده و یا بعد الزوال نهارنده
 افاقت بولوبده یومک جزو اولی اولان طلوع فجر ایله نخوة کبری
 بیننده دوام جنتله اصلاً افاقت بولمدیغی حالده شهر رمضانی اصرار
 ایلسه و بعد العید کاملاً افاقت بولسه قول اوله گوره سبب و جوب .
 تحقق ایتمگله مجموع رمضانی قضا لازم گلور قول ثانی به نظراً سبب
 و جوب . متحقق اولمدیغندن قضا ایجاب ایتمز . قول ثانی به (مصحح
 و مفتی به) دینلدیگی گبی قول اوله دخی (مصحح و ظاهر روایت
 و معتمد) دینلمشدر . صاحب هدایه قولین بیننی جمع ایدرک هم

(۱) حنث . ایدیلان یمینده دورماق

جزو شهره شهودی همدک کل یومی سبب و جوب عد ایله جزو
 شهره شهود . مجموع صوم شهرک و هرگون دخی گندی صومنک
 سبب و جوبی اولور دیمشدر . بوتقدیرجه مجنون مذکوره تماماً
 قضا اقتضا ایله من ﴿در مختار و ابن عابدین﴾ عید فطرک برنجی
 گونده و عید اضحانک برندن بدأ ایله دردنجی گونه قدر ایام
 اربعه ده صوم . تحریماً و یهوده تشبهدن (۱) احترازاً یالکزیوم
 عاشورا و سبت ده (۲) و فرسک بیرام گونلرینه رعایت شائبه سندن
 اجتناباً نوروز و مهر جانده اورج تنزیهاً مکر و هدر . صوم صمت که
 حال صیامده مجوسی گبی اصلاً تکلم ایتیه رک سکوت تام ایله اخشامه
 ایرمک . و صوم وصال که علی قول ایکی گونه بر افطار ایتمک
 و علی قول تکمیل سنه بی ایام منهیه سیله برابر صائم اولمق دخی
 تنزیهاً مکر و اولوب اگر ایام منهیه ده افطار ایدرسه بعض فقها
 کراهت یوقدر دیمشدر ایسه ده امام ابی یوسفه گوزه سائر فرائض
 و واجباتی ایفایه و کسب نفقه به ضعف و فتوری موجب اولمغله بوسورت
 دخی کراهت تنزیهیه مقرر و ندر ﴿در مختار و غیره﴾ محرم الحرامک
 طقوزنجی و یا اونبرنجی گونیه برابر یوم عاشوراده و عرفه عید
 اضحاده حاجک غیر یسنه مطلقاً و ضعف و یرمامک شرطیه عرفتده
 و عند الاکثر یالکزیوم جمعه ده اورج طوتمق مستحب و ایام بیض که
 هرماهک اون اوج و اون درت و اون بشنجی گونلریدر بونلرده
 صائم و صوم داود یعنی برگون امساک و برگون افطار ایدرک

(۱) تشبه . برشیته بکرتمک (۲) سبت . جمعه ایرتسی

صومه مداوم اولق مندوبدر ﴿منح ودر مختار﴾ ﴿من صام﴾
 رَمَضَانَ فَاتَّبَعَهُ سِتًّا مِنْ شَوَّالٍ كَانَ كَمَنْ صَامَ سَنَةً ﴿حدیث﴾
 شریفی وجهله یوم فطری افطار ایدوب بعده متفرقا یاخود
 متابعاً (۱) شهر شوالده الی گون صائم اولق صوم رمضاندر صکره
 یک زیاده افضل واجب اولان اعمالدندر ﴿حلویات﴾
 تتابع وعدم تتابع اعتباریه صوم اون اوچ نوع اولوب بونلردن
 یدیی یعنی رمضان وکفارت ظهار وقتل ویمین وکفارت
 افطار رمضان ونذر معین واعتکاف واجب اور جاری متابعه در که
 آرده بعض گونلرده افطار وقوعبولقه سزین بلا فاصله صره سیله
 امساکی واجب اولنلردر ﴿در مختار﴾ بحر صاحبی صوم اعتکاف
 واجبی اسقاط و بدلنده ﴿وَاللّٰهُ لَا صُومَ رَجَبًا﴾ گبی
 صوم یمین معینی کندیسندہ تتابع لازم اولان صومدن عدایلدی
 و تتابع ذکر و نیت اولنان نذر مطلق دخی بوکنا ملحقدر دیدی
 ﴿ابن عابدین﴾ التیسی یعنی نافله وقضای رمضان وصوم متعه
 وقران وفدیة حلق وجزای صید ووقت معینله مقید اولمیان
 وکندیسندہ تتابع ذکر و یانیت اولنمیان نذر مطلق اور جاری
 غیر متتابع اولوب بونلری بربری آردنجه طوتوب طوتما مقده صائم
 بخیردر ﴿در مختار و ابن عابدین﴾ صاحب بحر ذکر اولنان صوم
 سته دن نفلی اخراج و مقابلنده ﴿وَاللّٰهُ لَا صُومَ شَهْرًا﴾ گبی

(۱) متابعاً * بربری آردنجه

صوم یمین مطلق تذکار ایلدی ﴿زین العابدین﴾ کندوسنده
 تتابع واجب اولان صیام سبعة دن رمضان ونذر معین وصوم
 معینه یمینده تتابع لاجل الوقت مأموریه اولمغله بونلردن برنده
 صائم برگون افطار ایدرسه اورجه یکیدن باشلامق لازم گلمز
 و باقیلرنده تتابع لاجل الوقت اولیوب بلکه لاجل الفعل یعنی
 نفس صوم ایچون مأموریه اولدینی جهته صائم بونلردن برنده
 برگون افطار ایلرسه صومه یکیدن باشلامق ایجاب ایدر
 ﴿ابن عابدین نقلاً عن البحر﴾ صوم متعه وقران تمتع
 وقران نیتله حج ایدن کمیسه نک ذبح ایده جک قربان بوله مدینی
 و قتده اوچ گون حجدن اول ویدی گون حجدن صکره وطننه رجوع
 ایتدیگی زمانده طوتومی لازم اولان اون گونه مخصوص اور جدر
 جزای صید وفدیة حلق دخی احرامده ایکن ایدیلا شکار
 و تراشه مقابل اختیار اولنان صومدر ﴿طحطاوی﴾
 صومده قلباً نیت ایتک یعنی قننی صومی طوته جفنی بیلمک لازم
 اولوب بونده سنت اولان گیجه دن نیت ایدیلا ورسه لسانیه
 ﴿نَوَيْتُ اَنْ اَصُومَ غَدًا مِنْ فَرَضِ رَمَضَانَ لِلّٰهِ تَعَالٰی﴾
 وگوندز نیت اولنورسه ﴿نَوَيْتُ اَنْ اَصُومَ هَذَا الْيَوْمَ مِنْ
 فَرَضِ رَمَضَانَ لِلّٰهِ تَعَالٰی﴾ دیمکدر نیتده (ان شاء الله) دیمک قیاساً
 نیتی مبطل ایسه ده استجسانا دگلدر ﴿جوهره﴾ ان شاء الله دیمکله
 نیت باطل اولمز زیرا مشیت (۱) انحق لفظی ابطال ایدر نیت ایسه

(۱) مشیت * دیله مک

فعل قلیبدر ﴿ابوالسعود﴾ گیکجه صومه نیت ایدلد کدن صکره
تکرار رجوع اولوب فطره نیت ایدلسه اولکی نیت باطل
اولور. حتی فطره نیتله صباحه داخل اولوب تکرار. صومه نیت
ایدلیه رک امساک اولنسه صائم عد اولمز * اما گوندز صائم ایکن
فطره نیت ایدلسه نیت. لغو اولوب برشی یا پلمدچه صومه خلل کلز
طاوع فجر دن صکره قضایه نیتله اورج طوتلسه قضا اولیوب نفل
اولمش اولور و شاید بو مقوله صوم افساد ایدیلورسه انی قضا
ایتمک لازم گلور ﴿در مختار وابن عابدین﴾ ائمه ثلثه حنفیه
عندنده ایام رمضانده هرگون ایچون گرک گیکجه دن گرک گوندز
قبل الزوال مستقل. نیت لازم اولوب امام زفرک دیدیگی گبی مجموع
شهر ایچون بر نیت کفایت ایتمز * ادای صوم رمضان ایله صوم
نذر معینده ﴿نویت ان اصوم﴾ صورتنده اولان مطلق
نیت ویا ﴿نویت ان اصوم للنفل﴾ گبی نیت نفل دخی
صحیحدره. مقیم صحیح ایچون واجب آخر نیتله اورج طوتمق جائز درمثلا
بر مؤمن صاغ و سالم اولدینی و مقیم بولندینی حالد رمضانده کفارت قتل
و ظهار گبی واجب آخره یا خود قضایه قالمش صوم رمضان
اولوبده اگنا نیت ایلسه بونیت. ایچنده بولندینی رمضانک اورجنی
ادا ایچون صحیح اولور. اما مریض و یا مسافر. واجب آخره نیت
ایلر ایسه امام اعظم حضر تدرنجبه نیت ایتدیگی شی. حاصل
وعند الامامین صوم رمضان دن واقع اولمش اولور ﴿ملقی و غیره﴾
﴿لا یصام الیوم الذی یشک فیہ انه من رمضان الا تطوعاً﴾
حدیث شریفی موجبجه یوم شکده انجق تطوعاً صائم اولقی بلا کراهه


جائز اولوب یوقسه یقیناً و یا شکاً. رمضان ایچون نیت ایدلمک مکروهدر
﴿ملقی و مجمع الانهر﴾ ابن عباس (رضی الله عنهما) دن مروی
اولان ﴿لا تقدموا رمضان بصوم یوم او یومین الا رجل کان
یصوم صوماً فلیصمه﴾ حدیث شریفی موجبجه یوم شکک
صومی مکروه اولدیغدن یوم شکده صائم اولان مسلمک صومی
صوم معتادی اولان یومه موافق اولدینی یعنی اثین (۱) و خیس (۲)
گونلرینی یا خود آیک آخری اولان اون گونی و یا بتون شهری
اورجلو گچورمک انک اعتیادی اولوبده یوم شک دخی ایام
معتاده سندن برینه تصادف ایتدیگی یا خود یقیناً جزم ایدرک
تطوعه نیت ایددیگی حالد کراهت یوقدر. اگر اصل نیتده
تردید ایله یارین رمضان ایسه صومه و رمضان دگلسه اورج
طوتممغه نیت ایدلسه صحیح اولمز. وصف نیتده تردد اولوبده
رمضان اولورسه رمضان دن و اولمزسه واجب آخر و یا نفل
دیو نیت ایدلدیگی صورتده مع الکراهه جائز اولوب رمضان.
ظهور ایدرسه رمضان دن و ظهور ایتمزسه نفلدن صایلور.
شاید بوصوم. افساد ایدیلور ایسه نفل غیر قصدی اولدیغدن
قضایه لازم گلمز ﴿ملقی و در مختار﴾ یوم شکده جزماً تطوعه
نیتدن عبارت اولان نیت معتبره بیامیان. عوامدن معدود
اولدیغدن بعد الزوال افطار ایدر. مسلمینه لایق و مناسب یعنی
وجوب کفایه ایله واجب اولان شعبانک یگرمی طقوزنجی گونی

غروب شمسی متعاقب هلال رمضان رؤیتنی التماس وانتظار
ایله مکدره رؤیت واقع اولور ایسه ایرتسی گونی صیام فرض
اولور شاید غمام (۱) احاطه ایدرک مانع رؤیت اولور ایسه
عدت شعبان تکمیل ثلاثین ایدیلهرک ایرتسی گونی اورج
طوتیلور بر مؤمن هلال رمضان یالکز گورسه وشهادت
ایدوبده حاکم طرفندن رد اولنسه کندوسنه صائم اولمق علی
قول واجب و دیگر قوله گوره مندوب اولدیغندن
شاید صائم اولمیوبده افطار ایدر ایسه بعده یالکز قضا
لازم گلوب کفارت ایجاب ایتمز اگر شهادتی طرف حاکم
رد اولمزدن اول یاخود عند الحاکم اصلاً شهادت ایتمیه رک
کندوسی صائم اولوبده بعده افطار ایلرسه بوباده هر نه قدر
اختلاف وار ایسه ده راجح اولان ینه عدم کفارتدر قدوری
وتنویر ثبوت هلالده اهل توقيتک قولى اعتباری جائز ومنجمه
کندی حسابیله عمل جائز دگلدرد در مختار ومعراج هلال
رمضان یالکز قاضی گورسه اشهاد یعنی طرفندن بر نائب نصب
ایدوب انک نزدنده ادای شهادتله ناسه صوم ایله امریننده مخیردر
هلال شوالی منفرداً رؤیت ایدن قاضی وغیرسی تکمیل ثلاثین
ایدلدجه سرّاً وجهراً افطار ایتمزلر بر قوله یقیناً گورسه لر
بیله افطاری اظهار ایلمیوب بلکه اخفا ایدر لر جهره
جانب سماده غیم (۲) وغبار ودخان گبی علت اولسه قضی رؤیت
هلالده واحد عدلک شهادتی قبول ایدر رجل و مرأه و عبد

(۱) غمام • بلوط (۲) غیم • بلوط

و حره شهادتده مساویدره آسمانده بر گونه علت اولمدیغی حالده قاضی
خبرلریله غلبه ظن حاصل اولان جمع کثیری گورمدجه واحد عدلک
شهادتی قبول ایتمز قدوری جمع کثیر امام ابی یوسفدن
برروایتده الی قدر مسلمیندن عبارتدر دینلمش ایسه ده احق
اولان امام محمددن وبشقه جه کذلک امام ابی یوسفدن روایت
اولندیغی اوزره اعتباره مخبرلرک کذب اوزرینه اتقاقلری توهم
اولنیه جق مرتبه ده هر طرفدن خبرلر وارد اولمسنه در امام
اعظم حضر تلرندن روایت حسن اوزره سائر حقوق شهادتی
گبی ایکی عدلک شهادتیله اکتفا اولنور طحاوی عندنده خارج
بلده دن گلوب خبر و یرن یاخود مناره و جبال مثلاً مکان
مرتفعدن گوروب شهادت ایدن واحد عدلک اخباری کافیدر
ملتی و مجمع الانهر هلال شوال و ذی الحجه و سائرلری
انبأته ایکی حرک و یا بر حر ایله ایکی حره نک کندولرنده
عدل بولمق و لفظ (اشهد) ایراد قلنمق شرطیله بلا دعوی
شهادتلی قبول اولنور هلال رمضان انبأته نفس خبر
کافی اولدیغی جهته (اشهد) بی ایراد ایله مک شرط دگلدرد
صوم تلئیدن صکره هلال فطر رؤیت اولنسه سماده علت
بولنسون و یا بولنسون (هلال رمضان سماده علت بولندیغی
حالده شهادت عدلین و علت بولنیه رقی جمع کثیر ایله ثابت اولمش
ایسه و یا عدت شعبان تکمیل ثلاثین صورتیله صومه شروع
اولندیسه) فطر حلال اولور اگر هلال رمضان عدل واحدک

شهادتیه ثابت اولدیسسه فطر. عندالامامین حلال اولمز. امام محمد گوره رمضانده اولدینی گبی شوآلده دخی آسمانده علت بولنسه فطر. حلال اولور ﴿ملتقى وجمع الانهر و غیرها﴾ سماءه علت وار ایسه فطرک حلال اولدینی و علت بولنمدینی حالده حلال اولمدینی قول اشبه اوله رق زیلعیده بیان اولمشدر ﴿در مختار﴾ هلال رمضان. عدل واحدک شهادتیه ثابت اولدیسسه امام محمدن مروی اولدینی اوزره هلال شوآلده غیم بولنسه فطر. حلال اولدینی غایه البیانده تصحیح اولمشدر ﴿منح﴾ بر موضعه رؤیت هلال. ثابت اولسه انک حکمی جمیع ناسه لازم اولوب چونکه اختلاف مطالع. عند الحنفیه معتبر اولمدینی (مذهب و ظاهر روایت و مفتی به) اوله رق اکثر کتب معتبره ده مسطوردر ﴿ملتقى ودر مختار و غیرها﴾ اما حج و اضحیه حقه اوقات صلات گبی اختلاف مطالع. معتبر اولدینی کلام فقهادن منهدر ﴿ابن عابدین﴾



ایکینجی باب

مفسدات صومه و تفرعاته دائر مسائل حاویدر

صوم. بیانی سبق ایلدیکی اوزره نیت صحیحه ایله جمیع نهاردده مَظَرَات ثلثه دن عمدأ امساک اولدیغنه بناءً صائم اولان مسلم. اونیدوب اکل و یا شرب یا خود جماع ایدوبده اورجی بوزلدی

ظنیله قصدأ افطار ایلمدیگی تقدیرده صومی فاسد اولمز. اگر نهارد رمضانده اویوب احتلام و یا برینه نظر شهوتله باقوب انزال اولسه یا خود یاغ سورنسه و یا حجامت ایله و یا گوزلرینه سورمه چکسه و یا غیبت ایسه یا خود برینی اوپسه و یا قوجا قلاسه و یا مباشره فاحشه ده بولنسه ده انزال و قوع بولسه اورجی بوزلمز. احوال مذکورده دن نسیان و نظره انزال و احتلام صورتلرنده مفسد صوم ظنیله قصدأ افطار ایله یا کثر قضا و احتجام (۱) و اغتیاب (۲) و بلا انزال. قبله (۳) و مضاجعه (۴) ایله اورج بوزلدی ظنی اوزرینه عمدأ افطار ایسه هم قضا همده کفارت لازم اولور. انجق احتجام صورتنده بر عالمدن استفتایله فساد صومیه فتوی الدقن و یا تأویلنی بیلیمیه رک حدیث حجامتی استماع ایله ظاهرینه اعتماد ایتدکن صکره قصدأ اکل ایله اولوقت کفارت ایجاب ایتمز ﴿در مختار و جمع الانهر﴾ شهوتله برینی اوپوب و یلمس ایدوبده انزال اولسه صائمک. اوزرینه کذلک قضا لازم اولور. نفسندن امنیتی اولان و انزالدن خوف ایتمیان صائم ایچون شهوتله برینی تقیل ایله مکده بأس یوق ایسه ده نفسی اوزرینه امین اولمدینی صورتده مکروهدر. اوفق طاش و یا تیمور یا خود چکردک عمدأ باع ایدیاورسه صومی افساد ایده جگندن قضا ایجاب ایلمز ﴿قدوری﴾ قی طیبی و استقاء (۵) یا کثیر و یا قلیل اولور. علی کلا التقدیرین یا عودت ایتمز و یا بنفسه یا خود صنع ایله. عودت ایدر. بوصوتلرک هر برنده صائم یا ناسی یا خود ذا کر اولمقدن خالی اولمز. اگر ناسی اولورسه

(۱) احتجام. حجامت اولمق (۲) اغتیاب. برینی غیبت ایتمک (۳) قبله. اوپمک (۴) مضاجعه. یا نایه برابر یا تمق (۵) استقاء. اختیار یله قی ایتمک

بالاجماع مفسد اولیوب ذا کر اولورسه تفصیله محتاجدر شویله که
 قیء . بلا عودۀ ولا اعادۀ . ملاً الفم اولسه دخی بالاجماع مفسد
 اولمز . و بنفسه عودت ایدرسه ملاً فمک مادوننده کذلک اجماعاً
 افساد صوم ایتمز . اگر ملاً الفم اولوبده کلیسی و یا نخود مقداری
 عودت ایلسه امام ابی یوسف عندنده مفسد ایسه ده امام محمد
 گوره دگلدر . وهو الصحيح . اعاده صورتنده ذاتاً اغز طولوسی
 اولوبده کلیسی و یا نخود مقداری اعاده اولندیغی تقدیرده صومی
 بالاجماع افساد ایدر . ملاً الفم اولمز ایسه امام محمد عندنده
 مفسد ایسه ده امام ابی یوسفه گوره غیر مفسد دو . هو المختار
 در مختار . وهو الصحيح . ابن عابدین نقلاً عن الخانیة . استقاء
 ملاً الفم ایسه اوچ صورتده یعنی بلا عودۀ و بلا اعادۀ خروج
 ایله عودت بنفسه و عودت بصنعه حاللرنده دخی اجماعاً صومی
 افساد ایدر . اغز طولوسی اولندیغی حالده اوچ صورتده دخی
 امام محمد نزدنده مفسد و امام ابی یوسفه گوره ایکی اولکی
 صورتده غیر مفسد اولوب اعاده صورتنده ایکی روایت منقولدر
 فقط اصح اولان ینه مفسد اولماق روایتیدر . در مختار
 و تنویر . مسئله یگر می درت صورتی شاملدر شویله که صائم یاقی
 یا خود استقاء ایدر . شو ایکی صورت یا ملاً الفم یا خود مادون
 ملاً الفم درجه ده اولور . اشبو صور اربعه نک هر برنده یا خروج
 و یا عودت یا خود اعاده بولنور که مجموعی اون ایکی صورت اولور
 شو اون ایکی صورتک هر برنده ده صائم صومی یا تذکر و یا

فراموش ایدر بولنردن تذکر صوم ایله برابر اغز طولوسی اولمق
 شرطیله اعاده یا خود استقاء صورتلری بالاجماع مفسد صوم
 اولوب صور باقیه ده قول اصح اوزره فساد یوقدر . مسئله
 محرره ده امام محمد و امام ابی یوسف حضراتی بیننده گورینان
 اختلافک مبنی علیهم امام محمد . قیء . و استقاء ده صنعی و ملء فی امام
 ابی یوسف . یالکز ملء فی . اعتبار ایتملرندن عبارتدر . در مختار
 و غیره . بوغازه ولو بر قطره اولسون مطر و یا تلج بنفسه یعنی صائم .
 بلع (۱) ایتیه رک داخل اولسه یا خود صغیره غیر مشتهاته
 و یا سبیلینک غیری به وطی ایدلسه و یا بوس و یا حرارت بدنه
 حائل اوله جق بر شی اولمق سزین لمس اولنوبده بولرک جمله سنده
 انزال و وقوع بولسه اورج بوزیله جغندن بعده یالکز قضا لازم
 گلور . اگر انزال واقع اولماز ایسه صوم بوزلمز . تنویر . بوغازه
 غبار (۲) و یا دخان یا خود ذباب (۳) کیرسه صائمک صنع
 و اختیاری اولندیغی صورتده صومی فاسد اولمز . صائم . بر کیمسه بی
 غیبت ایلسه و یا جنب اوله رق صباحه داخل اولسه یا خود قولاً غنه صو
 دو کولسه اورج بوزلمز . ملتی . خطاً و یا مکرهاً اکل
 ایدلسه یا خود احتقان اولنسه و یا انفه سعو ط (۴) چکلسه و یا رمضانده
 صومه نیت ایدلسه یا خود وقت سحورده و یا افطارده خطا
 ایدیلهرک اکل اولنسه یالکز قضا اقتضا ایدر . بر مسلم رمضانده
 (۱) بلع . یومقی (۲) غبار . طوز (۳) ذباب . سینک (۴) سعو ط
 هندستانده نابت بر نوع نباتک کوکی اولوب دو گوله رک انفه گی برونه چکیلور

سجورده صومه نیت ایلمدیگی حالده صباحه داخل اولوبده قبل الزوال
اکل ایلسه امامین عندنده کفارت واجب اولور ﴿ملتقى وغيره﴾
ما بین آسنانده بولنان نخود مقداری شیئی بلع ایله مک مطلقاً
صومی مفسد اولوب نخود قدر اولمز ایسه اورج بوزلیه جغندن
قضا لازم گلمز ایسه ده بعد الاخراج اکل اولدینی صورتده
صومی افساد ایده جگنه بناءً یا لکیز قضا ایجاب ایدر . خارجدن
قصداً بلا مضغ (۱) . سوسام یوتیق مفسد اولوب قول مختاره
گوره کفارت بیله لازم ایسه ده یا لکیز چیگنه مک مفسد صوم دگلدر
﴿ملتقى﴾ قصداً احد سبیلینه وطی ایله مک یا خود غذا ودوا
اولور شیئی عمداً اکل و شرب ایتمک هم قضای موجب همده کفارت
ظهار مثلاً و کفارتی مستلزم اولور ﴿قدوری﴾ (یعنی قدرتی و ارایسه
بر عبد آزاد ایتمک و یا التمش فقیری اطعام ایله مک یا خود متابعاً
التمش گون صائم اولمق لازم گلور) حسب الزوم اذینه دوا
آقیدلسه یا خود صدر و بطن گبی محللرده بولنان جرحه به مداوات
اولنسه ده علاج ایچر ویه داخل اولسه مفطر (۲) اوله جغندن اورج بعده
قضا ایدیلور . مثانه یه دوا ایدلمک امام اعظم و امام محمد حضرت تکریمه مفطر
اولمدیغندن قضا ایدلمز و امام ابی یوسف عندنده اورجی بوزا جغندن
قضا اولنور . فقط مفتی به اولان قول امامیندر . بوغازه داخل
اولماق شرطیله شیئی قلیلی اغز ایله طامق و اجزاسندن هیچ
بر جزوئی یوتماق اوزره ساقز چیگنه مک و ضروری اولیه رق
مرأه . صبی ایچون مضغ طعام ایتمک مکروهدر ﴿قدوری﴾

(۱) مضغ * چیگنه مک (۲) مفطر * اورج بوزان شی

متأخرین عندنده ایض ساقز مقدم مضغ اولنדיسه مکروه و اولمدیسه
مفسد اولور ﴿منح﴾ زوجی سبی الخلق (۱) اولوبده تضییق ایدر سه
زوجه نك طعامی تذوق (۲) ایلمه سنده بأس یوقدر . مشتری جید
و عدم جیدینی (۳) اگلا مق قصدیله عسلی طامق مکروهدر ﴿محیط﴾
امام اعظم حضرت تکریمه تبرّد (۴) ایچون استنشاق ایتمک و باشنه صو
دو مک و اغتسال ایله مک و رطوبت لو توبه بور و نمکده دخی کراحت
واردر خلافاً لامام ابی یوسف . برروایتده مباشرت فاحشه و معافقه
و مصافحه ایله مک دخی داعی کراحتدر . سجورایتمک و سجوری
طلوع فجر ده شک اولنیه جق درجه تأخیر و افطاری وقتی
دخولنده تعجیل و قبل الصلوة ایله مک مستحبدر . چونکه بی محترم
صلی الله تعالی علیه وسلم افندمن حضرت تکریمه ثلاث من اخلاق
المرسلین تعجیل الافطار و تأخیر السجور و السواك بیور مشلدر
﴿ملتقى و مجمع الانهر﴾ رمضانده خسته لنوب صوم سبیلله ازدیاد
واشتداد مرضه یقین حصولیله خوف ایدیلور یعنی براماره و یا
تجربه صورتیله یا خود مستور الحال و حاذق اولان طیب مسلمک
اخباریله غلبه ظن حاصل اولور ایسه افطار و بعده صحتک عودتده
قضا اولنور ﴿قدوری و غیره﴾ اگر شروط محرره بی جامع اولمیان
طیبیک قولیله عمل اولوبده افطار ایدلسه غلبه ظن اولیه رق مجرّد
و هم ایله اولنان افطارده اولدینی گبی بونده دخی کفارت ایجاب
ایدر ﴿در مختار و ابن عابدین﴾ مسافره صوم ایله متضرر

(۱) سبی الخلق * کوتوخویلو (۲) تذوق * طامق (۳) جید و عدم
جیدینی * ایوینی و کوتوسنی (۴) تبرّد * سربلنمک

اولدینی حالدہ اورج طومتق افطار ایله مکدن افضل وبعده
 قضا ایتک اوزره مسافرت حالنده صائم اولماق مباحدر
 ﴿قدوری﴾ ارضاع (۱) صبی ایدن مرأه نفسنه ویا ولدینه
 مضرت وقوعبولسندن قورقار ایسه اولوقت افطار و صکره
 قضا ایلر ﴿تنویر﴾ مریض و مسافر . مرض و مسافرت حالنده
 فوت اولسه لر اگر افطار ایلمش لر ایسه کندولرینه فدیہ ایله
 وصیت واجب اولمز . مریض . کسب صحت و مسافر . اقامت
 ایلاکدن صکره وفات ایلمش لر صیام رمضانندن صحت
 و اقامت . مقداری ایامه مقابل انلر ایچون فدیہ وصیت ایله مک
 واجب اولور . حال حیاتلرنده فدیہ ایله وصیت ایلمامش لر ایسه
 مال میراندن فدیہ اخراجی و لیلری اوزرینه ایجاب ایلمز ایسه ده
 ولی تبرعاً افراز (۲) ایدر ایسه جائزدر . ثلث مالندن فدیہ
 وصیت ایلمش لر ایسه گرک وصی گرک وارثلره اجرای وصیت
 ایلمک لازمدر ﴿قدوری و در مختار﴾ مریض . صوم شهری
 نذر ایدوبده قبل الصّحة فوت اولسه بالاتفاق برشی لازم گلمز .
 ولو برگون صحیح اولوبده صائم اولیه رق وفات ایلمسه امام
 اعظم و امام ابی یوسف حضرتلرنجه بتون شهر ایچون
 اطعام ایله وصیت ایتک اوزرینه واجب اولور . امام محمد گوره
 قضای رمضانده اولدینی گبی کسب صحتدن صکره فوت اولان مقدار
 ایله وصیت ایدمک ایجاب ایدر ﴿ابن عابدین و جوهره و تنویر﴾
 قضایه قلان عدت ایام رمضاننی تفریق ایدرک تدریجاً یا خود
 جمله سنی صره سیله متعاقباً قضا ایله مک جائزدر . تأخیر قضا

(۱) ارضاع . سود و یرمک (۲) افراز . آیرمق

ایدیلوبده رمضان ثانی دخول ایتسه اول باول ادای رمضان
 و صکره قضای مافات اولنور و تاخیردن ناشی فدیہ لازم گلمز .
 حامل قادین حملندن طولانی کندینه ویا ولدینه مضرت
 ایریشمک ظن غالبی اولدینی حالدہ اورج طومتقوب وقت
 آخرده قضا ایدر و اوزرینه فدیہ ترتب ایتمز . صیامه قادر اولمیان
 پیرفانی افطار ایدوب هر افطار ایتدیگی گونک صومی ایچون .
 کفاراتده و صدقه فطرده اطعام اولدینی گبی برمسکینه خطه دن
 نصف صاع و شعیر و زبیب و تمردن تام بر صاع اطعام ایدر .
 وفات ایدن مسامک قضایه قلایش صوم رمضاننی اولسه وانک
 حقنده وصیت ایلمسه و لیلی هر برگون ایچون برمسکینه یارم
 صاع بغدادی ویا بر صاع خرما ویا ارپه یا خود قوری اوزم اعطا
 ایلر اگر وصیت ایلمد یسه وارثی طرفندن تبرعاً وجه
 مشروح اوزره اطعام مساکین ایدمک جائزدر ﴿قدوری﴾
 وصیت فدیہ . ثلثدن معتبردر ﴿تنویر﴾ عبادت بدنیّه نیابت . جائز
 اولدینه بناء وارث و ولی و وصی ویا غیر یسی . اوزرنده قضای
 اوله رق فوت اولنلر ایچون صوم و صلات اجرا ایلمش لر صحیح . اولمز
 ﴿منح﴾ قضایه قلان صلاتک بعد الوفات فدیہ سی دخی صومک
 فدیہ سی مثللو اولمغله قول صحیح اوزره هر صلاتک فدیہ سی
 برگون اورجک فدیہ سی گیدر ﴿ملتق﴾ صوم نفله قصداً شروع
 اولندقدن صکره افساد ایدلسه شروعیله وجوب . تحقق ایلدیگی
 ایچون یا لکیز قضا اولنور . نهار رمضانده صبی . بالغ اولسه و غیر
 مسلم اسلامه کلسه بقیه یومی امساک ایدر و ما مضای قضا ایتمز لر .

رمضانده ایلاً و یا نهاراً مُغْمًی علیه (۱) اولان مسلم . وقتنده صومه نیت ایتیش اولدیغنه مبنی صومنی افساد ایدر بشقه برشی بولمادیغنی تقدیرده یالکزاغما (۲) حادث اولدیغنی گونی قضا ایله میوب فقط اندن صکره کی ایامی نیت صوم بولمادیغندن قضا ایلر زیراً ذکر اولندیغنی وجهله عند الحنفیه هر گون ایچون بشقه جه نیت لازمدر * بناءً علیه بعد الاغما نیت اهل اولمادیغندن هر نه قدر هیچ برشی اکل و شرب ایتسه بیله امساکی صوم . عد اولنه مز * اگر اوّل لیلّه رمضانده شهرک کلیسنه نیت ایتیش ایسه اورجه مغایر برشی بولماق شرطیله صوم . جائز ایسه ده اغما صیامه منافی اولغله اوّل لیلّه رمضانده کی نیت . کافی اوله میه جغندن بهمه حال قضا اقتضا ایدر ﴿هدایه و جمع الانهر﴾ مجنون بعض اوقات رمضانده افقت بولسه ایام ماضیه بی قضا ایلر . رمضانک ایلک گجه سی غروب شمسدن اوّل مجنون اولوبده آخر رمضانده قدر جنون امتداد ایتسه اصلاً قضا لازم اولمز و غروب شمسدن صکره مجنون اولوب نهایت شهره دگین تمتد اولسه برنجی گونندن ماعدار رمضانک تمامی قضا ایتک ایجاب ایدر ﴿ملتقی و جمع الانهر﴾ مرأه دخی بعض ایام رمضانده حائض و یا نفساء اولسه افطار ایدوب بعده قضا ایلر . لکن نهار رمضانده مسافر . مقیم و حائض طاهره اولسه بقیه یومده اکل و شرب و و طی دن امساکی ایدوب مابعدنده صائم اولورلر ﴿ملتقی و قدوری﴾ مسافر . وقت زوالدن مقدم واکل و شرب ایلمدن گلور ایسه صوم لازمدر . شاید بعدالنیة افطار ایدر ایسه کفارت لازم گلمز . اما حائض . وقت زوال

(۱) مُغْمًی عَلَیْهِ * باییش (۲) اغما * باییش

واکلدن اوّل طاهره اولدقده صومه نیت ایله سه صحیح اولمز ﴿جوهره﴾ فجر . طلوع ایتدی ظنیله تسحر ایدلسه ده مؤخرأ طالع فجر تعین ایله یا خود شمس . غروب ایتدی ظنیله افطار اولنسه ده صکره دن شمسک عدم غروبی اگلاشله اوگون قضا ایدیلور ﴿قدوری و غیره﴾ اما شمسک غروب ایدوب ایتدیگی حقنده شک اولنسه و یا صائمک اکثر رأی شمسک غروب ایلمامسی جهتنده بولنسه کفارت دخی واجب اولور . شمسک غروبی ظنیله افطار و فجرک عدم طلوعی ظنیله تسحر صورتلرنده حقیقت حال تبیین ایدنجه حق وقتی قضا ایچون اوگونک بقیه سنده امساکی ایجاب ایدر . الحاصل بومسئله بش نوع حکمی تضمن ایدیور که برنجیسی سحور . بیان و یا افطار ایدن ذاتک کندی صومنی افساد ایلمسی . ایکنجیسی ادایی فوت ایلدیگندن قضا واجب اولمی . اوچنجیسی کفارت . اقتضای تمامسی . در دنجیسی بقیه یومده امساکی لازم گلمی . بشنجیسی ﴿ولیس علیکم جناح فیما اخطاتم به﴾ آیت کریمه سی دلالتیله اثم بولنامسی خصوصلرندن عبارتدر . مسئله مبسوطه نک خلافی اوله رق اگر طلوع فجرده شک ایدیلهرک اکل اولنسه کفارت ایجاب ایلمز چونکه بوضورتده اصل اولان بقای لیل اولوب بوبابده کی یقین ایسه شک ایله زائل اولمادیغندن اکل ایدن مسلم . قصداً افطار ایتیش عداولمز امام مسئله اولی ده یعنی غروب شمسده شک ایدیلهرک افطار اولدقده کفارت لازم گلور زیرا بونده اصل اولان بقای نهار اولغله نهار . متیقن بولنش ولیده شک واقع اولمش اولور . بناءً علیه شک ایله یقین زائل اولیه جغندن

افطار مذکور علی سبیل التعدی و قوعبولش عد اولنور * لکن
برنجی مسئله ده امام ابو الحسن الکرخی به گوره شک (۱) اولان مفطره
سنت شریف اولان تعجیل افطاری اقامه قصد ایتمیکی ایچون
کفارت لازم اولمز ﴿جوهره﴾ برکیمسه هلال شوالی یالکز
کندی رؤیت ایله سه افطار ایده مز * سماءه غبار و غیم گبی
علت اولور سه هلال فطرک اثباتنده انجق نصاب شهادت اولان
ایکی رجل و یا بر رجل ایله ایکی مرأه عادله نك شهادتی مقبول اولور
بونده هلال رمضان مثللو عدل واحدك شهادتی کافی دگدر *
آسمانده (۲) بر عات اولمز ایسه ظاهر روایتده گرك هلال رمضان گرك
هلال فطرده ایکی رجلك شهادتی مقبول اولمديغندن بر طاق خالقك رؤیت
هلالی نزد قاضیده خبر ویرملریله حصول علمه متوقفدر ﴿قدوری
و غیره﴾ صوم نافله ضیف (۳) و مضیفه (۴) عذر ضیافت سببیه افطار *
مباح اولدیغندن اولصورته افطار ایدر لر ایسه قضا لازم اولور ﴿ملتق﴾
نافله اورجنی بلا عذر بوزمق بر روایتده جائز اولیوب دیگر روایتده
ایسه قضا سنی نیت ایله مك شرطیه مباحدر * روایت اولی * صحیح
اولوب ثانیه بی ده کمال و صاحب وقایه و صدر الشریعة اختیار ایلدیلر
﴿نویر و در مختار﴾ هلال گورلدیکی وقتده اکا اشارت ایلیمك
أفعال جاهلیه دن اولمغه مکر و هدر ﴿در مختار نقلاً عن البرازیه﴾
عید فطر و انحی و ایام تشریق و یا سنه معینه یا خود تتابع شرطیه
غیر معینه صومی نذر ایدلسه نذر صحیح ایسه ده سنه ده بش گون شرعاً
منهی اولدیغندن بونلرده افطار ایدیلوب صکره قضا اولنور * اگر
(۱) شک * شک ایدن (۲) آسمان * گوک (۳) ضیف * مسافر
(۴) مضیف * مسافر صاحب

ایام منیه ده اورج طوتیلور ایسه مع الاثم عهده دن خارج اولمغه
قضا لازم اولماز * بلاتتابع * سنه غیر معینه صومی نذر ایدلسه ایام منیه
ورمضان * نذرده داخل اولمديغندن ناشی منهی اولان ایام خمس ده
صوم * کافی اوله میه جغه بناء آروجه اوتوز بش گون قضا اقتضا
ایلر * فلان و فلان گونلرك یا فلان سنه نك صومی اوزریمه اولسون
دینلسه الی صورتی محتمل اولور * برنجیسی فقط نیت نذردر *
ایکنجیسی نذر نیت و یمین اولماغه نیتدر * اوچنجیسی نذر
و یمینه عدم نیتدر که بو اوچ صورتده انجق نذر اولوب یمین
اولمز * دردنجیسی عدم نذر ایله یمینه نیتدر که یمین اولور سه ده نذر
اولمز * بو حالده افطار ایله قضا لازم اولیوب کفارت یمین واجب
اولور * بشنجیسی هم نذر همده یمینه و التنجیسی یالکز یمینه
نیت اولوب نذر * خاطره گلمسه عند الطرفین هم نذر و هم یمین
اولور که افطار ایدیلور ایسه قضا و کفارتی ایجاب ایدر * امام
ابی یوسف عننده اولده نذر و نانیسه یمین اولور ﴿ملتق﴾
و مجمع الانهر ﴿

اوچنجی باب ﴿

اعتکافه دائردر

اعتکاف * مستحبدر * لکن عشر اخیر رمضانده سنت مؤ کده در
زیر رسول اکرم صلی الله علیه و سلم اقدمن حضر تلمی اعتکافدر رمضان
شریفك عشر اخیرنده مداومت بیور مشلدر * جوهرده بیان
اولندیغنی اوزره اعتکاف * نذر ایدلسه واجب اولور * اعتکاف *

عرف شرعه کند و سنده اوقات خمس . ادا اولنان مسجدده
اعتکافه نیت ایله مکث ایلمکدر * معتکفه وطی ایتمک حرام اولدینی
گبی لمس و تقیل مثللو و طیک دو اعیسنه توسل دخی حرامدر . بناء
علی ذلک قبله و لمس ایله انزال واقع اولسه اعتکافی فاسد اوله جغندن
قضاسی لازم گنور ﴿قدوری و غیره﴾ معتکف لیلده و یا
نهارده قصداً یا خود ناسیاً مجامعت ایسه انزال وقوع بولسون
و یا بولسون اعتکافی باطل اولور ﴿قدوری﴾ اما نهارده
نسیاناً اکل و شرب ایله سه اعتکافی بوزلمز ﴿جمع الانهر﴾
اعتکاف اولنان مسجدک قدر جماعتی کثیر اولور ایسه فضیلت
اعتکاف دخی اولدرجه زیاده اولور ﴿جوهره﴾ امام اعظم
حضر تلرنجه اعتکاف واجبک اقل مدتی یوم تامدر . امام ابی
یوسف عندنده اکثر ایچون حکم کل اولدیغندن یومک اکثریدر
اعتکاف نفلک مدتی امام محمد گوره ساعت شرعیدر ﴿ملتقی و جمع الانهر﴾
اعتکاف نفلده . صوم . شرط دگلسه ده نذر سببیه واجب
اولان اعتکافده صوم . شرط و اقل مدتی مرور ایلدیگی
وجهله برگون اولمق متفق علیه در . امام اعظم حضر تلرندن حسن ابن
زیادکروایتنده اعتکاف نفلده دخی صوم . شرط و اقلی کذلک یوم تامدر
﴿ملتقی و جمع الانهر﴾ معتکف . قضای حاجتدن و طهارت و سنتلریله
برابر صلات جمعه دن غیری بر سبب و علتدن ناشی مسجددن
خارجه چیقماز . شاید اسباب محرره دن بشقه برشی ایچون
ولو ناسیاً ساعت واحده خروج ایدر ایسه امام اعظم حضر تلرینه
گوره اعتکافی باطل اولور . امامین عندنده یومک اکثرنده
جیقمادجه بطلان حاصل اولمز . احکام محرره اعتکاف واجبه

عائد اولدیغندن اعتکاف نافله ده گرک عذر ایله گرک بلا عذر
مسجددن خروجده بأس یوقدر * مسجدده احضار متاع ایدلماک
شرطیله معتکفه درون مسجدده امور لازمه سیچون بیع و شرا
جائزدر * معتکفک غیری یه مسجدده اخذ و اعطاء تجویز اولنماش ایسه ده
قول صحیحه گوره لزومنده اکل و شربده کراهت گورلماشدر
انجق خیر ایله تکلم ایدلمسی مستحسن و قربت . اعتقاد یله سکوتده
دوام اولمسی مکروهدر ﴿قدوری و غیره﴾ سکوت .
عبادت . عدایدیلور سه مکروه ایسه ده ﴿من صمت
نجا﴾ قولیله عمل واقع اولدینی تقدیرده کراهت یوقدر
﴿درر و منج﴾ امام اعظم حضر تلرینه گوره معتکف . قضای
حاجتدن صکره خارجده بر ساعت و امامین عندنده نصف یومدن
زیاده مکث ایلمر ایسه اعتکافی فاسد اولور ﴿جوهره و ملتقی﴾
انهدام مسجد سببیه و یا نفس و مالنه ضرر خوفیله یا خود امر
سلطان ایله مسجد آخره انتقال ایله مک و انشای اعتکافده اکل و شرب
و عقد نکاح و تنوم ﴿۱﴾ و نواهی مسجدده تردد و مؤذنهیه ﴿۲﴾
تصعد ﴿۳﴾ ایتمک اعتکافی افساد ایلمز ﴿جوهره و غیره﴾ بر مسلم
نفسی اوزرینه برقاج گون اعتکافی نذر ایدرک واجب قیلسه
اوگونلری گیکجه لر یله معا و تنابعی شرط ایتمه سه بیله گونلری تفریق
ایتمه رک متصلاً و متتابعاً اعتکاف ایله مک لازمدر ﴿قدوری﴾

﴿۱﴾ تنوم . او یومق ﴿۲﴾ مؤذنه . اذان و بریله جک محل یعنی مناره

﴿۳﴾ تصعد . یوقاری چیقماق

﴿ بشنجهی کتاب ﴾

حج بیانده در

﴿ برنجی باب ﴾

حج بیت مکرّمه متعلق احکامی شاملدر

نفس بیت شریف وسط شهرده کائن حرم شریفک وسطنده
واقعدر . زمیندن ارتقاعی مکّه مکرّمه ده متعارف اولان ذراعله
یگر می یدی ذراعدر . طولی حجر اسوددن رکن عراقی یه دک
یگر می درت ورکن شامیدن رکن یمانی یه دگین کذلک یگر می
درت آرشونددر . عرضی رکن حجر اسوددن رکن یمانی یه دگین
یگر می اوچ ذراع و برشبر (۱) ورکن شامیدن رکن عراقی یه دک کذلک
یگر می اوچ ذراع و برقاریشدر . جدار بیت مکرّمک عرضی ایکی
ذراعدر . طول باب کعبه . الی ذراع و اون پرمق و عرضی
اوچ ذراع اون سکنز پرمقدردر . باب شریف . جدار مبارک شرقیده
کائندر . عتبه عایاسنک ارضدن ارتقاعی درت ذراع و اوچ
اصبعدر (۲) درون بیت سعادتده ایکی عدد . ستون شریف . موجوددر .
التون اولوق تعبیر اولنان میزاب رحمت . حجر اسودی ولی ایدن
جدارک وسطنده و سقف شریفک برابرنده ورکن عراقی ایله
رکن شامی بیننده در . عرض ملتزم شریف که باب کعبه معظمه
ایله حجر اسود بینیدر درت ذراع اولوب جدار بیت سعادتده در .

(۱) شبر . قاریش (۲) اصبع . پرمق

حرم شریفک طولی باب السلامدن باب عمریه قدر درت یوز
و عرضی باب الصفادن باب ندویه دگین اوچ یوز درت آرشونددر .
جدار اربعه سنده اولان قبولر اون طقوزدر . حولی شریفده
بولنان مرمر ستونلر درت یوز التمش ایکی عدددر . جوانب
اربعه ده اوچ رقعات اوله رق طقسان ایکی قبه ویدی مناره
شریفه وارددر ﴿ خلاصة عن الطحطاوی و غیره ﴾ حج . حانک
فتیحی و کسریله لغتده شیء معظمه قصد ایتمکدر که بومقامده
مبنای اسلام اولان ارکان خمس دن بر رکنک ماده سی بولنان
نُسک مفروضی ادا ایچون خاصه مکّه مکرّمه یه قصد و توجه
ایلمک معناسنده در . حوائج اصلیه اولان مسکن و خدمه و اثاث
نیت و لباس و آلات صنایعده دن و محل سکنا یه عودت ایدنجیه
قدر اهل و عیالک نفقه سندن زیاده زاد (۱) و ذخیره و راحله یه
قدرت اولوق و امن طریق بولمق شرطیله بالغ و عاقل و صحیح (۲)
و بصیر (۳) اولان حرّ مسلمه عمر ننده بردفعه حج ایتمک فرض
عیندر ﴿ قدوری و در مختار ﴾ فرضیتی کتاب و سنت و اجماع امت ایله
نابتدر . هجرت نبویه (علیه افضل التحیه) نک طقوزنجی سالنده استعید بالله
﴿ وَلِلّٰهِ عَلَى النَّاسِ حِجُّ الْبَيْتِ مَنْ اسْتَطَاعَ اِلَيْهِ سَبِيْلًا ﴾ آیت
جلیله سیله امر بیورلمشدر ﴿ مجمع الانهر و غیره ﴾ مرأده گندی
ایله حج ایدر عاقل و بالغ و نسباً و یارضاعاً و یا صهراً مؤبداً
(۱) زاد . آرق (۲) صحیح . خسته اولیوب وجودی عافیتده اولان
(۳) بصیر . گوزی گورن یعنی اعمی اولین

نکاحی حرام اولان بر محرمی یا خود زوجی برابر اولق شرط
معتبر در . عبدی طواشی ده اولسه مرأیه محرم عدا و لمز . قدوری
و غیره . مدت سفر اولان اوچ گون و اوچ گیکه لک مسافه . گندی ایله
مکه بیننده موجود اولدینی تقدیر ده مرأیه محرم و یازو جنک غیر یسیله
حج ایتمک تحریماً مکروه و بر روایت گوره غیر جائز در . قدوری
و در مختار . حج شرعی . وقت معینده فعل مخصوص ایله مکان
عالی مخصوصی زیارت ایلمکدن عبارت و اوصاف محتره بی
جامع اولان حرّ مسلمه عمر نده بر کرّه فرضیتی علی الفور در .
امام محمد گوره فرضیتی علی التراخی اولدیغندن عام ثانی و ثالثه
حج ایدرسه آثم اولمز ایسه ده دوام عمره امنیت اولدیغندن تعجیل .
افضالدر . منج . بردن زیاده اولان حج . قن زاده فهو
تطوع . حدیث شریفی دلالتیله تطوع در . بر مسلم . مع الاستطاعة
حجی تعجیل ایتیوبده آخر عمر نده حج ایسه ادا اولمستنده اجماع
علماء وارد در . بناء علیه حج ایتمکسزین وفات ایسه آثم اولور . اوزرینه
شرعاً حج فرض اولان مسلم حج ایتیوبده مالی صرف ایسه
تأدیه سنه مقتدر اولسه بیله استقراض ایدرک ادای حج
ایله مسمی جائز در . در مختار و طحاوی . حج فرضی اوچ اولوب
برنجیسی احرامدر . ایکنجیسی یوم عرفه نك وقت زوالندن
طلوع فجر یوم نحرک براز اولنه قدر ولو بر ساعت اولسون
عرفانده وقفه در . اوچنجیسی دردی فرض و اوچی واجب
اولق اوزریدی شوط (۱) دن عبارت اولان طواف زیارتک اکثرینی

(۱) شوط . طوافه هر دوره بر شوط دینور

اجرا ایتمکدر . در مختار . شرائط وجوبی آنفا بیان اولدینی
وجهه اسلام و عقل و بلوغ و حریت و وقت و زاد و راحلهیه قدرت
و فرضیت حجه علم اولق اوزره سکر در . شرائط اداسی بش اولوب
اندرده صحت و امن طریق و زوال مانع و مرأیه حقنده عدم عدت
و زوج و یا محرم صحیحی ایله بالمعیه خروجدر . صحتک شروطی
وقت و احرام . و مکان عالی مخصوص و اسلام . دن عبارت اوله رق
در تدر . منج . مریض و مقعد (۱) و مفلوج (۲) و ال و ایانی مقطوع
اولان مسلمه حج . فرض اولدینی گبی احجاج ایله مک یعنی برینه برینی
بدل گونددر مک دخی لازم اولمز . اعمایه قائد (۳) و خادم بولنور
ایسه امامین عندنده واجب اولوب امام اعظم حضرت تارنجیه دگلدر
جوهره و غیره . طریقده غلبه امن و سلامت . معتبردر . بخرده
دخی عادت جاریه اوزره سلامت . غالب ایسه واجبدر . منج .
صبی و عبده حج . فرض اولدیغندن شاید تطوعاً محرم اولدقدن
سکره صبی بالغ و عبده . معتق اولوبده حج ایتسدر حجاری تطوع
اولغله بونکله حجه الاسلام اولان فرضدن استغنا حاصل
اولیه جفندن بعده قضا ایلملری لازم گلور . لکن صبی بالغک فرض
ایچون احرامی تجدیدی فریضه حجی اسقاط ایدر ایسه ده عبده
حقنده مسقط اولمز . احرامسز تجاوزی جائز اولیوب انجق
محرم اولدینی حالد عبوری لازم اولان میقاتلر اهل مدینه
ایچون مکه مکرمهیه اون و یا طقوز مر حله بعدی بولسان
(۲) مقعد . کوتورم (۳) مفلوج . بدنک نصفی حس و حرکتدن
ساقط اولان کیمسه (۴) قائد . قلاغوز

(ذی الحلیفه) واهل نجد مکيه ايکي مرحله مسافه سی
 اولان (قرن) واهل عراقه مکيه ايکي مرحله اوزاقانی
 بولنان (ذات عرق) واهل شامه مکة مکرمه يه اوچ مرحله
 بعينده اولان (جحفه) واهل يمن ايچون مکيه ايکي قوناق
 اولان (يلملم) ديدکاری مواضع خمس معينه در . مواقيت
 مذکور يه کمر دن اول احرامی تقديم ايله مک جائز و بلکه
 افضلدر . مکانی مواقيت محرره داخلنده اولان ذاتک احرامه
 داخل اوله جق محلی (حل) دينيلان موقعدر . مکده
 بولانک ميقاتی حجه حرم شريف و عمره ده کدک مذکور
 (حل) تسميه اولنان محلدردر **درختار** و غيره **درختار** ذکر اولنان
 محلدردر اهل بسنک غيريلری مواقيت محرره دن مرور ايلدکرنده انلره
 دخي ميقات اولور **درختار** حرم مکة مکرمه نك حدودی
 (طيبة) طرفدن اوچ و (عراق) و (يمن) و (طائف)
 جهتلرندن يدي و (جدّه) جانبندن اون و طائف طريقنک
 اوزرنده اولوب مکة مکرمه يه التي فرسخ مسافه سی بولنان
 (جعرانة) طرفندن طقوز ميلدر . اشبو حدودک خارجنه
 (حل) دينلور **درختار** و غيره **درختار** قاضي ابوالفضل
 النويری امام نووينک شرح مذهبندن نقلأ ديمشدر که مکة
 مکرمه حرمشک هر جانبنده علامات منصوبه اولوب جبريل
 (عليه السلام) بولرک محلدردر اراه و ابراهيم (عليه السلام) نصب

بيور مشلدر . بعده وقت سعادتده جناب رسالتآب افندمن
 حضرتلری جانب عاليسنندن شرفصادر اولان امر اوزرينه
 علامات محرره تجديد اولنديگي گي عمر و عثمان و معاويه
 (رضوان الله تعالى عليهم اجمعين) حضراتی زمانلرنده دخي
 مؤخرأ تجديد اولنه رق الان جميع جوانب حرمده ثابتدر .
 (جدّه و جعرانة) جهتلرندن دخي علامات وار ايسه ده
 منصوبه دگلدردر **ابن عابدين** **مزدلفه** بعدالفجر ولو بر
 ساعت اولسون وقوف و مروه ايله صفا ييشده سي ورمي
 جبار و حائضک غيری آفاقی ايچون طواف وداع و احرامدن
 چيقلدقده حلق و يا تقصير و ميقاتدن احرام و عرفاتده نهارأ
 واقف ايسه غروب شمس قدر وقوف و طوافه حجر اسود دن
 ابتدا و طوافده تيامن (۱) ايتک و عذر مانع اولمديگي
 حالده شي ايلمک و نجاست حکميهدن و عندالبعض ثوب و بدن
 و مکان . نجاست حقيقيهدن طهارت کامله اوزره بولنق
 و ستر عورت و سعي صفادن بدأ و سعي ده عذری اولميان
 حاجی ايچون مشی و قارن و يا متمتع ايسه ذبح شات ايتک
 و هر طوافده ايکي رکعت نماز قيلمق و يوم نحرده رمي و ذبح
 و حلق ييشده ترتيبه رعايت اولنمق و طواف الافاضه يي يعنی
 طواف زيارتی ايام نحرده اجرا و طوافی وراء حطيمدن ايضا
 ايله مک و سعي . طوافک اکثر اشواطندن صکره بولنمق و گرک
 حج گرک عمره ايچون حلق داخل حرمده و اگر يالکزد حج ايچون

اولورسه ینہ داخل حرمده اولقلہ برابر ایام نحرده یا بلق
وبعد الوقوف حالایسه مجامعتی ولبس مخیطی و تغطیة رأس
(۱) ووجهی ترک ایتمک واجبات حجدن اولوب بونلردن
ماعداسی سنن و آدابدر . طواف وداعی مکی و بستانی و حائض
اولنلر اجرا ایلمزلر . رجله تراش . اولق و مرأیه صاچ
قیریمق افضلدر . مکیه و هدی سوق ایتمان متمعه میقات .
حرمدر . رسول اکرم صلی الله تعالی علیه وسلم اقدمز
حضر تلری طوافده حجر اسوددن ابتدایه مواظبت بیور مشلردر .
نمازگی انده دخی ستر عورته اعتنا لازمدر . زیرا عورت اولان
اعضادن عضو اصغرک ربی ویا اکثری آچلسه دم . واجب
اولور . ذبح شاة . قارن و متمتع ایچون تراشدن مقدم . دم
شکر اوله رق اجرا قلنور . قننی طوافدن اولور ایسه اولسون
هر اسبوعدن یعنی هریدی شوطدن صکره ایکی رکعت نماز قیامق
عند الحنفیة واجب اولدیغندن بونی ترک ایتمک دمی مستلزمدر
در مختار و ملتقی و غیرها . شهر حج . شوال و ذی القعدة
و عشر ذی الحجة در . شهر مذکوره دن مقدم حج ایچون احرامده
کراحت تحریمیه واردر . تنویر . احرام و طواف و سعی
و حلقدن عبارت اولان عمره قریباً ذکر اولسه جنی و جهله
مدت عمرده بردفعه واجب و بعضلرنجه ظاهر مذهب اوله رق
سنت مؤکده در . یوم عرفه و ایام اربعه عید اخچادن ماعدا هر
گونه عمره ایتمک جائز اولوب فقط ذکر اولنان ایام خمسده
(۱) تَغْطِیةَ رَأْسٍ . باشنی اورتمک

ابتداءً عمره ایچون احرام تحریماً مکروهدر . استعیند بالله
وَ اتَمُّوا الْحَجَّ وَالْعُمْرَةَ لِلَّهِ نص جلیلندن استدلال ایله
عمره مدت عمرده حج ایله برابر بر کره واجب اولدینی جوهرده
تصحیح اولنش و بدایعهده بوکا مذهب اصحابدر دینلمشدر
منح و در مختار و طحطاوی . حج و احرام . قصدایدن حر
مسلم و مسلمه اوّل باوّل غسل ایدر و یا آبدست آلور . لکن
غسل . افضلدر . بعده ازار و رداء دینیلان ایکی بیاض . ثوب
جدیدی و یا مغسول و طاهر . ثوبینی اکتسا و طبی و ارایسه تطیب
ایلر و وقت مکروهک غیریده ایکی رکعت نماز قبول متعاقباً
مُفْرَدٌ بِالْحَجِّ اِیْسَه ۱۰ اَللّٰهُمَّ اِنِّیْ اُرِیدُ الْحَجَّ فِیْمَرْهَلِیْ وَ تَقْبَلْهُ مِنِّیْ ۱۰
دعاسنی قرائت ایلر و عقیب صلاتده حج . نیتله نیتله ایدر . قدوری .
غسل و توضعیدن مقدم . تقلم اظفار (۱) و قص شارب (۲) و حلق
عانه (۳) و معادی ایسه حلق رأس و نزدنده زوجہ سی و ارایسه
و بر مانع یوغیسه مجامعت . مندوب و صوبولنمز ایسه تیمم غیر مشر و عدر .
اکسا اولنان ثوبین . ابیض اولق افضل اولوب ثوب واحد ایله ده
ستر عورت جائزدر . تنویر . ذکر اولدینی اوزره قیلنه جق
اولان ایکی رکعت صلاتک برنجی رکعتده فاتحه و صکره
۱۰ قُلْ یَا اَیُّهَا الْکَافِرُونَ ۱۰ وایکنجیده کذلک اَوَّلًا فَاتحه
بعده ۱۰ قُلْ هُوَ اللّٰهُ اَحَدٌ ۱۰ سوره لری قرائت اولنور .
(۱) تَقْلِیمُ اَظْفَارٍ . طرنقلری کسمک (۲) قَصِّ شَارِبٍ . بیقلمی قیریمق
(۳) حَلْقِ عَانِه . قاسیق قیللرینی تراش ایتمک

﴿وَاسْتَعِينُوا بِالصَّبْرِ وَالصَّلَاةِ﴾ امر جلیلی صلات مذکورہ
 اشارت در ﴿جوهره﴾ ثوبی تحت ابط ایمنیدن (۱) ادخال و طرفی
 کتف ایسرہ (۲) القا ایتمک طوافدہ سنت شریفہ در . ثوبک عقدی
 (۳) ہر قدر . دم . ایجاب ایلمز ایسہ دہ اساتدر ﴿در مختار﴾ بالکثر
 حج ایدیلوبدہ عمرہ یہ قصد اولمدینی حالہ تلبیہ ایلہ انجق حجہ
 نیت اولنور . تَلْبِيْهٍ ۝ لَّبِيْكَ اللّٰهُمَّ لَّبِيْكَ لَّبِيْكَ لَا شَرِيْكَ لَكَ لَّبِيْكَ
 اِنَّ الْحَمْدَ وَالنَّعْمَةَ لَكَ وَالْمُلْكَ لَا شَرِيْكَ لَكَ ۝ دیمکدر کلمات
 مذکورہ دن برکہ ترک و یا نقصان ایدلمک لایق اولمز . زیادہ
 ایدیلورسہ جائزدر . تَلْبِيْهٍ ایدلدکدہ هنوز محرم اولغلہ اللہ تعالیٰ
 حضر تلمزینک نہی ایتدیگی رفتدن یعنی جماع واکا متعلق کلام
 فاحش و جمیع معاصیدن و رفقا و غیر یسیلہ مجادلہ دن اتقا و احتراز
 ایلہ مک واجبدر ﴿قدوری﴾ تلبیہ برکرہ شرط و زیادہ سی
 سنت و تلبیہ بی وارکک ایسہ تلبیہ دہ رفع صوتی ترک ایلہ مک اساتدر
 ﴿در مختار﴾ ابن عمر (رضی اللہ عنہما) تلبیہ دہ ۝ لَّبِيْكَ
 وَ سَعْدِيْكَ وَالْخَيْرُ كُلُّهُ فِيْ يَدِيْكَ وَالرَّغْبَةُ اِلَيْكَ لَّبِيْكَ لَّبِيْكَ ۝ دیہ رک
 زیادہ بیوردقلری مرویدر . بعضلردن دخی ۝ لَّبِيْكَ حَقًّا
 حَقًّا لَّبِيْكَ تَعْبُدًا وَرِقًّا ۝ قولى منقولدر ﴿جوهره﴾ محرم
 (۱) تَحْتَ اَبْطِ اَيْمَن . صاغ قولتوغث آتی (۲) کتف ایسرہ . صول
 اوموز (۳) عقد * باغلامق

اولان مسنم . صید بری قتل و صیدہ حضوردہ اشارت و غیوبت
 حالندہ تعیین محل صورتیسلہ دلالت ایتمز . گو ملک و طون گی
 دیکلمش البسہ و قاووق و خفتان گیمز و صاریق صارماز و نعلین
 وار ایکن خفین گیہ مز . نعلین یوق ایسہ اسفل کعبندن خفینی
 قطع ایدر . باشی و یوزینی برشی ایلہ اورتمز . رأس و بدنندہ
 اولان شعرى حلق و طیبی مس ایلمز . طرناغنی کسمز و لحيہ سندن
 قیل قویارمز . زعفران و ورس (۱) و عصفر (۲) و امثالی رنک
 ویررشی ایلہ مصبوغ (۳) اولان ثوبی مغسول اولوبدہ رنگی فی الجملة
 زائل اولمدینی حالہ اکتسا ایلہ مز * رأس و لحيہ سنی خطمی ایلہ غسل
 ایتمز . غسل ایتمدہ و حمامہ گیرمده و بیت و محمل ایلہ استظلال (۴)
 ایلمہ دہ بأس و میانسہ کمر باغلامدہ ضرر یوقدر . صلوات خمس
 عقبنجہ و یوکسک محله عروج (۵) و وادی یههبوط (۶) ایتدجہ
 ورا کہ ملاقی اولدجہ و خصوصاً وقت اسحار دہ تلبیہ بی اکتار ایدر .
 ہر تلبیہ یہ شروع دہ اوچ کرہ تکرار ایدوب دنیا کلامیلہ آرہ لرینی
 قطع ایتمز . تلبیہ ایدر ایکن ردہ سلام . جائز ایسہ دہ غیرہ سلام
 و یرمک مکروہدر ﴿قدوری و در مختار و طحطاوی﴾ حین
 استظلالدہ رأس و یا وجہی بیت و محملہ دو قند یرمق مکروہ
 (۱) ورس * یمندن گلور برصاری اوتدرکہ بویا ایدیلور (۲) عصفر *
 اصل بر یو یادرکہ انکله اوروبہ و سائرہ بویارلر (۳) مصبوغ * بویامش
 (۴) استظلال . کولگہ لنمک (۵) عروج . اشاغیدن یوقاری چیققی
 (۶) هبوط * یوکسک بردن اشاغی ایتمک

اولد یغندن بو باده زیاده اعتنا ودقت الزمدر * کمر و صرّه
وسیف و سلاح باغلامق و تختم یعنی یوزک استعمال و مطیب
اولیان کل ایله اکتحال و ختان و فصد (۱) و حجامت اولمق
ودیش چکدیر مک و اعضادن و قوعبولان قیریغی صارمق و قیل
وصاچ و قله (۲) دوشماک شریطیله رأس و بدنی رفقله قاشیمق ضرر
ویرمز * تنویر * بدندن قله بی قتل و یا القا ایله مک و کله اولمک ایچون
نوبی گونشه قویمق و یا کندوسنک دلالتیله دیگری اولدیر مک تصدقی
مستلزمدر * طحطاوی و غیره * مکّه مکرمه یه داخل اولندقدّه مسجد
حرامه دخول ایله ابتدا و بیت شریف مشاهده اولندقدّه تکبیر
و تهلیله اعتنا اولنور و بوضعه حضرت عمر (رضی الله عنه) دن
مروی اولان - اللهم انت السلام و منک السلام فاحینا ربنا
بالسلام اللهم زد بیتک هذا تعظیماً و تشریفاً و تکریماً و مهابة و زده من شرفه
و عظمه و کرمه من حجه او اعتمره تشریفاً و تکریماً و تعظیماً و برّاً -
دعای و سائر ماثورات قرائت ایدیلور * بعده حجر اسوده استقبال
و نمازه شروع ایدرگی اذینه قدر رفیع یدین ایدیلور تکبیر
و حجر اسود * استلام (۳) قلنور * استلام * سنت اولوب ترک
اذا ایسه واجب اولد یغندن بوکا رعایه مسلمینی اذا ایتمه دن
وزحمت و یرمه دن ممکن اولور ایسه کفینی حجر اسود اوزرینه
(۱) فصد * قان الدیرمق (۲) قله * کله (۳) استلام * حجر اسوده
الینی و بوزینی سورمک

وضعه تقیل اولنور * ازدحام * زیاده اولدینی و لمس و بوس ممکن
اولدینی حالدّه اوزاقدن النده اولان شیئی یا خود عصائی مس
ایلمک و بووجهله استلامدن عاجز اولدینی تقدیرده کآن
الترینک آیه سنی حجر اسودک اوزرینه وضع ایدرگی اشارت
ایدیلورک او جانبه استقبال و آتی تلثم (۱) ایتمک صورتلری جائز اولور
* قدوری و منح و طحطاوی * مکّه مکرمه یه نه اراً تلییه و خشوع ایله
باب معلادن و مسجد حرامه باب سلامدن دخول ایله اوچ کره
- الله اکبر - و متعاقباً - لا اله الا الله وحده لا شریک له
له الملك وله الحمد وهو على كل شیء قدير - دیمک مستجبدر
* منح * نبی محترم صلی الله تعالی علیه وسلم افندمن حضر تارندن
مبارک شفقتی ایله حجر اسودی تقیل و بکاء طویل و قوعبولدینی
مر ویدر * شرح مجمع * مسجد حرامه داخل اولندقدّه * اللهم انت
ربی و انا عبدک و البلد بلدک جئت هارباً منک الیک لا وادی فرأضک
و اطلب رحمتک و التمس رضوانک اسئلك مسئله المضطربین الیک
الخالقین عقوبتک اسئلك ان تستقبلنی الیوم بعفوک و تدخنی فی رحمتک
و تحاوزعنی بمغفرتک و تعیننی علی اداء فرائضک اللهم نجنی من عذابک
وافتح لی ابواب رحمتک و ادخانی فیها و اعذنی من الشیطان
الرجیم * دیمک دخی مستجبدر * جوهره * مشاهده بیت شریفده
دعا * مستجاب اولوب حتی امام اعظم حضر تالترینک بر مسلمه
(۱) تلثم * اویمک

دعا ايله وصيت بيورمش اولدقلري محقق و مثبتدر ﴿بحر رائق﴾
 حجر اسودی استلام و تقییدن صکره باب کعبه یی ولی ایدن محلدن
 یعنی طائف (۱) کندی صاغ طرفندن طوافه شروع ایدوب ردایی
 صاغ قولتغک التندن اخراج و طرفی کتف آیسره القا و منکب آیمیی
 کشف و اظهار ايله (وراء حطیمدن) یدی کره طواف ایدر
 و اوچ اولکی طوافده سرعت مشی ايله منکبینی تحریک و باقی
 درت طوافده سکونت اوزره مشی و حرکت ایلر * اثنای
 طوافده حجر اسوددن مرور اولندجه ممکن مرتبه استلام
 اولنه رق طوافی استلام ايله بدأ و ختم ايله مک بعده مقام ابراهیمه
 گلنهرک بوراده . ویر بولنه مدینی صورتده مسجدک ممکن اولان
 برحمانده ایکی رکعت نماز قیلمق لازمدر * اشبو طوافه طواف
 قدوم دینلور * طواف مذکور آفاقی به سنت ایسه ده اهل مکیه
 دگلدن ﴿قدوری و غیره﴾ طائف اولان مسلم . صول جانبندن
 طوافه شروع ایسه طوافی جائز ایسه ده لکن دم . واجب اولور
 ﴿جوهره﴾ طواف سابعدن صکره بیلنهرک طواف ثامنه
 باشلانلینی حالدیه شروع اولنمقدن ناشی اتمام اسبوع یعنی تکرار
 طواف سابعه لازم گلور * لکن طواف سابع ظنیله شروع
 اولنش ایسه اتمامی ایجاب ایتمز ﴿تنویر﴾ رکن یمانی بی بالاتقییل
 استلام . مندوبدر . امام محمد عندنده تقییل ايله برابر استلام .
 سنندر * رکن عراقی و رکن شامی استلام اولنمز ﴿منح﴾
 طائف . طواف و صلاتدن صکره تکرار حجر اسوده عودتله
 (۱) طائف * طواف ایدن

استلام ایتدکدن صکره (صفا) دینیلان محل مبارکه خروج
 و اوزرینه صعود و استقبال قبله و تکبیر و تهلیل و فخر کائنات
 (علیه افضل التحیات) افندمن حضر تلرینه صلات و سلام و حاجاتی
 ایچون اللری قالدیره رق حق سبحانه و تعالی حضر تلرینه دعا و استرحام
 ایدر . بوندن صکره صفادن نزول و مروه جانبنه توجه ايله
 سکونت و وقار اوزره مشی ایلر و (بطن وادی) دینیلان موقعه
 وصولده (میلین اخضرین) بیننده سرعتله سعی و بعده ینه سکونتله
 مشی ایدرک مروه به وارنجه آکا صعود و صفا اوزرنده
 ایتدیگی مثللو استقبال و تکبیر و تهلیل و تصلیه و عرض
 حاجات مطلوبه ایدر * بومعامله شوط واحد اولوب بونک گی
 التی شوط دها ایدرک یدی شوطی اتمام و صفادن ابتدا و مروه
 ايله اختتام ایلدکدن صکره مکة مکرّمهده محرمّا اقامت و استدکجه
 بیت شریفی نفلاً طوافه مبادرت ایلر ﴿قدوری﴾ سعی اولنور
 ایکن ﴿رَبِّ اغْفِرْ لِي وَارْحَمْ وَتَجَاوَزْ عَمَّا تَعْلَمُ إِنَّكَ أَنْتَ الْغَفُورُ
 الْكَرِيمُ وَاهْدِنِي لِلَّتِي هِيَ أَقْوَمُ فَإِنَّكَ تَعْلَمُ وَلَا تَعْلَمُ﴾ دعاسی اوقنور
 ﴿جوهره﴾ زيرده کی قطعهده محرر اولان و مکة مکرّمهده کائن
 بولنان مواضع مبارکه . محل اجابتدر .

نظم

دَعَاءُ الْبَرَايَا يَسْتَجَابُ بِكَعْبَةٍ وَمُلْتَزِمُ الْمَوْقِفِينَ كَذَا الْحَجَرِ
 طَوَافُ وَسْعَى مَرُوتَيْنِ وَزَمَزَمَ مَقَامُ وَمِزَابُ حِمَارِكَ تَعْبِيرُ
 ﴿نهر فائق﴾

علامه زحشرینک بیسانه گوره وراء . برکیمسه نك خلفی
ویا قدمی طرفلرندن کندویه مقابل اولان جهتدر . طوافک
وراء حطیم . دن وجوبی الی ارشون مقدار محلتک
بیت شریفدن اولدیغنه منیدر . بوتقدیرجه وراء . دن طوافی
ترك ايله حطیمله بیت مکرم بیننده بولسان فرجه دن طواف
ایداسه جائز اولیه جغندن مکه مکرمهده اقامت مدتیجه اعاده طواف
ایله امر اولنور و بلا اعاده مملکته عودت اولنسه دم . لازم اولور .
مع مافیه داخل حطیمدن طواف . صحیح و فقط نمازده کندویه
توجه . غیر صحیحدر . حطیمده حضرت ابراهیم (علیه السلام)
ایله هاجر (رضی الله عنها) نك مرقد مبارکری واردر .
محل مزبورده حطیم . دیندیگی مثللو حجر و خطیره دخی
اطلاق اولنور . جانب شمالده رکن عراقی ايله رکن شامی
آره سنده نصف دائره شکلنده یای گبی دیوار ايله ممتازدر .
دیوارک طولی ایکی ذراع ورنک آمیز مرمرلرله مفروشدر . حطیم .
مقدمه داخل کعبهده ایکن بعثت نبویه (علیه افضل التحیه) دن
اول قریش . بیت شریفی تعمیر و تجدیده مباشرت ایلدکارنده
اکماله مال حلاللری کفایت ایتدیگندن حطیم . بیت مکرمدن
خارجده قالمشدر . عبدالمک ابن مروان زماننده عبدالله ابن
زبیر (رضی الله عنهما) حضرتلری بیت شریفی تجدید
و تعمیر بیوردقلرنده حطیمی بیت معظمیه ادخال ایللمشلا ایدی
مؤخرأ حجاج ظالم بوزوبینه اولکی حالنه ارجاع ایتمشدر .
مقام ابراهیم (علیه السلام) دینیلان محل مبارک . مشار ايله

حضرتلرینک اسماعیل (علیه السلام) ايله هاجر (رضی
الله عنها) بی زیارتہ تشریفلرنده انشای نزول ورکوبلرنده
اوزرنده قائم اولدقلری حجاره در . طولی اون و عرضی یدی
قاریش اولدیغی مرویدر . مقام والای مذکور . کعبه معظمه نك
جدار شرقیسی طرفنده کی باب شریف . حذاسنده در . مقامک
جانب شمالنده مابینی تخمیناً اوج ذراع مسافهده مرمر طاشدن
منا و پک مرتفع براعلا منبر شریف واردر . حجر اسود ايله
مقام مزبورک آره سی یگریمی یدی ذراعدر . رکن ايله مقام
بیننده طقسان طقوز پیغمبر ذیشان (علیهم السلام)
مدفون اولدقلری مرویدر . مقام ايله منبر شریف . حذاسنده
و بئر زمزم . قربنده وجه کعبه مکرمهیه ناظر . باب السلام
العتیق اولوب حولی بیت شریفده در . یوم تروییه دن برگون
مقدم اولان ذی الحجه نك یدنجی گونی امام . خطبه قرائت
و خطبهده خلقه منایه خروج و بوراده اقامتی و عرفاتده صلاتی
و وقوفی و عرفاتدن افاضه و عودتک کیفیتنی تعلیم و بیانه مشابرت
ایدر . یوم تروییه اولان ذی الحجه نك سکزنجی گونی صلات
فجر . مکه مکرمهده بعدالادا منایه خروج و یوم عرفهده صلات
فجر ایضا ایدیلنجیه قدر مناده بعده عرفاته توجه ایدیلهرک
اوراده اقامت اولنور ﴿ قدوری ﴾ یوم سابع ذی الحجهده
او قونه جق اولان خطبه بی اکثر کتبهده صلات ظهردن
صکره اولق اوزره تعیین و نهایهده صلات ظهردن اول
اوله رق تبیین اولمش ایسهده فقط قبل الزوال مکروه

اولدینی جوهرده بیان ایدلمشدر . منایه طلوع شمسدن
 صکره خروج ایله صلوات خمس اوراده ادا ایله مک موجب
 فضیات و مکة مکرمه ده بیتوت و صلوات فجر آنده اقامت
 اساتدر ﴿ جوهره ﴾ یوم عرفه ده شمس . زائل اولدقده
 امام . کیفیت صلاتی و مناسک حج اولان عرفات و مزدلفه ده
 وقوف و انلردن افاضه یی و یوم نحرده رمی جاری و ذبح و حلق
 صورتلرینی و طواف زیارتی مبین جمعه گبی خطبتین . قرائت و وقت
 ظهرده صلات ظهر و عصری بر اذان و ایکی اقامت ایله مع الحجاج
 ادایه مبادرت ایدر . برکیمسه او گله وایکندی نمازلرینی
 منفرداً راحله سنده قیلمق استهسه امام اعظم حضر تدرنجه ظهری
 و عصری آری آری و قتلرنده ادا ایله مک لازم اولوب فقط
 جماعتله اولدینی گبی ایکسینی بروقتده جمع ایتمز و امامین عندنده
 منفرد . دخی جماعت مثللو جمع ایدر بعده موقوفه توجه ایله قرب
 جبل رحمتده وقفه ایدیلور . عرفاتک (بطن عرنة) دینیلان
 موقعدن غیری جمیع محلی موقوف و وقفهیه صالحدر . عرفه ده
 و قوفدن مقدم اغتسال و دعاده اجتهاد مستحیدر ﴿ قدوری و غیره ﴾
 شمس . غروب ایتد کده حجاج . سکونت و وقار اوزره عرفاتدن
 نزول ایله مزدلفهیه گلوب اوزرنده میقده (۱) اولان (جبل قزح)
 قربنه اینمک دخی مستحیدر . امام . حجاجه صلات مغرب و عشایی

(۱) میقده . قبل الاسلام اوزرنده اتش یا قلمش اولان بر اوجاق

بر اذان و اقامت ایله یاتسو و قننده ادا ایتدیرر . امام اعظم
 و امام محمد حضر تدرینه گوره صلات مغربی یولده ایفا ایله مک جائز
 اولیه جغندن ایفا ایدیلورسه طلوع فجر دن اول اعاده لازم گلور
 خلافاً لامام ابی یوسف ﴿ قدوری و ملتقی ﴾ مزدلفه ده قبل المغرب
 عشاییلنسه صلات مغرب ادا و اعاده عشا اولنور و اولجه قیلان یاتسو
 نمازی نافلهیه قالور و عشا اعاده اولنماشیکن فجر . ظاهر اولسه
 عشا جوازه متبدل اولور ﴿ تنویر ﴾ یوم نحرده فجر صادق
 طلوع ایتد کده امام . حجاجه غنسه یعنی گیجه نک آخرنده کی
 قرا آلقده ضیا منتشر اولمق سزین صلات صبحی ادا ایتدیروب
 و مع الحجاج و وقوف ایدوب عرفه ده ایتدیگی گبی دعا ایدر .
 بو وقوف . واجب اولدیغندن ترکیله دم . لازم اولور .
 مزدلفه نک (وادی محسر) دن ماعدا جمیع محلی موقفدر . بعده
 حجاج . طلوع شمسدن اول . صبح . و قننده منایه نزول ایدرک بطن
 وادیدن فسکه طاشی جرمنده یدی اوافق طاش ایله جرعه عقبه یی
 رمیه بدأ ایدرلر و جرعه عقبه عندنده توقف ایتیه رک هر طاشی
 آندقه تکبیر و اولکی حصاة (۱) ایله تلبیه یی قطع ایلرلر .
 بعده حاجی استر سه قربان . ذبح ایدوب صکره باشی تراش و یا شعربینی
 تقصیر (۲) ایدر . لکن تراش . افضلدر . بوندن صکره مقارنت
 نسادن غیری حجه منافی اولان هر شی کندیبه حلال اولور

(۱) حصاة . اوفق طاش (۲) تقصیر . قیریمق

﴿قدوری﴾ نخود و یا نوات تمر (۱) قدریدی طاش یا خود جنس
 ارضدن اولان طین (۲) گیشی . طریقندن اخذ و غسل ایدیلوب
 ابهام و مسیحه نك طرفلریله بش ذراع مقداری محله دگین
 بِسْمِ اللَّهِ وَاللَّهُ أَكْبَرُ رَغْمًا لِلشَّيْطَانِ وَحِزْبِهِ اللَّهُمَّ اجْعَلْ حَجِّي
 مَبْرُورًا وَسَعْيِي مَشْكُورًا وَذَنْبِي مَغْفُورًا - دینیلرک رمی ایدیلور
 رامی ایله موضع سقوطک مابینی بروجه محرر بش ذراع مقدارندن
 آز اولور ایسه طرح . عد اولمقله برابر هر تقدیر کفایت ایدر
 ایسه ده لکن سته مخالف اولدیغنه بناء آسائندن خالی اولمازه جمره رأس
 رجله و یا ظهر بیره (۳) واقع اوله رق بنفسه اسقوط ایدر سه جائز
 ایسه ده اگر کندی کندویه دوشمیو بده بر کیمسه آلوب وضع ایلر سه
 اعاده سی لازم اولور ﴿جوهره﴾ موضع جمره دن جمره اخذ
 و یا بر بیوک طاش آلوب کسر ایله اوفالده رق یتمش کو چک جمره پیدا ایتک
 و متجسس طاشله رمی ایله مک و هدر بناء علیه لایق اولان طاشلرک
 مغسول و پاک اولمسیدر ﴿تنویر و در مختار﴾ بوصره ده قریبان نسا
 و دواعیسی اولان لمس و قبله حلال اولمز و بعضلرینه گوره صید
 و طیب دخی غیر حلال ایسه ده متفق علیه دگلدر ﴿در مختار﴾
 حجاج . یوم مذکورده و یا ایکنجی یا خود او چنجی گونی مکه مکرمه یه
 گوب طواف زیارت اولمق اوزره بیت شریفی اشواط سبعة ایله
 یوقاروده بیان اولندیغی وجهله طواف ایدر لرله اولجه طواف قدومی
 (۱) نوات تمر خرمایکردگی * (۲) طین * بالحق (۳) بیره . دوه

متعاقب صفا و مروه بیننده سعی ایلمشالر ایسه طواف زیارتده
 رمل وسی ایجاب ایتمز اگر سعی ایلمامشالر ایسه بو طوافده ابتدا
 رمل بعده ذکر اولندیغی اوزره سعی ایلر لر . بوندن صکره
 مجامعت نسا حلال اولور . ذکر اولنان طواف زیارت . حجه
 فرض و ایام نحرده واجب اولدیغندن ایام نحر دن صکره یه تأخیری
 تحریماً مکروه اولدیغی گئی واجبی ترک . سیبیلله امام اعظم حضرت تبری
 عندنده دم . دخی لازم گلور ﴿قدوری﴾ نهاییه ده بیان اولندیغی
 اوزره رمی و ذبح و حلق و طواف . ایام نحرده ترتیب اوزره ادا
 اولنور و طائف اولان مسلمه ستر عورت و حدث و نجسندن
 طهارت کامله واجب اولور . کما مر ﴿جوهره﴾ طواف زیارتک اول وقتی
 یوم نحرک طلوع فجرندن صکره اولوب ایام نحرک اولکی گوننده
 افضل و ایام نحرده و لیا لیسندنه بلا کراهه جائزدر ﴿منح﴾ طواف
 وسی ده ایکن اقامت صلات اولنسه طواف وسی ترک ایدیلوب بعد
 الصلوة بنا اولنور ﴿جوهره﴾ طواف زیارتدن صکره منایه عودتله
 انده اقامت ایدیلور . ایام نحرک ایکنجی گونی بعد زوال الشمس
 چهار ثلثه رمی اولمق اوزره برنجی جمره دن که . مسجد خیف
 ولی ایدن جمره در . بوندن ابتدا ایله یدی طاش رمی و هر رمی ده
 تکبیر و بعده عندنده و قوف و دعا اولنور * بعده جمره اولی
 گئی جمره ثانیه ده دخی رمی و و قوف و دعا و جمره ثالثه یعنی عقبه
 دخی بر منوال محرر اجرا قلنور و بونک نزدنده و قوف اولمازه
 ایام نحرک او چنجی گونی دخی بعد الزوال چهار ثلثه وجه مذکور
 اوزره یدیشر طاش رمی ایتک صورتیله ایفا اولنوب عجله عودت

قصد ایدیلور ایسه مکه مکرمه به عزیمت ایدیلور و باقی قالان یگر می برطاش احتیاجی اولانه دفع و یا طاهر بر محله وضع اولنوره اگر عودت ایتیمو بده مناده اقامت اولنور ایسه یوم رابعده دخی دیگر لری مثللو بعد الزوال چهار ثلثه بی رمی ایله مک واجب اولوره بور می طلوع فجر دن صکره قبل الزوال تقدیم و اجرا ایتک امام اعظم حضر تدرینه گوره جائز در خلافاً لامامین ﴿قدوری﴾ را کباً و یا ماشیار می جائز ایسه ده جمره عقبه ده را کباً و ماعداده ماشیار افضلدر ﴿ملتقى﴾ آحمال (۱) و ائقالی (۲) منادن اولجه مکه به ارسال ایله کندوسی مناده رمی چهار ایچون اقامت ایتک شغل قلبی موجب اولدیغندن مکر و هدره کذلک عرفاته گیدر ایکن ائقالی مکه ده بر ائقدده دخی عدم امنیتدن ناشی کراحت وارد در لکن اشبوا یکی صورته کی کراحت شغل قلب و عدم امن ایله مقید بولندیغندن بولر موجود اولمدینی حالد کراحت دخی یوقدر ﴿جمع الانهر﴾ مکه به رجوع ایدلکده وادی محصب دینیلان محل که نماز و صدقه و تلاوت قرآن و دعا و ثنا ایله اشتغال اولنه جق بر موقع مبارک اولوب بوکنا ابطح و بطحاء و حصبا دخی دینیلور * بورایه نزول ایله بر ساعت مقداری اقامتدن صکره مکه مکرمه به گنوب استلدیگی قدر اقامت اولنور * بعده مکه دن سفر قصد اولندقدده بیت شریفه توجه و اشواط سبعة ایله طواف و داع اجرا ایدیلور * بو طوافده رمل و سعی اولنمز * اشبو طواف و داع اهل مکه نث

(۱) آحمال * یوکر (۲) ائقال * آغر لکر که اشیا مقصود در

غیر یسنه و اجبدر حاجی طواف و داعک ایکی رکعت نمازینی بعدالادا . ماء زمزم مدن شرب ایدوب و باب کعبه به گلوب تعظیماً عتبه مبارکه بی تقیل و وجه و صدر و خد ایتنی باب ایله حجر اسعد بیننده اولان ملتزمه وضع و صاغ الینی رفع ایدوب ﴿السائل ببابک یسئلك من فضلك و مغفرتک و یرجو رحمتک﴾ دیه رک کمال تضرع و خضوع ایله استرحاماتده بولنور و بیت مکرمک استار شریفه یعنی اورتوسنه بر مقدار تشبث و توسل و قلباً دعا و عیناً بکا و بیت شریفه عطف نظر حسرتنا ایدرک قهقریاً (۱) رجوع و مسجد حرامدن خروج ایلر ﴿ملتقى و مجمع الانهر﴾ « بعضلرینک بیاننه گوره بئر زمزمک عمقی التمش طقوز و یوقار یسنک عرضی درت ذراعدر * صوینک کثرتندن کندویه زمزم تسمیه اولنش و دروننده اوچ عدد عیونی اولدینی و کعبه معظمه دن بئر زمزم شریفک بعدی یگر می بر ذراع ایدوگی مروی بولنشدر * محرم اولان مسلم مکه مکرمه به داخل اولیوبده عرفاته توجه و اسلوب سابق اوزره اورده وقفه ایلسه طواف قدوم ساقط اولور و اشبو طواف سنت اولدیغندن ترکی سبيله حاجینک اوزرینه دم و صدقه و حرمت و قضا مثللو برشی لازم گلمز * بر حاجی عرفه گوننک زوالندن یوم نحرک طلوع فجرینه قدر براز وقت عرفاتده وقفه ایتسه و یا عرفاتدن سریعاً یا خود نائماً و یا کندویه اغما و سکر و جنب و حیض حالرندن بری و یا بر قاجی عارض

(۱) قهقریاً * گیر و گیر چکیه رک

اوله رق مرور آیه سه وینه بونک گبی رفیق ویاغیرسی کندی
 ایچون حجه اهلل (۱) ایدرک احراملنسه ویا یوم عرفه نک عرفه
 اولدینی معلومی اولیه رق واقف اولسه حجی صحیح اولور ﴿در﴾
 مختار و طحطاوی ﴿بو صورتده رفیقی و غیرسی بلا
 احرام گچر ایکن احرامه نیت و مناسک حجی ادا ایتسه
 امام اعظم حضرتلرینسک عندنده حجه کافدر خلافاً لامامین
 ﴿جوهره﴾ حاجی عرفاتده وقفه و آندن مرور ایتسه حجی فوت اولور
 چونکه ﴿الحج عرفة﴾ حدیث شریفی موجب حجه عرفه ده
 وقفه ایتک حجت ایکی رکنسک معظمی در * وقفه نک معظم رکنین
 اولسی انجق ایشلندیگی حالده حجت بطلانندن امنیت حاصل
 اولدیغنه مبنی اولغله طوافک افضلیتنه منافی دگلدر بنابرین
 بو صورتله وقفه ایلمیان حاجی طواف وسی ایدوب افعال عمره
 ایله تحلل (۲) و حجی هر قدر نذر و تطوع اولور ایسه ده سنه آتی ده
 قضا ایدرو اوزرینه دم لازم گلمز ﴿درر و غیره﴾ سبق ایدن
 افعال حجت جمله سنده مرأه رجل گیدر * شو قدر که مرأه رأسی
 آچیوب یالکز براز وجهنی کشف ایدر و تبلیه ده رفع صوت
 ایتیه رک کندی نفسنه اسماع ایتک درجه ده تبلیه ایلر و طوافده
 رمل ایتمز و (میائین اخضرین) بیننده سعی ایلمز و باشنی تراش
 ایتیوب بلکه مقراص ایله صاچلرینی براز قیرپار ﴿قدوری﴾
 مرأیه خفینی و حلیسینی (۳) و ثوب حریرینی لبس ایله مک و باشنه
 (۱) اهلل * لیک دیه رک رفع صوت ایتک (۲) تحلل * احرامدن
 چیتق (۳) حلی * قادیلرک جواهر و سائرده دن اولان زینت اشیایی

خماره وضع ایتک جائزدر * بلا ایذاء تقیل . ممکن اولسه بیله
 ازدحام . وقتنده حجر اسوده تقرب ایله استلامدن مرأه ممنوعه در
 ﴿جوهره و غیره﴾ حیض . مرأیه طوافدن غیری نسک حجی
 مانع اولمز و ایام نحر دن صکره طاهره اولدقده طواف زیارتی
 ادا ایدر و اوزرینه قربان ایتک گبی برشی لازم گلمز * وقوف
 و طواف زیارتدن صکره حائض اولور ایسه طواف وداع .
 ساقط اولور * نفساء دخی حکمده حائض گیدر ﴿تنویر﴾

ایکنجی باب

حج قرانه دائر مسائلی محتویدر

﴿یا آل محمد اهلوا بحج و عمره معاً﴾ حدیث جابلی دلالتیه
 حج قران . ائمه حنفیه حضراتی عندنده حج تمتع و افراددن
 افضلدر . قران . حج ایله عمره بیننی جمع ایله مک دیمکدر *
 محرم . درت نوع اولوب بری مفرد بالحجدر که اشهر حجده گرک
 میقاتدن گرک قبل المیقات یالکز حج . نیتیه احرام ایدندره دیگری
 اشهر حجده و یا اولجه میقاتدن و یا قبل المیقات ﴿لَیْکَ بِعُمْرَةٍ﴾
 دیه رک یالکز عمره یه نیت و صکره اعمال عمره یه مبادرتله اوسنه
 حج ایتیاندر که بوکا مفرد بالعمره دینیلور . بریده اشهر حجده
 و یا اولجه میقاتدن و یا قبل المیقات احرامده حج ایله عمره بی جمع

ایدرک و ﴿لَبَّيْكَ بِحَجٍّ وَعُمْرَةٍ﴾ دهرک افعال حج و عمره می
معاً اجرا ایدن قارندر . در نجیسی متمتعدرکه اشهر حجده و یا
اولجه یا لکز عمره نیتیه احرام و عمره می و یا اکثر اشواطی اشهر حجده
ایفا ایله بعد التحلیل اهلنه گتمیه رک اول سنه وقت مخصوصی حلولنده
حج ایچون محرم اوله ﴿ملتقی و مجمع الانهر و غیرها﴾ صفت قران .
احرامده عمره و حج ایله برابر تلبیه و رفع صوت ایله مکدر .
میقاتدن و یا قبل المیقات احرام قصدیه ایکی رکعت صلات احرام .
عقبنده ﴿اللهم انی اريد الحج والعمرة فيسريهما لي وتقبلهما
مني﴾ دینیلور . مکه مکرمه یه داخل اولندقدن اوله عمره
ایچون بیت مکرم . یدی شوط ایله طواف اولنوب اوچ اولکی
طوافده رمل (۱) و باقیسنده سکونت اوزره مشی و صفا و مروه
بیننده سعی ایتدکن صکره بلا حلق . حج ایچون دخی طواف
قدوم اولنه رق بعده ینه صفا و مروه بیننده حج مفردده بیان
اولندینی و جهله سعی ایدیلور ﴿قدوری و ملتقی﴾ اهلالی یعنی تلبیه می
و بونده لازم اولان رفع صوتی میقاتدن بدایتک شرط اولمدیغندن قبل
المیقات دخی جائزدر ﴿درر﴾ عمره و حج ایچون ایکی طوافی
متوالیا ایفا ایله بعده سعیلری دخی بویله جه اجرا ایله مکه جواز وار
ایسه ده سعی عمره نك تأخیری و طواف قدومك اكا تقدیمی
سببیه اسائت ترتب ایدر ﴿درر و ملتقی و مجمع الانهر﴾ یوم

(۱) رمل . حین مشی ده اوموزلری تحریک ایلیه رک قوتلو یوریمک

نحرده جمره عقبه رمی اولندقدن ادای نسکینه تشکراً دم قران
اولمق اوزره و جواباً برشاة و یا مستقلاً یا خود دیگر الی مسلم ایله
مشترکاً بربدنه و یا بر بقره ذبح ایدیلور . بونلردن بری بولنه مامسندن
و یافقر حالدن ناشی ذبح هدی ایدیله مدیگی حالدن یوم نحر دن مقدم
اولمق و عرفه گونی ختام بولمق یعنی ذی الحجة نك یدی و سکر
و طقوزنجی گونلرنده صائم بولمق اوزره اوچ گون اوج طوتیلور
ایام مذکوره ده اوج طوتلمقسزین عرفه مرور و یوم نحر
دخول ایدر ایسه بعده صوم کافی اولمدیغندن و جواباً دم . ترتب ایدر
﴿قدوری و ملتقی﴾ صومی عرفه گونه قدر اوچ گون متوالیا اجرا
ایله مکده افضلیت واردر . مع مافیه ذکر اولنان اوجی ایام مذکوره دن
اول گرک متوالیا گرک متفرقاً طوتمق دخی جائزدر * صوم . بدل
هدی اولوب بدل ایسه انحق شاردن اولدیغنه بناء نص
شریف . بدلی وقت حجه تخصیص ایلمشدر ﴿درر﴾ مختار
و طحطاوی ﴿حاجی﴾ افعال حجدن فراغدن و ایام تشریقك
گذرانندن صکره مکده و یا مملکتده یدی گون دها متوالیا
و یا متفرقاً صائم اوله رق عشره کامله بی اکمال و ایفا ایدر . لکن
بونده ده تابع . افضلدر * قارن . مکه یه داخل اوله رق و یا اولیه رق
طواف عمره می اجرا ایلمکسزین عرفاته توجه و وقوف ایسه اشبو
و قوفله عمره سنی رَفَض (۱) ایتمش اوله جغندن دم قران لازم اولمز
چونکه دم قران ایکی عبادتک جمعی نعمته تشکر ایچون اولوب

(۱) رَفَض * ترك ايلك

بوحاصل اولمدينى حاليه دم قران. واجب اوليسوب انجق ترك
عمره دن طولاي اوزرينه دم رقص وقضاي عمره لازم گلور
﴿قدورى وملتقى وغيرها﴾ قارن. عمره يي ايام تشرى قدن
صكره قضايدر وواجب اولان دم. دم جبر اولمغله آندن اكل
ياخودا نكله اشتراك جائز اولمز قارن. مكه يه داخل اولوبده درت كره
طوافدن صكره عرفاته توجه ايلسه ركن عمره بولندينى جهته
عمره سى باطل اولميه جفندن يوم نخرده طواف زيارتدن اول
اوج طواف ده ايتمگله عمره سنى اتمام ايلر ﴿جوهره ومنح﴾

اوچنجى باب

حج تمتع بيانده در

ائمه حنفيه حضراتى نزدنده حج تمتع. حج افراددن افضلدر *
تمتع ايكي نوع اولوب برى هدى يعنى قربانى برلكده سوق
ايدر وديگرى برابر گوتورمز * ميقاتدن ويا قبل الميقات عمره
نيتيله احرام و مكه يه دخول وعمره ايچون كعبه معظمه يي طواف
وسعى دن صكره هدى. سوق ايتمديسه حلق ويا تقصير ايله عمره دن
خروج و تحلل و طوافه بدأ ايتدكده قطع تلبيه و مكه مكرمه ده بلا
احرام. اقامت ايله مك حج تمتعك صقتلر ننددر * يوم ترويه
اولدقده تمتع. نيت حج ايله مسجد شريفدن احرامه داخل

اولوب مفرد اولان حاجك افعالى ادا واوزرينه واجب اولان
دم تمتع اجرا ايدر ﴿قدورى وغيره﴾ مسجددن احرام.
شرط اولمديغندن حرمدن ايدلسه ده جائز ويوم ترويه دن مقدم
احرام. افضلدر ﴿درر وملتقى﴾ اگر احرام حجدن صكره منايه
گيتمزدن اول طواف قدوم ويا نفل ايچون طواف ورمل وسعى
اولنديسه طواف زيارتده رمل اولميه جنى گي بعده سعى دخى
اولمز ﴿جوهره﴾ تمتع. ذبح ايدجك هدى بوله مز ويا
قدرتى اوله مز ايسه قران مثللو اوج گون ايام حجه ویدی گونده
حين رجوعده صائم اوله رق عشره كامله يي ادا ايدر ﴿قدورى﴾
صوم ايام ثلثه يي احرام عمره دن صكره ادا جائز ايسه ده اندن
مقدم جواز يوقدر وآنفا بيان اولندينى وجهله صومك صوك
گونى عرفه اولمق اوزره تاخيرى و تسابى مندوبدر
﴿درر﴾ وجه اول اوزره تمتع هدى مكه يه سوق ايتمك
قصد ايتسه محاندن عمره ايچون تلبيه ايله احرام ايدرك سوق
ايدر. اگر قربان اوله جق حيوان. مطيع اولورسه يدمكدن
اوگنده سوق ايتمك ده افضلدر زيرا فعل نبي (عليه السلام)
بويله واقع اولمشدر. قربان. بدنه ايسه جلد ويا نعل.
مقوله سندن قلاده (۱) ايدرك اكثا تعليق ايلر. بدنه يي
اشعار ايله مك يعنى انك سنامى (۲) صاغ ياخود صول طرفدن
(۱) قلاده بوراده قربان اوله جفته علامت اولمق اوزره حيوانك بوينه
اصيلان شى (۲) سنام * دوه نك اورگي

براز شق ايله اخراج دم ايتمك امامين عندنده جائز
ايسه ده بونده تعذيب حيوان اولديغدن امام اعظم حضرت تليينه
گوره مكر و هدر ﴿قدوري وغيره﴾ مكه يه داخل اولندقدده
عمره ايچون طواف وسعي اولنور وسوق هدي ايدليگي جهته
احرام عمره دن تحلل ايدلز . بعده يوم ترويه ده حج ايچون
حرمدن تكرار احرامه گيريلور . يوم ترويه دن مقدم احرامه
داخل اولمق جائز و بلكه افضلدر . قسم ثايندن اولان متمتع
دخي دم تمتع . واجبدر . يوم نحرده تراش اولندقدده احرام حج
وعمره دن خروج ايله حلال اولنور . اهل مكه ايله داخل ميقاتده
اولانلر ايچون حج تمتع وقران جائز اولمديغدن انلر انحق حج
افراد ايدرلر . متمتع . سوق هدي ايلمك سز ين حلق ايله عمره دن
بعدالفراغ بلده سنه عودت ايلسه تمتي باطل اولور ﴿قدوري
وغيره﴾ اشهر حجدن مقدم عمره نيتيله احرام ايديلوبده درت
شوطدن نقصان اوله رق عمره ايچون طواف ايدلسه و اشهر حجك
حلولندن صكره باقي قالان طوافي اتمام ايله حج . نيتيله احرام
اولنسه حج تمتع ايدلمش اولور . اگر عمره ايچون اشهر حجدن
اول درت كره ويادها زياده طواف ايديلوبده بعده اول سنه ده
حج اولنسه تمتع اولمز . اشهر حج . شهر شوالك ابتداسندن
اعتباراً ذى الحجة نك اوننه قدر ايكي ماه اون گون ايسه ده نيت
حج ايله احرامى اشهر حجه تقديم ايله مك دخي جائز و بوحالده
حج منعقد اولور ﴿قدوري﴾ يوم نحر دخي ايام حجدنر خلافاً

لامام ابى يوسف . بر مسلم . اشهر حجده زيد ايله تكلم ايتامگه
يمين ايدوبده يوم نحرده تكلم ايله سه امامين عندنده حاث (۱) اولور
امام ابى يوسفه گوره حاث اولماز ﴿جوهره﴾ كوفي اولان مسلم . اشهر
حجده عمره ايدوب احرامدن خروج ايدرك مكده ويا داخل
ميقاتده اقامتد نصكره حرمدده احرامه داخل اوله رق حج ايتسه
تمتعى صحيح اولور ﴿ملتقى وغيره﴾ مرأه . احرام وقتده حائض
بولنسه غسل ايدوب احرامه گيره رك تليه ايدر و حجاجك
ايتديگي گي افعال حجي ادا ايلر . لكن طاهره اولنجه يه قدر
بيت معظمى طواف ايدمه مز . اگر وقوف و طواف زيارتدن
صكره حائض اولور سه مكده دن انصراف ايدوب طواف
وداعى ترك ايدر و بونك ايچون برشى لازم گلمز ﴿قدوري﴾
مكه دن خروجدن اول پاك اولدينى تقديردده طواف وداع .
ايجاب ايلر . شايد بيوت مكه ي تجاوزدن صكره طاهره
اولديسه عودت ايتمز ﴿جوهره﴾

در دنيجي باب

غير ايچون ايديله جك حج بياننده در

عبادات ماليه ده مطلقاً نيابت جائز و بونده صاحبك قدرت و عدم
قدرتي مساويدر چونكه بوبابده فقرايه ايصال نفع . مقصود

(۱) حاث . يميني طوميان

اولد یغندن فعل نائبله ده مقصد . حاصلدر . عبادت بدنیه ده
 نیابت . قطعاً جائز اولمز و بونده عجز و عدم عجزه اعتبار اولمز .
 چونکه عبادت بدنیه ده رضای الهی ایچون نفس اماره یی و جوارحی
 اتعاب (۱) مطلوب اولوب نیابتده ایسه بو حصول بوله ماز .
 عبادات بدنیه و مالیه دن مرکب اولان حج مثلاً عبادتده موت
 وقوع بولمق و یا حبس و مرض گبی زوالی ممکن عجزدن ایسه
 موته قدر عجزک دوامی و یا علمی و زمانت (۲) گبی زوالی غیر مرجو
 عذری بولمق شرط لایله نیابت . تجویز اولمشدر نایب عن الحج
 ﴿لَيْسَ لَكَ بِحُجَّةٍ عَنْ فُلَانٍ﴾ دیهرک احرام ایله مک و نفقه
 فاضله یی وصی یه و یا ورثه یه رد ایتمک لازمدر ﴿ملتقى﴾ آمر حج .
 فضله نفقه یی نفسنه هبه ایدوب (ینه نفسک ایچون قبضه سنی
 وکیل ایتدم) دیسه فضله نایب حلال اولور ﴿اشباه﴾ مأمور
 بالحج اولان کیمسه یولده مریض و یا محبوس اولسه حج ایچون مالی
 غیر یه دفع ایده من انحق آمر . مالی حین اعطاده (دیلدیگک گبی
 ایشله) دیدیسه حج ایچون مالی آخره ویرمک مریض اولسه
 بیله جائز اولور ﴿در مختار و ابن عابدین﴾ مأمور بالحج .
 طریق حجه قبل الوقوف وفات ایتسه و یا نفقه سی سرق اولسه
 امام اعظم حضر تله نجه آمرک مجموع مالندن باقینک ثلثی وفا ایدرسه
 و آمر مأموره بر منزل تعیین ایتدیسه ثلث مذکور ایله صکره بر کره
 آمرک بلده سندن و امامین عندنده انحق مأمورک وفات
 ایلدیکی محلدن کذلک بر دفعه حج اولور . امام ابی یوسف
 (۱) اتعاب . بورمق (۲) زمانت . کوتورم اولمق

عندنده وصیتک محل نفوذی ثلث اولد یغندن ثلث مالک بقیه سیله
 و امام محمده گوره مأموره ویریلان اچه نک باقی قالان مقدار یله
 حج ایدمک لازم گلور و شاید باقی برشی قالمش ایسه بو حالده وصیت
 باطل اولور . مثلاً کندوسی ایچون حج ایله وصیت ایدرک وفات ایدن
 مسلم درت بیک درهم ترک ایلسه و وصی مأموره بیک درهم
 اعطا ایدوب اوده سرق اولسه عند الامام مال باقینک ثلثی
 اولان بیک درهمله و اودخی سرق اولسه ینه مال باقی اولان
 ایکی بیک درهمدن ثلث ایله و هکذا ثلث مالدن حجه کفایت ایتیه جک
 درجه یه وار نجه یه دیک قاله جق مقدار له بلده سندن و یا یتشدیگی بردن حج
 اولور . امام یوسفه گوره اولکی بیک درهم سرق اولندقد ثلث ترکه دن
 باقی اولان اوچ یوز او توز اوچ و بر ثلث درهمله موقع وفاتدن و یا
 یتشدیگی محلدن حج ایدیلور . و تکرار سرق وقوع بولسه وصیت
 باطل اولور . و امام محمده گوره آلف اولدن باقی و ارایسه محل
 وفاتدن و یا یتشه بیلدیگی بردن حج اولنوب فقط باقی یوق ایسه کذلک
 وصیت حکمسنر قالور ﴿در مختار و ابن عابدین﴾ بالذات حجه
 خروج ایدن مکلف . قبل الوقوف وفات ایدوبده کندیسی ایچون
 حج ایله وصیت ایتسه مال و یا مکانی بیان ایلش ایسه موجب حجه
 معامله اولور و بیان ایلماش ایسه ثلث مالی وفا ایدر ایسه کندی
 بلده سندن و ایتمز ایسه وفا ایلدیکی محلدن حج ایتدیریلور
 ﴿تنویر﴾ مقدما نفسیچون حج ایتیان کیمسه نک و مطلقاً مرأه
 و عبد مآذونک احجاجی جائز ایسه ده حج ایتمش اولان حر بالغ و عاقل .
 ار ککک نیابتی اولی در ﴿ملتقى﴾ علی الاطلاق حج ایله وصیت ایدلسه

وصی بنفسه حج ایتک جائز اولوب لکن وصی . ورثه دن بولندیغی یاخود غیر یه دفع مال ایله امر اولندیغی حالدہ ورثه نك اجازتنه توقف ایدر ﴿اشباه﴾ برمسلم . مرض وحبس گبی زوالی مأمول عجزدن ناشی حیاستده بدل یوللایوب بعده عجز . مستمر اولوبده وفات ایتسه فرض . ساقط اولور . وقبل الوفات عجزی زائل اولسه تکرار بنفسه حج ایتک لازمگور و بدلا ایتدیردیگی حج . تطوع صاییلور . اگر عمی وزمانت مثلاً عجزك اندفاعی امید اولمز ایتسه عجز . مستمر اولسه بیله نیابتله كذلك فرض . سقوط ایدر ﴿بحر﴾ ایکی آمرك حجی ایچون بر مأمور احرام ایتسه آمرلر گرک ابوینی گرک اجانب اولسون هر برینی آخره تشریک جهتدن آمرلرک امرلرینه مخالفتله گویا انلرک ماللرینی نفسنه صرف ایتمش اوله جفنه واحدهایی صورت اولویتده ترجیح ایله حجی اگا تخصیص ایتمگه قادر اوله میه جفنه بنساء حجی فرضاً ویا نفلاً نفسی ایچون ایلمش اوله جفندن آلدیغی نفقه لری تضمین لازمگور و حجی امرایلیان ایکی شخصك عهدہ لرندن فریضه حج . خروج ایتزه لکن مأمور . لاعلی التعین برینی نیتله احرامی . ابهام (۱) یاخود ﴿لَبَّيْكَ حَجَّةً﴾ - دیوب غیری برشی ذکر ایتیه رك احرامی . اطلاق ایدوب بعده افعال حجدن اول . احدهایی تعیین ایله سه صحیح اولور خلافاً لامام ابی یوسف . اما بلا امر . ابویندن ویا ایکی اجنبدن گرک تعیین گرک ابهام . صورتیله تبرعاً حج ایچون احرام ایدیلوب بعد الادا ثوابی معیناً برینه ویا ایکیسنه اهدا ایتک جائز

(۱) ابهام * مبهم براقق یعنی بلو ایتامک


اولدیغی گبی متبرع . وارث اولوبده احد ابوینك ذمتده حجة الاسلام بولنوب بلاوصیه فوت اولمش اولسه علی خلاف القیاس هم کندیسندن همده احد ابویندن فرض . ساقط اوله جفی احادیث شریفه ایله ثابتدر . اگر اجنبی ایتسه یا لکر کندیسندن فرض . ساقط اولوب میتة انجق ثواب حج . عائداولور ﴿در مختار وابن عابدین﴾ قران و تمتعه آمر . اذن ویرمش ایتسه تمتعه وقران . دملری وجنایت دمی مأموره و احصار . دمی . آمره ترتب ایدر . مأمور . عرفانده وقوفدن اول . جماع ایتسه نفقه آمری ضامن اولور و سنه آتیده کندی مالندن حج ایتک لازمگور ﴿درر﴾ مأموره خدمت ایدن کیمسه نك نفقه سی مأموره عائدا و مأمور خادم استخدا ایدر مقوله دن اولدیغی حالدہ قوللاندیغی خدمتکارك نفقه سی آمره راجع اولور ﴿اشباه﴾ قبل الاحرام مأموری نیابتدن عزل واسترداد مال جائزدر . بوصورتده نائبك عزلی خیانتی ایچون ایتسه رجعت وعودت مصرفی کندی مالندن وضعف رأیندن ویا مأمور حجی جهلندن ناشی ایتسه مال میتدن و هیچ بر تهمتدن طولای اولدیغی تقدیرده مال وصیدن ایجاب ایدر ﴿تاتارخانیة﴾ نماز واورج و صدقه و تلاوت قرآن و ذکر و طواف و حج و عمره و زیارت قبور و تکفین موتی و سائر انواع عباداتدن برینه حین عملده نفسی ایچون نیت ایدلدیگی حالدہ بیله آنك ثوابی آحیا و أمواتدن غیره هبه وهدیه ایله مك جائز اولدیغنه دائر بر چوق آدلہ واردر * از جمله بری دارالقطنی دن روایت اولنان حدیث شریفدرکه برکیمسه

طرفندن نبی محترم صلی الله تعالی علیه وسلم افدمنز حضرت تدرینه
 (کَانَ لِي ابْوَانِ اَبْرَهًا حَالِ حَيَاتِهِمَا فَكَيْفَ لِي بِرَّهَآ بَعْدَ مَوْتِهِمَا)
 یعنی بنم حیانتارنده کندولرینه ابولک ایلدیگم ابونیم وار ایدی
 وفاتلرندن صکره کندولرینه بر واحسانم نصورتله ممکن اولور
 مآلنده وقوعبولان سؤاله جواباً $\text{انَّ مَنْ اَبْرَ بَعْدَ الْمَوْتِ اَنْ$
 $\text{تَصِلِيَ لِهَآ مَعَ صَلَاتِكَ وَاَنْ تَصُومَ لِهَآ مَعَ صَوْمِكَ}$ امر جایی
 شرفصادر اولمشدر معنای منیفی نمازکله برابر انلر ایچون
 نماز قیلهسک وصیامکله برابر انلر ایچون صائم اولهسک دیمکدر
 حضرت علی (کرم الله وجهه) دن منقولاً کذلک
 دارالقطبی دن مروی اولان $\text{مَنْ مَرَّ عَلَى الْمَقَابِرِ وَقَرَأَ قُلْ هُوَ اللهُ$
 $\text{اَحَدٌ اَحَدٌ عَشْرَةَ مَرَّةً ثُمَّ وَهَبَ اَجْرَهَا لِلْأَمْوَاتِ أُعْطِيَ مِنَ الْاَجْرِ}$
 $\text{بَعْدَ الْاَمْوَاتِ}$ و انس (رضی الله عنه) حضرت تدرندن
 روایت اولنان $\text{مَنْ دَخَلَ الْمَقَابِرَ فَقَرَأَ سُورَةَ اِسْ خَفَّ اللهُ}$
 $\text{عَنْهُمْ يَوْمَئِذٍ وَكَانَ لَهُ بَعْدُ مِنْ فِيْهَا حَسَنَاتٌ}$ و کذلک انس
 (رضی الله عنه) جانبندن حبیب کبریا علیه افضل التحایا
 افدمنز حضرت تدرندن استفسار زمیننده وقوعی ابو حفص
 العکبری دن روایت اولنان (قَالَ اَنْسُ اِنَّا نَتَصَدَّقُ عَنْ مَوْتَانَا وَنُحْجِ

$\text{عَنْهُمْ وَنَدْعُو لَهُمْ فَهَلْ يَصِلُ ذَلِكَ لَهُمْ } قَالَ النَّبِيُّ صَلَّى اللهُ عَلَيْهِ$

وَسَلَّمَ $\text{نَعَمْ اِنَّهُ لَيَصِلُ اِلَيْهِمْ وَاِنَّهُمْ لَيَفْرَحُوْنَ بِهِ كَمَا يَفْرَحُ اَحَدُكُمْ}$
 بِالطَّبَقِ اِذَا اُهْدِيَ اِلَيْهِ $\text{مَثَلُوْا حَدِيْثَ شَرِيْفٍ دَخَى شَرْفُوْارِد}$
 اولمشدر رسول اکرم صلی الله علیه وسلم افدمنز حضرت تدری
 بری نفس نفیس نبویلری و دیگری امتلری ایچون اولمق
 اوزره آقلى قرهلى الآجه ایکی قوچ تضحیه بیوردقلری
 ابو داوددن مرویدر بونلره وسائر آثار جلیلهیه نظراً
 انسانه غیرک عملندن نفع اولدیغی ثابت اولور $\text{حَلَبِيْ نَقْلًا عَنْ الزَّيْلَعِيْ}$
 حجه صریحاً نیابتک صحتنه دلیل اولمق اوزره ابن عدینک
 کاملده و امام بیهقینک شعبده و امام سیوطی نک جامع الصغیرنده
 $\text{اِنَّ اللهَ يَدْخُلُ بِالْحَجَّةِ الْوَاحِدَةِ ثَلَاثَةَ نَفَرٍ الْجَنَّةِ الْمَسِيَّتِ وَالْحَاجَّ}$
 $\text{عَنْهُ وَالْمُنْفَذِلَذَلِكَ}$ حدیث شریفی ذکر و ایراد قلنمشدر
 $\text{وَاَنْ لَيْسَ لِلْاِنْسَانِ اِلَّا مَسْعٰى}$ آیت جلیلهینه بعضلری
 طرفندن (الا اذا وهبه له غيره) یعنی برکیمسه کندى عملک ثوابی
 غیرى به بخش ایدرسه اولور معناسی ویرلمشدر طحطاوی
 و کمال ابن عباس (رضی الله عنهما) دن روایت اولندیغی اوزره
 آیت جلیلهیه مذکورہ $\text{وَالَّذِينَ اٰمَنُوا وَاتَّبَعَتْهُمْ ذُرِّيَّتُهُمْ بِاِيْمَانٍ}$
 $\text{الْحَقْنَابِهِمْ ذُرِّيَّتُهُمْ}$ نص شریفله منسوخدر برده وَاَنْ
 $\text{لَيْسَ لِلْاِنْسَانِ اِلَّا مَسْعٰى}$ آیت کریمه سی موسی و ابراهیم
 (علیهما السلام) حضرت تدرینک قوملرینه مخصوص صدرکه

انلرك صحفانده اولانى ﴿﴾ ام لم ينبا بما في صحف موسى و ابراهيم
الذى وفى ﴿﴾ آيت كريمه سندن صكره حكاية واقع اولمشدر
﴿﴾ وان اساتم فلها ﴿﴾ كلام مجيدنده كي (فلها) اي
فعليتها و (لهم اللعنة) اي عليهم ايله تفسير اولنديغي گي
(للانسان) دخي اي على الانسان ايله تفسير اولمشدر
عبادتك برقاچ نوعي اولوب بوندن برى زكات وعشر وكفارات
وصدقة فطر مثللو عبادت ماليه در. ديگري صلات وصوم واعتكاف
وتلاوت قرآن واذكار گي عبادت بدنيه محضه در. بريده
حج. ماندى ماليه و بدنيه دن مركب اولان عبادت در ﴿﴾ جمع الانهر ﴿﴾



بشنجي باب ﴿﴾

محرم حقنده اولان جناياته دائر مسائل مخصوصه در

جنايات . جمع جنایت در . جنایت . شرعاً حرام اولان فعلك
اسميدر . بوراده مقصود . احرام ويا حرم . سبيله حرام
اولوب ايشلمه سي منع اولمش اولان فعلدر ﴿﴾ در مختار ﴿﴾ محرم
بالغ اولان مسلم . گوزل رايجه لو شيلري استعمال ايلسه اوزرينه
كفارت واجب اولور شويكه بر عضو كامله ويا عضو واحد دن
زياده سنه ولو سهواً اولسون طيب سورر ايسه بر دم و بر
عضودن اقل . محلى تطيب ايلر ايسه صدقه لازم گلور . يوم

ويا ليله كامله ده ديگيلمش ثوب اکتسا يا خود باشي برشي ايله
بنفسه ويا ناتم ايكن غيريسي ستر ايتسه بر دم و بر يومدن ناقصده صدقه
ايجاب ايدر . محرم . رأس ويا لحيه سنك ربغى ويا دها زياده سنى
تراش ايدر ايسه دم و ربعدن اقل ايچون صدقه ومواضع حجامتى
تراش ايدوب احتجام ايلرسه امام اعظم حضر تيرنجه دم وبعد
الحلق احتجام ايلمزسه صدقه وامامين عندنده هر حالده صدقه
لازمدر ﴿﴾ قدورى ودر مختار ﴿﴾ دم دن . انجيه ده كافي اولان
قربان و صدقه دن . صدقه فطره مقصوددر ﴿﴾ ملتقى وغيره ﴿﴾ محرم
باشنه ويا صقالنه ويا اليه حنا سورسه ويا بر عضو كاملنه زيت و خل خالصى
(۱) على وجه التطيب طلا ايتسه بونلر سائر آدهان (۲) گي اوليوب
طيب عد اولندقلرندن ينه حكم مذکور جارى اولور اما بونلري
اكل ويا بورنه استنشاق ايتسه ويا بونلرله جراحت ويا شقوق رجه
مداوات ايلسه ويا اذينه آيتسه تطيب وجهله استعمال عد اولنجه جغندن
برشي لازم گلمزه لكن مسك وغبر و غاليه (۳) وكافور مثللو بنفسه
طيب اولان شيلري استعمال . مداوات طريقيه اولسه بيله جزا
ايجاب ايدر . اگر بونلري طعام مطبوخه قارشدير سه طيبك حكمي
اولمديغندن برشي ترتيب ايتماز وغير مطبوخه قارشدير ديني حالده
حكم . غاليه اولوب طيب . غالب ايسه دم . ايجاب ايدوب
مغلوب اولديغي صورتده دم . لازم گلمز ايسه ده رايجه سي
بولندقدده انك اكلى شم تفاح (۴) گي مكر وهدر * مشروباته

(۱) خل خالص . ابو سرکه (۲) آدهان . ياغلر (۳) غاليه * زياده گوزل
قوتولو و قيتلو بر نوع طيب (۴) شم تفاح * الماي قوتلامق

قارشید بر لدینی حالدہ دخی علی قول حکم بویله در و دیگر قوله گوره .
 طیب . غالب ایسه دم و مغلوب ایسه بر دفعه ایچون صدقه و مکرراً شرب
 ایدر سه دم . لازم گلور در مختار و ابن عابدین سر او یل و قیص
 و قبادن عبارت اولان ثوب مخیطی عادت اوزره اکتسا ایسه دم .
 لازم اولور * اگر ازارگی ارقه سنه آلور ایسه دم . ترتب
 ایتمز جوهره ایکی الارینک و یا ایکی ایاقلرینک طر ناقلرینی
 جملة مجلس واحدده تقایم ایدر ایسه بردم و یا لکنز بر ال
 و یا بر ایانک طر ناقلرینی کسر ایسه ینه بردم . لازمدر * والارینک
 و ایاقلرینک طر ناقلرینی هر بر الی و یا هر بر ایانی بشقه بشقه اوله رق
 درت مجاسده کسر سه عند الامامین درت دم . و امام محمد گوره
 كذلك بردم . اقتضا ایدر * اگر بش طر ناقدن اقل و یا متفرق اوله رق
 بش طر ناق کسر سه هر طر ناق ایچون صدقه لازم گلور و امام محمد
 عندنده خمسة متفرقه ده دم . ایجاب ایلر ملتقی بر قولتغنی و یارب
 رأسی بر مجلسده و دیگر قولتغنی و یا رأسنک هر ربعی آری آری
 مجلس آخرده تراش ایسه محله اتحاد اولغله بردم . لازم
 اولور در مختار محرم اولان مسلم . عذرندن ناشی تطیب
 و یا ثوب مخیطی لبس یا خود حاق رأس ایسه حرمدہ بر غم . قربان
 و یا گرک حرم گرک غیریده اتی مسکینه طعامدن اوچ صاع .
 تصدق ایلمک یا خود دیلدیگی مکانه بلا شرط تتابع اوچ گون
 صائم اولمق خصوصاً رنده مخیردر قدوری مسکین واحدده
 آتی گون ایکشر نوبت طعام ویرسه کفایت ایدر خلافاً لامام محمد

بحر و مجمع الانهر محرم مضطر ایچون ثوب واحد . کافی
 ایکن ایکی ثوب اکتسا ایسه ایکسی دخی موضع ضرور تده ایسه
 مع الاثم بر کفارت مخیره و بری موضع ضرور تده اولوب آخری
 دیگر محله ایسه بری مخیره و دیگری معینه اوله رق ایکی کفارت
 لازمدر بدایع و منح شهوت ایله تقیل یا خود مس ایله مک
 دمی موجب اولوره عرفه ده و قوفدن مقدم احد سبیلینه و طی ایتمک
 مفسد حج اولدیغندن بر شاة ذبح ایدیلور و حجی فاسد اولیان
 کیمسه گی افعال حج ادا و سنه آتی ده قضا اولنور . حین قضا ده
 مرأه سی برابر بولندیغنی حالدہ آندن مفارقت ایله مک شرط
 دگلدر عرفه ده و قوفدن صکره و تراشدن اول حلالیله مجامعت ایتمک
 حجی افساد ایلمز ایسه ده بر بدنه ذبح ایتمک واجب اولور و بعد الحاق
 طواف زیارتدن اول مجامعت اولندیغنی حالدہ بر شاة لازم گور .
 درت شوط طوافدن مقدم . عمرده مجامعت . عمره بی افساد
 ایده جگندن افعال عمره بی ادا و بعده قضا ایله مک و ذبح غنم ایلمک
 ایجاب ایدر * اگر درت شوط طوافدن صکره و طی اولنور ایسه
 یا لکنز بر قربان ایدیلور و عمره سی فاسد اولیه جغندن قضا اقتضا
 ایتمز ناسیاً و یا عامداً جماع . حکمده مساوی اولغله صومه قیاس
 اولنمز محدث ایکن طواف قدوم ایدلسه صدقه و جنب ایکن
 طواف قدوم و محدث اوله رق طواف زیارت اولنسه برر قیون
 و جنب حالنده طواف زیارت اولنور ایسه بر دوه لازم اولور . شو
 صور تدرده افضل اولان مکة مکر مده بولند قجه عاده طواف ایتمکدر .

بو حالد برشی کسمک. لازم اولمز * محدث ایکن طواف وداع ایدیلورسه
 صدقه ویرمک و جنب حالده طواف وداع اولنورسه برقیون کسمک
 ایجاب ایدر. طواف زیارتدن اوچ شوط و یا بوندن نقصان ترک ایدلسه
 كذلك برشاة لازم گلور و درت شوط ترک اولندیغی تقدیرده درت شوطی
 طواف ایدنجیه قدر محرم قالنور * طواف صدر یعنی وداعدن
 اوچ شوط ترک ایدیلور ایسه صدقه و جمله سی یاخود درت
 شوطی ترک اولنور ایسه برغم. کیلور. صفا و مروه بیننده کی
 سعی. ترک ایدیلور ایسه ینه برقیون قربان ایدیلور و بوندن
 حجه بر نقصان ترتب ایتمز. وقوف مزدلفه ترک و یا امیرالحجدن
 وغروب شمسدن اول حدود عرفاندن خروج اولندیغی حالده
 بشقه بشقه برردم. واجب اولوره ایامک کلیسندده رمی چهار
 ترک اولنسه یاخود برگونک جهره سی اجرا ایدلمسه و یا یوم
 نحرده جهره عقبه و یا اکثری رمی اولنسه آری آری برردم
 و چهار ثلثه نك بری ترک ایدلسه صدقه لازم گلور. ایام نحر.
 منقضیه اولنجیه قدر تراشی و یا طواف زیارتی بلا عذر. تأخیر
 ایتمک امام اعظم حضرت تلرنجه دمی موجبدر خلافاً لامامین
 ﴿قدوری﴾ تأخیر رمی ده و حلق و رمی و ذبحی بری برینه
 تقدیم و تأخیرده دخی خلاف مذکور موجود در ﴿جوهره﴾
 محرم ولو حالده اولان بر صید بری بی قتل ایلسه یاخود قتل ایتمک
 قصدنده بولنان کیمسه به شکار. فلان محل و یا وادیده در یولنده دلالتده

بولنسه جزا واجب اولور. بوجزاده عامد (۱) و ساهی (۲)
 و مبتدی (۳) و عائد (۴) مساویدرلر. جزا امام اعظم و امام
 ابی یوسف حضرت تلری عندلرنده قیمت صید اولدیغندن صید.
 قتل اولنان مکانه و یا موضع قتل. صحرا اولوبده قیمتی اولمزسه
 قیمت صید بولنان و محل قتله اقرب اولان بلده ده ایکی رجل
 عادل طرفندن صید مقتوله قیمت تقدیر اولنور. بوضورتده قاتل
 و یا دال. مخیر اولوب دیلرسه قیمت مقدره کافی اولدیغی
 صورتده انکله هدی آلوب حرمدده ذبح ایدر و یا طعام اشترا
 ایدرک هر مسکینه نصف صاع. خطه و یا بر صاع. خرما یاخود شعر
 تصدق ایلر یاخود هر نصف صاع. خطه و بر صاع. شعر یا چون بر
 گون صائم اولور. اگر طعامدن نصف صاعدن اقل فضله
 قالور ایسه استر ایسه آنی تصدق ایدر و دیلرسه كذلك برگون
 اورج طوتار ﴿قدوری﴾ محرمک هدی و اطعامه قدرتی
 وار ایکن صومی اختیار ایلمسی جائز در ﴿جوهره﴾ امام
 محمد عندنده نظیری اولان صید. قتل اولندقدده جزاسی جنه جه
 نظیری اولمق لازمدر مثلاً قتل اولنان صید. گیک و یا
 صیرتلان ایسه برشاة و طوشان ایسه آتی آیلق براوغلاق ویر
 قاره سی تعبیر اولنان عرب طوشانی ایسه درت آیلق بردیشی
 اوغلاق و دوه قوشی اولدیغی حالده بربدنه جزا واجب اولور
 (۱) عامد. قصداً بیان (۲) ساهی. سهو ایدن (۳) مبتدی ایلك
 دفعه ایشلیان (۴) عائد. تکرار ایشلیان

﴿قدوری﴾ عصفور (۱) و حمامه (۲) گبی نظیری اولیان صیدده
 بالاتفاق قیمت . لازم و قیمتی مساوی اولان نظیرده امامین عندنده
 نظیرینی تصدق جائزدر ﴿جوهره﴾ بر آوی یاره لایق ویا
 توایلرینی قوپارمق یاخود برعضوینی کسمک نقصان قیمتک تضمینی
 استلزام ایدر . بر قوشک قنادینی یولمق ویا برصیدی ایاقلرینی قطع
 ایله حیز امتناع ویا طالبندن فرار درجه سندن چیقارمق قیمت
 کامله یی ایجاب ایلر . صیدک بوزوق اولیان یمورطه سی
 کسر ایدیلور ایسه بیضه نك (۳) قیمتی وشاید قیریلان یمورطه دن
 میت یاوری چیقار ایسه جزاء . حی (۴) بر جیو جیو بهاسی ویریلور
 ﴿قدوری﴾ صید . بعد الجرح اخذ اولندیغی تقدیرده قیمت
 کامله اقتضا ایدر . صیدک جرحی اثر جنایت قالمیه رق التیام ایدر ایسه
 برشی ترتب ایتمز و حیز امتناعدن خروج ایدن صیدک قیمتی
 تصدقندن صکره اول صید . قتل اولنسه ادای جزادن اول ایسه
 جزای آخر لازم گلمز . یمورطه قیریلوبده پشورلسه ینه بهاسی
 تضمین اولنور ﴿جوهره﴾ لاشه اکل ایدن قارغه وچیلایغی
 وکلب عقوری (۵) وقوردی وحیه وعقرب وفاره وقره سینک
 واری وقرنجه و سیوری سینگی وپره وکنه یی ایجابنده اولدر مکده
 جزا یوقدر . کهله ویا چکرکه اولدیریلور ویا قتل دلالت ایدیلور

(۱) عصفور . سرچه قوشی (۲) حمامه . گوگرچین
 (۳) بیضه . یمورطه (۴) حی . دیری (۵) کلب عقور . ایصیرجی
 ویرتیجی کوبک

ویا یره بر اقیلور ویا کهله یی تلف قصدیه ثوب . شمشه القا اولنورسه
 استیلان شی ویریلور یاخود اولدیریلان ایکی کهله ویا چکرکه
 مقابلی فقرایه بر آوچ طعام . اطعام وبر کهله ویا چکرکه ایچون
 برپارچه نان اعطاوا کرام اولنور . بوبابده برخرما تصدق ایله مک
 کافی اولدیغی اثرده وارد اولمشدر ﴿قدوری ودر مختار﴾ اوچدن
 زیاده کهله ویا چکرکه اولدیرلسه نصف صاع حنطه تصدق ایدیلور .
 قله بدنندن ویا ثوبندن اخذ اولنمیوبده یردن الله رق اولدیرلسه
 برشی لازم گلمز ایسه ده قتل قله ایچون ثوبی دیگرینه ویرمک
 موجب جزادر . لکن آخرک اوزرنده اولان کهله یی اولدرمک
 جزایی مستلزم دگلدر ﴿جوهره﴾ سباع یعنی یرتیجی حیوان گبی
 لحمی اکل اولنمیان صیدی قتل ایله مک دخی جزایی ایجاب ایدوب
 بوده قیمتجه برشاتی تجاوز ایتمز . شاید او مللو حیوان . محرمه حمله
 و هجوم ایلمسندن ناشی قتل اولنور ایسه برشی ترتب ایله مز .
 محرم ایکن احتیاج واضطرار سببیه صید . قتل اولنوبده لحمی اکل
 ایدلسه جزا لازمدر . محرم قیون وصغرو دوه ویا طوق و خانه ده
 بسنیلان قازی کسر ایسه ضرر یوقدر . حمامه مسروله یی یعنی
 پچه لی گوگرچینی یاخود قوشی ومونس اولان گیگی قتل ایتمک
 دخی جزایی مستلزمدر . محرم . گرک حل گرک حرمد صیدی
 ذبح ایلسه ذبیحه سی میته عد اولنه جفندن کیمسه یه اکی حلال اولمز
 اگر حلال اولان مسلم حرمد صیدی ذبح ایدرسه جزاسنی
 ادا ایدرو انحق کندوسنه لحمی حلال اولمدیغندن اکل ایتمز لکن محرم .

صیده دلالت و یا امر و اشارت ایلمدیگی صورتده غیر محرمک
 حلاله صید و ذبح ایتدیگی حیوانک لمنی اکل ایتمسند برأس اولمز .
 حرم . صیدینی غیر محرم ذبح ایلهسه اوزرینه جزا ترتب ایدر .
 حرم شریفک بنفسه نابت اولوب ناسک انبات ایتدیگی نبات .
 جنسندن اولمیان تازه اوتلریله اغاجلرینی قطع ایله مک قیمتی
 ایجاب ایدر ﴿ قدوری و جوهرة ﴾ ناس . طرفندن انبات یعنی
 غرس و تربیه اولنان یا خود بنفسه نابت اولوب ناسک انبات ایتدیگی
 نباتات جنسندن اولان حشیش و شجرک قطعی و انتفاعی حلال اولوب
 فقط خالقک غرس و تربیه ایتدیگی نبات جنسندن اولمیه رق کندی
 کندویه بیتن حشیش و اغاجک قلع (۱) و قطعی حالده قیمتی تضمین
 لازم و بونلرک مملوک اولوب اولماسی غیر مشروطدر بنا برین ارض
 مملوکهده بنفسه نابت اولان دیکنی بیله مالکنک غیر یسی قلع ایدر
 ایسه مالکنه عائد اولان بر قیمتی و حق شرعی مقابلنده دخی
 بر قیمت اخراپی تضمین اقتضا ایدر و مالکی قطع ایلر ایسه یالکز
 حق شرعی ایچون بر قیمت ایجاب ایلر ﴿ ابن عابدین نقلاً عن
 شرح اللباب ﴾ حج مفردده بردمی مستلزم اولان جنایت
 احرامده قارنه بری حجی و دیگری عمره سی ایچون اولمق اوزره
 ایکی دم لازم گلور لکن قارن . میقاتنی بلا احرام . تجاوز
 ایدوبده بعده عمره و حج ایچون احرامه داخل اولسه دم واحد
 کافی اولور . ایکی و یاز یاده محرم بر صیدک قتلنده مشترک اولسهلر

(۱) قلع * قویار مق

جزای فعل اوله رق هر برینه بشقه بشقه جزای کامل ترتب
 ایدر . ایکی غیر محرم . صید حرم قتلنده اشتراک ایلسهلر جزای
 محل اوله رق جزای واحد کفایت ایلر . محرم بر صیدی بیع
 و یا اشتراک ایتسه بیع و شرایی باطلدر ﴿ قدوری ﴾ محرم و حلال .
 قتل صیدده مشترک اولسهلر محرمه تام قیمت و حلاله نصف
 قیمت و حلال و قارن اشتراک ایلسهلر حلاله نصف و قارنه ایکی جزا
 ایجاب ایدر . حلال و مفرد و قارن مشترک اولسهلر حلاله ثلث
 و مفردده جزای واحد و قارنه ایکی جزا ترتب ایلر ﴿ جوهرة ﴾
 محرم ایکن صید ایدوبده حلال ایکن بیع ایلسه بیعی صحیحدر .
 شول مسلم که حرمه داخل اولوبده النده طشره دن گتورمش
 بر صید بولنسه آنی صالیویرمک لازمدر . صیدی بعد الاطلاق
 برینک یدنده بولسه حلال اولدقدن صگره اخذ ایدر ﴿ جوهرة ﴾
 النده کی صیدی صالیویرمیوبده بیع ایلسه اگر یدمشریده عینی
 باقی ایسه بیعی رد ایله مک و عینی موجود اولمیوبده مشترینک
 الندن گیتمش ایسه جزا ایجاب ایلر * محرم ایکن بیتنده و یا قفسنده
 صید بولنسه صالیویرمک لازم گلمز . محرم اولمیان مسلم
 بر صید اخذ ایدوب بعده احرامه داخل اولسه و اول شکاری
 آخری صالیویرسه اطلاق ایدن آنک قیمتی ضامن اولور .
 محرمک اخذ ایلدیگی صیدی دیگری ارسال ایلسه صائدک (۱) ملکی

(۱) صائد * اولیان

اولدیغندن مُرسِل (۱) . ضامن اولمز . بر مُحْرِمُكْ اخذ ایتدیگی
 صیدی مُحْرِمُ آخر قتل ایلسه ایکسنه دخی ضمان یعنی جزا ترتب
 ایدر و مُحْرِمُ آخذُكْ ضامن اولدیغی جزا . صوم اولیوب مال
 اولدیغندن مُحْرِمُ قاتله مراجعتله آنی تضمین ایتدیرر ﴿ماتقی﴾

بَابُ التَّنْبِيْهِ

احصار بیاننده در

احصار . لغتده مطلقاً منع معناسنه اولوب شرعده بعد الاحرام
 عذر شرعیله وقوف و طوافدن منعه اصطلاح اولمشدر . گرک
 آدمی گرک سباعدن دشمن و یارکوب و ذهابه مانع مرض و یا نفقه نك
 هلاك و ضیاعی و یا مُحْرِمُ . مرأه اولوب کندیسیله مکه بیننده مدت
 سفر قدر مسافه وار ایکن مُحْرِمُكْ وفاتی سببیه مُحْرِمُ . احصار
 اولنسه تحلل یعنی احرامدن خروج ایلمک حلال اولور
 استعین بالله ﴿فَإِنْ أَحْصَرْتُمْ فَمَا اسْتَيْسَرَ مِنَ الْهَدْيِ﴾ آیت
 جلیله سی موجبجه احصاردن طولانی حرم شریفده ذبح اولنق
 اوزره وقت ذبحی تعیین ایدرک بر شاة و یا اشتراى شاة ایچون قیمتی
 کوندروب بعد الذبح محظورات احرامدن تطیب و یا تقایم ظفر
 گبی بر فعلی ایشلمگله احرامدن خروج ایلر . مُحْصَرُ اولان قارن
 ایسه حج و عمره سی ایچون ایکی قربانلق قیون ارسال ایدر . دم

(۱) مُرسِل * صالیورن

احصارك حرم شریفك غیری محله ذبحی جائز اولمازه امام اعظم
 حضر تدرنجه مُحْصَرُ بالحج ایچون دم احصارك يوم نحر دن مقدم
 ذبحی تجویز اولنش و امامین حضر اتجه يوم نحره حصر و تخصیص
 قلنمش و مُحْصَرُ بالعمره ایچون استیلا و قتده ذبحه بالاتفاق
 جواز ویرلشدره مُحْصَرُ بالحج اولان تحلل ایتدکده دیگر سنه ده
 بر حج و بر عمره و مُحْصَرُ بالعمره یه یالکزه عمره و قارنه بر حج ایله
 ایکی عمره قضای لازم گلور . مُحْصَرُ بالحج و یا بالعمره اولان مُحْرِمُ .
 هَدْيِی بعث و فرستاده و آنک يوم معینده ذبحیه مواعده ایتدگدن
 صکره احصار . زائل اولوب قبل الذبح هَدْيِی وجه و یا عمره یه
 ادرا که قادر بولنسه تحلل جائز اولدیغندن یولنه دوامله افعال حج
 یا عمره بی ادا ایلر و هَدْيِی استر بیع و یا هبه و یا تصدق ایدر .
 اگر مُحْصَرُ بالحج یالکزه هَدْيِی ایرشمک ممکن اولسه اصل اولان
 حجدن عاجز اولدیغی ایچون بلا توجه . ذبح هَدْيِی ایله و یا مع التوجه
 افعال عمره ایله تحلل ایله مك جائز و افعال عمره ایله تحلل ایدر سه
 ایلر و ده کی قضای عمره ساقط اولور . مُحْصَرُ بالحج و یا بالعمره انحق
 ادراك حجه و یا عمره یه قادر اولور ایسه حرمت مال . حرمت نفس
 گبی اولدیغندن مالی مجاناً ضایع اولماق ایچون استحساناً تحلل ایتک
 جائز ایسه ده . لکن توجه افضلدر . بر مسلم مکه مکرمه ده وقوف
 عرفات و طواف زیارتدن منع اولنسه امام اعظم دن اصح روایت

اوزره محصر اولوب مفرد اولسون قارن اولسون هدی ایله تحلل ایدر. اگر احدهایه قادر ایسه محصر صایلمیه جغندن انک حقهده هدی ایله تحلل جاری اولمز. زیرا یالکز وقوفه قادر اولدینی حالد انکله حج تمام اولوب فقط حاق. واقع اولدیه طواف زیارتی ایدنجهیه دگین هر شیئه و حاق وقوع بولدیه یالکز نسایه محرم اوله رق قالور. بعده ایام تشریق گچنجهیه قدر ممنوعیتی دوام ایدو بده بوده مرض گبی بر امر ضروریدن ناشی ایسه برشی لازم گلمیوب فقط عدوسبیلله دوام ایلدیه مزدلفهده وقوفی ورمی ترک و طواف و حاق تأخیردن طولانی درت دم ایجاب ایدر. اگر یالکز طوافه قادر اولدیه فائت الحج گبی افعال عمره ایله تحلل ایده جگندن هدی ایله تحلل احتیاجی یوقدر قدوری وملتقی ودر مخار وابن عابدین

یدنجی باب

فوائت حج بیاننده در

برمسلم. حج ایچون احرامه داخل اولدینی حالد یوم نحرک فجر صادق طلوع ایدنجهیه قدر عرفه ده وقوفی اجرا ایده مامش اولسه حجی فوت ایتمش اولور واولسنه طواف وسی ایدرک تحلل ایدر و سنه آتی ده حجنی قضا ایلر. فائت الحج حقهده افعال عمره

محصر حقهده دم. منزله سنده اولغله فوت واقعدن طولانی دم لازم گلمز و احرام و طواف و صفا ایله مروه بیننده سعی. دن عبارت اولان عمره فوت ایدیلهمیه جگندن سنه نك کلیسنده اجرا اولنور ایسه ده فقط عرفه و نحر و تشریق گونلرنده مکروهدر قدوری وملتقی. عمره ده احرام. شرط و طواف. فرض وسی و حلق و یا تقصیر. واجب اولوب بونلردن ماعداسی سنن و آداب اولدینندن تارکی آثم و دم و جزا لازم اولمز. قول مشهورده عمره سنت مؤکده و صحیح اولان وترگی واجب اولمقدر جوهره. عمره فی رمضان تعدل حجه. حدیث شریفی دلالته عمره رمضان شریفده ایام سائر دن افضلدر بحر رائق

سکزنجی باب

حجده هدی بیاننده در

هدی. شرعه کندوسبیلله حرمدن تقریب الی الله ایچون دوه و صیغر و قیونندن حرمه هدیة ارسال اولنان حیوان اولوب ادناسی غنم واعلاسی ابل و بقدر. جمله سندن ثنی یعنی بش یا ثنی بیتروب التی به داخل اولمش اولان دوه وایکی یا ثنی اکمال ایله اوچه یتشمش صیغر و بر یا ثنی بتوره رک ایکی به گیرمش اولان قیون وچی کافیدر. ثنی درجه سنده جثلی اولورسه التی آیلقدن زیاده قوزی دخی جائزدر. هدی ده قولانغی ویا اکثر اذنی یا خود قویروغی

یا اوک ویا آرد آیانی مقطوع ویا برگوزی ناموجود یا خود زیاده
ضعیف ویا مذبحیه دگین مشیه غیر قادر طویال حیوان . قربان
اولمز . شاة . هرشی ایچون کافی اولوب لکن جنب ویا حائض
ایکن طواف زیارت ووقوف عرفه دن صکره قبل الحاق مجامعت
ایدنلره ابل ویا بقر . ذبح ایله مک لازمدر * شاة . کفایت ایدن
محلده بدنه وبقره دن هر برینی قربت وعبادت قصد ایدن یدی مسلم
مشرکاً ذبح ایتمگه جواز وار ایسه ده شاید بونلردن بری گندی
حصه سنه لحم آرزو ایدر ایسه بشقه لرینه ده جائز اولمز * دم نُسک
اولدینی ایچون تطوع و متعه وقران . قربانندن صاحبک اکل ایلمسی
تجویز اولمش ودماء کفارات اوله رق ایدیلان هدایان اکله جواز
گوسترلما مشدر * هدی متعه وقران انجق یوم نحرده وباقیلری استیلان
زمانلرده وبالجمله هدایا منحصراً حرم شریفده ذبح اولنور و لحوم هدایا .
حرم شریفک و غیره محللارک مساکین و فقر اسنه تصدق و اعطا قلنور *
هدیلری تعریف یعنی عرفاته گوتورمک ویا برشی ایچون هدی اولدینی
اعلام ایتمک لازم دگلدرد * قدوری ودر مختار * لکن شاتک غیر بی
دم شکرده تعریف وعلامت اوله رق تقلید ایتمک ودم کفارتده اخفا ایله مک
مندوبدر * منح * ابل صدری وبقرو غنمی رأسی طرفندن ذبح ایتمک
افضل و حسن صورته اجرایه مقتدر اولان مسلم . بنفسه ذبح ایله مک
اولی در . هدیك چولی و یولاری واریسه بعد الذبح تصدق اولنور
ذابح . اجرتلو قصاب مقوله سی ایسه اجرت اوله رق اجزای

هدیدن برشی اعطا اولمییوب آروجه اجرتی ویریلور . اگر
بدنه . سوق اولنور ایکن اگا بنمگه احتیاج و ضرورت صحیحه
حاصل اولور ایسه رکوب و احتیاجک زوالنده همان نزول
اولنور . شاید رکوبدن ناشی هدییه نقیصه عارض اولورسه
نقصی تضمین ایتمک لازمگلدور * بدنه نک لبی اولدینی حالده
وقت ذبح . قریب ایسه صاعلمیوب سود کیلیمک ایچون مهمه سنه
صغوق صو سر پیلور * قدوری وملتقی * وقت ذبح . بعید
اولوبده سودی صاعلمامق سببیه هدییه ضرر ایرشمسی متحقق
اولدینی تقدیرده سودی صاعیله رق عیناً و استهلاك صورتنده
قیمتی بدلاً فقرايه تصدق اولنور * مجمع الانهر و غیره *
هدیک جلدی ویا لحمی بیع ایدلدیگی حالده ثمنی تصدق و تحمیل
متاعدن ناشی برگونه نقصان ترتب ایدرسه قیمتی تضمین ایدیلور
ولبی اخذ و صرف ویا مذبحک لحمی اغنیایه اعطا قلنورسه
کذلک قیمتی فقرايه صدقه اوله رق ویریلور * در مختار *
هدی سوق ایدر ایکن یولده هلاک اولسه تطوع ایسه یرینه
دیگری تدارک ایله مک لازم اولمیوب واجب ایسه بشقه
برهدی اگا بدل اوله رق اعطا ایدیلور . هدییه جواز اخیه بی
مانع اولان عرج (۱) و غمی مثلاً و عیب کیر . اصابت ایدرسه یرینه
غیر بیسی تدارک وهدی معیوب ملک خالص اولمغله استدلالیگی
گی معامله اولنور * قدوری * صاحب هدیك آخرینی اخذه

اقتدار یو غیسه هدی معیوب کفایت ایدر ﴿جوهره﴾
 هدی . بدنه اولوبده یولده هلاکه قریب اولسه تطوع ایسه
 ذبح ایدیلوب هدی اولدینی بیلنمک ایچون قلاده سی اولان
 نعلی دمیله صغ (۱) و بوینک ویا اور گجنگ بر طرفه ضرب اولنور
 و بونک لمندن صاحب هدی واغنیادن هیچ بری اکل ایتمز
 و تطوع اولدیغندن یرینه بشقه بر هدی قونلماز * اگر بدنه
 هالکه هدی واجب ایسه یرینه غیر سی اقامه قلنور * بدنه
 تطوع و متعه و قران . دم نُسک اولوب شایان اعلام اولدقلرندن
 ناشی قلاده ایله تقلید و اشهار . مندوب ایسه ده احصار و جنایات
 و کفارات دملری ستر اولنق اولی اولمغله قلاده وضع ایدلمز
 ﴿قدوری و ملتقی﴾ مسائل غریبه دندر که ﴿لله علی المشی
 الی بیت الله﴾ دینسه نذر اوله جغندن حج . واجب اولور *
 مشی . یرینه خروج و ذهاب و سیر . ذکر اولسه بالاجماع برشی
 لازم اولمز * بیه بدل مسجد حرام ویا حرم . تذکار ایدلسه
 امام اعظم حضر تله نجبه حج . لازم اولمز خلافاً للامامین
 ﴿جوهره﴾ بیت مکرّمه بلا ایذاء و بلا رشوة دخول .
 مندوب اولدینی گبی زیارت قبر نبی محترم صلی الله علیه وسلم دخی
 كذلك مندوب و بر قوله قدرتی اولان مسامحه و اجبدر ﴿در
 مختار﴾ مدینه منوره و صولده ﴿بسم الله رب ادخانی مدخل

(۱) صغ * بویامق

صدق و آخر جنی مخرج صدق و اجعل لی من لدنک سلطاناً
 نصراً ﴿- دینلهرک کمال خضوع و خشوع ایله و روضه مطهره
 قصیدله باب جبریلدن مسجد شریفه دخول و قبر مکرّمه اوج
 درت ذراع مقداری قریب اوله رق قبله استقبال و رأس
 شریفلری جانبنده صلاته قیام ایدر گبی وقوف و حضور کامل
 ایله توجه اولنوب ﴿السلام علیک یا رسول الله السلام علیک
 یا نبی الله السلام علیک یا صفی الله السلام علیک یا حبیب الله
 السلام علیک یا نبی الرحمة السلام علیک یا شفیع الامة السلام
 علیک یا سید المرسلین السلام علیک یا خاتم النبیین السلام
 یا منزل السلام علیک یا مدثر السلام علیک و علی آل بیتک
 الطیبین الذین اذهب الله عنهم الرجس و طهرهم تطهیراً﴾
 دینلملی بعده ینه صلات و سلام و صدیق اکبر و عمر فاروق
 (رضی الله عنهما) حضراتی حضورنده دخی سلام و نفسنه
 و والدینه و جمیع امت محمدیه دعا ایلملیدر بوندن صکره ینه
 قبر اقدس و اشرفک رأس جلیلی جانبنده وقوف ایدیلوب کالاول
 صلات و سلام و دعا و ثنا ایله اختتام اولنور ﴿منح﴾ رسول
 اکرم صلی الله علیه وسلم افندمن حضر تله بنک اعضای شریفه
 و مقدسه لرینک منضم اولدینی قبر شریف . بقاع ارضک جمله سندن
 و عرش و کرسیدن بالاجماع افضل اولدینی و کعبه مکرّمه دخی

قبر مقدسین ماعدا مدینه دن افضل بولندینی و بو ایکی محل
مبارکدن بشقه مکه ایله مدینه دن قنغیسی افضل اولدیغنده اختلاف
اولوب فقط هر ایکسینک دخی افضل بلاد اولدیغنه اجماع
حاصل اولدینی اکثر کتبه محرر در (در مختار وابن عابدین)

التبجی کتاب

اضحیه دائر مسائلی حاویدر

اضحیه لغتده وقت ضحی ده ذبح اولنان حیوانک اسمی و جمعی
اضاحی در وضحیه لفظی دخی اضحیه ده لغت اولوب جمعی ضحایادر
هدیه . هدایا گبی . اصطلاح شرعه بر مخصوص . حیوانه اسم
اولمشدر که ایام نحرده نیت تقرّب ایله بوغازلنور (جمع الانهر
و درر) عید اضحاده قربان کسمک هر حر و نصابه مالک اولان
مسلم مقیمه و اجیدر . عقل و بلوغ عندالامامین شرائط و جوبدن
اولیوب فقط امام محمد عندنده شرائطدن اولدینی بدایعدن نقلاً
رد مختارده مسطوردر . برروایتده ولد صغیر ایچون دخی اضحیه
ذبح ایدیلور . بر قوله گوره باباسی گندی مالندن و دیگر قوله
مالی اولان طفله بابا و یا وصی صینک اچقه سندن تضحیه (۱) ایدر
و بقدر الحاجة صبی اطعام و باقیسنی البسه گبی طفل ایچون منتفع به
(۲) اولان برشی ایله استبدال ایلر (قدوری و ملتقی) اضحیه ده
(۱) تضحیه . اضحیه ذبح ایتک (۲) منتفع به . کندوسیه فائده لیمک
ممکن اولان

کافی اولان برغم و یا بر بدنه یا خودیدی مسلم مکلفه مشترکاً بر دوه
و یا بر صیغر ذبح ایلمکدر (قدوری و غیره) بر بدنه و یا بر دوه
مشترک اولان یدی مسلمدن بری گندی حصه سیله قرینه قصد
ایتمیوب ات الملق استهسه و یا حصه سی سبیدن اقل اولسه هیچ
برینه جائز اولمز چونکه تقرّب برندن منتفی اولنجه دیگر لرندن
دخی انتفا (۱) ایتک طبعیدر . بر دوه و یا صیغر ده یدی مسلمک
مادوننده مشارکت تجویز اولمش ایسه ده مافوقه جواز
یوقدر . بوصورتله مشترکاً ذبح ایدیلان قربانک لحمی شریکدر
بیننده تخمین صورتیه داغیدلیوب مطلقاً وزن ایله تقسیم اولنور
انجق باش و ایاق و دری مثللو شیرات ایله قارشیدریلور ایسه بو حالده
ربا (۲) اولمدیغندن تخمیناً تقسیم ایدمک جائز اولور . قربان نیتیه
برینک اشترا ایلدیگی بدنه ده صکره دن دیگر اتی مسلمک
اشتراکی استحساناً تجویز اولمش ایسه ده بو مثللو اشتراک
قبل الشرا عقدی احب گورلمشدر (ملتقی و جمع الانهر)
مسافره و نصابه مالک اولمیان فقیره قربان واجب دگدر (قدوری)
فقر و غنا و ولادت و موت . خصوصاً صرندده اضحیه نک آخر وقتیه
اعتبار اولنور مثلاً بر مسلم . ایام نحرک اولنده غنی ایکن نهایتنده
فقیر اولسه و یا اولنده حیاتده ایکن آخرنده وفات ایلسه قربان .
واجب اولمز . لکن ایام نحرک اولنده فقیر ایکن آخرنده غنی
اولسه و یا آخر ایام نحرده برچو جق تولد ایلسه تضحیه واجب
(۱) انتفا . بوراده زائل اولمق دیمکدر (۲) ربا . زیاده لک که فضله
اولمق مقصوددر

اولور ﴿ملتقى وجمع الانهر﴾ اضحیه نك وقتى بیرامك اولكى
گونى طلوع فجر ایله داخل اولور . شهرده اولان کیمسه لره
صلات اضحایی قیلمزدن مقدم ذبح ایتك جائز اولمز زیرار رسول
اکرم صلی الله تعالی علیه وسلم افندمن حضر تلمی ﴿من ذبح قبل
الصلوة فلیعد ذبیحته﴾ بیور مشلردر اما صلات عید واجب اولمیان
قراده وقت فجر دن صکره ذبح ایله بیلور . قربان . عید اضحانك
برنجی وایکنجی و اوچنجی گونی غروب شمسن اولجه کس یاور
واندن صکره کس یلمز و برنجی گونی دیگر ایکی گوندن افضل
وگیجه ده ذبح . مکر وهدر . اضحیه نك وقتى فوت اولوبده ذبح
ایدیله مسه اگر اضحیه گرک فقیر ویا غنینك مندوره سی یاخود
تضحیه ایچون فقیرك مشتری ایسه آنی حی اوله رق عیناً تصدق
لازمدر . شاید ذبح ایدوبده حمیله برابر ذبحدن نقص حاصل
اولورسه اشبو نقصانك قیمتی دخی تصدق ایجاب ایدر و لمندن اکل
ایتمز واکل ایدرسه ما کولك قیمتی دخی تصدق ایلر و اضحیه
مذکوره مندوره ویا فقیرك مشتری اولیوبده غنی نك ایسه غنی
آنى گرک اشترا ایلمش اولسون گرک اولسون اول اضحیه نك
قیمتیه تصدق اقتضا ایدر ﴿قدوری ودر مختار وملتقى﴾ ایکی ویا بر
گوزی گورمز و طویال اولوبده مذبحه یه قدر یورویه مز اولان و گوزی
وقولاغی ویا قویر و غنك قسم اکثری واولك ویا آرد ایاغی کس یلمش
بولنان و بغایت ضعیف اولان حیوانی ذبح ایتك جائز اولمز . مقطوع اولان
قولاق و قویر و غنك نصفدن زیاده سی موجود بولسه و خالقه بویوز سر

و یا مؤخرأ بویوزی قیر یلمش و سمیز اولان اوپوز ویا بوراش
حیوانی قربان ایلمك جائزدر . تضحیه ایدیه جك قیون وکچی نك
بر یاشنی اکال ایله ایکیسنه واصل و بقرک ایکی یاشنی بتوروب اوچ
وبدنه نك بش یاشنی اکال ایله الی یاشلرینه داخل اولمش اولملری
کفایت ایدر و قیونك بر یاشندن بر قاق آی نقصان اولمسندن
بر بئس اولمیوب حتی الی آبی بتوره رك یدنجی آیه گیرمش
وجهه گوسترشی اولورسه تضحیه جائز و بوده قویر و قلی قیونه
مخصوصدر ﴿ملتقى ودر﴾ قربان اتندن صاحبی و خانه خلقی
اکل و اغیا و فقرایه اطعام و تصدق ایلر . لکن اضحیه واجب
اولمیان فقیر . اضحیه . نیتیه بر قیون اشترا ایلوب ایام نحرده ذبح
ایتسه بر قولده آندن اکل . حلال اولمیوب مندوره گی تصدق
ایتمی لازم و قول آخره گوره اکل . حلال اولدیغی تاتار خنیه دن
نقلأ رد مختارده محرردر . اگر ایام نحر دن صکره ذبح ایلسه
بالاتفاق تصدق ایدر . قربانك بعد الذبح بر مقدارینی خانه سنده
قاوورمه یا به رق حفظ ایله بعده عیالیه اکل ایلمگه رخصت شرعیه
واردر . اضحیه نك فقرایه تصدق اولسه جق مقدارى ثلثدن
ناقص اولماق مستحب و تضحیه ایدن مسلم ذی عیال ایسه عیالنه
وسعت حصولیچون اضحیه سندن غیر یلرینه تصدق ایلما سی
مندوبدر . دریمی تصدق یاخود پوست ایدیه رك خانه ده
استعمال اولنور یاخود صاتیلوب بقاء کندیسيله انتفاع اولنان
برشی اشترا قلنور قربانی صاحبی گوزلجه کسمگه مقتدر اولدیغی
حاله بالذات گندی ذبح ایله مك افضلدر . مقتدر دگلسه لازمه
ذبحی بیان بر مسلمه کس دیر مك جائز و اهل کتابه ذبح ایتدیر مگه

دخی جواز وار ایسه ده مکر و هدر . اضحیه لری قارشمسندن
 ناشی ایکی مسلم یا کیشاق ایدوبده هر بری آخر کقیونتی بنمدر دیو
 ذبح ایلسه لر استحساناً ایکسینک دخی قربانی صحیح و کافی اولوب
 اوزرلرینه ضمان لازم گلمز ﴿درر و قدوری و ملتقی﴾ بر مسلم
 دیگر بر مسلمک اضحیه سنی امری اولمقسزین ذبح ایتسه استحساناً
 جائز و غضب اولسان غنم ایله تضحیه ایله مک صحیح اولوب بعده
 صاحبیه تضمین ایجاب ایدر . اما و دیعه اولان شاتی قربان ایتک
 صحیح دگلدر زیرامغصوب بهاده ملکیت . وقت غصبده ثابت اولدیغندن
 ذبح . گندی ملکنده و و دیعه ده ایسه او مقوله حیوانی قربان ایلمکله
 غاصب اوله جغندن ذبح . ملکینک غیریده واقع اولمش اولور
 ﴿ملتقی و مجمع الانهر﴾



التي کتاب و متعدد ابوابدن عبارت اولان اشبو جزؤ اولک طبعی
 بلطفه تعالی ختام بولمشدر .

۱۹